

SALMO CA'

1

¹ Ba neza zrentę naca na cheę bénnea'
quebe dxezi'e da dxuluzéajni'i benne' węn da
caleła ca' le',

ne quebe dxunę' tuze benne' dul-la ca',
ne quebe dxunę' tu zren benne' ca' dxelún le' cheę
Dios.

² Zue' xel-la' dxebé lawe' da dxuzúę' dizra'
da nadxixruj bea Xránadxu,
ne ca naca da nadxixruj bea na,
te zra ne chizrela dxelaba lazre' na.

³ Benne' nigá naque' ca tu xaga zua na dxu'a xegu
nisa,

da dxunna na da zixre cheę na lu beu' cheéqueze
na,

ne xrlegue na quebe dxase na.

Ca naca da dxun benne' nigá, dxepe ban na.

⁴ Quegá caní zaj naca benne' węn da caleła ca'.

Zaj naque' ca tu xizre laga' da dxua be' bdunu'.

⁵ Quebe xelexegá'ana chawe' benne' węn da caleła
ca'

gate guchi'a Dios cheę',

ne quebe xelú'u benne' dul-la ca' naga zaj nazraga
benne' xrlátaje ca'.

⁶ Dxezaca ba lazre' Dios ca da dxelún benne'
xrlátaje ca'.

Da dxelún benne' węn da caleła ca'
cheę na le' naga xelebía xi'e.

2

¹ ¿Bizr chee na' dxeledábaga benne' xezr la xu ca' neda'?

¿Bizr chee na' dxululaba lázrequeze bénneache da guzúa na neda' chalá'ala?

² Dxeledábagaqueze benne' wenná bea ca', ne dxelún tuze dizra' benne' ca' dxelenná bea ca xelune'

chee Xránadxu Dios, ne chee Bénnea' gucá'a Le'.

³ Dxelenné': "Guselá cuínadxu lu xel-la' dxenná bea chee',

ne guzúadxu chalá'ala da zaj nadxixruj bé'ene' dxi'u."

⁴ Naga dxe' Xránadxu xabáa dxuzrizre'.

Quebe dxezi' lené' chee da dxelegú'u lazré xelune'.

⁵ Lu xel-la' dxezrá'a chee' dxedil-le' le',

ne lu xel-la' snia chee' dxuchebe' le'.

⁶ Dxenné': "Lu xi'a lá'azxa chia', xi'a Sión

ba nuzúa' benne' gaque' Wenná Bea waláz chia' neda'."

⁷ Dxenná Wenná Bea na': "Guzenda' le'e da guzre Xránadxu neda'."

Guzre' neda': "Lue' nacu' Zri'ina'. Ná'aqueze naca' Xrau'.

⁸ Gunabe neda', na' gunna' Lue' xúgute cue' xezr la xu ca',

na' gaca chiu' dute ca naca xezr la xu.

⁹ Guzízxenu' bénneache xezr la xu ca' nen vara xia, ne ca tu dxe'e xu guzuzru' le'."

¹⁰ Na'a, le'e, wenná bea, le xene da nigá dxuzéajni'ida' le'e.

Le gusede da nigá dxusízreda' le'e,

benne' dxelenná bea lu xezr la xu.

11 Le gun zrin chee Xránadxu Dios, dute xel-la' dxezrebe cheēle.

Nen xel-la' dxezrize cheēle, le be lau Le'.

12 Le gapa ba lá'ana Zrí'ine' cheē quebe zre'e, checa' cuía xile la neza cheēle, lawe' da la zra'ate Le'.

Da ba neza zrentę naca na cheē xúgute benne' dxuluxrén lazre' Le'.

3

1 Xrana' Dios, ba naxánle'e benne' dxeledábague' neda'.

Benne' zante dxeledíl-lalęne' neda'.

2 Benne' zante dxeleñné' chia': "Quebe guselá Dios le'."

3 Lue', Xrana' Dios, dxucú'uju' neda'.

Nacu' Benne' dxebélena', ne Benne' dxuzé chawe' neda'.

4 Gudxezre xa'a, bláwizra' Xrana' Dios, na' Le' bechebe' chia' naga zuę' lu xi'a lá'azxa chee'.

5 Guta', ne gusia',

na' bebana' lawe' da nuxru Xrana' neda'.

6 Quebe zreba' gaxúa gaxúa bėnneache,

benne' zaj naxéchaje' neda'.

7 Guzé, Xrana' Dios.

Bselá neda', Dios chia'.

Ben wę' xraga benne' ca' dxeledíl-lalęne' neda',

ne guzuzruj lazxa benne' xriwe' ca'.

8 Xel-la' weselá za' lu na'u, Xrana' Dios.

Ben da chawe' cheē bėnneache chiu'.

4

1 Bechebe chia' gate dxuláwizra' Lue', Dios.

Nacu' Benne' dxuchi'e ca da dxuna'.
 Gate guzúa' lu da stebe, Lue' btipu' lazra'.
 Bexache lazre' neda', ne bene ca da dxuchálajlena'
 Lue'.

² Le'e, bèneache, ¿ájatęscha' gucá'ana dítjale neda'?
 ¿Ájatęscha' zri'ile da quebe zaca, ne chéajlele da
 węn lazre'?

³ Le xexúnbea ba gucá'a Xránadxu
 nu benne' dxape' Le' ba lá'ana.

Xrana' Dios xenne' gate dxuláwizra' Le'.

⁴ Le zrebe lau Dios, ne quebe gunle dul-la.

Le gulaba lazre' chee' naga dxásale, ne le sua zrize.

⁵ Le gute lau Le' béadu ca' lu da naca du lazre',
 ne le guxrén lázre' Xránadxu Dios.

⁶ Benne' zante dxelenné': “¿Nuzra gun gá'anatu'
 chawe'?”

Dutę xel-la' zri'i lazre' chiu' bxue netu', Xran.

⁷ Lue' bzu' xel-la' dxebé lu xichaj lázrdawa',
 da naca na zrendxa ca da zaj napa benne' zaj
 nápalę'e zrua',

ne xrise uva wal-la.

⁸ Dutę xel-la' dxebeza zri lazre' gata', ne gasia',
 lawe' da dxunu' Lue', Xran, zua' zri'a chawe'.

5

¹ Bze naga dizra' chia', Xran.

Bde lazre' ca dxebezre lazra'.

² Bene ca guchálajlena' Lue', Wenná Bea chia', ne
 Dios chia', q lawe' da guláwizraja' Lue', Dios.

³ Xran, che zílala xennu' chi'a.

Che zílala xídaqueza' lau Lue', ne wabeza lazra'
 Lue'.

⁴ Nacu' Dios quebe dxezaca ba lazru' da calela.

Benne' wən da calela quebe súaqueze' naga zu' Lue'.

⁵ Quebe dxu'u lataj xelezrín benne' wən da calela lau'.

Dxecuídenu' xúgute benne' dxelune' da zrinnaj.

⁶ Guzrí'a xí'quezu' benne' ca' dxelezí' xe'e.

Guzú' chalá'ala benne' wete benne', ne benne' guzrí' xe'.

⁷ Neda' waca chu'a lizru' lawe' da nazrí'ile'enu' neda'.

Güe lá'ana' Lue' lu xudau' lá'azxa chiu' dute xel-la' dxezrebe.

⁸ Bsi neda' chee guna' da xrlátaje chiu', Xran,

lawe' da zralé'e benne' dxeledábague' neda'.

Gulú'u neda' neza chawe' chiu'.

⁹ Benne' caní quebe dxelenné' da li.

Lu xichaj lázrdawe' xu'u da calela.

Xedxu lbe'e zaj naca na ca tu ba chee benne' gate da naxalaj na.

Zaj nupé'e dizra' chawe' chee' da zaj naca na da wən lazre'.

¹⁰ Bde benne' ca' lu da ba xa', Xrana' Dios.

Ben cheajlecházie' cáteze zaj naca xrtízraqueze'.

Lawe' da naxánle'e da calela da dxelune'

ne lawe' da guledábague' Lue', bebéaje' chalá'ala.

¹¹ Welebélé'e benne' ca' dxuluxrén lazre' Lue'.

Welebézre xá'aqueze' dute xel-la' dxelebé lawe' da dxucú'uju' le'.

Lau Lue' welebélé'e benne' ca' zaj nazrí'ine' Lue'.

¹² Gúnquezu' da chawe' chee benne' xrlátaje, Xran.

Gucu'uju' bènnea' lawe' da dxezaca ba lázre'enu' le'.

6

¹ Lue', Xran, quebe til-lu' neda' lu xel-la' snia chiu',
ne quebe gudéu' neda' ba xa' lu xel-la' dxezrá'a
chiu'.

² Bexache lazre' neda', Xran, lawe' da quebe
chawe' zua'.

Bexún neda', Xran, lawe' da dxedéa' xel-la' zi'.

³ Stébele'e zua xichaj lázrdawa'.

Xran, ¿bátala gácalenu' neda'?

⁴ Gudá, Xran, bselá benne'du xu'a.

Bselá neda' duté xel-la' zri'i lazre' chiu'.

⁵ Naga zaj zra' benne' gate ca', quebe nu dxeajsá
lazre' Lue'.

Lu lataj ba xa' ¿núzraqueze güe lá'ana Lue'?

⁶ Ba dxexedú lazra' lawe' da dxebezre lazra'.

Tu zre' tu zre' dxebísane ga dxásia' nisa da dxe-
bezra'.

Dxusebisa' xrcugua' nisa da dxebezra'.

⁷ Ba dxane xiaj lawa' xel-la' dxebezre.

Ba bebízrqueze nisa xuzru xiaj lawa' lawe' da
zralé'e

benne' dxulusaca zi'e neda'.

⁸ Le cuasa naga zua', xúgutēle dxunle da zrinnaj
lawe' da ba ben Dios dxebézrele'a.

⁹ Xrana' Dios ba benne' da dxata' xueda' Le'.

Ba guzí' Xrana' Dios da dxuchálajlena' Le'.

¹⁰ Dxelexedué'e, ne zaj zua lu da stébele'e xúgute
benne' dxeledábague' neda'.

Chadite xelexebigue' naga zua', ne xelexedué'ene'.

7

¹ Xrana' Dios, dxuxrén lazra' Lue'.

Gúcale neda' ne bselá neda' lu na' benne' ca' dxu-
lusaca zi'e

- neda',
² chee quebe xe_lle_l-le' neda' ca dxun bezre xixre',
na' xuluzúzruje' neda' naga quebe nu chilá' nu
guselá neda'.
- ³ Xrana' Dios, che bēna' neda' caní:
Che bi da zrinnaj bēn ni'a na'a.
- ⁴ Che bi da calela bēna' chee benne' zuē' chawe'
nen neda'.
(Bselá' bēnnea' dxedábage' neda' lácala quebe bi
nuna' chee'.)
- ⁵ Che caní bēna',
be lataj benne' dxedábage' neda' gau zi' ne
xezrúnene' neda'.
Be lataj bēnnea' guchuchu guléaje' neda' lu xu,
ne xusunitie' xel-la' ba lá'ana chia'.
- ⁶ Xran, dutē xel-la' dxezrá'a chiu', guzé.
Bexechaj benne' ca' dxulusaca zi'e neda' lu xel-la'
dxelezrá'a chee'.
Gusel-la da gácale na neda' gate guchi'u da dxaca
chia'
ca da gunná be'u.
- ⁷ Xúgute benne' zaj zre'e xezr la xu xelezrague' lau'.
Gunná be'e benne' ca' dutē xel-la' szren chiu'.
- ⁸ Lue', Xran, guchi'u chee benne' xúgute xezre.
Bchi'a ca da nuna' lu da naca xrlátaje,
ne lu da naca du lazre' chia'.
- ⁹ Bēn cheajsé naze da zrinnaj da dxelún benne'
wen da calela ca',
san bzua chawe' benne' xrlátaje,
lawe' da nacu' xrlátaje, Dios, ne dxenná'u da xu'u
xichaj lázrdau bēneache.
- ¹⁰ Diósqueze dxucu'uje' neda'.
Dxuselé' benne' zaj naque' du lazre'.
- ¹¹ Xlátaje dxuchi'a Dios chee da dxelún bēneache.

Tu dxezrá'azqueze Dios da dxelún benne' wēn da zrinnaĵ ca'.

¹² Che quebe xelexíaje lazre' Dios gulé' xia chee'.

Ba nuzúa cuásate' xaga nalá xéche'ze chee'.

¹³ Ba naxrúa cuásate' xia chee' ca' chee wedil-la.

Ba nuzúa cuásate' xaga nalá xéche'ze da dxelala.

¹⁴ Benne' wēn da zrinnaĵ dxugú'u lazre' ca da

calela gune'.

Xu'u lázrdawe' da zrinnaĵ da gune', na' dxebéajé' da

wēn lazre'.

¹⁵ Ba gudene' tu xēdxu situĵ naga cheajlechaze

bénneache,

na' lézqueze' xeajcházie' lu xēdxu na'.

¹⁶ Da zrinnaĵ da bene' dxebague na léqueze',

na' da bsaque' bénneache xezrizre na xíchaje'.

¹⁷ Güe lá'anaqueza' Xrana' Dios ca da xrlátaje da

dxune',

ne gúl-laqueza' chee La Xrana' Dios, Bénnea' naque' szrente'.

8

¹ Lue' Dios, Xránantu', zrente naca Lau' du gabí'i

xēzr la xu.

Zrendxa naca xel-la' szren chiu' ca xabáa.

² Bidu ca', ne bidu dxe'ene ca' dxelúl-labe' ca naca

na.

Zúaquezu' lataĵ chawe' naga quebe xelezrín benne'

ca'

dxeledábague' lue'.

Dxuzúa zriu' benne' dxeledábague' lue',

ne benne' dxelecuídenē' Lue'.

³ Gate dxenná'a xabáa da nunu' Lue',

ne beu', ne belaj ca', da ca' nuzú' cha chee na,

4 na' dxucheḅa': “¿Ájazra naca bēnneache, dxulaba
lazru' cheeḅ le'?”

¿Ájazra naca bēnneache, dxe'u gunne xue le'?”

5 Benu' le' látezdxá szren ca nacu' Lué'queze,
ne bzu' cheeḅ xel-la' szren, ne xel-la' ba lá'ana.

6 Benu' dxenná bé'eneḅ xúguteḅ da ca' nunu'.

Xúguteḅ na bdeu' lu ne'e,

7 zrila' ca', ne beḅze ca',

ne xúguteḅ be xixre' ca',

8 beḅ zaj zua xrila, ne bela ca',

ne xúguteḅ da zaj zua na lu nísadau'.

9 Xránantu', Dios,

szrenteḅ naca Lau' du gabí'i xeḅzr la xu.

9

1 Xran, duteḅ lázrdawa' güe lá'ana' Lue'.

Guzenda' bēnneache ca zaj naca da zrenteḅ da benu'.

2 Wabéqueḅza', ne gúl-laqueza' ca naca chiu'.

Gul-la' cheeḅ lau' Lue', nacu' Dios zrenteḅ.

3 Buluzrunnuj benne' dxeledábagueḅ neda'.

Xeajlechazieḅ, ne belexenitieḅ lau' Lue'

4 lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

5 Gudil-lu' benne' xeḅzr la xu ca',

ne bzria xi'u benne' wen da caleḅla ca'.

Bsulu' la benne' ca' chadíá chacanna.

6 Ba gulebíá xi' benne' dxeledábagueḅ neda'.

Chadíá chacanna zaj nazrinnaj lataj cheeḅ benne'
ca',

ne xeḅze cheeḅ ca', da ca' bchínnuju' Lue'.

Netú benne' cheajsá lazreḅ benne' ca'.

7 Xránadxu Dios súatequeḅeḅ chadíá chacanna.

Ba nucueze' lataj blau chee' naga guchi'e chee
bénneache.

⁸ Lu da xrlátaje guchi'e chee bénneache dute xezr la
xu,

ne chee benne' xúgute xezre ca' lu da naca li lazre'.

⁹ Xránadxu Dios gaque' ca tu lataj ga xelezrá chawe'
benne' xache',

naga xelezré'e chawe' gate zrin zra chee da zi' da
xa'.

¹⁰ Benne' ca' zaj núnbe'e Lue', Xran, xuluxrén lazre'
Lue',

lawe' da quebe bsan lazru' benne' ca' belexílaje'
Lue'.

¹¹ Le gul-la chee Xránadxu, Bénnea' zue' xezre Sión.
Le guzén benne' xezre ca' ca zaj naca da ca' nune',

¹² lawe' da dxeajsá lazre' chee benne' ca',

ne dxexebéaj lazre' chee benne' wete benne'.

Quebe gul-la lazre' ca da dxululáwizra benne' ba
xache' ca' Le'.

¹³ Bexache lazre' neda', Xran.

Gunná' da dxezaca' lu ni'a na' benne' ca' dxele-
cuídené' neda'.

Dxecacu' neda' lu na' xel-la' gute,

¹⁴ chee guzenda' bénneache da dxue lá'ana' Lue',

naga dxu'untu' xezre Sión,

ne chee beda' lawe' da bseláu' neda'.

¹⁵ Xeajlechaze benne' xezr la xu ca' lu xedxu da
gulene'.

Xeajlechu'e lu xralaj da bulucueze'.

¹⁶ Xránadxu Dios blé'ene' ca da zaj naque' ne chee

da zi' da xa' da gudichaj be'e chee benne' ca'
dxelune' da calela.

Xeajchaze benne' wɛn da calela na' lu da nun ni'a ná'queze'.

17 Benne' wɛn da calela ca' xeledéqueze' lu lataj ba xa'.

Xúgute benne' ca' dxelal-la lazre' Xránadxu Dios.

18 Quegá chadía chacanna gal-la lazre' Dios benne' xache' ca',
ne quegá tu chi'ize xenite da dxelebeza lazre' le'.

19 Guxasa, Xrana' Dios.

Quebe gu'u lataj xelexegá'ana szrénqueze bénneache.

Xelalá' lau' benne' xɛzr la xu ca' chee guchi'u chee'.

20 Xran, ben xelezrebe benne' ca' Lue'.

Ben xelexúnbea benne' xɛzr la xu ca' zaj naque' bénneacheze.

10

1 ¿Bizr chee na' zu' zitu', Xran?

¿Bizr chee na' dxucache cuinu' gate dxeledé xel-la' zi' bénneache chiu'?

2 Benne' wɛn da calela dxenáu zi' xuzre' benne' xache'

lu xel-la' dxucá'ana szren cuine',
na' xeajchaze benne' xache' na' lu da ba nucuéza bénnea'.

3 Dxucá'ana szren cuine' ca naca da dxezá lazre'.

Nupé'e dizra' da dxenné' chee benne' dxucude',
na' dxucá'ana dítaje' Xránadxu Dios.

4 Benne' wɛn da calela na' lu xel-la' dxucá'ana szren cuine'

quebe dxape' Dios ba lá'ana,
ne quebe dxéquene' che zua Dios.

- 5 Tu dxúnzqueze' da calela,
ne quebe dxéqueñe' guchi'u Lue' ca da dxune'.
Dxuzúe' chalá'ala xúgute benne' dxeledábague' le'.
- 6 Lu xichaj lázrdawe' dxenné': "Quebe bi seque'
guzaga na neda'.
Cabata' bi gaca chia' da calela."
- 7 Tu dxennézqueze' dizra' schanni',
ne da wen lazre', ne ca naca da calela da gune'.
Dxeledxúaj dxu'e dizra' calela, ne dizra' xálaze.
- 8 Dxu'a xezre ca' dxucache cuine' chee quele'
bénneache.
Bagácheze dxutie' benne' dxeledeze' na'.
Bagácheze dxenné'e chee bi gune' chee benne'
xache' ca'.
- 9 Bagácheze dxebeze' ca dxun bezre xixre'.
Dxebeze' ga séquene' quel-le' benne' xache' ca'.
Dxel-le' benne' xache' lu xralaj chee', ne dxexu'e
le'.
- 10 Dxine' xu bénnea' gudel-le'.
Dxusaca zie' benne' zan nen ne'e wal-la.
- 11 Lu xichaj lázrdawe' dxenné': "Nal-la lazre' Dios
benne' caní.
Nucache lawe', ne quebe lé'ene' da dxuna'."
- 12 Guxasa, Xrana' Dios, ne bze na'u.
Quebe gal-la lazru'u benne' xache' ca'.
- 13 ¿Ájazra chen' benne' ca' dxelune' da calela
dxuluzúe' Dios chalá'ala?
Lu xichaj lázrdawe' dxelenné': "Quebe xebéaj lazre'
Dios."
- 14 Dios, Lue' blé'equeznu' da nigá,

lawe' da dxenná'u benne' wen da caleļa,
ne da ca' dxune' quebe naca na xrlátaje,
na' xebéaj lázrequezu' bénnea'.

Dxuluzúa cuina benne' xache' ca' lu na'u.
Lue' dxácalequezu' bi wezébedu ca'.

¹⁵ Dxugú' xel-la' wal-la chee benne' wen da caleļa.
Guleaj lávela da caleļa da nune', da na' bene' lu da
bagache'.

¹⁶ Chadía chacanna naca Xránadxu Wenná Bea
cheedxu.

Lu xezr la xu chee' ba gulebía xi' benne' dxele-
cuídene' Le'.

¹⁷ Bnézruju' ca da bululáwizra benne' dxexruj
lázre'du ca' Lue', Xran.

Lue' dxupa'u lázxdau bénne'du ca' chee xuluzé
nague' xrtizru',

¹⁸ chee guchi'u chee bi wezébedu ca',
ne chee benne' dxeledé' xel-la' zi',
chee québedxa bi da caleļa xelún benne' ca'
dxelune' da caleļa chee bénne'du caní.

11

¹ Dxuxrén lazra' Xrana' Dios.

Ájazra chen' dxi'u bénne'du xu'a:

“Bzrunnuj, guxíaj lu xí'ala ca tu bxinne?”

² Le na' xque, dxulucuéza benne' ca' dxelune' da
caleļa
xaga nalá xéche'ze.

Ba zaj naxrúe' xaga nalá xéche'ze chee' lu du chee
na,
chee xelútié' bagácheze benne' xrlátaje ca'.

- 3 Chete ca' xelexinnaj da dxulusé chuchu da xrlátaje,
 ¿ájazra xelún benne' xrlátaje ca'?
- 4 Xránadxu Dios zúaqueze' lataj lá'azxa chee'.
 Xabáaqueze zua lataj blau naga dxe' Dios.
 Dxelenná' xanne xiaj lawe'.
 Dxelé'ene' ca da dxelún bénneache.
- 5 Xránadxu Dios dxudé' chawe' benne' xrlátaje ca' lu da stebe.
 Dxecuídene' benne' ca' dxelune' da calela,
 ne benne' dxelune' da zrinnaj.
- 6 Gudé' benne' ca' dxelune' da calela lu da zi' da xa',
 da zaj naca na xi', ne da dxuzézrele'e da dxala na ca xedxe,
 ne tu be' lále'e, da ca' sel-le' lawe' benne' ca'.
- 7 Caní gune' lawe' da naca xrlátaje Xránadxu Dios,
 ne nazrí'ine' da naca na xrlátaje.
 Benne' li lazre' ca' xeelé'ene' lawe'.

12

- 1 Xrana' Dios, bselá bénneache chiu' lawe' da québedxa
 dxape' benne' xezica Lue' ba lá'ana.
 Quebe nu chilá' benne' li lazre' ládujla bénneache ca'.
- 2 Xúgute bénneache ca' dxelezí xe'e le sa' ljwezre'.
 Lu da wen lazre' ba zaj nupé'e dizra' chee' xelezí xe'e le'.
- 3 Xránadxu Dios guzría xi'e xúgute benne'
 quebe dxuluchálaje' du lazre',
 ne benne' ca' dxuluchálaje' da dxucá'ana szren cuine'.

⁴ Benne' ca' gulenné': “Nę cheę dizra' cheętu' zrué'entu' da chawe'.
Ca dxezá lázrentu' guchálajntu', ¿nuzra nna be'e netu', xca'?”

⁵ Dxenná Xránadxu Dios: “Na'a xídaqueza' lawe' da dxulusaca zi'e benne' xache' ca',
na' dxelebezre lazre' benne' baxache' ca'.
Guselá' benne' ca' dxelánene' da guna'.”

⁶ Xrtizra' Xránadxu Dios zaj naca na du lazre'.
Zaj naca na ca xiaj plata da ba gudé na lu xi',
da ba gudé na lu xi' gazre lasa.

⁷ Xran, guxúequezu' Lue' bėnneache chiu' ca'.
Chadía chacanna gucu'uju' le' lu na' benne' zaj zre'e
lu zra na'a zra.

⁸ Gáteteze na' dxaca da caleła
gate dxulucá'ana szren bėnneache da naca sban.

13

¹ ¿Ájatequeze gal-la lazru' neda', Xran?
¿Gal-la lázrtequezu' neda'?

¿Ájatequeze quebe le'enu' da dxaca chia'?

² ¿Ájatequeze gun na ba xen guchaga lawa' da dx-
ezaca?

¿Ájatequeze gaca wi'ine lazra' te zra, ne chizrela?

¿Ájatequeze nna be'e benne' dxedábague' Lue'
neda'?

³ Gunná' da dxaca chia', Xran, ne bechebe chia'.
Btipa lazra' cheę quebe gatia',

⁴ ne cheę quebe nna benne' dxedábague' neda':
“Ba bėtia' ni'a nę'e.”

Benne' ca' dxeledábague' neda' xelebene'
che cheajcházia' lu da caleła.

⁵ Neda' dxuxrén lazra' Lue' xexache lazru' neda'.
Dute lázrdawa' dxebeda' lawe' da dxuseláu' neda'.

⁶ Gúl-laqueza' chee Xrana' Dios
lawe' da ba nune' chia' da xrlátaje.

14

¹ Benne' lázxdau zide' dzezá' lazre', dxenné':
“Quebe zua Dios.”

Benne' caní zaj nazrinnaj xichaj lázrdawe'.
Dxelune' da sban ca'.

Quebe nu chilá' benne' dxune' da xrlátaje.

² Xránadxu Dios zue' xabáa dxenné'e bénneache
chee lé'ene' che zua nu benne' dxéajni'ine',
bénnea' dxape' ba lá'ana Dios.

³ Xúgute' zaj xu'e neza xuca'.

Xúgute' zaj nazrinnaj xichaj lázrdawe'.

Quebe nu chilá' benne' dxune' da xrlátaje,
netúgue'.

⁴ ¿Quebe dxeléajni'i benne' ca' dxelune' da sban?

Dxulusunítie' bénneache chia' ca dxuzuzruj tu
benne'

xeta da dxawe',

ne quebe dxeléquebe'ene' zua Xrane' Dios.

⁵ Dute xel-la' dxelezrebe dxelezrize benne' ca'
lawe' da dxácale Dios benne' xrlátaje ca'.

⁶ Belún le' chee da gulenná benne' xache' ca',
san benne' caní xelebeza lazre' Xránadxu Dios.

⁷ Xídatega Bénnea' guselé' benne' Israel ca'.

Gate gun Xránadxu xelexezrín benne' chee' ca',
benne' ca' zaj nada'u zítu'la,

na' welebé zri'ine zre sua Jacob,

ne welebélé'eqezne' benne' Israel ca'.

15

- ¹ Xran, ¿núzraqueze benne' sue' naga zu' Lue'?
¿Núzraqueze benne' sue' naga naca lá'azxa chiu'?
- ² Waca bénnea' naque' du lazre', ne dxune' da
xrlátaje,
bénnea' zua da líqueze lu xichaj lázrdawe',
- ³ bénnea' quebe dxenné' chee le sa' ljwezre',
ne quebe bi da calela dxune' chee le sa' ljwezre',
ne quebe dxu'e lataj nu benne' si tizre' le sa'
ljwezre'.
- ⁴ Waca bénnea' quebe dxape' ba lá'ana
nu benne' dxune' da sban.
Dxape' ba lá'ana benne' ca' dxelape' ba lá'ana
Xránadxu Dios,
bénnea' quebe dxuché'e dizra' da ba gunné' lácala
bi da' gunitie'.
- ⁵ Waca bénnea' dxusané' dumí chee' ne quebe dx-
enabe' xíchajen,
ne quebe dxezí' lu ne'e dumí chee nnie' chee
nu benne' quebe bi zria nabague'.
Nu benne' dxune' caní cabata' cheajchazie' lu da
calela.

16

- ¹ Bxue neda', Dios, lawe' da dxuxrén lazra' Lue'.
² Lu xichaj lázrdawa' gucha' Xrana' Dios:
“Lue' nacu' Xrana’.
Quebe bi xetú da xrlátaje de chia' da quebe naca na
chiu'.”
- ³ Tuze benne' ca' zaj naque' chee Dios lu xezr la xu,
ne benne' ca' zaj naque' du lazre' dxezaca ba
lázrelena'.

⁴ Waxánqueze da dxelezaca benne' ca' dxelape' ba
lá'ana
tu dios quebe bi zaca.

Quebe guna' le' tu zren gate dxuluzríe' zren lau
dios na',
ne quebe guchíneda' la dios na'.

⁵ Xránadxu Dios dxugawē' neda', ne naque' da ba
neza chia'.

Lue', Dios, nuxru' ca da naca chia'.

⁶ Ca da nuzú' chia' zaj naca na da dxezi'a ba neza,
ne xrtantē zaj naca da nunnu' chia'.

⁷ Tu gucá'ana szrénzqueza' Xránadxu Dios,
Bénnea' dxusédenē' neda'.

Chizrela gate ne dxasia' dxuzéajni'ine' neda' lu
xichaj lázrdawa'.

⁸ Xránadxu Dios nuxrén lazra' gusi'e neda'.

Lawe' da zuē' cuita', quebe bi seque' guchebe na
neda'.

⁹ Cheē le' na' gubé lázrdawa', ne gubéle'equezda',
na' zra gacha' lu xēdxu ba cueza lazra'

¹⁰ lawe' da quebe gucá'anu' bēnne'du xu'a lu lataj
ba xa',
ne quebe gu'u lataj guzru nu benne' nácaqueze'
chiu'.

¹¹ Gulé'enu' neda' da guna' cheē gata' chia' xel-la'
nabán.

Naga zu' Lue' wabéle'equezda',
na' cuitu' Lue' súatequeze da ba neza chia'.

17

¹ Bze naga chi'a, Xran.

- Ben xanne' da dxuláwizra' Lue'.
 Guzí' da dxenaba' Lue', naca' du lazra'.
² Benna lataj xelá'a lau' chee guchi'u chia',
 lawe' da dxelé'enu' xúgute cáteze zaj naca na.
³ Lue' dxenná' xánniu' xichaj lázrdawa'
 ne dxelé'enu' neda' chizrela.
 Gunná' xánniu' da dxuna', na' quebe bi da caleļa
 blé'enu'.
 Ba nuna' quebe bi dizra' caleļa nnia'.
⁴ Dxuzúa' dizra' ca naca da dxennáu',
 na' quebe dxuna' ca da dxelún benne' wen da
 zrinnaj ca'.
⁵ Bxue neda' lu neza chawe' chiu',
 chee quebe cheajcházia' lu da caleļa.
⁶ Dxuláwizra' Lue', Dios, lawe' da dxennu' chi'a.
 Bze naga chi'a, na' bene da dxennía'.
⁷ Ble'e ca dxexache lázreļ'u bēneache.
 Bselá benne' ca' dxuluxrén lazre' Lue' lu na' benne'
 dxeledábage' le'.
⁸ Bxue neda' ca dxun benne' dxuxúe' xiaj lawe'.
 Gudezre neda' ca dxun bedxuj dxézreba' zrí'ineba'
 zran xrílaba'
⁹ chee quebe bi xelún chia' benne' ca' dxelune' da
 caleļa,
 benne' dxeledábage' neda', ne dxelaca lazre'
 xelútie' neda'.
¹⁰ Quebe dxelexache lazre' le sa' ljwezre',
 na' dutē xel-la' dxulucá'ana szren cuine' dxu-
 luchálaje'.
¹¹ Gáteteze dxedá' dxeléchaje' neda'.
 Dxelaca lazre' xeline' neda' xu.
¹² Zaj naque' ca tu bezre xixre'dau' dxaca lázreba' bi
 gáguba'.
 Zaj naque' ca tu bezre xixre',

ba nucache cuínaba' chee quél-laba' béadu ca'.

¹³ Gudá, Xran, gudábaga' benne' ca' dxelunę' da caleļa,
na' bchiche' lu xu.

Bselá neda' lu na' benne' ca' dxelunę' da caleļa,
guchínenu' xia chiu'.

¹⁴ Bselá neda' lu na' benne' ca' nen ni'a ná'quezu',
Xran.

Bselá neda' lu na' bénneache, benne' ca' zaj dxe'e
gunne xue

chee xęzr la xu nigaze,

benne' ca' dxeláguqueze' da zácale'e chiu'.

Da nigáqueze dxulugawe' zrí'ine' ca',

ne dxexegá'anaqueze da dxelágu zrí'ine zre suę'.

¹⁵ Le'eda' neda' lau Lue' lawe' da naca' xrlátaje.

Xezaca ba lazra' gaca' ca nácaquezu' Lue' gate xe-
bana'.

18

¹ Nazrí'ida' Lue', Xran.

Lue' dxuzé chuchu' neda'.

² Lue', Xran, nacu' ca tu xiaj naga ze chúchua',
ne ca tu xu'u zren naga xu'u chawa', na' nacu'
weselá chia'.

Dios chia', Lue' dxuzé chuchu' neda', na' guxrén
lazra' Lue'.

Dxucu'uju' neda', ne dxuseláu' neda', ne dxucache
chawu' neda'.

³ Wannéqueza' Xránadxu Dios,

Bénnea' naca chee' güe lá'anadxu Le'.

Le' guselé' neda' lu na' benne' ca' dxeledábague'
neda'.

⁴ Guzúa' lu da stebe chee xel-la' gute,

na' guca da caleḷa ca tu xegu nisa da bchebe na neda'.

⁵ Guzúa' lu da stebe chu'a lataj ba xa' lawe' da zua' lu da stebe chee' xel-la' gute.

⁶ Lu da zi' da xa' bláwizra' Xrana' Dios, ne gunnéqueza' Dios chia'.

Le' benne' chí'a naga zue' lataj lá'azxa chee',
ne bze nague' da bchálaja' lawe'.

⁷ Nadxa guzrú' lu xezr la xu nigá.

Gulezrize lane xi'a ca'.

Gulezrízele'e na lawe' da bzra'a Le'.

⁸ Bdxuaj zren chee' xi' lu zrine',

ne bdxuaj xi' lu dxu'e da bzezxe na da de lawe',
na' xi' na' gudel-la na bau ca'.

⁹ Bzéxruje' da zria zran xabáa, na' bétaje',

na' guzúa da chul-la zran ni'e.

¹⁰ Gudée' lu be' zrie' tu da nazí le na querubín.

Chadí gudée' lu be' bdunu'.

¹¹ Gúcue' da chul-la, da bcache na Le',

da na' naca na beuj bza da xuzru na nisa.

¹² Lu da dxácatite legala chee' da xu'u lu beuj bza,
na' beledxúaj bau dxelala, ne xiaj bezxe'.

¹³ Zran xabáa gunné guziu' chee' chí'i Xránadxu,

na' ben chí'i Dios szrentę ládujla bau dxelala ca',
ne xiaj bezxe' na'.

¹⁴ Bsanę' xaga nalá xéche'ze chee' ca',

na' beše dínnaje' benne' ca' dxeledábage' neda'.

Bsanę' xesa guziu' ca', ne bzria xi'e benne' ca'.

¹⁵ Nadxa belelá' da zaj de lu situj chee' nísadau',

ne ble'e lau lane xezr la xu da zua na zran nísadau',
gate na' gudil-lu' benne' ca' dxeledábage' neda',

Xran,

ne lu xel-la' dxezrá'a chiu' bzagu' benne' ca'.

16 Bétaje' lu da sibe, ne bequé'e neda'.

Bebéaje' neda' lu da naca ca tu nisa zila.

17 Bselé' neda' lu na' benne' wal-la dxeledábague'
neda',

ne lu na' benne' ca' dxelecuídene' neda',
benne' zaj nácadxé' wál-la ca neda'.

18 Buluzague' neda' gate na' zua' lu da stébele'e,
san Xrana' Dios gúcalene' neda'.

19 Bebéaje' neda' naga xu'a, ne bzue' neda' tu lataj
zren.

Bselé' neda' lawe' da bezaca ba lazre' chia'.

20 Xránadxu Dios bexunne' chia' cáteze naca
da xrlátaje da nuna'.

Cáteze naca da xrlátaje da nuna' bexunne' chia'

21 lawe' da dxuna' ca da dxusede Xrana' neda',
ne quebe guleaj xíchaja' Dios chia'.

22 Dxuna' ca naca da dxenná bé'ene' neda',
ne quebe bsana' da ca' nadxíxruj be'e.

23 Guca' li lazre' lau Le',
ne bxue cuina' chee quebe guna' da calela.

24 Chee le na' bexunna Xránadxu Dios chia'
cáteze naca da xrlátaje da bēna',
cáteze naca da xrlátaje da nuna' lau Le'.

25 Dzexache lazru' chee benne' dxexache lazre' le
sa' ljwezre',

ne nacu' li lazre' nen benne' naque' li lazre'.

26 Dxunu' da naca chawe' chee benne' naque'
chawe',

na' gacu' snia nen benne' wen da calela.

27 Guseláu' benne' zaj zue' lu da zi' da xa',
san guzéxruju' benne' dxulucá'ana szren cuine'.

28 Lué'queze guzalju' xi' chia'.

Xrana' Dios, guzani'u chia' naga zua' lu da chul-la.

- 29 Nen xel-la' waca chiu' guzría xi'a benne' zante
dxeledíl-lalene' neda'.
Che Lue', Dios, súalenu' neda'
waca guchínnaja' ze'e da zaj naxechaj xezre ca'.
- 30 Li lazre' zaj naca da dxun Dios, na' du lazre' naca
xrtizre'.
- Dxucu'uje' xúgute benne' ca' dxelebeza lazre' Le'.
- 31 Tuze Xránadxu naque' Dios.
Tuze Dios cheedxu naque' Benne' dxucu'uje' dxi'u.
- 32 Dios naque' Bénnea' dxune' neda' benne' wal-la,
ne Benne' dxune' li lazre' da dxuna' neda'.
- 33 Dxune' ni'a ca zaj naca ni'a bzrina' xixre'
ne dxuzúa chúchue' neda' lu xi'a Sión chee'.
- 34 Dxusédene' neda' chee gaca cha'a lu wedil-la,
ne chee gaca guchíneda' xaga nalá xéche'ze
da naca na xia gache'.
- 35 Lu xel-la' weselá chiu' bcu'uju' neda',
ne nen na'u xabēla gúcalenu' neda'.
Xel-la' zri'i lazre' chiu' ba nucá'ana szren na neda'.
- 36 Ben chawu' neza naga tea',
chee quebe cuila' lu neza na'.
- 37 Blaga' benne' dxeledábague' neda', na' xeajzrena'
le',
na' quebe bebi'a cadxa bétetea' benne' ca'.
- 38 Bēna' benne' ca' we', na' quebe guca xelexase'.
Xeajlecházie' zran ni'a.
- 39 Btipu' lazra' chee cha'a lu wedil-la.
Bzéxruju' benne' dxeledábague' neda' zran ni'a.
- 40 Bēnu' buluzrunnuj benne' dxeledábague' neda'
lawa',
chee bzria xi'a benne' ca' dxelecuídene' neda'.
- 41 Gulenné' nu benne' gácalene' le' san quebe nu
chilá'.

Gulenné' Xránadxu Dios, san quebe benne' chee'.

⁴² Bzúzruja' benne' ca' ca bxrte xu da dxua be'.

Bléaja' le' ca dxuléaja' guna' la neza ca'.

⁴³ Bseláu' neda' lu na' benne' ca' dxeledábague',

na' benu' neda' benne' xíchaję xęzr la xu ca',

na' benne' ca' quebe núnbe'a dxelunę' zrin chia'.

⁴⁴ Gate belennę' chia', na' buluzúę' xrtizra'.

Benne' zaj zra' xęzr la xu ca' belunę' ca gunná
be'eda'.

⁴⁵ Benne' zitu' ca' gulate ni'a nę'e,

na' beledxúaję' dxelezcízię' lu xęzre zrentau' chee'
ca'.

⁴⁶ Gaca ba lá'azxa Xránadxu Dios.

Gaca ba Bénnea' dxucu'uję' neda'.

Xegá'ana szrénqueze Dios, Bénnea' dxuselé' neda'.

⁴⁷ Naca Dios Bénnea' dxebéaj lazrę' benne' dx-
eledábague' neda',

ne dxuzúę' benne' ca' zran ni'a.

⁴⁸ Naque' Bénnea' dxuselé' neda' lu na' benne' ca'
dxeledábague' neda'.

Dxunę' dxenná be'eda' benne' ca' guledábague'
neda'.

Bselé' neda' lu na' benne' xichaj zra'a ca'.

⁴⁹ Chee le' na' xechęba' chiu', Xran, lau benne' xęzr
la xu ca',

na' gúl-laqueza' chee Lau' Lue'.

⁵⁰ Dxun Dios dxenná bea bénnea' waláz chee',

ne dxexache lazrę' bénnea' guquę'e, bénnea' naque'
David,

ne zri'ine zre suę' chadía chacanna.

19

¹ Dxulé'e lau zran xabáa ca naca xel-la' szren chee
Dios.

Dxucháľajqueze na ca zaj naca da nune'.

² Tu zra tu zra dxuzén na zra xula da nigá,
na' tu zre' tu zre' dxę na zre' xula da ná'queze.

³ Quebe dxuluchine na xrtizra' bėnneache,
ne quebe nu dxen chi'i na,

⁴ san dxezriluj da dxeleenná na du gabí'i xęzr la xu,
ne dxeleznín xrtizra' na dapa saca cheę xęzr la xu.
Dios bene' xabáa ca tu xu'u naga zua gubizra.

⁵ Che zılala dxalaj na ca tu benne' wechaga na'.
Dxebé na ca tu benne' dxezá chégüe' lu witja.

⁶ Dxedxuaj na chalá'a naga dxalaj na,
na' dxezrnín na chalá'a naga dxebía na.
Dxuchá'a na xúgutę da zaj de.

⁷ Du lazre' naca da nadxixruj bea Xránadxu,
ne dxuzé chacha na bėnne'du xú'udxu.
Li lazre' naca da dxexechebe Xránadxu,
ne dxunezruj na xel-la' sına cheę benne' ca'
quebe zaj nape' na.

⁸ Da líqueze zaj naca da nadxixruj bea Xránadxu,
na' dxelebéle'e benne' ca' dxelune' ca zaj naca na.
Du lazre' zaj naca da dxuzéajni'i Xránadxu dxi'u,
da dxuluzúa na dxi'u lu xel-la' naxaní'.

⁹ Cháwedau' naca zrėbedxu Xránadxu,
da gun na súadxu chadía chacanna.
Da líqueze zaj naca da dxuchi'a Xránadxu cheędxu,
ne zaj naca na chawe'.

¹⁰ Zaj naca na da dxezá lázredxadxu ca oro,
ne ca oro zrente da zácale'e na.
Zaj naca na zıxredxa ca bznína'dau', da nácale'e na
zixre.

¹¹ Dxulusizre na neda', wen zrin chiu'.
Lawe' da dxuna' ca zaj naca na, da zrente dxezi'a.

12 Netú benne' quebe gaca lé'ene' da calela da dxune'.

Bselá neda', Xran, lu da calela da quebe dxéquebe'eda' dxuna'.

13 Bucache chawe' neda', wen zrin chiu',
chee quebe bi dul-la guna' du lazra'.

Quebe gu'u lataj nna be'e dul-la neda'.

Nadxa gaca' du lazra', ne quebe baga' zria chee
dul-la na'.

14 Gaca da dxuchálaja', ne da dxulaba lazra'
da dxezaca ba lazru' Lue', Xran

Nacu' Benne' dxuxúe' neda', ne Benne' dxexá'ue'
neda'.

20

1 Dxenaba' Xránadxu xenne' chi'u lu zra zu' lu da
stebe,

ne gucu'uj La Dios chee Jacob lue'.

2 Dxenaba' Le' naga zue' lataj lá'azxa chee' sel-le'
da gácale na lue',

ne chee xi'a Sión xide' guxre' lue'.

3 Dxenaba' Le' cheajsá lazre' ca naca xúgute guna'
bzu' chee',

ne si' lu ne'e béadu ca' dxuzezxu' lawe'.

4 Dxenaba' Le' gunne' lue' ca naca da dxezá lazru',
ne guné' xúgute da dxéquenu' xrlátaje.

5 Béle'entu' gate guselé' lue',

na' chísantu' tu da gulé'e lawe na La Dios cheedxu.

Dxenaba' Xránadxu gunne' lue' xúgute da dxenabu'
lau Le'.

6 Na'a nezda' dxuselá Xránadxu bénnea' ba
gucá'aqueze'.

Naga zue' xabáa lá'azxa chee' xenne' chi'i bénnea'.

Xel-la' waca zrente chee' guselé' bénnea'.

7 Bal-la benne' dxuluxrén lazre' carro ca' chee
wedil-la,
na' xezícadxe' dxuluxrén lázre' bzrina' ca'.
Dxi'u dxuxrén lázredxu La Xránadxu Dios.
8 Benne' ca' gulate ni'a ne'e, ne xeajlechazie'.
Dxi'u bexásadxu, na' zedxu.
9 Bselá netu', Xran, nacu' Wenná Bea cheentu'.
Ben chi'intu' gate dxuláwizrantu' Lue'.

21

1 Benne' dxenná bea dxebéle'ene' nen xel-la' waca
chiu', Xran,
na' ca naca xel-la' weselá chiu' dxebéle'ene'.
2 Bnézruju' le' da guzá lazre',
ne quebe bzagu' da gunabe' Lue'.
3 Guzí' lu na'u le', ne benu' dxaca chawe' chee'.
Nuzriu' xíchaje' tu da naca na oro.
4 Gunabe' Lue' gunnu' le' xel-la' nabán,
na' bnézruju' na le' chee' súaqueze' zane' iza.
5 Zrente naca xabáa chee' lawe' da bseláu' le'.
Bennu' le' xel-la' ba lá'ana, ne xel-la' szren.
6 Lawe' da nunu' gaca chawe' chee' chadía cha-
canna
dxunu' dxebéle'ene' lau Lue'.
7 Lawe' da dxuxrén lazre' wenná bea na' Xránadxu,
xexache lazre' Dios szrente le',
na' quebe sue' lu da stebe.
8 Xulétaju' xúgute benne' dxeledábague' lue'.
Xel-la' waca chiu' xulétaju' benne' ca' dxelecuídene'
lue'.
9 Lu zra na' zra'u le' gaca chee' benne' ca'
ca guzú' le' lu xi' ga dxulúzrie' bla'dau'.
Xránadxu guzúzruje' benne' ca' lu xel-la' dxezrá'a
chee',

na' xi' na' guzezxe na le'.

¹⁰ Xúgute da belune' lu xezr la xu nigá guzria xi'u,
ne xegú' zri'ine zre sue' ládujla bèneache,

¹¹ lawe' da gulaca lazre' xelune' da calela chiu'
Lue'.

Gulilaj lazre' ca da xelune', san quebe bi
xelezéquene',

¹² lawe' da gulagu' benne' ca'.

Nucuezu' xaga nalá xéche'ze chiu' chee le'.

¹³ Begá'ana szrénqueze Lue', Xran, lu xel-la' wal-la
chiu'.

Tu gúl-lazquezdxu, ne tu güe lá'anazquezdxu Lue'
ca naca xel-la' waca chiu'.

22

¹ Dios chia', Dios chia', ¿bizr chee na' nusán lazru'
neda'?

¿Bizr chee na' quebe dxennu' da dxenaba' Lue'
chee guseláu' neda'?

² Dios chia', dxuláwizra' Lue' te zra, ne quebe dxex-
echebu' chia'.

Dxuláwizra' Lue' chizrela, ne quebe dxezí'i lazra'.

³ Lá'azxa nacu' Lue'.

Nacu' Benne' dxebeze' naga dxelúe lá'ana benne'
Israel Lue'.

⁴ Xra xrtáuntu' gulebeza lazre' Lue'.

Gulebeza lazre', na' bseláu' le'.

⁵ Bululáwizre' Lue', na' beelé'.

Buluxrén lazre' Lue', na' quebe belexedué'ene'.

⁶ Neda' naca' ca tu be'la' gúna'dau', ne quegá
bèneache.

Dxelecuide bèneache neda', ne dxuluzúe' neda'
chalá'ala.

⁷ Xúgute benne' dxelelé'e neda' dxelún le' chia'.

Lu da dxelún le' chia' dxelexrá dxu'e,
ne dxulutá xíchajé', dxelenné':

⁸ “Bzua cuine' lu na' Xránadxu chee guselé' le'.
Guselé' le' che dzezaca ba lázreleñe' le'.”

⁹ Lue' nacu' Bénnea' bexru' neda' gate gúlaja'.
Benu' bxren lazra' Lue' gate na' ne dxázretea'.

¹⁰ Guxu'a lu na'u gate quebe ne gálajtea'.
Gate ne xu'a lu le'ë xrna'a, báchequeze nacu' Dios
chia'.

¹¹ Quebe xebigu' naga zua' lawe' da zua gágute
da gusaca zi na neda',
ne quebe nu chilá' benne' gácalene' neda'.

¹² Zaj naxechaj benne' dxeledábague' neda' ca
bezre ca'.

Zaj naxechaj benne' neda' zaj naque' ca bezre wal-
la ca'
chee Basán.

¹³ Gulaca lazre' xuluzría xi'e neda'
ca tu bezre xixre' dxedunba', ne dxebezre xa'aba'.

¹⁴ Bebizre lazra' ca nisa da nalalaj na lu xu,
na' ca naca zrita xu'a bulusán ljwezre na.
Lázrdawa' guca na ca xina' da bxuna na lu le'a ca
nisa.

¹⁵ Bexaca xel-la' wal-la chia' ca tu xé'ena xu la'a,
na' luzra' bedá' na chichja'.

Nuzú' neda' lu xu xrte chee xel-la' gute.

¹⁶ Zaj naxéchajé' neda' ca becu' ca'.

Zaj naxechaj benne' wen da zrinnaj ca' neda'.
Gulídue' ni'a na'a.

¹⁷ Waca gulaba' ca naca zrita xu'a,
na' benne' ca' dxelenné'ë neda', ne dxelenná'
xánnie' neda'.

¹⁸ Belexelé'ë zra lana' late' weaj,
na' lawe' zra lana' gulebeje' da gaca bea na.

19 Quebe xebigu' naga zua', Xran.

Nacu' xel-la' wal-la chia'.

Gudázega gácalenu' neda', Xran.

20 Bselá benne' du xu'a lu na' benne' gu'e neda' xia.

Bénnea' guzría xi'e neda' gunē' ca dxun becu'.

21 Bselá neda' lu dxu'a bezre xixre'.

Bselá neda' lu luzu bezre wal-la ca'.

22 Guzenda' bi bícha'dau' ca' lau' Lue'.

Güe lá'anaqueza' Lue' ladaj benne' zaj nazrague'
lau'.

23 Le'e, dxezrébele Xránadxu, le güe lá'ana Le'.

Le gucá'ana szrene', le'e, zri'ine zre sua Jacob.

Le zrebe Le', le'e, zri'ine zre sua Israel.

24 Quebe bzua Dios chalá'ala, ne quebe gucuídenē'

da zi' da xa' da guledé benne' xache' ca',

ne quebe bcache lawē' lau benne' ca'

san gate bululáwizre' Le', benne' chi'e.

25 Güe lá'anaqueza' Lue' laduj benne' zan zaj
nazrague' lau'.

Ca da guchebe lazra' gúnqueza' lau benne' ca' dx-
elezrebe' Lue'.

26 Xelagu benne' dxexruj lazre', ne welélajquezne'.

Benne' ca' dxelebigue' lau Xránadxu xelúe
lá'anaqueze' Le'.

Tu gácazqueze da ba neza chee benne' ca'.

27 Cheajlesá lazre' benne' dutē xezr la xu Xránadxu,
na' xelexebí'e lau Le'.

Xúgutē cue' benne' chee xúgutē cue' xezr la xu
xelúe lá'anaqueze' Le',

28 lawe' da xu'u lu na' Xránadxu xel-la' dxenná bea,
na' nna bé'ene' xúgutē benne' xezr la xu ca'.

29 Xeláguqueze xúgute benne' zren ca' chee xezr la
xu nigá,

ne xelúe lá'anaqueze' Dios.

Xuluzú zribe lau Le' xúgute benne' ca' xelate,
benne' ca' quebe xelezéquene' xelegú'u chawe'
bénne'du zaj xu'e chee quebe xelatie'.

30 Zri'ine zre sua benne' ca' xelunbe' zrin chee
Xránadxu.

Xuluzenne' zrí'ine' ca' ca naca chee Xránadxu
cadxa cheajsete chee bénneache.

31 Xelezrine', ne xuluzenne' bénneache ca naca
da xrlátaje da dxun Dios.

Xuluzenne' benne' quebe ne xelálaje' ben Dios da
caní.

23

1 Xránadxu Dios dxuxúe' neda' ca tu benne' dxuxúe'
zrila' chee'.

Quebe bi dxexázejeda'.

2 Ca dxeleZRúa zrila'du ca' ba guláguba' xixre'
xá'adau',

caní dxune' chia' chee xezí' lazra'.

Gune' chia' ca dxaca chee zrila' ca'

dxeché'e-ba' dxu'a xegu nisa da de zrize.

3 Dxuxuzúa chúchue' neda' lu xichaj lázrdawa'.

Dxusi'e neda' lu da xrlátaje chee gaca li da guchebe
lazre'.

4 Láqueze tea' naga sua' lu da stebe chee xel-la' gute,
quebe bi da calela guchebe na neda',

lawe' da zúalenu' Lue' neda', Xran,

na' dxelácale zrize', ne blazru chiu' neda'.

5 Dxucuezu' da xi'aj gawa' lácala benne'

dxeledábague' neda' zaj naxečaj neda'.

Dxugú'u da za xichja' da dxapa na neda' ba lá'ana,

ne dxusezráteu' zriga' chia'.

⁶ Da xrlátaje, ne xel-la' dxexache lazre' chiu'
da lítegaze xelezúale na neda' xúgute zra naca
bana',
na' lizru', Dios, gaca na lizra' chadía chacanna.

24

¹ Chee Dios naca xezr la xu nigá ne xúgute da zaj
de lawe na.

Naca chee' xezr la xu, ne xúgute bènneache zaj zre'e
ga na'.

² Bzue' na lawe' nísadau',
ne bzale' lane na sítujla zran nísadau'.

³ ¿Nu seque' cuen xi'a chee Xránadxu?
¿Nu seque' chu'u xudau' lá'azxa chee'?

⁴ Waca benne' ca' zaj naque' du lazre' ca naca da
dxelune',

ne ca naca da dxulaba lazre'.

Benne' ca' quebe ne xelechisa ne'e lau bedáu' xiaj
xaga ca',

ne quebe bi ne xelechibe lazre' da naca wen
lazre'.

⁵ Xránadxu gunē' da chawe' chee benne' caní.
Dios guchi'e chee benne' caní, ne guselé' le'.

⁶ Caní zaj naca bènneache dxelebigue' lau Le',
benne' ca' dxelexu'e naga zua Dios chee Jacob.

⁷ Le salaj dxa xu'u chee xudau'.

Le salaj dxa xu'u chawe' ca',
na' chu'u Wenná Bea szrente.

⁸ ¿Nuzra na' Wenná Bea szrente nigá?

Naque' Xránadxu, Benne' wal-la,
Bénnea' nape' dute xel-la' waca.

Naque' Xránadxu, Bénnea' dxedxúaję' chawe' lu
wedil-la.

⁹ Le salaj dxa xu'u cheę xudau'.

Le salaj dxa xu'u chawe' ca',
na' chu'u Wenná Bea szrentę.

¹⁰ ¿Nuzra na' Wenná Bea szrentę nigá?

Naque' Xránadxu, Benne' dxenná bé'ene' xúgute da
zaj zua.

Le' naque' Wenná Bea szrentę na'.

25

¹ Xran, dxennía' Lue' dutę lázrdawa'.

² Dxuxrén lazra' Lue', Dios chia'.

Quebe gu'u lataj xedué'eda'.

Quebe gu'u lataj benne' dxeledábage' neda' xu-
luzétaje' neda'.

³ Da líqueze, benne' ca' dxelebeza lazre' Lue'
quebe xeleque zréajene'.

Xeledué'e benne' ca' dxeledábage' xrtizru'.

⁴ Xran, ble'e neda' da dxaca lazru' guna'.

Ble'e neda' da dxezaca ba lazru' guna'.

⁵ Bse de neda' guna' ca naca da li chiu'

lawe' da nacu' Dios dxuseláu' neda'.

Tu dxebeza lázrezqueza' Lue'.

⁶ Bsa lazre', Xran, gacu' zri'i lazre',

ne xexache lazru' chia' cáteze da dxúntequezu'.

⁷ Quebe chajsá lazru' dul-la da bęna' gate ne naca'
benne' cuide', ne ca gudábaga' xrtizru'.

Nen dutę xel-la' dxexache lazre' chiu', bsa lazre'
neda',

ne nen dutę xel-la' zri'i lazre' chiu', Xran.

⁸ Xrlátaje, ne li lazre' naca Xránadxu Dios.

Chee le na' gusédene' benne' dul-la ca' da dxal-la' xelune'.

⁹ Gulé'ene' benne' dxexruj lazre' ca' da xrlátaje da xelune',

ne gusédene' benne' zren lazre' ca' da xelune'.

¹⁰ Lu xel-la' dxexache lazre',

ne lu da li dxeché Xránadxu benne' ca' dxelune'

ca naca xel-la' wezría chee', ne ca da dxuséde Le'.

¹¹ Lawe' da dxunu' ca da ba gunnú', Xran,

gunite lau' ca naca dul-la nuna', da naca na zren.

¹² ¿Nu benne' dxezrebe' Xránadxu Dios?

Le' gusédene' benne' nigá da dxal-la' gune'.

¹³ Gaca chee' tu da ba neza zrente,

na' zri'ine zre sue' gaca cheebe' xezr la xu.

¹⁴ Xránadxu Dios naque' tuze nen benne' ca' dx-elezrebe' Le',

na' gune' xelúnbe'e xel-la' wezría chee'.

¹⁵ Tu dxennázqueza' Xránadxu Dios

lawe' da guselé' neda' lu na' benne' ca' dxelaca lazre' xelexe' neda'.

¹⁶ Gunná' neda', ne bexache lazre' neda'

lawe' da zua' tuza', ne dxezaca zi'a.

¹⁷ Naxánle'e da stebe da zaj zua lázrdawa'.

Bselá neda' lu da stebe zua'.

¹⁸ Gunná' ca dxezaca zi'a, ne ca dxunle'a zrin,

na' bnite lau xúgutę dul-la da nabaga'.

¹⁹ Gunná' benne' ca' dxeledábague' neda' ca naxánle'ene',

ne ca dxelecuídele'ene' neda'.

²⁰ Bxue bénne'du xu'a, ne bselá neda'.

Quebe gu'u lataj xedué'eda' lawe' da dxuxrén
lazra' Lue'.

²¹ Zaj nuxru da xrlátaje, ne xel-la' li lazre' neda'
lawe' da dxebeza lazra' Lue'.

²² Dios, bselá benne' Israel ca'
lu xúgute da dxelezaca zi'e.

26

¹ Bchi'a chia', Xran, lawe' da nuna' da xrlátaje.
Bxren lazra' Lue', Xrana' Dios, ne quebe ben chupa
lazra'.

² Gunná' xanne' lázrdawa', Xran, ne bxue ca da
nuna'.

Gunná' xanne' da xu'u lu xichaj lázrdawa'

³ lawe' da dxeque be'eda' dxexache lazru' neda',
ne dxuna' ca naca da li chiu'.

⁴ Quebe ne guna' tu zren benne' ca' dxelune' da
xrlátaje cúzreze,
ne quebe ne guna' tuze benne' ca' dxululé'e cuine'
xrlátaje.

⁵ Dxecuúdeda' da dxelún benne' ca' dxelune' da
calela

naga dxelezrague',
ne quebe ne chu'a tu zren benne' ca' dxuluzúe'
Dios chalá'ala.

⁶ Dxelé'enu' quebe bi zria nabaga',
na' waca biga' lu cugu chiu', Xran,

⁷ chee cuezre xa'a, xapa' Lue': "Xcalenu",
ne chee guzenda' bénneache ca naca da zren ca' da
nunu'.

⁸ Xran, nazrí'ida' lizru' naga zu',
ne lataj lá'azxa naga zua da xabáa chiu'.

⁹ Quebe guzría xi'u neda' tu zren nen benne' dul-la
ca',

ne quebe gutiu' neda' tu zren nen benne' ca' dx-
elútiē' benneáche,

¹⁰ benne' ca' dxelunē' da calela,
ne tu dxulunézrujzqueze' dumí cheē xeledé' lu da zaj
nune'.

¹¹ Neda' tu gúnzqueza' da naca li lazre'.

Bselá neda', ne bexache lazre' neda'.

¹² Tu núnzqueza' da xrlátaje, na' güe lá'anaqueza'
Xránadxu Dios

lau benne' ca' zaj nazrague' cheē'.

27

¹ Xránadxu Dios naque' xel-la' naxaní' chia',
ne Benne' dxuselé' neda'.

¿Nu benne' gaca guchebe' neda'?

Xránadxu Dios naque' Benne' dxucu'uje' neda'.

¿Nu benne' gaca guzúē' neda' lu da stébele'e'?

² Gate guléchaj benne' ca' dxelunē' da calela chia',
nen benne' ca' dxulusaca zi'e neda',
ne benne' ca' dxeledábague' neda' cheē xuluzría
xi'e neda',

na' gulechégüē', ne xeajlecházie'.

³ Láqueze xeléchaj tu cue' benne' dxjaque' wedil-la
neda',

benne' ca' dxeledábague' neda', quebe zrébequeza'.

Láqueze xuluzúē' neda' lu wedil-la, neda' guxrén
lázrequeza' Dios.

⁴ Tu da gunábeda' Xránadxu Dios.

Da nigáze sa lazra', da naca na cheē sua' lizre

Xránadxu

xúgute zra gaca bana',

cheē gulaba lazra' ca naca da xrtante cheē

Xránadxu,

ne cheē guchálajlęna' Lę' lu xudau' lá'azxa cheē'.

- 5 Le' gucache chawe' neda' lu lataj lá'azxa chee'
 lu zra dxaca da calela.
 Gucache chawe' neda' lu lataj cheéqueze' naga
 zúaqueze'.
 Guzúe' neda' tu naga se cháweda'.
- 6 Nadxa gunē' guzétaja' benne' dxeledábague'
 neda',
 ne zaj naxéchaje' neda',
 na' nen dutē xel-la' dxebé gutia' béadu ca' guzúa'-
 ba'
 lu cugu chee'.
 Gúl-laqueza', ne tu güe lá'anazqueza' Xránadxu.
- 7 Xran, ben chi'a gate ne dxuláwizra' Lue'.
 Bexache lazre' neda', ne bechebe chia'.
- 8 Lu xichaj lárzdawa' benda' chí'u, gunnú': "Bexilaj
 chia'."
 Xexílaja' chiu', Xran.
- 9 Quebe gucache lau' chia' neda'.
 Lu xel-la' dxezrá'a chiu' quebe xebigu' naga zua'
 neda',
 wēn zrin chiu'.
 Nacu' Benne' dxácalēnē' neda'.
 Quebe gusanu' neda', ne quebe cueaj xichju' neda',
 Dios, weselá chia'.
- 10 Lácala xulusán xra xrna'a neda',
 tu xecá'azqueze Xránadxu Dios neda'.
- 11 Bsede neda' da dxaca lazru' guna', Xran,
 ne ble'e neda' da li lazre' da dxal-la' guna',
 lawe' da zaj naxán benne' dxeledábague' neda'.
- 12 Quebe gu'u lataj benne' dxeledábague' neda'
 xelunē' chia' da dxelaca lazre'
 lawe' da zaj naxechaj benne' wēn lazre' neda'
 nen benne' dxelaca lazre' xulusaca zi'e neda'.

13 Xránadxu Dios guchebe lazre' le'eda' da xrlátaje
chee'
naga gaca bana'.
La quebe guxéajle'a da nigá, na' gute ni'a na'a.
14 Le cueza xelá' Xránadxu.
Le gutipa lázrele, na' Le' guzé chúchue' le'e.
Awe', le cueza xelá' Xránadxu.

28

1 Xran, dxuláwizra' Lue'.
Nacu' Benne' dxucú'uju' neda'.
Bze naga chi'a lawe' da che quebe xennu' neda'
gaca' ca tu benne' dxu'e lataj ba xa'.
2 Ben chi'a dxuláwizra' Lue',
ne dxechisa na'a lau' naga zu' lataj lá'azxa chiu'.
3 Quebe guzría xi'u neda' tu zren nen benne' wen
da calela ca',
ne cá'unqueze nen benne' ca' dxelune' da zrinnaj,
benne' ca' dxelenné' dizra' cháwedau' lau le sa'
ljwezre',
san xu'u lázrdawe' da calela gune' chee'.
4 Bde benne' ca' lu da ba xa' cáteze naca chee da
belune',
cáteze naca da calela da zaj nune'.
Bnezruij chee benne' ca' cáteze da belune', da na'
dxal-la' xelezí'e.
5 Lawe' da quebe gulape' ba lá'ana da ben
Xránadxu,
ne quegá da bene' lu ni'a ná'queze',
guxrínajé' benne' ca', ne gudée' le' lu da ba xa'.
6 ¡Gaca ba Xránadxu Dios, Bénnea' benne' chi'a
gate bláwizra' Le'!
7 Xránadxu naque' Bénnea' dxuzé chúchue' neda',
ne dxucu'uje' neda'.

Bxren lazra' Le', na' gúcalene' neda',
na' chee le na' gubelé'eda', na' gul-laqueza',
ne güe lá'anaqueza' Le'.

⁸ Xránadxu naque' Bénnea' dxuzé chúchue' benne'
chee' ca',
ne naque' Benne' dxucu'uje', ne dxuselé' bénnea'
guqué'ē.

⁹ Bselá benne' chiu' ca', ne ben gaca chawe' chee'
da naca chee'.

Bxue benne' ca', ne bexru le' chadía chacanna.

29

¹ Le güe lá'ana Xránadxu, le'e, zrale xabáa.
Le güe lá'ana xel-la' szren chee', ne xel-la' waca
chee'.

² ¡Da xabáa naca La Xránadxu!
¡Le güe lá'ana na!

Le guzú zríbele lau Xránadxu lá'azxa gate xel'é'ē.

³ Chi'i Xránadxu dxen na lawe' nísadau'.
Dxen chi'i Dios xabáa ca guziu' da dxenné na.
Dxedá chi'ē lawe' nísadau'.

⁴ Dxen chi'i Xránadxu ca naca xel-la' wal-la chee' na.
Dxen chi'i Xránadxu dute xel-la' szren chee' na.

⁵ Chi'i Xránadxu dxichaj na xaga cedro ca'.
Dxichaj na xaga cedro ca' zaj ze na xi'a Líbano.

⁶ Dxuxrite na xi'a Líbano ca' ca dxelexrite bézredu
ca',

na' dxuxrite xi'a Hermón ca tu bézredau'.

⁷ Chi'i Xránadxu dxun na chaze xesa.

⁸ Chi'i Xránadxu dxuxrize na le'ē xixre' lawe' lataj.
Dxuxrize na le'ē xixre' chee xezr la xu Cades.

⁹ Chi'i Xránadxu dxuxrize na xaga wal-la ca'.

Dxuchibe na xrlegue xaga ca',
na' lu xudau' chee' dxelenná xúgutē bénneache:

“¿Gaca ba Dios!”

¹⁰ Dxenná be'e Xránadxu nísadau' ca'.

Chadía chacanna dxenná be'e ca Wenná Bea.

¹¹ Xránadxu Dios dxuzé chache' benne' chee' ca'.

Dxuzúe' le' lu da ba neza chee xel-la' dxebeza zri
láze'.

30

¹ Gucá'ana szrena' Lue', Xran, lawe' da bechisu'
neda',

ne quebe bnézruju' lataj benne' ca' dxeledábague'
neda'
xelún le' chia'.

² Xrana' Dios, bláwizra' Lue', na' bexunu' neda'.

³ Xran, bseláu' neda' lu lataj ba xa'.

Bexunu' neda' chee quebe chu'a xedxu ba.

⁴ Le gul-la chee Xránadxu, le'e nácale benne'
cheéqueze'.

Le xē Lē': “Xcalenu”, ne dxajsá lázrele naque'
lá'azxa,

⁵ lawe' da tu chí'idauze dxezré'e

san chadía chacanna zua xel-la' zri'i lazre' chee'.

Wabézredxu tu zreze, san che zílala wabéle'edxu.

⁶ Gate guzúa chawa' gunnía': Quebe nu seque' gutá
neda',

⁷ lawe' da bze chuchu' neda', Xran, ca tu xi'a zren,
ne blé'enu' neda' cháwedau'.

Gate bcache lau', na' guzúa' stebe.

⁸ Xran, guláwizra' Lue', ne gata' xueda' Lue'.

⁹ ¿Bizra da ba neza gaca na chiu' che gatia',
ne chu'a xedxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

¹⁰ Bze naga neda', Xran, ne bexache lazre' neda'.
Xran, gúcale neda'.

¹¹ Benu' bexaca xel-la' dxebezre chia' xel-la'
wexá'a.

Bcuasu' xel-la' dxewí'ine lazre' chia', ne bzu' chia'
xel-la' dxebé.

¹² Chee le na' tu gúl-lazqueza' chiu', lawe' da nacu'
da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía cha-
canna.

31

¹ Dxuxrén lazra' Lue', Xrana' Dios.

Quebe gu'u lataj xedué'eda'.

Lu da xrlátaje chiu' bselá neda'.

² Bze naga chi'a, ne bselá neda'.

Bze chuchu neda', ne bucú'uj neda' chee la'.

³ Nacu' Benne' dxuzé chuchu' neda', ne dxucú'uju'
neda'.

lawe' da nacu' li lazre' gulé'enu' neda' neza,
ne gusi'u neda' neza na'.

⁴ Bebéaj neda' lu xralaj da ba zaj nucueze', chee
xelel-le' neda'.

Lue' nacu' Benne' dxuxúe' neda'.

⁵ Lu na'u dxuzúa' bénne'du xu'a, Xran.

Lue' bexá'awenu' neda', Dios li lazre'.

⁶ Dxecuídeda' benne' ca' dxelebeza lazre' dios ca'
quebe bi zaj zaca.

Neda' dxebeza lazra' Xrana' Dios.

⁷ Béle'eda', ne sua' lu da ba neza lawe' da dxexache
lazu' neda'.

Caní dxunu' lawe' da dxelé'equeznu' ca da dxezaca
zi'a.

Nézenu' ca dxedéa' lu da ba xa'.

8 Quebe bdeu' neda' lu na' benne' ca' dxeledábague' neda'.

Bze chuchu' neda' tu lataj chawe'.

9 Bexache lazre' neda', Xrana' Dios, lawe' da zua' lu da ba xa'.

Ba bebizre nisa xuzru xiaj lawa' lawe' da dxewí'ine lazra'

dute béne'du xu'a, ne dute bela' dxen chia'

10 lawe' da dxedé xel-la' nabán chia' lu da ba xa', ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na' dxelelá zrita xu'a.

11 Xúgute benne' ca' dxeledábague' neda' dxelecuídenē neda',

na' benne' walíZR chia' dxuluzúē neda' chelá'ala,

na' benne' zaj núnbe'ē neda' dxelecuase' neda'.

Benne' ca' dxelelé'ene' neda' la neza dxuluzrúnnuje' naga zua'.

12 Benne' caní ba gulal-la lazre' neda' ca dxelal-la lazre'

tu benne' gate.

Naca' neda' ca tu xé'ena xu da nalá'a.

13 Dxenda' dizra' schanni' da dxelenná benne' zante' chia',

na' gáteteze zua da dxuchebe na neda'.

Dxácatē na' dxelunē tuze dizra' bi xelunē' chia', ne zaj nune' xelútie' neda'.

14 Neda' dxuxrén lazra' Lue', Xran.

Dxennía' nacu' Lue' Dios chia'.

15 Lu na'u Lue' zaj xu'u zra chia' ca'.

Bselá neda' lu na' benne' ca' dxeledábague' neda', ne lu na' benne' ca' zaj nau zi' xuzre' neda'.

16 Lu xel-la' szren chiu' bxue neda', wen zrin chiu'. Lu xel-la' dxexache lazre' chiu' bselá neda'.

17 Quebe gu'u lataj xedué'eda', Xran, lawe' da dx-
uláwizra' Lue'.

Bēn xelexedué'e benne' ca' dxelebéaj xíchaje' Lue'.
Bēn xelezúa zriē' lu lataj ba xa'.

18 Bēn quebe gaca xelenné benne' ca' dxelezí xē'e,
benne' ca' dxeleñné' da calela chee benne' xrlátaje
ca',

da dxeleñné' lu xel-la' dxulucá'ana szren cuina,
ne lu xel-la' dxulucá'ana ditaj benne' caní.

19 Da zrentē naca xel-la' zri'i lazre' chiu' da napu'
chee bi gunu' chee benne' ca' dxelape' Lue' ba
lá'ana,

da na' dxunu' lau xúgute bēnneache

ne chee benne' ca' dxelebeza lazre' Lue'.

20 Lu da bagácheze naga zu' Lue' dxucachu' benne'
ca'

chee quebe bi xelún bēnneache chee'.

Dxuzú' benne' ca' tu lu xu'u nagache

chee quebe bi gun chee' xel-la' wetil-la dizra' chee
bēnneache.

21 ¡Gaca ba Xránadxu Dios!

Lu xel-la' dxexache lazre' chee' bēne' da zrentē
chee gúcalēne' neda' tu lu xēzre naga guca wedil-
la.

22 Gate na' guzúa da dxuchebe neda' gunnía':

Zua' naga québedxa le'e Xrana' neda'.

Lue' bennu' chi'a da guta' xueda' Lue' gate na'
bláwizra' Lue'.

23 ¡Le zri'i Xránadxu, xúgutele le'e nácale benne'
chee Léqueze'!

Xránadxu dxuxúē' benne' ca' quebe dxulusane' Le',
na' dxuxunézrujle' chee benne' ca' dxulucá'ana
szrene' Le'.

24 Le gutipa lázrele, xúgutele le'e dxebeza lázrele
 Xránadxu Dios,
 na' Le' guzé chúchue' le'e.

32

1 ¡Ba neza zrente naca na chee bénnea'
 Dios ba bnite lawe' dul-la da gubágué',
 ne ba gudúé' zria da guzúa chee'!

2 ¡Ba neza zrente naca na chee bénnea'
 Dios quebe dxusebague' le' zria,
 bénnea' quebe dxezí xe'e!

3 Gate quebe guxrúalepa' dul-la gubaga',
 bedú lazra' lawe' da gudxezra' bedú zra.

4 Te zra ne chizrela bdeu' neda' xel-la' zi', Xran.
 Bedú lazra' ca dxebizre beaj nisa beu' la.

5 Nadxa guxrúalepa' dul-la gubaga',
 ne quebe bcacha' zria da guzúa chia'.
 Bechugu lazra' guxrúalepa' na lau Lue', Xran,
 na' Lue' bnite lau' chee dul-la gubaga'.

6 Xúgute bénneache chiu' dxal-la' xuluchálajlene'
 Lue'
 gate de lataj xelexezrelne' Lue', na' gate zrin da zi'
 da xa'
 da xezezaque',

da gaca na ca tu xegu nisa zren da dxedxuaj na,
 na' quebe bi gune na benne' ca'.

7 Lue' nacu' ca tu lataj naga gaca gucache cuina',
 na' gucache chawu' neda' chee quebe bi da saca'.
 Tu gul-lazqueza' zizraj ca bseláu' neda' lawe' da
 dxuxú' neda'.

8 Dxenná Xránadxu: “Gulé'eda' lue' neza naga dxal-
 la' tau'.

Gusédeda' lue', ne guzéajni'ida' lue' ca dxal-la' gunu'.

⁹ Quebe gacu' ca tu bzrina' u tu bea, be quebe bi dxeléajni'iba',

bea ca' dxun na ba xen nna be'enu'-ba', na' cu'u xia dxú'aba',

chee gunu' xelunba' ca dxaca lazru'."

¹⁰ Benne' wen da calela ca' dxun na ba xen xeledéé' lu da zi' da xa'.

Benne' ca' dxuluxrén lazre' Xránadxu, tu dxuxúezqueze' le' nen duté xel-la' zri'i lazre' chee'.

¹¹ Le'e, benne' xrlátaje, le be, ne le sua lu da ba neza,

ne chee da ben Xránadxu, gúcalene' le'e.

Nen duté xel-la' dxebé le gul-la, le'e, nácale li lazre' lau Le'.

33

¹ Le be le'e, benne' xrlátaje, lau Xránadxu Dios.

Xrtante naca lau Dios da dxelúe lá'ana benne' xrlátaje ca' Le'.

² Le gucá'ana szren Dios nen da zríadi'i na du da dxínnele.

Le gúl-laqueze chee' nen da dxúl-lalene, ne nen tu da nua na chi du.

³ Le gul-la chee Le' tu da cube.

Le gul-la cháwedau', quínnele duté xel-la' dxebé.

⁴ Li lazre' naca xrtizra' Xránadxu Dios, na' nune' duté lu xel-la' li lazre' chee'.

⁵ Le' nazrí'ine' da naca xrlátaje, ne da naca du lazre'.

Zaj núnbea bènneache xel-la' dxexache lazre' chee Xránadxu

du gabí'i xęzr la xu.

⁶ Ne cheę xrtizra' Xránadxu Dios, bene' xabáa,
na' xúgute belaj da zaj nalá' zran xabáa bene'
nen be' dxedxuaj dxu'e.

⁷ Le' dxuxutube' nísadau', ne dxexune' na ca tu xi'a
nisa.

Dxegá'a chawe' nisa lu da situj ca' naga nucueze'
cheę na.

⁸ Le zrebe Xránadxu Dios, xúgutele zrale xęzr la xu
nigá.

Le zrebe lau Le', xúgutele le'e zrale lu xęzr la xu

⁹ lawe' da gunneze', na' guca xęzr la xu.

Gunná be'ene' na, na' zúaqueze na.

¹⁰ Xránadxu Dios dxune' dxexaca dácheze dizra' zaj
nun

bénneache xęzr la xu ca',
ne dxune' dxelaca níteze da ca' zaj nune' xelune'.

¹¹ Dizra' ba nun Xránadxu Dios tu súazqueze
na chadía chacanna.

Da dxegú'u be'e lu lázrdawe' tu wadíazqueze na
lau xúgute bénneache.

¹² Ba neza zrente naca na cheę benne' xęzr la xu
ca'

Xránadxu naque' Dios cheę le',
benne' xęzr la xu ca' gucá'a Dios cheę xelaque'
benne' cheę'.

¹³ Naga zue' xabáa cheę' dxenná' Xránadxu Dios,
na' dxelé'ene' xúgute cuen bénneache.

¹⁴ Naga zue' lataj lá'azxa cheę' dxenné'e,
na' dxelé'ene' ca zaj zra' bénneache lu xęzr la xu.

¹⁵ Le' bene' xichaj lázxdau xúgute benne' ca',
na' dxenné'e xúgute da dxelune'.

¹⁶ Quebe la benne' wenná bea ne cheę benne'
dxjaque' wedil-la zante cheę',

ne quebe la benne' wal-la ne chee xel-la' wal-la da nape'.

17 Quebe nu benne' le' ne chee bzrina',
ne quebe nu la ne chee xel-la' wal-la zren chee'.

18 Le na' xque, dxuxúe Xránadxu Dios benne' ca'
dxelezrebe' Le'.

Dxuxúe' benne' ca' dxelebeza lazre' Le' xexache
lazre' le'

19 chee guselé' le' lu xel-la' gute,
ne chee gugawe' le' gate dxaca gubina'.

20 Dxebeza lázredxu Xránadxu Dios.
Le' naque' Bénnea' dxácalene' dxi'u, ne dxucu'uje'
dxi'u.

21 Chee le' na' du lázredxu béle'equezdxu lau Le',
lawe' da tu dxuxrén lázrezquezdxu La lá'azxa chee'.

22 Bexache lazre' netu', Xránantu',
lawe' da dxebeza lázrentu' Lue'.

34

1 Tu güe lá'anazqueza' Xránadxu Dios te zra chizrela.
Tu gúl-lazqueza' da güe lá'ana na Le'.

2 Xezaca ba lázrelena' Xránadxu Dios.
Xelén benne' dxexruj lazre' da caní, na'
welebéle'ene'.

3 Le gucá'ana szren Xránadxu Dios tu zren nen
neda',
na' tu zren gucá'ana szrendxu La lá'azxa chie'.

4 Bláwizra' Xránadxu Dios, na' Le' benne' chia',
ne bselé' neda' lu xúgute da buluchebe na neda'.

5 Benne' ca' gulebeza lazre' Le' belelé'ene' da xabáa
chee',
ne quebe belexedué'ene'.

6 Neda', benne' xache', bláwizra',
na' ben Xránadxu Dios chia',

ne bselé' neda' lu xúgute da dxezaca zi'a.

7 Gubáz chee Xránadxu zue' cuita benne' ca' dx-elezebe' Le',
na' dxucu'uje' benne' ca'.

8 Le guxúe xque, na' lé'ele naca xrlátaje Xránadxu
Dios.

Ba neza zrente naca na chee bénnea' dxuxrén
lazre' Le'.

9 Le zrebe Xránadxu Dios, le'e, nácale benne' chee
Léqueze',

lawe' da quee bi dxelexazrje benne' ca' dx-
elezebe' Le'.

10 Bezre xíxre'du ca' dxelexázrjeba', ne dxeledunba'.
Benne' ca' dxelebeza lazre' Xránadxu Dios
quebe bi da chawe' xelexázrjen'.

11 Le da, bidau', ne le xen chia'.

Gusédeda' le'e chee zrébele Xránadxu Dios.

12 ¿Nu benne' ládujla le'e dxaca lazre' xegá'ane'
lu xel-la' nabán,

bénnea' dxaca lazre' sue' zane' iza chee lé'ene' da
chawe'?

13 Bxue xanne' ca dxuchálaju' chee quebe nneu' da
calela,

ne chee quebe guchálaju' da wen lazre'.

14 Bsan da calela da dxunu', na' ben da xrlátaje.

Ben ba xuzre gapu' xel-la' dxebeza zri lazre',
ne ben ca naca chee na.

15 Dxuxúe Xránadxu Dios benne' ca' zaj naque'
xrlátaje,

ne dxuzé nague' da dxululáwizre' Le'.

16 Dxezrá'a Xránadxu Dios benne' ca' dxelune' da
calela,

chee quebe sua nu benne' chajsá lazre'
benne' wen da calela ca'.

- 17 Benne' xrlátaje ca' dxululáwizre' Xránadxu Dios,
na' Le' dxenne' chee',
ne dxuselé' benne' ca' lu xúgute da dxelezaca zi'e.
- 18 Gágute zua Xránadxu Dios naga zaj zra' benne' ca'
dxelexewi'ine lazre',
ne dxuselé' benne' ca' dxelexewi'ine lazre'.
- 19 Da zante da dxezaca zi' benne' xrlátaje.
Dxuselá Xránadxu Dios bénnea' lu xúgute da ca'.
- 20 Le' dxuxúequeze' xúgute zrita xu'e,
na' netú zrita chee' quebe gachaj na.
- 21 Dul-la da dxun benne' wen da calela gute na le',
na' xelebía xi' benne' ca' dxelecuídené' benne'
xrlátaje.
- 22 Xránadxu Dios dxexá'awe' bénne'du xu'u
benne' wen zrin chee' ca',
na' xúgute benne' ca' dxuluxrén lazre' Le'
québequeze xelebía xi'e.

35

- 1 Xran, bsizre benne' ca' dxelenné' chia'.
Gudíl-lale benne' ca' dxeledíl-lalene' neda'.
- 2 Gudá gucu'uju' neda' lu wedil-la,
ne gúcale neda'.
- 3 Gudel-la xia chee wedil-la chee guzagu' benne'
ca'
dxululague' neda'.
- Guzre neda' nacu' Benne' dxuselé' neda'.
- 4 Ben xelexedué'e, ne xeleque zrêaje benne' ca'
dxelaca lazre' xelútié' neda'.
- Ben xuluzrunnuj, ne xelexedué'e benne' ca' dx-
elaca lazre'
xelune' chia' da calela.
- 5 Ben xelaque' ca tu xizre bebe da dxua be',

ne gusel-la gubáz chee xabáa chiu' chee gulague'
benne' ca'.

⁶ Ben chul-la neza naga xeledée', na' gaca na naga
xeleBILE',

ne gusel-la gubáz chee xabáa chiu' chee gulague'
benne' ca'.

⁷ Bulucache' tu xralaj chee queḷa na neda',
ne quegá bi nuna' chee'.

Gulene' tu xedxu naga cheajcházia' neda',
ne quegá bi de da dxagu na zria chia'.

⁸ Gusel-la da guzría xi na benne' ca', ne quebe
xeleque be'ene'.

Ben queḷa xralaj chee' na' léqueze',
ne cheajlecházie' naga xelebía xi'e.

⁹ Nadxa béle'equezda' ca naca da nun Xránadxu
Dios.

Sua' lu da ba neza lawe' da bselé' neda'.

¹⁰ Xúgute zrita xu'a xelenná na: Xran, ¿núzraqueze
naca
ca nacu' Lue'?

Dxuseláu' benne' xache' lu na' benne' wál-ladxa ca
le',

ne benne' dxexazrje lu na' benne' dxebane' da du
de chee'.

¹¹ Belasa benne' dxelexechebe' da wen lazre'.

Gulawe' zria neda' chee' tu da quebe dxaca be'eda'.

¹² Belexebi'e neda' da caleḷa chee' tu da xrlátaje da
bena',

chee' xuluzúe' neda' lu da ba xa'.

¹³ Neda', gate quebe chawe' gulezúe', bewi'ine
lazra'.

Bena' gubasa da bsaca zi na neda',

ne du lazra' bláwizra' Dios chee' xexune' benne' ca'.

¹⁴ Bewi'ine lazra' chee' benne' ca' ca dxuna' chee'

le sa' ljwezra', u chee bi bíchequeza'.
 Guzúa' lu da baxache' ca dxun benne' chee xrne'e
 gate dxatie'.

15 Gulebé benne' ca' gate zua' lu da ba xa', ne
 belezrague'.

Belezraga benne' dxeledábage' neda',
 benne' wen da calela, na' chadite gulel-le'
 neda'.

Tu belúezqueze' neda', ne quebe gulezúa zrie'.

16 Bulusaca zi'e neda', ne belún le' chia',
 ne gulagu lazxe' lu xel-la' dxelezá'a chee' neda'.

17 Xran, ¿ájatę scha' gu'u latja da dxelune'?'
 Bselá neda' lu na' benne' caní dxuluzría xi'e neda',
 benne' zaj naque' ca bezre xixre' ca'.

18 Xapa' Lue': Xcalenu', lówela benne' zan ca' zaj
 nadupe' chiu' Lue'.

Tu güe lá'anazqueza' Lue' ládujla benne' zan ca'.

19 Quebe gu'u lataj xelebé benne' ca' dxeledábage'
 neda',
 ne quebe bi nuna' chee'.

Quebe gu'u lataj xelún la benne' ca' chia',
 benne' dxelecuídenę' neda',

ne quebe bi de da dxagu na zria chia'.

20 Benne' caní quebe dxelaca lazre' xelezúe' lu
 xel-la' dxebeza zri lazre',
 na' lu xel-la' dxelezí xę chee' dxelenné' chee' benne'
 ca'

dxelebeza zri lazre' lu xęzr la xu nigá.

21 Belún le' chia'.

Gulenné': "¡E! ¡E! ¡Ba blé'entu' da nune'!"

22 ¡Xran, ba blé'eqeznu' da dxelune'!

¡Quebe sua zriu'!

¡Xran, quebe gusanu' neda'!

- 23 ¡Guxasa, guzúa guchi'u chia!
 ¡Gudá, Xrana' Dios, chee gácalenu' neda'!
- 24 ¡Bchi'a chia' lu da xrlátaje chiu', Xrana' Dios!
 ¡Quebe gu'u benne' ca' lataj xuluzrizre' chia'!
- 25 ¡Quebe gu'u lataj xelenné': "Ba guca da dxezá
 lázredxu!"
 ¡Quebe xelenné': "Ba bendxu chie'!"
- 26 Ben xelxedué'e, ne xeleque zréaje xúgute
 benne' ca'
 dxelebene' gate bi dxaca chia'.
 Bsi'e xel-la' stu', ne ben xelaca xala benne' ca'
 dxeledábague' neda'.
- 27 Ben xelúl-la, ne xelebé benne' ca' zaj de'e neda',
 chee xelennáqueze': "Tu xegá'ana szrénzqueze
 Xránadxu,
 Bénnea' dxezá lazre' sua lu xel-la' dxebeza zri
 lazre'
 benne' wen zrin chee'!"
- 28 Tu guchálajzqueza' chee da xrlátaje chiu',
 ne chee da dxue lá'anaqueze na Lue' te zra chizrela.

36

- 1 Da zrinnaj da dxun benne' dxuzúa chalá'ala Dios
 dxuchálajle na le' lu xichaj lázrdawe'.
 Quebe dxezá lázrequeze' gape' Dios ba lá'ana.
- 2 Chee le na' dxulé'e cuine' ca tu benne' zrente'.
 Dxéqueñe' quebe dxelé'e Dios da zrinnaj da dxune',
 ne quebe dxecuide Dios le'.
- 3 Da tu dxuchálajzqueze' naca na da zrinnaj, ne da
 wen lazre'.
 Québedxa dxéajni'ine', ne québedxa dxune' da
 xrlátaje.
- 4 Dxulaba lazre' ca naca da calēla gunē' gate de'
 naga dxate'.

Xu'e neza da quebe naca neza chawe'.

Quebe dxecuídene' da calela.

⁵ Xrana' Dios, zrente naca xel-la' dxexache lazre' chiu'

da dxezrinte na xabáa,
na' dxezrinte lu beuj xel-la' li lazre' chiu'.

⁶ Da xrlátaje chiu' naca na ca tu xi'a zren chiu',
na' ca dxuchi'u naca na ca tu nísadau' sítujte.

Xrana' Dios, tu dxuxúezquezu' bénneache, ne be
xixre' ca'.

⁷ Xrdante naca xel-la' dxexache lazre' chiu', Dios.
Chee le na' dxuluxrén lazre' bénneache Lue' ca
dxelún
bedxuj dxé'enedu ca' dxelexezraba' zran xrila
bedxuj.

⁸ Welélajquezne' chee da dele'e lizru',
na' Lue' gunézruju' xelé'aje' da naca ca tu xegu da
naca na da dxezaca ba lazru' Lue'.

⁹ Naga zu' Lue' zua beaj naga dxalaj nisa da dx-
unna na
xel-la' nabán.

Lu xel-la' naxaní' chiu' walé'entu' da naca lení'.

¹⁰ Bexache lazre' benne' ca' zaj núnbe'e Lue',
ne bzua chee benne' li lazre' ca' da xrlátaje chiu'.

¹¹ Quebe gu'u lataj tábaga benne' dxucá'ana szren
cuina neda',

ne quebe gutá benne' dxun da calela neda'.

¹² Xeajlechaze benne' ca' dxelune' da zrinnaj.
Lue' benu' xeajlechaze benne' ca', na' quebe gaca
xelexase'.

37

¹ Quebe su' stebe ne chee da dxelún benne' ca'
dxelune' da calela,

ne quebe se lazru' da zaj nápalē'e benne' dxelunē'
da zrinnaj,

² lawe' da xeledé chee benne' ca' ca dxaca chee
xíxre'du ca',

na' gaca chee benne' ca' ca dxaca chee xixre' da
nadxugu,

dxebizre na.

³ Bxren lazre' Xránadxu Dios, ne ben da xrlátaje,
na' súaquezu' lu xezr la xu, ne sí'quezu' ba neza da
li.

⁴ Bezaca ba lazre' nen Xránadxu,
na' Le' gúnnaqueze' chiu' da dxezá lazru'.

⁵ Bzua cuinu' lu na' Xránadxu,
ne bxren lazre' Le', na' Le' gunē' ca da dxenabu'.

⁶ Gulé'ene' da xrlátaje chiu' ca tu xel-la' naxaní',
ne da li lazre' chiu' ca lawe' zra.

⁷ Guzúa zrize lau Xránadxu, ne guleza lazre Le'.
Quebe su' stebe ne chee benne' dxezi'e ba neza,
bénnea' dxúnqueze' da calela.

⁸ Bsan xel-la' xichaj zra'a, ne quebe cuídenu'.

Quebe sa lazru' bi xusacu' benne' ca' dxelunē' da
calela,

⁹ lawe' da guzría xi' Dios benne' ca' dxelunē' da
calela.

Benne' ca' dxelebeza lazre' Xránadxu, gaca chee'
xezr la xu.

¹⁰ Chadite te chee benne' ca' dxelunē' da calela.
Le'enu' lizre lataj benne' ca', san québedxa zaj zre'e
na'.

¹¹ Benne' dxexruj lazre' ca' gaca chee' xezr la xu,
na' xelexezaca ba lazre' lu xel-la' dxebeza zri lazre'
zrente.

¹² Benne' dxelún da calela dxelilaj lazre' bi xelunē'
chee benne' xrlátaje,

ne lu xel-la' dxelezá'a chee' xelagu lazxa benne'
ca'.

13 Xránadxu Dios guzrízrequeze' chee' benne' ca' dx-
elune'
da caleĭa

lawe' da nézene' ba za zra cheajsé chee' benne' ca'.

14 Benne' dxelune' da zrinnaj dxelebéaje' xia chee',
ne dxuluzé' xaga nalá xéche'ze chee',
chee' xuluzría xi'e benne' xache' ca', ne benne'
dxelexazrje',

chee' xelúti'e benne' ca' dxelune' da li lazre'.

15 Xia nalá chee' benne' ca' chaze na lu
lazrdáuqueze',

na' gáchajqueze xaga nalá xéche'ze chee'.

16 Cháwedxa naca da du da de chee' benne' xrlátaje
ca da gunní'a da zaj napa zánete' benne' dul-la ca',

17 lawe' da welátequeze ni'a na' benne' dxelúne' da
zrinnaj.

Xránadxu ná'queze dxuxúe' benne' xrlátaje ca'.

18 Nunbea Xránadxu ca zaj naca zra xelezúa benne'
du lazre' ca',

na' da zaj napa benne' ca' xelezúa na chadía cha-
canna.

19 Quebe xelexedué'ene' gate quebe dxaca chawe'
chee'

bénneache,

na' lu zra chee' gubina' gata' da xelawe'.

20 Xelebía xi' benne' dxelúne' da zrinnaj,

na' benne' ca' dxeledábaga' Xránadxu,
ca dxaca chee' xiaj xixre' ca'.

Xeledé chee', ne xelexenitie' ca zren chee' xi'.

21 Benne' ca' dxelún da caleĭa tu da dxelenabe' tu
chí'idauze,

ne quebe dxuluxunézruje' na,

na' benne' xrlátaje dxexache lazre' le', ne dx-
unézruje' chee'.

22 Benne' ca' dxelé'e Xránadxu le' chawe', gaca chee
benne' ca' xezr la xu,
na' benne' ca' quebe dxelé'ene' chawe', xelebía
xí'queze'.

23 Da dxelún benne' xrlátaje ca' zaj naca na da ble'e
Xránadxu le', na' dxelé'ene' cháwedau' ca da dx-
elune'.

24 Gate dxelejchaze benne' xrlátaje ca' quebe
cheajlechaze'

tu chi'ize lawe' da nuxru Xránadxu na' benne' ca'.

25 Benne' cuide' guca', ne na'a ba gúxrua',
ne cabata' ble'eda' tu benne' xrlátaje gusán Dios le',
na' quebe xeledá zri'ine zre sue' xelebéaje' guna'.

26 Benne' xrlátaje nigá tu dxexache lázrezqueze',
ne dxunézruje' bi dxexazrje nu benne',
na' zri'ine zre sue' zaj naque' da ba neza chee
bénneache.

27 Québedxa gunu' da calela, san ben da xrlátaje,
na' gaca bánquezu' chadía chacanna,

28 lawe' da nazrí'i Xránadxu da naca li lazre',
ne quebe dxusane' benne' zaj de'e Le'.

Chadía chacanna tu guxúezqueze' benne' ca',
san guzría xi'e xrtia ljwezre benne' ca' dxelune' da
calela.

29 Benne' xrlátaje ca' gaca chee' xezr la xu nigá,
na' xelezrá'queze' chadía chacanna lu xezr la xu.

30 Benne' xrlátaje dxuchálajqueze' da naca sina,
na' ca dxuchi'e naca na xrlátaje.

31 Da nadxixruj bea Dios tu xú'uzqueze na xichaj
lázdawe'.

Chee le' na' quebe cheajchaze bénnea'.

32 Benne' wən da zrinnaj dxenné'e benne' xrlátaje, ne dxuné' ba xuzre gutié' le'.

33 Quebe gusán Xránadxu le' lu na' benne' wən da calela na', ne quebe guzríá xi'e le' gate dxuchi'e chee'.

34 Guleza lazre' Xránadxu, ne ben ca da ba gunné', na' Le' chísaqueze' Lue' chee gaca chiu' xezr la xu nigá.

Gate xelebía xi' benne' dul-la ca', na' lé'enu' na.

35 Ble'eda' tu benne' wən da zrinnaj, nagá'ane' szrente, na' guxánle'e da de chee' ca dxegula tu xaga zrente.

36 Na' gudé chee', na' québedxa zue' na'a.

Bexílaja' le', san quebe nu bezrelda'.

37 Blaba lazre' ca naca chee benne' li lazre', ne gunná' benne' xrlátaje

lawe' da naga cheajsé gaca tu da ba neza chee benne' dxebeze' zri lazre'.

38 Benne' dxeluné' da calela xelebía xí'queze'.

Quebe nu cha' xrtia ljwezre benne' dxeluné' da zrinnaj.

39 Xránadxu Dios guseláquezé' benne' xrlátaje ca', na' Le' gutipe' lazre' benne' ca' lu zra chee da stebe.

40 Xránadxu Dios gácalene' le', ne guselé' le'.

Guselé' le' lu na' benne' ca' dxeluné' da calela, na' guné' gaca chawe' chee' lawe' da buluxrén lazre' Le'.

38

1 Xrana' Dios, quebe til-lu' neda' lu xel-la' dxezrá'a chiu'.

Quebe gudéu' neda' da ba xa' lu xel-la' snia chiu',

2 lawe' da belúe xaga nalá xéche'ze chiu' neda',

na' bē na'u neda'.

³ Quebe bi chawe' zua bēla' dxen chia' lawe' da dxezra'u neda',
ne quebe zaj zua zrita xu'a cháwedau' lawe' da nuna' dul-la.

⁴ Ca naca da zrinnaj da nuna' ba zria cháqueze na xíchaja'.

Zaj naca na chia' ca tu xua' zí'ile'e.

⁵ We' da zaj zria bēl-la' dxen chia' ba dxelelá na,
ne ba dxeluzru na,

da na' dxaca chia' lawe' da bēna' da calela.

⁶ Nucache lawa', ne dxexedué'ele'eda',
ne dxebezre xacha' te zra chizrela,

⁷ lawe' da ca naca bēl-la' dxen chia' dxelá na,
ne quebe bi chawe' zua bēla' dxen chia'.

⁸ Nate ni'a na'a, ne dxéqueda' ba naxúzrujne zrita xu'a.

Dxebezre lazra' lawe' da zua stēbe lázrdawa'.

⁹ Xran, ca naca da dxezá lazra' zaj zua na nen Lue',
na' da dxebezre lazra' dxelé'equeznu' Lue'.

¹⁰ Dxate lázrdawa', ne ba bedú lazra',
ne québedxa dxelé'eda' cháwedau'.

¹¹ Dxelexebiga ljwezra', ne le sa' ljwezra' ca' zítu'la
ne chee xízrawe' chia',
na' benne' walíZR chia' ba belexecuase' zítu'la.

¹² Benne' ca' dxelaca lazre' xelútiē' neda' dxu-
luzalē' xralaj,

na' benne' ca' dxelúe lazre' bi gaca chia' dxelenné'
chia'

wabía xi'a, ne tu zaj zúaze' bi xulusaque' neda'.

¹³ Neda' quebe dxenda' ca dxaca chee tu benne'
cuezru,

ne naca' ca tu benne' quebe dxaca nne',
benne' quebe dxexrá dxu'e.

- 14 Naca' ca tu benne' quebe dxenne',
 b́ennea' quebe dxexechebe',
 15 lawe' da dxebeza lazra' Lue', Xrana' Dios.
 Lue' xechebu' waláz chia', Xrana' Dios.
 16 Gunnia': Quebe gu'u lataj xelebene' ne chee da
 dxaca chia'.
 Gate dxeajchazia', quebe gu'u le' lataj xulucá'ana
 szren cuine'
 lawe' da zua' lu da baxache'.
 17 Ba zua' cheajcházia',
 ne tu dxelázqueze dutę bel-la' dxen chia'.
 18 Chee le' na' xrúalepequeza' da calela da bęna',
 ne xewine lazra' ca naca dul-la da nabaga'.
 19 Benne' ca' dxeledábage' neda' zaj zúaqueze'
 chawe',
 ne zaj naque' benne' wal-la.
 Zaj naxánle'e benne' ca' dxelecuídene' neda',
 ne quebe bi de da dxagu na zria chia' lau le'.
 20 Benne' ca' dxelune' da calela chee benne' ca'
 dxelune' da xrlátaje
 zaj naque' benne' dxeledábage' neda' lawe' da
 tu dxúnzqueza' da xrlátaje.
 21 Quebe gusanu' neda', Xrana' Dios.
 Dios chia', quebe su' zitu' naga zua'.
 22 Bęn ba xuzre gácalęnu' neda', Xran.
 Nacu' Benne' dxuselé' neda'.

39

- 1 Neda' gunnía': Guxúe xanne' cuina' chee quebe
 guna' dul-la
 lu da guchálaja'.
 Tu guxúe xánnezqueza' ca da guchálaja' dxácatę na'
 zua benne' węn da calela naga zua'.

² Guzúa' zrize ca tu benne' quebe dxaca nnie',
ne québequeze bchálaja' da xrlátaje,
na' bzáladxa xel-la' dxudía chia'.

³ Guca lázrdawa' ca tu da dxala,
na' lu da dxulaba lazra' guca na ca tu xi'.
Na' gunaba' lau Xránadxu, gunnía':

⁴ Xran, ble'e neda' da gaca chia',
ne ájatę zra gaca bana'.
Bzájni'i neda' chaditę nazruzre gatia'.

⁵ Nunu' chia' sua' bábaze zra,
na' iza chia' québequeze bi naca na lau Lue'.
¡Da líqueze quebe bi zaj naca zra cheę xúgute
bénneache!

⁶ ¡Da líqueze zaj naca bénneache ca tu zrúl-laze!
¡Da líqueze dácheze naca zaj dxe' bénneache gunne
xue
cheę xel-la' nabán cheę'!

¡Dxulucúdię' xel-la' gunnía', ne quebe zaj nézene'
nu cheę gaca na!

⁷ Na'a, Xran, ¿bízraqueze cueza lazra'?
Tuzu' Lue' dxal-la' cueza lazra'.

⁸ Bselá neda' lu xúgute da zrinnaj da bena'.
Quebe gu'u lataj benne' xala ca' xelún le' chia'.

⁹ Guzúa' zrize, ne quebe bi bchálaja'
lawe' da Lué'queze bęnu' guca caní chia'.

¹⁰ Becá'a xízrawe' da bzu' lu bela' dxen chia'.
Bache gatia' lu da dxusacu' neda'.

¹¹ Dxudéu' ba xa' tu benne' ba nun dul-la
cheę dxuzéajni'inu' le',
ne ca dxun béadu dxuteba' ladxe' dxuzría xi'u
da nazrí'idxe bénnea'.

¡Da líqueze quebe bi zaj naca zra cheę xúgute
bénneache!

¹² Bene da dxenaba' lau Lue', Xran,

ne bze naga ca da dxuláwizra' Lue'.
 Quebe su' zrize gate zua' dxebezra' lau'
 lawe' da naca' lau Lue' ca tu benne' dxedaze', ne
 quebe de lizre',
 ne naca' ca tu benne' quebe de xezr la xu chee'
 ca gulaca xra xrtawa' ca'.

¹³ Bsan neda' chee gata' lataj xezí' le dipa'
 nédxula ca xexá'a xenitia'.

40

¹ Nen dutę xel-la' zren lazre' chia' guleza lazra'
 Xrana' Dios,

na' bze nague' chia', ne benne' da gunábeda' Le'.

² Bebéaje' neda' ca tu lu xędxu situj, ne lu da naca
 ca guna' guzra'.

Bzue' ní'a ca tu lu xiaj xre, ne begu'e neda' neza li.

³ Bęe' dxul-la' tu da cube da naca na da dxue
 lá'ana'
 Xránadxu.

Benne' zante xeelé'ene' da nigá dxune', na'
 xelezrebe' Le',

ne xulxréń lazre' Xránadxu Dios.

⁴ Ba neza zrentę naca na chee bęnea' dxuxréń
 lazre'

Xránadxu Dios,

ne quebe dxune' ca dxelún benne' ca' dxulucá'ana
 szreę'

bedáu' xiaj xaga ca',

ne quegá ca dxelún benne' ca' dxelún lazre'.

⁵ Da zante bęnu', Xrana' Dios, da dxebánentu',
 ne ca zaj naca da dxezá lazru' gunu' cheętu'
 quebe gaca gulábantu' lau Lue'.

Chela nu guzenda' ca zaj naca na,

ne che guchálaja' chee na, quebe baben tu na.

- 6 Quebe dxezaca ba lazru' béadu ca' gutia' lau',
 u da gunna' Lue',
 ne quebe gunabu' béadu ca' guzézxea' lau', u dxen
 chee
 béadu ca' da guzúa' lau' ne chee dula nabaga',
 san gusalaju' naga' chee xenda' chi'u.
- 7 Nadxa gunnía': Guná' xque, za'a neda'.
 Lu xiche lá'azxa naxúaj na ca naca chia'.
- 8 Dxezaca ba lazra' guna' ca da dxaca lazru' Lue',
 Dios chia',
 na' da nadxixruj be'u zua na lu xichaj lázrdawa'.
- 9 Ca naca da xrlátaje chiu' ba bzenda' bénneache
 naga zaj nazraga chiu' bénneache zante.
 Gunná' xque, quebe guzúa' zria',
 ca nézqueznu' Lue', Xrana' Dios.
- 10 Quebe bcácheza' ca da xrlátaje chiu' lu lázrdawa'.
 Ba bchálajqueza' ca naca xel-la' li lazre' chiu',
 ne ca dxuseláu' bénneache.
 Quebe guzúa' zri ca naca xel-la' dxexache lazre'
 chiu',
 ne ca naca da li chiu' ládujla benne' zante zaj
 nazrague' chiu'.
- 11 Xran, quebe chenu' xexache lazru' neda'.
 Xel-la' dxexache lazre' chiu', ne da li chiu'
 tu dxelácalezqueze na neda'.
- 12 Lawe' da ba guléchajle'e da calela ca' neda',
 da calela ca' da ba nuna' zaj zria na neda',
 na' quebe gaca nna'a naga zu'.
 Zaj naxándxa na ca zaj naca xicha xíchaja', na'
 dxedú lazra'.
- 13 Dxenaba' lau', Xran, guseláu' neda'.
 Xran, ben ba xuzre gácalenu' neda'.
- 14 Ben xelexedué'e, ne xeleque zréaje

xúgute benne' ca' dxelaca lazre' xelútię' neda'.

Ben xeajxaca bzébela, ne xelexedué'e

benne' ca' dxelezá lazre' xelune' chia' da calęla.

¹⁵ Ben xeleque zréaje' lawe' da belún zréaje' neda' benne' ca' gulé'e neda': "E, e."

¹⁶ Ben xelebé, ne xelezúe lu da ba neza xúgute benne' ca' dxelebeze' Lue', ne ben xelennáqueze benne' ca' zaj nazrí'ine' Lue', weselá cheę'.

Xelenné': "Xegá'ana szrénqueze Xránadxu."

¹⁷ Láqueze sua' neda' lu da ba xa', ne lu da baxache', guxúequeze Xrana' Dios ájala gunę' chia'.

Nacu' Benne' dxácalęne' neda', ne Benne' weselá chia'.

Dios chia', quebe chenu' gácalęnu' neda'.

41

¹ Ba neza zrentę naca na cheę bénnea' dxe'e gunne xue cheę benne' xache'.

Lu zra gate zue' lu da stębe, guselá Xránadxu bénnea'.

² Xránadxu guxúequeze' le', ne gunézruje' le' xel-la' nabán.

Gaca na tu da ba neza zrentę cheę bénnea' lu xęzr la xu nigá,

na' quebe gudé Xránadxu le' lu na' benne' ca' dxeledábague' Le'.

³ Xránadxu Dios gúxruqueze' le' gate zúe' lu xel-la' dxudía.

Gun chawę' dute da naque' gate na' quebe chawe' zue'.

⁴ Gunnía': Xrana' Dios, bexache lazre' neda'.

Bexún bēnne'du xu'a lawe' da bēna' dul-la gate
gudábaga' Lue'.

⁵ Benne' ca' dxeledábage' neda' dxelenné' chia' da
calela.

Dxellené': “¿Bátala gate benne' nigá, ne xenite
le'?”

⁶ Che xedajlenné'e neda', dxelún lazre'.

Dxelebéaje' neda' dizra' chee bi da calela gaca
xelenné' chia',

na' gate dxelexedxúaje', na' dxelexrúe' dizra' na'.

⁷ Gate dxelezraga benne' dxelecuídené' neda',
na' tu dxelennézqueze' chia'.

Tu dxuluchálajlezqueze' ljwezre' chia' neda' da
naca
da calela, dxelenné':

⁸ “Ba guxú'e tu xízrawe' da gute na le',
ne québedxa xexásaqueze' ga na' de'.”

⁹ Cá'anqueze bēnnea' guleza zri lazre' nen neda',
bēnnea' bxren lazra', na' gudágulequeze' neda',
benne' nigá dxedábagazegue' neda'.

¹⁰ Lue', Xrana' Dios, bexache lazre' neda',
ne bēn xexasa' neda',

na' xunézruja' benne' ca' ca da dxal-la' xelezí'e.

¹¹ Caníqueze nezda' ba bēna' da dxezaca ba lazru'
Lue',

chee quebe bi xelebéle benne' ca' dxeledábage'
neda'.

¹² Ca naca chia' neda', ba bēxruquezu' neda' lawe'
da
naca' du lazre',

ne ba bzu' neda' lau Lue' chadía chacanna.

¹³ ¡Gaca ba Xránadxu, Dios chee benne' Israel ca'
gaxuane iza, ne chadía chacanna!

¡Ca'an naca na, ne ca'an gaca na!

42

¹ Ca dxun bzrina' xixre' dxebezre xa'aba' lawe' da
dxebíleba' nisa,

ca' dxuláwizra bénne'du xu'a da naca chiu', Dios.

² Dxebile bénne'du xu'a da naca chiu', Dios ban.

¿Bata gaca xida' chee guzúa cuina' lau Dios?

³ Nisa xuzru xiaj lawa' guca na ca xeta dxawa'
te zra chizrela,

dxácate na' gulé'e neda' xúgute zra: “¿Ga na' Dios
chiu'?”

⁴ Dxajsá lazra' chee da caní, ne dxebezre lazra'.

Dxajsá lazra' ca guxá'alena' benne' zan ca',
ne nuzúa' lawe' le' lizre Dios.

Tu dxúl-lazquezdxu lu xel-la' dxebé,
ne dxue lá'anaquezdxu Dios lu laní.

⁵ ¿Bizr chee na' dxate ni'a na'u, bénne'du xu'a?

¿Bizr chee na' zu' stébe lu xichaj lázrdawa'?

Guleza lazre' Dios lawe' da güe lá'anaqueza' Le' da
xula.

Naque' Benne' dxuselé' neda', ne Dios chia'.

⁶ Dios chia', ba nate ni'a na' bénne'du xu'a
lu xichaj lázrdawa'.

Chee le' na' dxajsá lazra' chiu' nigá zua' lu xezr la
xu

xechalá'a xegu Jordán,

ne lu xezr la xu chee benne' Hermón naga zua xi'a
Mizar.

⁷ Ca schaga da dxun nísadau', ne da dxun tu bdua
nisa

zren chiu', Dios,

ca' dxeque bénne'du xu'a lawe' da dxusaca zi' na'u
neda'.

8 Te zra xexache lazre' Xránadxu neda',
na' chizrela tu gúl-lazqueza' da güe lá'ana' Le',
ne tu guchálajlezqueza' Dios,

Bénnea' dxunne' xel-la' nabán chia'.

9 Xapa' Dios: Lué'queze dxucu'uju' neda'.

¿Bizr chee na' nal-la lazru' neda'?

¿Bizr chee na' dxewí'ine lazra' lawe' da dxusaca zi'
benne' dxedábage' neda'?

10 Ca tu benne' dxelé'e zrita xu'a, ca' dxelún benne'
ca'
chia', dxelún le' chia'.

Tu zra tu zra dxelenné' chia': "¿Ga na' Dios chiu'?"

11 ¿Bizr chee na' dxate ni'a na'u, benne'du xu'a?

¿Bizr chee na' zu' stębe lu xichaj lázrdawa'?

Guleza lazre' Dios lawe' da güe lá'anaqueza' Le' da
xula.

Naque' Benne' dxuselé' neda', ne Dios chia'.

43

1 Bchi'a chia', Dios, ne ble'e lau naca' xrlátaje.

Bselá neda' lu na' benne' ca' dxuluzúe' Lue'
chalá'ala,

ne lu na' benne' ca' dxelezí xę'e, ne dxelune' da
zrinnaj.

2 Nacu' Lue' Dios chia', ne dxuzé chuchu' neda'.

¿Bizr chee na' nusán lazru' neda'?

¿Bizr chee na' dxewí'ine lazra' lawe' da dxusaca zi'
neda'

benne' ca' dxeledábage' neda'?

3 Gusel-la chia' xel-la' naxaní' chiu', ne da li chiu'.

Da caní xulusí na neda' neza.

Xeleché na neda' lu xi'a lá'azxa chiu', ne naga
zúaquezu' Lue'.

4 Chu'a naga zua lucugu cheē Dios.
 Chu'a lau Dios, Bénnea' dxunē̄ dxebeda', na' zua' lu
 da ba neza.

Güe lá'ana' Lue' nen da zríadi'i na du, Dios chia'.

5 ¿Bizr cheē na' dxate ni'a na'u, bēnne' du xu'a?
 ¿Bizr cheē na' zu' stebe lu xichaj lázrdawa'?
 Guleza lazre' Dios lawe' da güe lá'anaqueza' Le' da
 xula.
 Naquē' Benne' dxuselé' neda', ne Dios chia'.

44

1 Dios, bache bēnentu' lawe' da buluzén Xra
 xrtáuntu' netu'
 ca naca da bēnu' lu zra cheē', da naca na iza ba
 guledé na.

2 Bzria xi'u bēneache xēzr la xu xezícadxa ca' lau
 xra xrtauntu' ca', nā' bzu' le' xлатаj benne' ca'.
 Bsaca zi'u benne' xēzr la xu ca', san bzua chachu'
 bēneache chiu' lu xēzr la xu nigá.

3 Xra xrtáuntu' ca' quebe gulezi'e xēzr la xu nigá
 nen xia nalá cheéqueze',
 Ne quebe buluselá cuine' nen xel-la' wal-la da zaj
 nape'.

Lue' bseláunquezu' le' nen xel-la' waca chiu',
 ne nen xel-la' wal-la chiu',
 ne nen xel-la' naxaní' chiu', lawe' da bezaca ba
 lazru' nen le'.

4 Dios, nacu' wenná bea chia'.
 Bselá zri'ine zre sua Jacob.

5 Nen xel-la' waca chiu' xebéajntu' benne' ca'
 dxeledábague' netu'.
 Lu Lau' Lue' guchuchuj guléajntu' benne' ca'

dxeledábague' netu'.

⁶ Quebe guxrén lazra' xaga nalá xéche'ze chia',
ne quebe guselá xia chia' neda'.

⁷ Lue' bcu'uju' netu' lau benne' ca' dxeledábague'
netu',

ne benu' belexedué'e benne' ca' belecuídenę' netu'.

⁸ Ne cheę Dios tu súazquezentu' lu da ba neza,
na' chadía chacanna güe lá'anantu' Lau' Lue'.

⁹ Nusán lazru' netu', ne nunu' dxexedué'entu',
ne quebe dxéajłenu' benne' cheętu' ca' dxjaque'
wedil-la.

¹⁰ Benu' buzrúnjntu' lau benne' ca' dxeledábague'
netu',

na' benne' ca' dxelecuídenę' netu' gulegüę' ca naca
da nápantu'.

¹¹ Bdeu' netu' ca zrila' ca' lu na' benne' xelútię'
netu',

ne ba beše dínnaju' netu' ládujla benne' xęzr la xu
ca'.

¹² Bdéu' netu', benne' chiu' ca' cá'aze, ne quebe bi
guzi'u.

¹³ Dxunu' dxelún la benne' walízre cheętu'.

Benne' zaj naxéchaję' netu' dxelún lę', ne dxu-
luzrizre' cheętu'.

¹⁴ Nuzú' netu' ca tu da dxelenná benne' xęzr la xu
ca'

naca na da baxáchele'e.

Xúguteę benne' dxelelé'eng' netu' dxulutá xíchaję',
ne dxelexebánenę' ca da baxache' nácantu'.

¹⁵ Tu zra tu zra tu dxexedué'ezquezda',

ne tu zúazqueza' lu da stébeleę'

¹⁶ lawe' da dxelenné' schanni' chia', ne dxuluzúę'
neda' chalá'ala,

ne dxulutíl-lalę neda' benne' ca' dxeledábague'
neda',

nen benne' ca' dxelexebeaj lazre' neda'.

¹⁷ Xúgute da caní dxaca cheentu', ne quebe ne
gal-la lazrentu' Lue',

ne quebe ne guzúantu' chalá'ala xel-la' wezría
chiu'.

¹⁸ Quebe ne gusán lázrentu' Lue',

ne quebe ne xecuásantu' lu da gunná be'enu' netu'.

¹⁹ ¿Bizr cheę na' nuzú' netu' chalá'ala tu lataj cheę
bę snia ca',

ne nuzú' netu' naga xelaze gátentu'?

²⁰ La gul-la lázrentu' La Dios cheędxu,

ne bca'ana szrentu' tu dios da quebe bi zaca,

²¹ ¿quebe dxal-la' zra'a Dios netu' ne cheę da nigá?

Le' nézquezne' da zaj zua lu xichaj lázxdau
bénneache.

²² Lawe' da nácantu' chiu', tu zra tu zra ba
zaj zúatequeze' xelútię' netu'.

Zaj nune' netu' ca zrila' ca' ba zua xelútię'-ba'.

²³ ¡Bebán, Xran!

¿Bizr cheę na' dxasiu'?

¡Bebán!

¡Quebe su' zitu' tu chi'ize!

²⁴ ¿Bizr cheę na' nucache cuinu',

ne quebe dxeque be'enu' ca dxezaca zí'intu',

ne ca dxuluchine benne' ca' netu'?

²⁵ Ba nate ni'a na' bénne'du xú'untu', ne dxea-
jcházetęntu' lu xu,

na' ba détentu' sudxú'ala lu xęzr la xu.

²⁶ ¡Guxasa, gúcale netu',

ne dutę xel-la' dxexache lazre' chiu', bselá netu'!

45

- 1 Xu'u lászrdawa' tu dizra' xrtante,
na' gúl-laqueza' tu da naca chee Wenná Bea.
Gúl-laqueza' tu da bzuaj tu benne' dxuchálajle'e
cháwedau'.
- 2 Nacu' xrtánle'edxa ca xúgute bénneache.
Dxezilé'entu' ba neza chee dizra' dxuchálaju',
lawe' da nucá'anaqueze Dios Lue' cháwedau' tu
chí'izqueze.
- 3 Bda' xia chiu' dxu'a le'u, Lue', benne' wal-la,
lu dute xel-la' szren chiu', ne xel-la' dxenná bea
chiu'.
- 4 Lu xel-la' szren chiu' chepe bánquezu'.
Bchine dizra' li, ne xel-la' dxexruj lazre', ne da
xrlátaje,
na' guzėjajni'i Cuinu' da zri'a ca'.
- 5 Zaj nalále'e xaga nalá xéche'ze chiu' ca',
da xelute na benne' xezr la xu ca' lau Lue',
ne cheajlechaze na lu lászrdau benne' ca' dx-
eledábague' Lue'.
- 6 Lataj blau naga dxe'u, Dios, naca na da chadía
chacanna,
ne súatequeze na.
¡Xrlátaje naca ca dxenná be'u!
- 7 Nazri'inu' da naca xrlátaje, ne dxecuídenu' da
calela.
Chee le ná' ba nuzúa Dios chiu' Lue' xlátaju',
naga dxebéle'edxenu' ca le sa' ljwezru' ca'.
- 8 Dxelá zixre zra lanu' nen xala da naca na nizre
xaga,
ne xiaj, da ca' dxelelá na zixre.
Lu xu'u lizru' da zácale'e na dxuluzúe' Lue' lu da ba
neza.

9 Bi nu'ula chee wenná bea ca' zaj zúabe' ládujla
 nu'ula
 chiu' ca' zaj naque' blaudxa.
 Chalá'a xabela chiu' dxe' nu'ula gácabe' zru'ulu'
 nácube' oro
 da za na xezre Ofir.

10 Bene, nú'uladau', ne gunná' xque, ne bze naga da
 nnia':

Bzala lazru' lazriu' ne lizre xrau',

11 na' benne' wenná bea sa lazre' xel-la' xrtan
 chiu'.

Bzexruj lazru' lau le' lawe' da naca le' xranu'.

12 Xelelá' nu'ula xezre Tiro lau lue', zaj nu'e da
 xelunne' chiu',

na' xelenaba benne' gunní'a ca' gunu' tu culuén
 chee'.

13 Xrtanle'e naca bi nu'ula chee wenná bea lu xu'u
 naga zue'.

Zra lánabe' nazí' lechítaje na oro.

14 Xeleché'e-be' lau wenná bea, nácube' zra lánabe'
 da núale'e lechítaje na.

Nu'ula wégu'du ca' chjácabe' cuzru lebe'.

Nu'ula caní, nu'ula ljwézrebe' xuluzúabe' lawe' lue'.

15 Lu duté xel-la' dxebé, ne lu da ba neza xeleché'e-
 be',

na' xelú'ube' lu xu'u lizru', wenná bea.

16 Waláz chee xra xrna'u xelexezúa zri'inu',

bi ca' gunu' xelenná beabe' du gabí'i xezr la xu.

17 Guna' cheajlesá lazre' xúguté bénneache lau' lue'.

Chee le na' xelúe lá'ana bénneache lue' chadía cha-
 canna,

ne gaxuane iza.

46

¹ Dios naque' Benne' dxuxúe' dxi'u, ne dxune' dxi'u
benne' wal-la.

Zúatequeze' gácalene' dxi'u gate dxededxu xel-la'
zi'.

² Chee le' na', quebe zrébedxu lácala xru' xezr la xu
nigá

na' cheajlechaze xi'a ca' lu nísadau',

³ ne lácala xeajxruza zren chee nísadau' xuluninne
na,

ne dxelúnle'e na schaga,

na' welezrízequeze xi'a ca' ne chee da dxezrú'.

⁴ De tu xegu da dxunna na xel-la' dxebé lu xezre
chee Dios,

ne lu xu'u lá'azxa chee Dios, Benne' nape' dute xel-
la' szren.

⁵ Dios zue' xezre na', ne cabata' cuía xi na.

Dxaní'sise' xide' gácalene' bénneache zaj zre'e xezre
na'.

⁶ Dxelezrébele'e benne' xezr la xu ca',

na' dxelezrize benne' chee wenná bea ca'.

Dxenné Dios ca dxenné guziu', na' dxexuna xezr
la xu.

⁷ Dios, Bénnea' nape' dute xel-la' waca, zúalene'
dxi'u.

Dios na' chee Jacob dxucache chawe' dxi'u.

⁸ Le da lé'ele da ca' nun Xránadxu.

Le nna' ca naca da dxebánedxu da nune' lu xezr la
xu.

⁹ Dxebeque zrie' wedil-la da dxelaca du gabí'i xezr
la xu.

Dxuzúzruje' da dxuzala na xaga nalá xéche'ze ca',

ne dxíchuję' xaga tuche' ca' cheę wedil-la,
na' dxuzezxe' da ca' zaj nache' benne' wedil-la ca'.

¹⁰ Dxenná Dios: “Le sua zrize, ne le xúnbea naca' Dios.

Naca' szrendxa ca zaj naca xúgute cue' xęzr la xu.
Naca' szrendxa ca dutę xęzr la xu.”

¹¹ Dios, Bénnea' nape' dutę xel-la' waca, zúalęę' dxi'u.

Dios na' cheę Jacob dxucache chawe' dxi'u.

47

¹ ¡Le capa na'le, le'e, xúgute bénneache!

¡Le güe lá'ana Dios nen dutę xel-la' dxebé!

² Dخال-la' zrédexu Xránadxu, nape' dutę xel-la' szren.

Naque' Wenná Bea zren dxenná bé'ęę' dutę xęzr la xu.

³ Bzue' benne' xęzr ca' zran ní'adxu.

Bzue' dxi'u cheę nna be'edxu zánęę cue' xęzr la xu ca'.

⁴ Bequę'ę tu xęzr la xu da gaca na cheędxu,

Da naca tu xęzr la xu xrtanę cheę zri'ine zre sua Jacob,

benne' ca' nazrí'ine'.

⁵ Dzegüén Dios naga dxe'ę dxenná be'ę.

Dxelebezre luzu da dxulucęzre' gate dxegüén Xránadxu ga na'.

⁶ ¡Le gul-la da gaca ba Dios!

¡Le gul-la!

¡Le gul-la da gaca ba Wenná Bea cheędxu!

¡Le gul-la!

⁷ ¡Dios naque' Wenná Bea dutę lu xęzr la xu nigá!

¡Le gul-la cheę' nen dutę xel-la' dxéajni'i cheęle!

8 Dxe' Dios naga dxenná be'e, lu lataj na' naca na
lá'azxa.

Dxenná bé'ene' xúgute cue' xezr la xu ca'.

9 Dxelezraga benne' dxelenná bé'ene' xúgute cue'
xezr la xu

tu zren nen bēneache chee Dios chee Abraham.

10 Benne' ca' dxelenná be'e du gabí'i xezr la xu

buludée' xel-la' dxenná bea chee' lu na' Dios.

Le' dxenná bé'ene' xúgute benne' wenná bea ca'.

48

1 ¡Zrente naca Xránadxu!

¡Naca chee' güe lá'analē'edxu Le'

ga naca lu xezre chee Dios cheedxu,

da dxe' na lu xi'a lá'azxa chee'!

2 Sión, da naca na xi'a chee Dios, naca na sibe, ne
xrtante.

Naca na xezre chee Wenná Bea zrente,

da dxunna na xel-la' dxebé dute xezr la xu nigá.

3 Dios ba blé'ene' dxucache chawe' dxi'u,

lu xu'u zaca ca' chee xezre chee' na'.

4 Belezraga benne' wenná bea ca',

na' belelé'e chee xeledíl-lalēne' xezre nigá,

5 na' gate belelé'ene' na, na' belexebánene'.

Beleznébe', na' buluzrúnnuje'.

6 Gulezré'e lu da stebe,

ne gulezúe' xel-la' dxudía ca dxaca chee tu nu'ula

ba zua sane' bidau'.

7 Gulaque' ca da ca' dxeledá lawe' nísadau' dxexrite
na

gate dxácale'e be' bdunu' lu nísadau'.

8 Bendxu ca da ben Dios, na' na'a ba ble'edxu na,

ga naca lu xezre chee Xránadxu, nape' dute xel-la'
waca,

da naca na xezre chee Xránadxu Dios.

Le' guzúa chawe' xezre nigá chadía chacanna.

⁹ Ga naca lu xudau' chiu' Lue', Dios

dxajsá lázredxu ca naca xel-la' zri'i lazre' zren chiu'.

¹⁰ Gáteteze na' dxelúe lá'ana bénneache Lue',

na' ca naca xel-la' szren chiu' dxezrín na
du gabí'i xezr la xu.

Ca naca da xrlátaje dxenná be'u.

¹¹ Xelebéle'e bénneache zaj zre'e Sión.

Xelebéle'e bénneache zaj zre'e xezre ca' chee Judá
ne chee da dxuchi'u chee'.

¹² Le'e, bénneache chee Dios, le chechaj dxu'a xezre
na',

ne le gulaba ca zaj naca xu'u sibe ca',
da dxuluzé chacha na xezre na'.

¹³ Le nna' xque ca naca ze'e zren naxechaj na xezre
na'.

Le nna' xanne' ca zaj naca xu'u wal-la chee na,
chee guzenle bi chee le ca naca xezre na'.

¹⁴ Dios nigá nácaqueze' Dios cheedxu chadía cha-
canna.

Le' tu gulé'ezquezne' dxi'u neza.

49

¹ Le xen da nigá, le'e, benne' xúgute cue' xezr la xu.

Le guzé nágale, le'e, benne' duté xezr la xu,

² le'e, benne' blau, ne le'e, benne' xezícadxa,
le'e, benne' gunní'a, ne le'e, benne' xache'.

³ Guchálajqueza' xel-la' sina,
ne guzėjní'ida' le'e da xu'u lázrdawa'.

⁴ Guzé naga' tu dizra' sina.

Gúl-laqueza' chee tu da nagache,
ne quinnia' da zríadi'i na du chen.

5 ¿Bizr chee na' dxun na ba xen zreba' lu zra chee
da stebe,
gate naxechaj da calela neda' da dxelún benne'
dxeledábague' neda'?

6 Benne' ca' dxuluxrén lazre' da zaj de chee',
ne dxulucá'ana szren cuine' lawe' da zaj nápalē'e.

7 Quebe xelezéqueñe' xelexá'awe' le sa' ljwezre',
ne quebe gaca xulunézruje' Dios da guselá na le'

8-9 chee tu xelaca bánzqueze',
ne chee cabata' xeluzru beł-la' dxen chee'
lawe' da zrente naca da dxexa'u na xel-la' nabán
chee bēneache,

ne cabata' seque' nu benne' quízruje' na.

10 Xelelé'ene' dxelátequeze benne' sina ca',
ne xelúzruē' cáteze dxaca chee benne' xala ca',
ne chee benne' lázrdau zide' ca',
na' dxulucá'ane' xel-la' gunní'a chee' lu na' benne'
xula ca'.

11 Dxeléqueñe' wazráqueze zri'ine zre sue' chadía
chacanna,
na' xelexegá'ana lizre' chee xelaca na chee xúgute
cuen
xrtia ljwezre',

na' dxelu'e la xezr la xu chee' ca' ca zaj nazí
láqueze'.

12 Quebe xelexegá'anatequeze bēneache lu da ba
lá'ana.

Zaj naque' ca be xixre' ca', be dxeláteba'.

13 Ca da dxelune' naca na da xálaze,
na' dxelexezaca ba lazre' xrtia ljwezre' ca' nen da
dxelennaze'.

14 Zaj naque' ca tu cue' zrila' zjácaba' lataj ba xa',
naga guxúe xel-la' gute leba'.

Benne' xrlátaje ca' xelenná bé'ene' benne' gunnía
 ca'
 gate za' chaní',
 na' xelebía xi' da ca' guta' chee',
 na' lataj ba xa' gaca na naga tu xelezúazqueze'.
 15 Dios xexá'awe' xel-la' nabán chia' lu lataj ba xa'
 lawe' da xeché'e neda' naga zúaqueze' Le'.
 16 Quebe su' stebe gate nu benne' dxezrué'ene' xel-
 la' gunnía,
 ne gate dxune' lizre' da zácale'edxa,
 17 lawe' da gate gatie' quebe bi xexu'e,
 ne quebe chéajle' xel-la' gunnía' chee' le'.
 18 Lácala dxácatę naca bane' dxe cuine' zue'
 lu da ba neza zrente,
 na' dxelúe lá'ana bėnneache le' gate dxepę bane',
 19 san chu'e naga zaj zra xra xrtawe' ca',
 ne cabátadxa lé'ene' xel-la' naxaní'.
 20 Bėnnea' dxelapa bėnneache le' ba lá'ana san
 quebe
 bi dxéajni'ine'
 naque' ca be xixre' ca', be dxeláteba'.

50

1 Ba gunné Xránadxu Dios, ne ba nutube' bėnneache
 chee' dute' xezr la xu,
 benne' zaj zre'e naga dxalaj gubizra,
 ne benne' zaj zre'e naga dxebía na.
 2 Lu xi'a Sión, da naca na xrtánle'e ba bzaní' Dios.
 3 Xelá' Dios cheedxu, ne quebe sua zrie'.
 Gálajqueze xi' lau Le',
 ne gácale'e be' bdunu' da chechaj na Le'.
 4 Xutúbequeze' benne' zaj zre'e xabáa na'ala,
 ne benne' zaj zre'e xezr la xu,

cheē guchi'e cheē bēneache chee'.

⁵ Dxenné': "Le xutube benne' chia' ca',
benne' ca' belune' tu xel-la' wezríá nen neda'
da buluzúa chúchue' nen dxen cheē béadu ca'."

⁶ Da zua xabáala gulé'e lau na naquē' xrlátaje,
lawe' da naca Dios Benne' guchi'e cheē bēneache.

⁷ Dxenné': "Le xen, bēneache chia', na' guchálaja'.
Le guzé nágale, benne' Israel, na' nnia'
da gagu na zria cheēle.

Neda', Dios, naca' Dios cheēle.

⁸ Quebe til-la' le'e ca naca béadu ca' bētele lawa',
ne ca naca béadu ca' bzézele,
da zaj zúaqueze na lawa' neda'.

⁹ Quebe ca'a lu na'ale mēdu ca',
ne chivo biu ca', bē nápaquezle

¹⁰ lawe' da zaj naca chia' xúgutē bē xixre' ca',
ne zane gaxúa bē xixre' zaj zraba' lu xí'adu ca'.

¹¹ Xu'u lu na'a xúgutē bē zua xrila,
ne naca chia' xúgutē bē zaj naca banba'.

¹² Chela neda' dxeduna', quebe xapa' le'e ca'
lawe' da naca chia' xezr la xu, ne xúgutē da dē lawe
na.

¹³ ¿Dxun na ba xen gawa' bēla' bēze ca'?

¿Xí'aja' dxen cheē chivo biu ca'?

¹⁴ Le guzúa lau Dios da güe lá'anale Le'
ne le gunezruj ca da guchēbe lázrele lau Dios
szrentē.

¹⁵ Bláwizra neda' lu zra zu' lu da zi' da xa',
na' guselá' lue', na' lue' gapu' neda' ba lá'ana."

¹⁶ Dios guzre' benne' wen da calēla:

"¿Bi dxéquenu' lue', dxuchálaju' ca nadxixruj bi'a,
ne dxenníu' ca naca cheē xel-la' wezríá chia'?

¹⁷ Lue' dxecuídenu' neda' che dxusízreda' lue',

ne dxuzú' chala'ala dizra' chia'.

18 Gate dxelé'enu' gubán, na' dxunu' le' tu zren,
ne nacu' tu zren benne' ca' dxeledálene' nu'ula
quebe zaj naca zru'ule'.

19 Dxuchálajquezu' da calela,
ne tu dxúnzquezu' da wen lazre'.

20 Tu dxennézquezu' da calela chee bi bíchequezu',
Ne dxagu' zria chee bi chee xrná'aquezu'.

21 Da caní benu', na' neda' guzúa' zrize.

Gúquenu' naca' tu benne' ca nacu' lue'.

Na'a wadíl-laqueza' lue', ne gulé'eda' lue' ca ba
benu'."

22 Le chéajni'i da nigá na'a, le'e dxal-la lázrele Dios.
Ga gaze guzuzruj Dios le'e, ne québedxa sua nu
guselá le'e.

23 Bénnea' guzúe' lawa' da güe lá'ane' neda' gape'
neda' ba lá'ana,
na' bénnea' dxuxuchá cuine' chee guné' da xrlátaje,
gulé'eda' le' ca guselá' le', naca' Dios chee'.

51

1 Gúcale neda', Dios, lu duté xel-la' dxexache lazre'
chiu'.

Duté xel-la' dxexache lazre' chiu' bsula zria da
nabaga'.

2 Gudibe neda' ca naca da calela da nuna',
ne bca'ana chawe' neda' chee dul-la da bēna',

3 lawe' da dxexúnbe'a ca bēna' gudábaga' Lue',
ne ca naca dul-la chia' tu dxáguze na zria neda'.

4 Lau' Lue' bēna' dul-la.

Awe', lau' Lué'queze, ne ba bēna' da calela lau' Lue'.
Caní dxaca na chia' chee gaca bea nacu' xrlátaje lu
da dxenníu',

ne nacu' du lazre' ca da dxuchi'u chee bēneache.

- 5 Gunná' xque, báchequeze nabaga' dul-la gate gúlajtea',
ne lu dul-la zúaqueza' gate guzrán xrna'a neda'.
- 6 Lue' dxezá lazru' sua da li lu xichaj lázrdawa',
ne lu xichaj lázrdawa' ba bzéajni'inu' neda' da naca sina.
- 7 Bca'ana chawe' neda' nen da na' dxuchínenu',
na' xegá'ana' xrlátaje.
Gudibe neda', na' gaca' chíchedxa ca tu bezxe'.
- 8 Ben xenda' xel-la' dxebé, ne da ba neza,
na' xelexezí' le dipa zrita xu'a, da ba gudíchaju'.
- 9 Quebe gusá lazru' ca naca dul-la da bēna',
na' bsula xúgute da calela da nuna'.
- 10 Dios, bzua neda' tu lázrdawa' xrlátaje,
ne bzua tu be' li lazre' lu xichaj lázrdawa'.
- 11 Quebe gucasu' neda' lau' Lue',
ne quebe xeca'u lu xichaj lázrdawa' be' lá'azxa chiu'.
- 12 Bexunna neda' xel-la' dxebé chee xel-la' weselá chiu',
ne bzua chuchu be' chawe' da xu'a.
- 13 Nadxa gusédeda' benne' ca' dxelunę' da zrinnaj ca dxaca lazru' xelunę',
na' benne' dul-la ca' xelexexaque' chiu' Lue'.
- 14 Bselá neda' lu zria da nabaga', betia' benne'.
Lue' Dios, nacu' Dios dxuseláu' neda',
na' gúl-laqueza' chee da xrlátaje nacu' Lue'.
- 15 Xran, gusalaj dxu'a,
na' guzenda' bēneache da dxue lá'ana' Lue'.
- 16 Quebe dxaca lazru' béadu ca' gutia'-ba' lau',
ne quebe dxaca lazru' béadu ca' guzézxea' lau'.
- 17 Da guzúadxu lau Dios da dxaca lazre' naca na tu lázxdau dxexruj lazre'.
Tu lázxdau dxexruj lazre', ne da dxexíaje lazre'

quebe guzú' chalá'ala, Dios.

18 Dute xel-la' zri'i lazre' chiu', ben gaca chawe'
chee
xezre Sión.

Bsegula ze'e da nzechaj na xezre Jerusalén.

19 Nadxa xezaca ba lazru' nen béadu ca' gútentu'
lau'
dute da naca xrlátaje cheentu',
ne béadu ca', ne da du ca' guzéxentu' lau'.
Nadxa xelútię' béadu ca' lu cugu chiu'.

52

1 ¿Bizr chee na' dxucá'ana szren cuinu' chee da
calela

da nunu', lue', benne' wal-la?

Tu zúazqueze xel-la' dxexache lazre' chee Dios.

2 Tu dxuchálajzquezu' chee da calela da gunu' chee
le sa' ljwezru'.

Da dxenníu' naca na ca tu xia da nalále'e, dxezí
xe'u ljwezru'.

3 Nazrí'idxenu' da calela quézcala da xrlátaje,
ne dxedánnedxenu' da wen lazre' quézcala da li.

4 Nazri'inu' xúgute dizra' da dxulucá'ana ditaj na
bénneache,

lue', benne' dxezí xe'u.

5 Chee le na' guzríá xi' Dios lue' tu chí'izqueze.

Waxele' lue', ne xequé'e lue' naga zúaquezu',
ne gucuase' lue' naga zaj zra' benne' ban ca'.

6 Xelelé'e benne' xrlátaje ca' da nigá, na'
xeleznébequeze'.

Xuluzrízrqueze' chiu' lue', xelenné':

7 "Le na' xque, benne' nigá quebe bxren lazre' Dios
chee gucu'uje' le'.

Bxren lázrequeze' ca naca xel-la' gunní'a zrente
chee',

ne guzúaqueze' lu da calela da dxune'."

⁸Neda' naca' ca tu xaga olivo xa'a lu xu'u lizre Dios.

Tu dxuxrén lázrezqueza' xel-la' dxexache lazre'
chee'

Dios chadía chacanna.

⁹Güe lá'anaqueza' Lue' chadía chacanna lawe' da
benu' da caní,

ne cueza lazra' lau Lue' lawe' da naca na xrlátaje
lau xúgute'

benne' chiu' Lue'.

53

¹Benne' xala ca' dxelenná lu lázrdawe': Quebe zua
Dios.

Xúgute' zaj naque' sban, ne zaj nune' da calela.

Quebe nu chilá' benne' dxune' da xrlátaje.

²Dios zue' xabáa dxenné'e bénneache

chee' lé'ene' che zua tu benne' sina,

bénnea' dxape' Dios ba lá'ana.

³Xúgute' benne' zaj nabéaj xíchaje' Dios.

Xúgute' zaj naque' sban.

Quebe nu chilá' benne' dxune' da xrlátaje, netú
gue'.

⁴Dxenná Dios: "¿Quebe dxeléajni'i benne' caní
dxelune' da calela?

Dxele'aj dxelawe' da dxelebane' chee' bénneache
chia',

ne quebe dxelexílaje' neda'."

⁵Za zrin zra xelexruse' ca da quebe ne xezeaque',
lawe' da gusedinnaj Dios zrita ca' chee' benne'

guledábague' bénneache chee'.

Dios na' nuzúe' chalá'ala benne' ca',
na' bēneache chee' xuluzría xi'e benne' ca'.
⁶ Dxenaba' Dios gunē' dxuaj Sión da gácale na
benne' Israel ca'.
Gate ba nun Dios xelezrín bēneache chee' lu xezr
la xu
cheéqueze',
xelebé zri'ine zre sua Jacob,
ne xelezúa lu da ba neza benne' Israel ca'.

54

¹ Bselá neda', Dios, nen xel-la' waca chiu'.
Gúcale neda', Dios, nen xel-la' wal-la chiu'.
² Bene da dxenaba' lau', Dios, ne bechebe chia'.
Bze naga da guchálajlena' Lue'.
³ Za'aca benne' snia ca' xeledíl-lalene' neda'.
Benne' xichaj zra'a ca' dxelaca lazre' xelútiē' neda',
benne' ca' quebe dxelape' ba lá'ana Lue', Dios.
⁴ Dios naque' Benne' dxácalene' neda'.
Xránadxu Dios zúalene' benne' ca' dxuluxúe' neda'.
⁵ Ca naca da calēla dxelún benne' dxeledábague'
neda',
xuzrí'i Dios na chee' benne' ca'.
Guzría xi'e benne' ca' lawe' da naque' li lazre'.
⁶ Du lazra' cu'a da gudéa' lau Lue', Xran.
Güe lá'anaqueza' Lau' lawe' da nácale'e na xrlátaje.
⁷ Bseláu' neda' lu xúgute da stebe guzúa'.
Ble'eda' gulebía xi' benne' ca' dxeledábague' neda'.

55

¹ Bze naga, Xran, ca da dxuchálajlena' Lue',
ne quebe guzú' chalá'ala ca da dxenaba' lau'.
² Guzúa ban lazre', ne bechebe chia'.

Dxuláwizra' Lue' lu da dxuchálaja', ne zua' stebe,
 3 lawe' da benne' dxeledábague' neda' dxelenné'
 chia',

ne lawe' da dxelún la benne' wen da calela neda'.
 Bulusebague' neda' da zrinnaj,

ne dute xel-la' dxelezá'a zaj nau zi' xuzre' neda'.

4 Dxe' gunne xue lázrdawa' lu bela' dxen chia',
 ne dxuchebe xel-la' gute neda'.

5 Zua' lu xel-la' dxezrebe, ne dxezríztequeza',
 na' zúale neda' da dxuchebe na neda'.

6 Na' gunnía': ¿Nuzra gunna neda' xrila' ca xrila tu
 bsia

chee cha'a lu be'la naga xezí' lazra'?

7 Da líqueze guzrúnnuja' zítu'la,

na' súaqueza' le'e xixre' lawe' lataj.

8 Guna' ba xuzre la' lu be' bdunu', ne lu be' wal-la.

9 Bzria xi' benne' ca' dxelune' da calela, Xran.

Bzaga naze da dxelune',

lawe' da ble'eda' da zrinnaj, ne da calela da dx-
 elune'

lu xezre.

10 Te zra chizrela dxeledé' lawe' ze'e da naxechaj
 na xezre,

ne dxelune' da zrinnaj, ne da calela lu xezre nigá.

11 Nazrate xezre nigá da calela da dxelune',

ne tu dxelúnzqueze' da wen lazre', ne xel-la' dxezí
 xe

lu neza chee na.

12 La guca tu benne' bénnea' dxedábague' neda',

bénnea' ben le' chia',

na' bchaga lawa' da na'.

La guca tu benne' dxecuídene' neda' bénnea'

gudábague' neda',

na' bcache cuina' lau le'.

- 13 Lue', bēnnea', gucu' ca tu le sa' ljwezra'.
Bsi'u neda', ne gucu' tuze neda'.
- 14 Tu zren bchálajdxu du lázredxu,
ne lu xel-la' zri'i lazre' gudadxu lu xu'u lizre Dios.
- 15 Dios, bēn queła xel-la' gute benne' ca' dxelunē'
da caleła chadite.
Bēn xelexú'ē lu lataj ba xa' zaj naca bane',
lawe' da nazrate xu'u lizre' da caleła da dxelunē'.
- 16 Ca naca chia' neda', bláwizra' Dios,
na' Xrana' Dios bselé' neda'.
- 17 Che zílala, ne wagubizra, ne ca dxebía gubizra
guchálajlequeza' Dios, ne guláwizra' Le',
na' Le' xenne' chia'.
- 18 Xexá'awe' bēnne'du xu'a lu wedil-la da dxaca
chia' neda',
ne gunē' cueza' zri lazra',
lácala zaj zra' zánete benne' dxeledábague' neda'.
- 19 Wene Dios, na' guzría xí'queze' benne' ca'.
Naque' Bēnnea' zúatequeze' dxenná be'ē nédxute.
Caní gunē' chee benne' ca' lawe' da quebe dxu-
luché'ē
ca dxelunē', ne quebe dxelezrebe' Dios.
- 20 Guchisa na' benne' wēn da zrinnaj chee gu'ē
benne' ca'
dxelebeza zri lazre' nen le'.
Gudíchajē' xrba chee xel-la' wezría da bene' nen
benne' ca'.
- 21 Dizra' bchálajē' zaj naca na dizra' zren lazre',
san xu'u lázrdawe' xel-la' dxezrá'a.
Dxunē' xrtante dizra' dxuchálajē',
san zaj naca na ca xia da zaj nalále'ē.
- 22 Bda xua chiu' cuzru Xránadxu, na' Le' gutipe'
lazru'.

Québequeze gu'e lataj cheajchaze benne' chawe' tu
chi'ize.

²³ Lue', Dios, gunu' xelexú'u benne' ca' dxelunē'
da calela lataj ba xa',
benne' dxelute benne', ne benne' dxelezí xe'e,
gate quebe ne xezezrine' gachaj catite dxal-la'
xelaca banē',
san neda' guxrén lazra' Lue'.

56

¹ Bexache lazre' neda', Dios, chee quebe xuluzría
xi'
bénneache neda'.

Tu zra tu zra dxulusaca zi' bénneache neda', benne'
ca'
dxeledíl-lalene' neda'.

² Te zra chizrela benne' ca' dxeledábague' neda'
dxulucá'ana dítajē' neda',
lawe' da zaj zra' benne' zante, benne' dxeledíl-
lalene' neda'
lu xel-la' dxulucá'ana szren cuine'.

³ Lu zra dxezreba', dxuxrén lazra' Lue'.

⁴ ¡Dxuxrén lazra' Dios, na' güe lá'ana' xrtizre'!

¡Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

⁵ Xúgute zra dxuluchuque' xrtizra'.

Ca naca da dxelegú'u be'e zaj naca na chee xelunē'
chia'
da calela.

⁶ Dxelezrague', ne dxulucache cuine'.

Dxelenná' xánnie' ca da dxuna'.

Dxelilaj lazre' ca xelunē' xelútie' neda'.

⁷ Dios, bxue ca da dxelunē',

na' dutē xel-la' dxezrá'a chi'u' bzria xi' benne' ca'.

8 Nézqueznu' Lue' ca dxuzrúnnuja' lau benne' ca'.
Bsa lazre' nisa da ba gudxezra'.

¿Quebe zaj naxúaj na lu xiche chiu'?

9 Gate dxuláwizra' Dios, lu zra ná'queze xuluxu-
zrunnuj

benne' ca' dxeledábague' neda'.

Nézquezda' zúale Dios neda'.

10 ¡Dxuxrén lazra' Dios, na' güe lá'ana' xrtizre'!

¡Dxuxrén lazra' Xránadxu, na' güe lá'ana' xrtizre'!

11 ¡Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

12 Nabaga' ca da nachebe lazra' chiu', Dios.

Gúl-laqueza' da güe lá'ana' Lue'.

13 Ba bseláu' bénne'du xu'a lu xel-la' gute,

ne bebéaju' ni'a naga zaj zua cheajlechaze na,

chee gaca chu'a lau Dios lu xel-la' naxaní' da dx-
unne'

chee benne' ca' zaj naca bané'.

57

1 Bexache lazre' neda', Dios.

Bexache lazre' neda', lawe' da dxuxrén lazra' Lue'
dute lázrdawa'.

Quezru' neda' ca dxun bedxuj dxézreba' zrí'ineba'
zran xrílaba', cadxa te chee da štebe caní.

2 Guláwizra' Dios, Benne' zrentę.

Guláwizra' Dios chee gácalęne' neda'.

3 Naga zúate' xabáa chee' sel-le' nu guselá neda' lu
na'

bénnea' dxáca lazre' guzrí xi'e neda'.

Gusel-la Dios xel-la' dxexache lazre', ne da li chee'.

4 Zua' lu da štebe ca tu benne' zue' ládujla bežre
xixre' ca'.

Xu'a ládujla bénneache zaj naque' ca bežre xixre' ca'

dxeláguba' bénneache.
 Dizra' da dxelenné' chia' zaj naca na ca tu xia
 natuche',
 ne xaga nalá xéche'ze ca',
 na' xrtizre' zaj naca na ca tu xia da nalále'e.
⁵ Xega'ana szrénquezu' lu xabáa, Dios.
 Xel-la' szren chiu' sua na lawe' dutę xęzr la xu.
⁶ Ba zaj nabeche' xralaj cheę xelęl-le' neda'.
 Ba dxedú lazra' lu da dxaca chia'.
 Ba zaj naxene' tu xędxu cheę cheajcházia' lu'ule
 na.
 Lu'ule da na' ba xeajlecházqueze le'.
⁷ Ba zúatequeze lázrdawa', Dios.
 Ba zúatequeze lázrdawa' cheę gúl-laqueza' da güe
 lá'ana' Lue'.
⁸ Bebán lazre', bénne'du xu'a, ne le xebán lázrele,
 le'e dxínnele da dxúl-lalęnle, ne da zríadi'i na du.
 Che zílala chásaqueza'.
⁹ Güe lá'anaqueza' Lue' ládujla bénneache chiu', Xran.
 Gúl-laqueza' chiu' lau benne' xúgute cue' xęzr la xu,
¹⁰ lawe' da naca xel-la' dxexache lazre' chiu'
 zrendxa ca xabáa,
 na' da li chiu' naca na zrendxa ca beuj bza ca'.
¹¹ Xegá'ana szrénquezu' lu xabáa, Dios.
 Xel-la' szren chiu' sua na lawe' dutę xęzr la xu.

58

¹ Le'e dxenná beale ¿da li dxuchálajle da naca
 xrlátaje?
 ¿Dxuchí'ale ca naca da li cheę bénneache chia'?
² ¡Cabíze'!
 ¡Lu lázrdaule dxugú'u beale da zrinnaj!
 ¡Stébele'e dxuzúale bénneache lu xęzr la xu chia'!

- 3 Zaj nazrinnaj lázxdau benne' ca' zaj nabéaj xíchaje'
neda'
gate gulálajte'.
- Belexase dínnaĵe' dxelún lazre' gate gulezante
xrne'e le'.
- 4 Dizra' da dxelenné' zaj naca na da dxelute
bénneache
ca da zria zran lazxa beĵa'.
- Zaj naca na ca beĵa' snia, be nácaba' be cuezru.
- 5 Quebe dxenba' chi'i benne' dxunné' leĵa'
lácala dxennéle'e xrtandau'.
- 6 Dios, gudichaj lazxa benne' ca'.
Gudichaj, Xran, lazxa benne' ca' zaj naque' ca
bezre xixre' ca'.
- 7 Beĵ xelxenítie' ca nisa da dxelalaj na lu xu.
Gate dxulusane' xaga nalá xéche'ze chee',
beĵ xeledé na chalá'ala.
- 8 Beĵ xeledé chee' ca dxaca chee' be zaga dxellex-
exúnaba'.
- Beĵ québedxa xelélé'ene' gubizra ca tu bidau'
dxálajbe'
ba nátebe'.
- 9 Nédxula gate quebe ne la xesu' lu xi'
xecá'a Dios benne' ca' tu lu be' bdunu',
benne' zaj naca bané', ne benne' ca' zaj zua xe-
latie'.
- 10 Wabé benne' xrlátaje gate lé'ene' xebéaj lazre'
Dios
benne' ca' dxelune' da caleĵa.
- Guchuchu guléaje' dxen chee' benne' zaj nabéaj
xíchaje' Dios.
- 11 Nadxa nne' bènnea': "Da líqueze de lazruj chee'
benne' xrlátaje.

Da líqueze zua Dios, Bénnea' dxuchi'e chee
 bénneache
 zaj zre'e lu xezr la xu."

59

¹ Bselá neda' lu na' benne' ca' dxeledábage' neda',
 Dios chia'.

Bselá neda' lu na' benne' ca' dxelune' chia' da
 caleja.

² Bselá neda' lu na' benne' ca' dxelune' da zrinnaj.
 Bselá neda' lu na' benne' ca' dxelutie' benne',

³ lawe' da dxelilaj lazre' xelútie' neda'.

Zaj nazraga benne' wal-la ca' chee xeledíl-lalene'
 neda',

quegá lawe' da bi zria nabaga', ne quegá ne chee
 dul-la nuna' neda', Xran.

⁴ Lácala quebe bi bēna' chee benne' ca',

zá'aca chégüe', ne dxulucueze' bi xelune' chia'.

Bebán chee xidu' naga zua', na' le'enu' da dxelune'.

⁵ Lue', Xran, Dios chee benne' zan dxjaque' wedil-
 la,

ne Dios chee benne' Israel ca',

bebán chee gudéu' ba xa' benne' xúgute' cue' xezr
 la xu.

Quebe xexache lazru' xúgute' benne' ca'
 dxeledábage' Lue',

ne dxelune' da zrinnaj.

⁶ Xelelé'e gate cuía gubizra, ne xelebezre xe'e

ca dxelún becu', na' xeléchaje' xezre.

⁷ Gunná' xque, da dxuluchálaje' naca na ca da
 dxelxexebe'.

Dizra' dxelenné' zaj naca na ca xia zaj nalá na,

lawe' da dxelenné': "¿Nuzra xene?"

8 Lue', Xran, guzrizru' chee benne' ca'.

Gun lau' chee benne' xúgute cue' xezr la xu ca'.

9 Zaj naca wal-la benne' ca' dxeledábague' neda'.

Cueza lazra' Lue' lawe' da dxucu'uju' neda', Dios.

10 Dios, Bénnea' dxexache lazre' neda', cuía lawe'
lawa' neda'.

Dios gune' le'eda' gaca chee benne' ca'
dxeledábague' neda'

ca da dxezá lazra'.

11 Quebe gutiu' benne' ca', chee quebe xelal-la
lazre'

bénneache chia' ca da gunu'.

Bese dinnaj benne' ca' nen xel-la' waca chiu'.

Lue', Xran, Benne' dxucu'uj netu', ben chea-
jlecházie'.

12 Ben xeledule' lu xel-la' dxulucá'ana szren cuine',

ne chee dul-la dxelune' lu da dxuluchálaje',

ne ne chee dizra' schanni', ne da wen lazre' da
dxelenné'.

13 Bzria xi'e lu xel-la' dxezrá'a chiu'.

Bzria xi'e chee québedxa xelezúe'.

Dios, ben xeleque be'ene' dxenná be'enu' zri'ine
zre sua Jacob.

Dxenná be'u du ca naca xezr la xu.

14 Dxelelé'e gate dxebía gubizra, ne dxelebezre
xe'e

ca dxelún becu', ne dxeléchaje' xezre.

15 Dxeledé' ca benne' dxeledaze', dxelílaje' da
xelawe',

na' che quebe dxeléljane', na' du xela dxelawe' zria
tue' xetúe'.

16 Neda' gúl-laqueza' chee xel-la' waca chiu',
na' che zílala güe lá'ana' xel-la' dxexache lazre'
chiu',

lawe' da gúcalenu' Lué'queze neda',
ne bcu'uju' neda' gate guzúa' lu da stébele'e.

17 Lue' dxutipu' lazra', na' gúl-laqueza' chiu',
lawe' da nacu' Lue', Dios, Bénnea' dxucu'uje' neda',
ne Dios, dxexache lazru' neda'.

60

1 Dios, Lue' ba bzu' netu' chalá'ala, ne benu' xea-
jcházentu'.

Bzrá'ale'enu' netu'.

Na'a bedá gácalenu' netu'.

2 Benu' guzrú' xezr la xu, ne benu' bxfalaj na.

Bexún na naga bxfalaj na lawe' da dxebía xi na.

3 Benu' blé'entu' netu', benne' chiu', da naca
stébele'e.

Benu' guca cheentu' ca güé'entu' tu da ben na
xeajcházentu'.

4 Bnézruju' tu da dxulé'e lau chee benne' dx-
elezrebe' Lue',

Da xeluxre' chee gulé'e lau da naca li.

5 Chee xeelé' benne' ca' nazrí'iqueznu' Lue',

bsel-la le' dute xel-la' waca chiu', ne bene chia'.

6 Dios gunné' lu lataj lá'azxa chee': "Wabéquezda'
neda'.

Gunna' late weaj chee le xezr la xu chee benne'
Siquem,

ne gudxixra' chee le xezr la xu de cuita xegu Sucot.

7 Chia' naca xezr la xu Galaad, ne chia' naca xezr
la xu

chee zri'ine zre sua Manasés.

Xezr la xu chee zri'ine zre sua Efraín naca na ca

tu da napa chi'i na xíchaja'.
 Xe_zr la xu chee zri'ine zre sua Judá naca na naga
 dxenná be'a.

⁸ Xe_zr la xu chee benne' Moab naca na ca tu
 zriga' da xuzru nisa guná'a,
 na' xe_zr la xu chee benne' Edom guchichan' nen
 zrela'.

Si'a ba neza xe_zr la xu chee benne' Filistea."

⁹ ¿Nuzra che' neda' chee guzétaja' xe_zre da naxechaj
 na
 ze'e sibe?

¿Nuzra che' neda' chee guzétaja' benne' Edom ca'?

¹⁰ ¿Quegá Lue' na' che'u neda', Dios, nacu' Bénnea'
 bzue' netu' chalá'ala,
 ne quebe guxeájle_nu' benne' cheentu' ca', benne'
 dxjaque'

wedil-la?

¹¹ Gúcale netu' chee séquentu' tíl-lalēntu' benne' ca'
 dxeledíl-lalēne' netu',
 lawe' da naca dácheze xelácale bénneache netu'.

¹² Tu zren nen Dios gundxu tu da zrente,
 na' Le' gulague' benne' ca' dxeledíl-lalēne' dxi'u.

61

¹ Bene, Dios, da dxuláwizra' Lue'.

Bze naga da dxuchálajle_na' Lue'.

² Zitu' naga zua lazria' dxuláwizra' Lue', lawe' da
 dxedú lazra'.

Guché' neda' naga zua Bénnea' naque' ca tu xi'a
 xiaj,

Bénnea' nácadxe' szren ca neda',

³ Nacu' Lue' Benne' nuxrue' neda',
 ne nacu' ca tu ze'e xiaj da dxucu'uj na neda' lau
 benne' ca'

dxeledábague' neda'.

⁴Tu súazqueza' lu xu'u lá'azxa chiu'.

Sua chawa'a cuitu' Lue' ca zaj zua chawe' bedxuj
dxé'enedu ca'
zran xrila bedxuj.

⁵Lawe' da bennu' Lue', Dios, ca da guchebe lazra'
chiu',

benu' napa' ca da dxelapa benne' ca' dxelezrebe'
Lue'.

⁶Gunu' gaca bana' neda', wenná bea, zánete zra.

Iza chia' xelaca na ca da zaj naca chee chupa cuen
bénneache.

⁷Tu súazqueza' lau', Dios.

Bcueza xel-la' dxexache lazre' chiu', ne da li
chee xulucá'ana chawe' na neda', wenná bea.

⁸Caníqueze gúl-laqueza' chee lau' tu chí'izqueze,
ne gúnqueza' tu zra tu zra ca da guchebe lazra'.

62

¹Tuze nen Dios dxebeza zri lazre' bénne'du xu'a.
Léqueze' dxuselé' neda'.

²Tuze Le' dxucu'uje' neda', ne dxuselé' neda'.

Naque' Bénnea' dxuxre' neda', na' quebe negue
lazra'.

³¿Ajatezcha' gucuézale da gunle chee tu benne',
na' dxunle ba xen xúgutele guzría xile le',
ca dxun tu benne' dxuchínnaje' tu ze'e da ba de
chalá'ala,
u tu le'aj da ba guzru'?

⁴Dxunle tuze dizra' ájazra xebéajle neda' lu xel-la'
szren chia'.

Nazrí'ile da wen lazre'.

Nen dxú'ale dxennele da xrlátaje, san xu'u lázrdaule
da calela.

⁵ Lue', bēnne'du xu'a, guleza lazre' tuze Dios,
lawe' da naca Le' Bénnea' dxebeza lazra'.

⁶ Tuze Le' dxucu'uje' neda', ne dxuselé' neda'.
Naque' Bénnea' dxuxre' neda', na' quebe negue
lazra'.

⁷ Naca Dios Bénnea' dxuselé' neda', ne naque' da ba
neza chia'.

Naca Dios Bénnea' dxucu'uje' neda', ne Benne' dx-
uxre' neda'.

⁸ Le cueza lazre' Le' tu chí'izqueze, le'e, bēnneache.
Le xe'e ca da dxezá lázrele.

Naca Dios Bénnea' dxuxre' dxi'u.

⁹ Da líqueze, da dácheze zaj naca bēnneache,
ne ca tu da wēn lazre' benne' zren ca'.

Quebe bi dxelé'e tu lu zrgú'unsá.

Zaj nácadxe' zraze ca tu be' da dxecá'a lázredxu.

¹⁰ Quebe guxrén lázrele da sile gate dxexúbele,
ne quebe gucá'ana szren cuínale chee da ca' dxe-
banle.

Che dxegula xel-la' gunní'a chee, quebe xezaca
ba lázrele
chee da na'.

¹¹ Tu lásaze gunná Dios:
na' chupa lasa benda' da nigá:
Chee Dios naca xel-la' waca.

¹² Chiu' Lue', Xran, naca xel-la' dxexache lazre'
lawe' da dxunézruju' lazruj chee tu tu bēnneache
cáteze da zaj nune'.

63

¹⁻² Dios, Lue' nacu' Dios chia'.

Dxebile bēnne'du xu'a da naca chiu',
na' bēla' dxen chia' dxezá lazre' na da naca chiu'.

Naca chia' ca zúaqueza' tu xe_zr la xu bizre naga
quebe bi nisa de.

Dxaní'siseze xida' lau Lue' chee le'eda' xel-la' waca
chiu',
ne xel-la' szren chiu',

cáteze ba ble'eda' da naca chiu' lu lataj lá'azxa
chiu'.

³ Cháwedxa naca xel-la' dxexache lazre' chiu'
ca xel-la' nabánqueze.

Chee le na' güe lá'anaqueza' Lue'.

⁴ Caníqueze nnia' chiu' da xrlátaje dxácate naca
bana'.

Chee gucá'ana szrena' Lau' chísaqueza' na'a.

⁵ Xélaje bénne'du xu'a da naca na ca be_se zrita,
ne bela' da dxánnele'e,

na' duté xel-la' dxebé güe lá'anaqueza' Lue'

⁶ gate dxajsá lazra' chiu', ne dea' ga dxata',
ne gate dxulaba lazra' ca naca chiu' gate dxen-
naza' chizrela.

⁷ Lawe' da dxácalenu' neda', béle'eda' cuitu'
ca dxelún bedxuj dxé'enedu ca' zran xrila bedzuj.

⁸ Naca bénne'du xu'a Lue' tuze.

Nen na'u wal-la nuxru' neda'.

⁹ Benne' ca' gulezá lazre' xuluzría xi'e neda'
cheajlecházié' lataj ba xa'.

¹⁰ Xelebía xi'e lu xia nalá.

Xelaque' da xelagu becu' xixre' ca'.

¹¹ Neda', wenná bea, beda' lu da naca chee Dios.

Xegá'ana ba lá'ana núteteze benne' dxuluchínene'
la',

lawe' da xelexxuj dxu'a benne' ca' dxelenné' da
wēn lazre'.

64

- 1 Dios, bze naga chi'a lawe' da zua' stebe dx-
uláwizra' Lue'.
Bxue xel-la' nabán chia' lawe' da dxezreba' bi
xelún benne' ca'
dxeledábage' neda'.
- 2 Bcache chawe' neda' chee quebe xelún benne'
wen
da calela chia' ca da dxelezá lazre',
ne chee quebe xelún benne' dxelún da zrinnaj
chia'
ca da zaj nune' xelune' chia'.
- 3 Dizra' dxuluchálaje' zaj naca na ca xia zaj nalále'e
na,
ne dxelenné' schanni' ca dxun tu benne' dxusane'
xaga nalá xéche'ze chee'.
- 4 Caní dxelenné' bagácheze chee xelune' cheajlec-
haze
benne' zaj naque' li lazre'.
Chadite dxelune' na, ne quebe bi dxelezrebe'.
- 5 Dxelune' ba xuzre xelune' da zrinnaj da zaj nune'
xelune',
na' dxuluzé' xralaj ca' chee xelele' bénneache,
dxelenné': "¿Nuzra le'e da dxundxu?"
- 6 Dxelílaje' ca zaj naca da zrinnaj xelune',
ne dxelenná' xánnie' ca zaj naca na.
Ca da zaj xu'u xichaj lázrdawe' zaj naca na stébele'e
ca zaj naca lázrdauqueze'.
- 7 Dios guné' benne' ca' we' nen tu xaga nalá
xéche'ze chee'.
- Chadite xelu'e xízrawe' zren ca'.
- 8 Dizra' buluchalaj benne' ca' xelún na chea-
jlecházie',

na' xelezrebe xúgute bēnneache gate xeledé'ene'
benne' ca'.

9 Nadxa xelezrebe xúgute bēnneache, ne
xuluzenne'
ca da nun Díos,

na' xuluxúnbe'e ca zaj naca da bene' Le'.

10 Béqueze benne' xrlátaje lau Xránadxu, ne guxrén
lazre' Le',

na' xelezúa lu da ba neza xúgute benne' zaj naque'
li lazre'.

65

1 Naca chiu' Lue', Díos, güe lá'anantu' Lue' lu xezre
Sión,

na' guntu' da guchebe lázrentu' chiu'.

2 Lue' dxénqueznu' da dxuchálajentu' Lue',
na' xeledá' lau Lue' xúgute bēnneache.

3 Nabágale'a da zrinnaj da bēna',
san Lue' dxunite lau' ca da gudábagantu' Lue'.

4 Ba neza zrente naca na chee bēnnea' dxeca'u Lue',
ne dxenníu' le' gaque' chiu', chee súaqueze' lataj
lá'azxa chiu'.

Xélajquezentu' da xrlátaje da de lizru', da ca' da zaj
de
xudau' lá'azxa chiu'.

5 Lu da xrlátaje chiu' gunu' da zaj naca zrente gate
gunu'
ca da dxenábantu' Lue', Díos, Benne' dxuselé'
netu'.

Xúgute bēnneache zaj zra' dute xezr la xu dxelebeza
lazre' Lue',
ne cá'anqueze dxelebeza lazre' benne' dxeledé'
zítu'la lawe' nísadau'.

6 Lué'queze dxuzúa chuchu' xi'a zren ca' nen xel-la'
waca chiu'.

Nácaquezu' Benne' wal-la.

⁷ Dxebeche zriu' nísadau' gate dxelucu na,
ne schaga da dxelún xeajxruza chee na.

Dxebeche zriu' benne' xęzr la xu gate
dxeledábague' Lue'.

⁸ Chee le na' benne' zaj zre'e dute xęzr la xu
xelezrebe' ca naca da zrentę da dxunu'.

Dxuzú' lu da ba neza bęnneache zaj zra' du gabí'i
xęzr la xu.

⁹ Dxenna'u xęzr la xu, ne dxesel-lu' nisa xiuj.

Dxunu' dxúnnałe'e na lina chee na.

Nuzúaquezu' lu xęzr la xu xęgu ca' da zaj dełe'e na
nisa.

Dxucuezu' zrua' za da xelagu bęnneache,
ca ba núnquezu' gaca na.

¹⁰ Dxesel-lu' nisa xiuj naga ba zaj nune' na'.

Dxunu' dxexaca na xu xa'a.

Dxuculu na nen nisa xiuj na'.

Dxunu' dxelegula chawe' da du ca' ba zaj naxaza
na.

¹¹ Dxunu' dxelexezí' bęnneache ba neza tu iza tu iza
ne chee da dxunézruju',

na' ca zaj naca beuj bza chiu' dxelunna na xiuj

da dxun na dxelegula chawe' da zaj naza
bęnneache.

¹² Dxelunna na xiuj naga dxeledá be xíxre'du ca' da
dxeláguba',

na' dxelebé bęnneache dxelelé'ene' ca bane zaj zua
xí'adu ca'.

¹³ Lache' ca' zaj zra' zřila' ca',

na' dxu'a xęgudu ca' zaj naxaza zrua' xřila,

na' dxelebezre xa'a bęnneache chiu' dute xel-la'
dxelebé,

ne dxelúl-laqueze' chiu'.

66

- 1 Le gucá'ana szren Dios dutę xel-la' dxebé,
le'e zrale dutę xęzr la xu.
- 2 Le gul-la ca naca xel-la' szren cheę le'.
- Le gucá'ana szrene' gate dxue lá'anale Le'.
- 3 Le xę Dios: "Dxebánele'equezentu' ca zaj naca da
nunu'."
- Ne cheę xel-la' szren cheę xel-la' waca chiu' xu-
luzúa
xrtizru' benne' ca' dxeledábage' lue'.
- 4 Xúgute bėnneache zaj zra' dutę xęzr la xu xelúe
lá'anaqueze' Lue', ne xelúl-laqueze' chiu'.
- Tu xelúl-lazqueze' cheę Láquezu'.
- 5 Le da, lé'ele ca zaj naca da nun Dios.
Da zrėbedxu zaj naca da bene' cheę benne' ca'
belune' da calela.
- 6 Bene' bexaca nísadau' xu bizre.
Guledé bėnneache cheę ní'aze' naga nedxu de tu
xęgu situj.
- Dxu'a nísadau' na' gubéle'edxu lau Dios.
- 7 Dutę xel-la' waca cheę' nna be'e chadía chacanna.
Dxuxúequeze' ca da dxelún bėnneache dutę xęzr la
xu.
- Benne' dxeledábage' Le' quebe xelezrué'equezne'
xel-la' szren.
- 8 Le'e, bėnneache, le gucá'ana szren Dios cheędxu,
ne le guzén bėnneache ca da dxue lá'anale Le'.
- 9 Léqueze' bxue' dxi'u cheę naca bandxu,
ne quebe be'e lataj cheajcházedxu.
- 10 Lué'queze bxu' netu' ca da bentu', Dios.
Bdeu' netu' xel-la' zi' ca dxelún bėnneache dxu-
ludée'
xia plata lu xi' cheę xegá'ana chawe na.

11 Benu' xeajchú'untu' tu lu xralaj.

Bda'u cúzruntu' tu xua zí'ile'e.

12 Benu' guledé xíchajntu' benne' zaj zrie' bzrina'
chee' ca'.

Gudentu' tu lu xi', ne tu lu nisa situj,

na' bebéaju' netu', ne bzu' netu' tu lataj naga
zúantu'
lu da ba neza.

13 Chú'unqueza' lu xu'u lizru' chee guzézxea' béadu
ca',

ne gunna' chiu' ca da guchebe lazra' guna',

14 da na' guchebe lazra' ca da gunnía'
gate guzúa' lu da stébele'e.

15 Guzézxea' béadu ca', be dxelanne lau' Lue',

ne guna' cuen zren chee zríla'du ca' lau',

ne gutia' bezre ca', ne chivo biu ca' lau'.

16 Le da, xénele, xúgutele dxezrébele Dios,
na' guzenda' le'e ca da bene' gúcalene' neda'.

17 Du lazra' bláwizra' Le',
ne bca'ana szrénqueza' Le'.

18 La guzé lazra' tu da calela,
quebe ben Xránadxu chia'.

19 Da líqueze bene Dios chi'a.

Bze nague' ca da gunábeda' Le'.

20 ¡Gaca báqueze Dios!

¡Quebe bzué' chalá'ala da bchálajlena' Le',
san bexache lazre' neda'!

67

1 Dios, bexache lazre' netu', ne ben da chawe'
cheentu'.

Dute xel-lá' zri'i lazre' chiu' guzúale netu',

2 chee xelúnbea bénneache du gabí'i xezr la xu

ca naca da dxaca lazru',
 ne chee xeleneze bēnneache dute xezr la xu
 ca dxuseláu' bēnneache.

³ Xúgute bēnneache dxelúe lá'ane' Lue', Dios.
 Dxelúe lá'ana xúgute bēnneache Lue'.

⁴ Le be, ne le sua lu da ba neza, le'e, bēnneache dute
 xezr la xu,
 lawe' da guchi'a Dios chee ca naca da xrlátaje,
 ne guxúequeze' xúgute bēnneache.

⁵ Xúgute bēnneache dxelúe lá'ane' Lue', Dios.
 Dxelúe lá'ana xúgute bēnneache Lue'.

⁶ Xezr la xu nigá ba zria na lina chee na,
 lawe' da ben Dios cheedxu da chawe' cheedxu.

⁷ Dios ba bene' chawe' cheedxu,
 na' gáteteze dxal-la' xelapa bēnneache Le' ba lá'ana.

68

¹ Guzé, Dios, ne bese dinnaj benne' ca' dx-
 eledábague' Lue',

ne ben xuluzrunnuj benne' ca' dxelecuídenē' Lue'.

² Ca dxun tu be', dxulaga na zren chee xi',
 ca' gulagu' benne' ca'.

Ca dxuna xina' lu xi', ca' xelexenite benne' ca' lau
 Dios,
 benne' ca' dxelunē' da zrinnaj.

³ Xelebé benne' xrlátaje ca', ne xelezúe' lu da ba
 neza lau Dios,
 ne xelexritequeze' lu xel-la' dxelebé chee'.

⁴ ¡Le gul-la chee Dios!

¡Le gul-la da du ca' chee Láqueze'!

¡Le gucá'ana szren Bēnea' dxe'e xabáa, nazí le' Jah!

¡Le be lau Le'!

⁵ Ca xra bi dxé'enedu ca', ne ca benne' dxuxúe
nu'ula ca' zaj zue' tuze,
naca Dios lu lataj lá'azxa naga zúaqueze'.

⁶ Dxun Dios xelezúa xrtia ljwezre bénneache quebe
nu
xrtia ljwezre' zaj zra'.
Dxebéaje' benne' zaj xu'e lu na' benne' zitu' ca'
chee xelezúe' lu da ba neza.
Benne' ca' dxeledábaga Dios zaj zue' tu lu xezr la xu
bizre.

⁷ Dios, gate bdxúaju' lau bénneache chiu',
ne gudáu' lu xezr la xu bizre na',

⁸ na' guzrú' xezr la xu na'.

Cá'anqueze gúcale'e xiuj lau Dios.
Xi'a Sinaí guzrize na lau Dios,
Dios chee benne' Israel ca'.

⁹ Gusel-lu' tu nisa xiuj zílale'e, Dios.
Gate belexedú lazre' bénneache chiu', Lue' btipu'
lazre'.

¹⁰ Bénneache zaj naca chiu' zaj zúaqueze' lu xezr la
xu chiu'.
Dute da chawe' chiu', Dios, dxuxú' benne' xache'
ca'.

¹¹ Xránadxu Dios gusel-le' tu dizra' chawe',
na' gulezrá' benne' zante, benne' buluzenne'
bénneache
ca naca dizra' chawe' na'.

¹² ¡Buluzrúnnuje'!

¡Buluzrunnuj wenná bea ca' nen
ca naca benne' chee' dxjaque' wedil-la,

na' benne' ca' zaj nagá'ana lu xu'u lizre' belexe-
que'e

da bulucá'ana benne' ca' buluzrúnnuje'.

13 Lácala bcache cuínale naga dxuxúele zrila' ca',
gacu zra lánale da naca na ca xrila bgúgudu ca' da
zaj nazí lechítaje na plata,

na' dube' chee xrílabá' ca' zaj nazí lechítaje na oro.

14 Gate beše dinnaj Dios zrente wenná bea ca' lataj
na',

na' bexruj bezxe' da bgacu na xi'a Salmón.

15 Tu xi'a zrente naca xi'a Basán.

Tu xi'a zri'a naca xi'a Basán na'.

16 ¿Bizr chee na' dxenna'le, le'e, xi'a zri'a ca',
xi'a na' naga dxaca lazre' Dios súaqueze'?

Da líqueze súaqueze Xránadxu lu xi'a na' chadía
chacanna.

17 Da zaj naché' benne' ca' lu wedil-la da napa Dios
zánete cue' gaxúa zaj naca na.

Xránadxu Dios zezé'e xi'a Sinaí chee sue' lataj
lá'azxa chee'.

18 Begüénu' xabáa, zeché'u benne' ca' bebéaju'
lu na' xel-la' gute,

na' guzi'u da chawe' ca' da belunna bénneache,
ne cá'anqueze guzúa da bennu' chee benne' ca'
guledábage' Lue',

chee súaquezu' ládujla bénneache, Dios, leu' Jah.

19 ¡Gaca ba Xránadxu!

¡Tu zra tu zra dxusezrate' dxi'u da chawe' chee'!

¡Naque' Dios, dxuselé' dxi'u!

20 Dios, Bénnea' naque' Dios cheedxu guselé' dxi'u.
Léqueze Xránadxu Dios guselé' dxi'u lu na' xel-la'
gute.

- 21 Da líqueze Dios gune' we' xichaj benne' ca'
dxeledábage' Le'.
- Gune' we' xichaj benne' quebe dxulusane' ca zaj
naca
dul-la da dxelune'.
- 22 Gunná Xránadxu: “Guna' xezrinle lázrele,
xeza'ale lu xi'a Basán,
Guna' xeza'ale lu da situj chee nísadau', xezrinle
lázrele,
- 23 lawe' da guna' guchuchu guléajle dxen chee
benne' ca'
dxeledábage' le'e,
na' xeelé'e becu' chee dxen chee benne' ca'.”
- 24 Beelé'e bèneache ca guledá bèneache chiu'
belúe
lá'ane' Lue', Dios.
Dute xel-la' dxelebé gulu'e lataj lá'azxa chiu', Dios,
Wenná Bea chia'.
- 25 Benne' ca' dxelul-la zeajzrie' láwe'la,
na' benne' zaj nu'e da dxulucuezre' zja'aque'
bzébela.
Ládujla zjaca nu'ula cuíde'du ca' zaj núxrube'
da du ca' dxulusézxebe'.
- 26 Le güe lá'ana Dios naga zaj nazraga bèneache
chee'.
- Le güe lá'ana Xránadxu, le'e nácale zri'ine zre sua
Israel.
- 27 Zaj zra' zri'ine zre sua Benjamín na', guque'
benne'
cuídedxa, na' dxelenná be'e.
Zaj nazraga benne' xíchaje chee zri'ine zre sua
Judá na',
ne benne' xíchaje chee zri'ine zre sua Zabulón,
ne benne' xíchaje chee zri'ine zre sua Neftalí.
- 28 Dios, ble'e lau xel-la' wal-la chiu'.

Bzua chacha, Dios, da na' benu' cheentu'.

²⁹ Ne chee xel-la' szren chee xudau' chiu' da zua na
xezre Jerusalén,

xelegú'u benne' wenná bea ca' da xelunne' lau'.

³⁰ Gudil-la benne' dxjaque' wedil-la chee dute xezr
la xu

zaj nazrague' chee xeledíl-lalene' Lue',

benne' ca' zaj naque' ca bezre zan ca' nen biadu
cheeba' ca',

cadxa xuluzúa xúgute' dizra' chiu',

na' xelunne' ca naca xia plata da zaj nape'.

Beše dinnaj benne' dute xezr la xu dxelexezaca ba
lazre'

xelezúe' lu wedil-la.

³¹ Xeledá' benne' xíchaje chee xezr la xu Egipto.

Benne' xezr la xu Etiopía xelunne' ba xen xulucá'ana
szrene' Dios.

³² ¡Le gul-la chee Dios, le'e zrale du gabí'i xezr la xu!

¡Le gul-la chee Xránadxu!

³³ ¡Le gul-la chee Bénnea' dxe'e xabáa na'ala,
da zua na nédxute!

¡Le nna' xque, wanné', ne zízrajle'e nne'!

³⁴ ¡Le nne nápalé'e Dios xel-la' waca!

¡Lu xel-la' szren chee' dxuxúequeze' benne' Israel
ca',

na' zran xabáa nalá' xel-la' waca chee'!

³⁵ Benne' zrébentu' nacu' Lue', Dios,
naga zu' lataj lá'azxa chiu'.

Dios chee benne' Israel ca', Léqueze' dxutipe'
lazre'

bénneache chee'.

¡Gaca ba Dios!

69

¹ Bselá neda', Dios.

Naca' ca tu benne' dxepē' lu nisa.

² Naca' ca tu benne' xu'ē lu guzra' situj, ne quebe dxaca se'ē.

Naca' ca tu benne' xu'ē lu nisa sítujlē'ē,
na' nisa na' ba dxacu na xíchajē'.

³ Ba dxajxréqueda' lawe' da ba gunnélē'a, ne ba da lba'a.

Ba dxelátetē lawa' dxenná'a gácale Dios neda'.

⁴ Ba naxánda benne' dxelecuídengē' neda' ca naxán xicha xíchaja', ne quebe bi dē bi nuna'.

Zaj naca benne' wál-lalē'ē benne' dxeledábague' neda',

benne' ca' dxuluzría xi'ē neda', ne quebe bi dē bizr cheē na'.

¿Dxal-la' quízruja' da quebe gulana'?

⁵ Dios, nézqueznu' Lue' naca da xálaze da nuna', ne dxelé'equeznu' dul-la da bēna'.

⁶ Quebe gu'u lataj xelexedué'e ne chia' neda' benne' ca'

dxuluxrén lazrē' Lue', Xrana' Dios szrente.

Quebe gu'u lataj xeleque zrējaje ne chia' neda' benne' ca'

dxelebeza lazrē' Lue', Dios cheē benne' Israel ca'.

⁷ Lawe' da nazrí'ida' Lue' bulucháchalēne' neda', na' lu xel-la' stu' zúaqueza'.

⁸ Ca tu benne' zitu' naca' lau bi bícha'dau' ca', ne quebe zaj núnbea bi cheē xrna'a neda'.

⁹ Lawe' da dxé'lē'a gunne xue cheē lizru' dxal-la na lu lázrdawa'.

Gate dxelenné' benne' ca' schanni' chiu' Lue', Dios,
naca ca dxelenné' schanni' chia' neda'.

10 Gudxezra', ne bēna' gubasa, na' bde cuina' xel-la'
zi',

na' chee lē na' bulucháchalēne' neda'.

11 Cá'anqueze bgacu cuina' zra lana' tuzruj.

Buluzúe' neda' ca tu da dxulé'e na da baxache'
zrente'.

12 Gulenné' chia' benne' ca' zaj xu'e xu'u lawe',
na' benne' ca' dxelezuzre' belún lē' chia' lu da
belul-le'.

13 Neda' bláwizra' Lue', Xrana' Dios, lu zra
dxezaca ba lazru' Lue'.

Dios, lu xel-la' dxexache lazre' zren chiu', ne lawe'
da

líqueze nacu' weselá cheentu', bene chia'.

14 Bebéaj neda' lu da stēbe zua', naca' ca tu benne'
xu'e lu guzra' situj, ne quebe gu'u lataj
cházedxa'.

Bselá neda' lu na' benne' ca' dxelecuídenē' neda'.

Naca' ca tu benne' xu'e lu nisa situj.

15 Quebe gu'u lataj gatia' ca tu benne' xegache' lu
nisa situj,

ne quebe gaca' ca tu benne' chu'e lu da situj,
ne quebe gaca' ca tu benne' cheajchazie' tu lu
xēdxu situj.

16 Bechebe chia', Xrana' Dios, lawe' da chawe' naca
xel-la' dxexache lazre' chiu'.

Gudá, gúcale neda', lawe' da zrente' naca xel-la'
dxexache lazre' chiu'.

17 Gunná' xque ca da dxaca chia' neda', wēn zrin
chiu'.

lawe' da zua' lu da stébele'e, bēn ba xuzre xennu'
chia'.

18 Gudá naga zua', ne bselá neda'.

Bselá neda' lawe' da zaj naxánle'e benne' ca'
dxeledábage' neda'.

19 Lue' nézqueznu' ca dxulucháchalene' neda', ne ca
zua'

lu da stébele'e, ne ca dxulucá'ana dítaje' neda'.
Dxelé'equeznu' xúgute benne' ca' dxelecuídene'
neda'.

20 Lawe' da dxelún le' chia' dxedú lazra', ne zua' lu
da stébe.

Guleza' nu benne' xexache lazre' neda', san quebe
nu chilá'.

Guleza' nu benne' xelexúe zrene' neda', san quebe
nu chilá'.

21 Bulugawe' neda' da sla',
na' gate gubíleda', buluxí'aje' neda' da zichaj.

22 Ca naca laní chee benne' ca' ben gaca na ca tu
xralaj naga cheajlecházie',
ne ben xexaca da ba neza chee' tu da gun na
cheajlecházie'.

23 Ben xelechul-la xiaj lawe' chee' québedxa
xelelé'ene',
ne ben tu xelexrízrezqueze benne' ca'.

24 Dute' xel-la' dxezrá'a chiu' ble'e benne' ca',
ne dute' xel-la' xichaj zra'a chiu' be' benne' ca'.

25 Ben quebe nu chilá' lu xu'u lizre benne' ca',
ne quebe nu sua lu xezr la xu chee',

26 lawe' da guláu zi' xuzre' bènea' benu' Lue' we',
ne dxuluzrizre' ca naca xel-la' zi' dxedé bènea'
be'u Lue'.

27 Ble'e dul-la da zaj nabaga benne' ca',
ne quebe gu'u le' lataj xelaque' tuze benne' xrlátaje
chiu'.

28 Busula la benne' ca' lu xiche chee benne' ca'
zaj nape' xel-la' nabán,

ne quebe guzúaju' le' naga zaj naxúaj la benne'
xrlátaje ca'.

²⁹ Neda' zua' lu da ba xa', ne lu da stébele'e.
Bselá neda', Dios, ne bechisa neda'.

³⁰ Gúl-laqueza' da güe lá'ana' La Dios chia'.

Gucá'ana szrena' Le' nen da dxue lá'ana' Le'.

³¹ Da nigá xezaca ba lázredxa Dios ca tu beze, be
gutia' lawe',

u ca tu me', béadu zaj zua lúzuba', ne xrúguba'.

³² Xelexé'equeze benne' baxache' ca' da nigá, na'
xelebene'.

Le biga lau Dios, na' gaca bánquezle,

³³ lawe' da dxene Xránadxu benne' ca'
dxelexázejene',

ne quebe dxuzúe' chalá'ala benne' chee' ca', benne'
zaj xu'e lizre xia.

³⁴ Le güe lá'ana' Le', le'e zrале xabáa, ne le'e, zrале lu
xezr la xu,

ne le'e zrале lawe' nísadau', ne cá'aqueze xúgute
da zaj naca ban xúgute lataj caní.

³⁵ Dios guselé' benne' zaj zre'e xezre Sión,

ne xexune' xezre ca' zaj zra na lu xezr la xu chee'
benne' Judá ca',

na' tu xelexúazqueze' na', ne gata' chee' xezr la xu
na'.

³⁶ Zri'ine zre sua benne' wen zrin chiu' ca', gaca
chee' xezr la xu na',

na' benne' ca' zaj nazrí'ine' Lau' Lue' xelexúe' na'.

70

¹ Bselá neda', Dios.

Gúcaleche neda', Xran.

- ² Ben xelexedué'e, ne xelezúa lu da stebe benne' ca' dxelaca lazre' xelútie' neda'.
Ben xelexebigue', ne xelexala benne' ca' dx-
elebene'
lawe' da zua' lu da stebe.
- ³ Ben xelexegá'ana xala benne' ca' dxelún le' chia'.
- ⁴ Benne' ca' zá'aque' lau Lue' xelebenę',
ne xelezúe' lu da ba neza.
Benne' ca' dxelé'e Lue': "Xcalenu'" lawe' da bseláu'
le',
tu dxelennázqueze': "¡Zrente naca Dios!"
- ⁵ Zua' lu da stebe, ne nate ni'a na'a.
Gudázega gácalenu' neda', Dios.
Nacu' Weselá chia', ne Xrana'.
Quebe chenu', Xran.

71

- ¹ Za'a lau' Lue', Xran, cheę guxru' neda'.
Ben québedxa xedué'eda'.
- ² Gúcale neda', ne bselá neda' nen dute da naca
xrlátaje chiu'.
- Bze naga chi'a, ne bselá neda'.
- ³ Nacu' ca tu xiaj xre naga sua' chawe', na' waca
xida'
naga zu' te zra chizrela.
Gunná be'enu' nu guselá neda', lawe' da nacu' Lue'
ca tu xiaj xre naga dxaca dipa lazra'.
- ⁴ Dios chia', bselá neda' lu na' benne' ca' zaj nabéaj
xíchaję' Lue',
ne lu na' benne' ca' dxelune' da caleła ne zaj naque'
xichaj zra'a,
- ⁵ lawe' da dxebeza lazra' Lue', Xrana' Dios.
Nacu' Bénnea' dxuxúe' neda' gate nácatea' bídau'tę.
- ⁶ Lue' núxruquezu' neda' gate gúlajtea'.

Lue' benu' bdxuaja' lu le'e xrna'a.

¡Tu güe lá'anazqueza' Lue'!

⁷ Belexebane benne' zante ca naca chia',
ne ca naca chiu', dxuxúe xánniu' neda'.

⁸ Ben tu gul-lazqueza' da güe lá'ana' Lue',
ne gucá'ana szrena' Lue' du zra.

⁹ Quebe guzú' neda' chalá'ala gate ba guxrúa'.
Gate ba bedú lazra', quebe gusanu' neda'.

¹⁰ Benne' dxeledábage' neda' dxelenné' chia',
na' benne' ca' dxelezá lazre' xelútię' neda' belunę'
tuze dizra',

¹¹ dxelenné': "Ba bsan Dios le'.

Chéajdxu cheajtéladxu le' lawe' da québedxa nu zua
nu guselá le'."

¹² ¡Dios, quebe su' zitu' naga zua'!

¡Dios chia', gudázega gácalenu' neda'!

¹³ ¡Ben xelexedué'ene'!

"Ben xelexenite benne' ca' dxeledábage' neda'."

"Ben xelezúa xel-la' stu', ne xeleque zréaje benne'
ca'
dxelezá lazre' xelunę' chia' da calela."

¹⁴ Neda' tu cueza lázrezqueza' Lue',

ne tu güe lá'anazqueza' Lue'.

¹⁵ Guzenda' bénneache nacu' xrlátaje,

ne tu guzénzquezda' le' ca da benu' bseláu' neda',
láqueze quebe nezda' bal-la lasa bseláu' neda'.

¹⁶ Tu guchálajzqueza' cheę da zrentę da benu' Lue',
Xrana' Dios,

ne gusá'a lazre' bénneache cheę da xrlátaje
cheéquezu'.

¹⁷ Dios, Lue' bsédenu' neda' gate nácatea' bidau'tę.

Dxulé'eda' bénneache ca naca da zrentę da benu'.

- 18 Dios, quebe gusán lazru' neda' gate bache
guxrúa',
ne ba bgucha'.
Be' neda' lataj guzenda' zri'ine zre sua' ca naca
xel-la' waca chiu',
ne guzenda' bi za xelalaj ca naca xel-la' wal-la
chiu',
- 19 ne ca naca da xrlátaje chiu', da naca na da zrente,
Dios.
Lue' ba benu' da zaj nácale'e na zrente.
Dios, ¿Núzraqueze ca Lue'?
- 20 Lue' benu' gudéa' lu da stebe zante, ne lu da
calela ca',
na' gunu' xexaca bana', na' da xula xechisu' neda'
lu xedxu ba.
- 21 ¡Gucá'ana szrendxu' neda',
ne xue zrénquezu' neda'!
- 22 ¡Cá'aqueze güe lá'aqueza' Lue', quínnia' da gul-
laleña'!
¡Dios chia', gúl-laqueza' chee da li chiu', quínnia'
da du' zríadi'i na du!
¡Nacu' Benne' Lá'azxa chee benne' Israel ca'!
- 23 ¡Sua' lu da ba neza gate gúl-laqueza' chiu' Lue',
ne béqueze bénne'du xu'a, bénne'du' bexa'u!
- 24 ¡Tu guchálajzqueza' chee da xrlátaje chiu' te zra
chizrela,
lawe' da benu' belexedué'e, ne guleque zréaje
benne' ca' belune' ba xuzre xelune' chia' da calela!

72

- 1 ¡Dios, ben guchi'a wenná bea da dxaca cheentu'
ca dxuchí'aquezu' Lue',
ne ben xelaca xrlátaje zri'ine wenná bea na'!
- 2 Nadxa le' guchi'a chee bénneache chiu' ca naca

da naca xrlátaje,
ne ca naca da li guchi'e chee benne' chiu' ca' zaj
zue'

lu da ba xa'.

³ Lu xi'a ca' xebeza zri lazre' bèneache chiu',
ne lu xí'adu ca' xelezúe' lu da naca chawe'.

⁴ Guchi'e chee benne' ca' zaj zue' lu da ba xa'
lu xezre cheentu',

ne guselé' bidu ca' chee benne' ca' dxelexázejene',
ne guzríá xi'e benne' ca' dxulusaca zi'e bèneache.

⁵ Xelezrebe' Lue' dxácatę ne zua gubizra,
ne beu' lawe' tu cuen tu cuen bèneache.

⁶ Gaca wenná bea na' ca nisa xiuj da dxaca naga ba
nadín,

ne ca xrlé'ela da dxaca dxęla lu xęzr la xu.

⁷ Lu zra chee wenná bea na' gaca da xrlátaje,
ne xebeza zri lazre' bèneache dxácatę ne zua
beu'.

⁸ Nna be'e dute xęzr la xu,
ne dxu'a xęgu Eufrates, ga zrintę dxu'a nísadau'.

⁹ Lau le' xuluzú zribe benne' ca' zaj zre'e xęzr la xu,
na' guzéxruje' lazre' benne' guledábague' Le'.

¹⁰ Benne' wenná bea chee xęzr la xu Tarsis,
ne wenná bea ca' chee tu tu cue' xęzr la xu zitu' ca'
xelelé'e zaj nu'e da xulunézruje' chee',
na' benne' wenná bea chee xęzr la xu Sabá,
ne wenná bea chee Sebá xulunézruje' chee' da
gunní'a.

¹¹ Xúgute benne' wenná bea ca' xuluzú zribe' lau
le',

na' benne' xúgute cue' xęzr la xu xelune' zrin chee'.

¹² Le' guselé' benne' ca' dxelexázejene',

benne' dxululáwizre' le',
ne guselé' benne' ca' zaj zue' lu da ba xa',

ne quebe sua nu benne' gácalene' le'.

13 Xexache lazre' benne' xache' ca', ne benne' ca'
dxelexázzrene',

na' guselé' benne' xache' ca' chee xelaca bané'.

14 Xexá'awe' benne' xache' ca' lu na' benne' wen
lazre' ca',

ne benne' snia ca'.

Gune' ba xuzre guselé' benne' ca' lu na' benne' ca'
dxelutie' benne'.

15 Gaca ban wenná bea nigá,

na' xulunézruje' chee' oro chee xezr la xu Sabá,

na' tu xelenábazqueze bénneache Dios gácalene' le',

ne te zra chizrela xelenabe' Dios gune' gaca
chawe'

chee wenná bea na'.

16 Tu zrígadauze zrua' xtila xelaze' lu xezr la xu,

ne lu xí'adu ca',

da cuíale'e na ca da dxebía lu xi'a Líbano,

na' benne' zaj zre'e lu xezre ca' xelane' ca xixre' ze
lu xezr la xu.

17 Tu súazqueze la benne' wenná bea na'.

Tu xuluchálajzqueze' chee la le' dxácaté ne zua
gubizra.

Ne chee le' gaca da ba neza chee bénneache xúgute
cue' xezr la xu,

na' xelenné' chee' naca chee' da ba neza zrente.

18 Xrlátaje naca Xránadxu Dios, Dios chee benne'
Israel ca',

na' tuze Le' dxune' da dxexebánedxu.

19 Xrlátaje naca La Le' da naca na da xabáa chadía
chacanna,

na' dute xezr la xu nigá xeledé'ene' da xabáa chee'.

¡Ca'an naca na, ne ca'an gaca na!

20 Nigá dxexuzre xrtizra' David, da dxuchálajlęne'
Dios.
David nigá naque' zri'ine Isaí.

73

- 1 Da líqueze ba ben Dios da chawe' cheę benne'
Israel ca',
benne' ca' zaj naque' du lazre' lau Dios.
2 Neda' ba guzúa cheajcházia' lu dul-la.
Ba guzúa guna' tu da zrinnaj,
3 lawe' da guca' zre'e lazre' ne cheę benne' gunnía'
ca',
gate ble'eda' ca dxelepe ban benne' ca' zaj nabéaj
xíchaję' Dios.
4 Benne' caní quebe zaj zuę' stębe cheę xel-la' gute,
lawe' da zaj zúalę'e chawe'.
5 Quebe dxeledęe' lu da ba xa' ca da dxeledé xúgute
benne' ca',
ne quebe dxelezaca zi'e ca da dxaca cheę xezícadxa
bénneache.
6 Cheę lę na' dxulucá'ana szren cuinę'.
Tu dxelexúbezquezne' dxelune' da calęla.
7 Dxelánnię' lawe' da dxelagu cháwele'e.
Dxelezilę'e ca naca da dxelezá lazre'.
8 Dxelún lę' cheę Dios, ne dxelennę' calęla ca da
zrinnaj
da xelune'.
Dute xel-la' dxulucá'ana szren cuina dxuluchálaje'
da zrente.
9 Dxelennę' cheę da ca' zaj zua xabáa,
ne dxuluchálaje' ca benne' zaj nape' dute xęzr la
xu.
10 Cheę lę na' xúgute bénneache dxelune' lę' tu zren,
ne dxelezi'e ca da dxelenná benne' gunnía' ca'.

11 Dxelenná benne' ca' dxelunē' da caleḷa:

“¿Ájazra gaca neze Dios?

¿Dxelé'equeze Bénnea' zue' na'ala?”

12 Benne' caní zaj naque' benne' zaj nabéaj xíchajē'

Dios,

na' dxelepe banē' lu xēzr la xu, ne dxelaque'
gunní'a.

13 Da líqueze, dácheze naca guca' du lazre',
ne quebe bi da caleḷa nuna'.

14 Gudéa' lu da ba xa' tu zra tu zra,
ne gudéa' xel-la' zi' xúgutē zra.

15 La nnia' neda': Guchálaja' ca dxuluchalaj benne'
ca',

na' si xē'a bēnneachedu ca' chiu', Dios.

16 Gate blaba lazra' cheē chéajni'ida' da nigá,
guca na stébele'ē chia' neda'.

17 Gate guxu'a lu lataj lá'azxa cheē Dios,

na' guque be'eda' da gaca cheē benne' ca' gate
cheajsé.

18 Da líqueze nunu' cheē benne' ca' cheajlecháziē',
ne gunu' xelebía xí'queze'.

19 Chaditē gulebía xí'queze'.

Belexenitē' lu xel-la' gulezrébele'ē.

20 Zaj naque' ca tu da ble'edxu lu xēla da dxexenite
na

gate dxexebandxu.

Ca'an gaca, Xran, gate chasu', guzú' chalá'ala ca da
gulaca benne' ca'.

21 Gate guca' zre'e lazre' cheē benne' ca',

guzúa lázrdawa' lu da stēbe.

22 Lawe' da guca' xichaj zide', na' quebe
guxéajni'ida'

guca' ca tu be xixre' lau Lue'.

²³ Tu guzúazqueza' nen Lue', na' guca'u na'a xabela.

²⁴ Bsi'u neda' chee guna' da dxulé'enu' neda',
na' te nigá xezí' lu na'u neda' lu xabáa chiu'.

²⁵ Quebe nu xetú zua chia' xabáa san tuzu' Lue',
ne quebe nu xetú dxezá lazra' lu xezr la xu, san
tuzu' Lue'.

²⁶ Dxelexedú lazre' beła' dxen chia', ne lázrdawa'.
Dios naque' Benne' dxutipe' lazra',
ne naque' da ba neza chia' chadía chacanna.

²⁷ Benne' ca' dxelexecuase' naga zu' xelexenítie'.
Guzría xi'u xúgute benne' ca' xelexebeaj xíchaje'
Lue'.

²⁸ Ca naca chia' neda', dxaca chawe' chia' lawe' da
gubiga'
lau Dios.

Tu dxebeza lázrezqueza' Xránadxu Dios,
chee guchálajqueza' ca naca da zrente da nune'.

74

¹ Dios, ¿tu chí'izqueze nuzú' netu' chalá'ala?

¿Dxezra'u netu', nácantu' ca zrila' chiu' ca'?

² Bsá lazre' bèneache chiu', benne' ca' guzi'u
nédxudaute.

Benne' ca' bexa'u chee gunu' xelaque' benne'
cheéquezu',

benne' ca' zaj zre'e lu xi'a Sión nigá, naga zúaquezu'
Lue'.

³ Gudá xedajnná'u ca nabía xi' xezre nigá,
ne ca naca da calęla da belún benne' ca'

dxeledábage' netu', lu lataj lá'azxa chiu'.

⁴ Dxelebezre xa'a benne' ca' dxeledábage' Lue'
laduj naga zaj nazraga bèneache chiu'.

Zaj nuzúe' nigá da dxululé'e na xu'untu' lu na' benne' ca'.

⁵ Buluzría xi'e xezre nigá, ca dxun tu benne' dxine' ca naca xaga zaj zę tu xi'a.

⁶ Na'a nen xa waga chee' ca', ne nen xaga chee' ca', ba buluzría xi'e ca naca lechítaję chee' xudau' chiu'.

⁷ Ba buluzézxie' lataj lá'azxa chiu'.

Bulucá'ana dítaję' xu'u lizru'.

Buluchínnaję' na.

⁸ Lu lázrdawę' gulenné': "Guzría xí'tegadxu na tu chí'ize."

Ba buluzézxie' xúgute xu'u naga bezrágantu' chiu' lu xęzr la xu chiu'.

⁹ Québedxa dxelé'entu' da la'axza ca' da dxululé'e na da guchísantu' lu xęzr la xu cheętu'.

Québedxa nu chilá' benne' guchálaję' waláz chiu', ne quebe nu zua ládujla netu', benne' nézene' bátaqueze lantu'.

¹⁰ Dios, ¿Báta cueza na xulucháchalę benne' ca' nefu',

benne' ca' dxulusaca zi'e netu'?

¿Chadía chacanna welenné benne' dxeledábague' lue'

schanni' chee Lau'?

¹¹ ¿Bizr chee na' quebe dxebéaj lazru' benne' ca'?

¿Bizr chee na' quebe dxuzría xi'u benne' ca' dx-elunę' da calęla?

¹² Lue', Dios, nacu' Wenná Bea chia' nédxudaute.

Lué'queze dxuseláu' bėnneache dute xęzr la xu.

¹³ Xel-la' waca chiu' bėnu' nísadau' chupa la'a.

Gula'u xichaj bę schanni' ca' lu nísadau'.

¹⁴ Bzúzruju' xichaj bę schanni' lęba' leviatán,

Na' benu' gulagu be xixre' leba', bea ca' zaj zraba'
lu xu bizre.

15 Benu' gulaj nisa beaj, ne nisa xegu ca'.

Bsebizru' xegu zri'a ca'.

16 Chiu' Lue' naca te zra, ne cá'anqueze chiu' naca
dxela.

Lue' bzu' beu', ne gubizra naga dxeledé na.

17 Lue' bzu' tu chi'ize ca naca da zaj de xezr la xu
nigá.

Lue' benu' beu' la ca', ne beu' zaga ca'.

18 Bsa lazre' da nigá: Benne' ca' dxeledábague' lue'
ba zaj nun le' chiu' Lue', Xran.

Benne' xala ca' ba gulenné' schanni' chee Lau'.

19 Quebe gusanu' lu na' benne' zaj naque' ca be
snia ca'
benne' ca' nazrí'iquezu',

ne quebe gal-la lazru' tu chi'ize bèneache chiu' zaj
zue' lu da ba xa'.

20 Gunná' ca naca xel-la' wezría da benu',
lawe' da gáteteze naca chul-la lu xezr la xu,
na' zaj zra' benne' ca' dxelune' da zrinnaj.

21 Quebe gu'u lataj xelegá'ana lu xel-la' stu' benne'
ca' zaj zue' lu da baxache'.

Benne' dxelezaca zi'e, ne benne' dxelexázejene'
xelúe lá'ane' Lau'.

22 ¡Guzé, Dios!

¡Ben ca ba gunnáu'!

¡Bsa lazre' ca dxelún benne' xala ca', dxelún le' chiu'
te zra te zra!

23 Quebe gal-la lazru' ca da gulenná benne' ca'
dxeledábague' lue'.

Da schaga dxelún benne' ca' dxeledábague' Lue'
tu dxénzqueze na.

75

- 1 “Xcalenu”, dxentu' Lue', Dios: “Xcalenu’.”
 Dxuzentu' bēnneache zúalenu' netu', ne ba nunu'
 da ca'
 dxexebánequezentu'.
- 2 Dxenná Dios: “Ba nuzúa' zra guchi'a chee
 bēnneache.
 Guchi'a ca naca da xrlátaje.
- 3 Lácala xru' dutę xęzr la xu, ne xelezrize xúgute
 da zaj naca ban na,
 neda' gúxruqueza' ca naca lane xęzr la xu na'.
- 4 Dxapa' benne' xala ca': Quebe gáwele.
 Dxapa' benne' ca' dxelunę' da caleła:
 Quebe gucá'ana szren cuínale.
- 5 Quebe guxrén lázrele xel-la' wal-la cheełe.
 Quebe gácale benne' lázxdau zide'.”
- 6 Quebe za xel-la' szren naga dxalaj gubizra,
 ne naga dxebía na,
 ne quebe za na le'ę xixre' lawe' lataj.
- 7 Dios naque' Bēnnea' guchi'ę chee bēnneache.
 Dxucá'ane' cá'aze tu benne', ne dxucá'ane' szren
 xetú benne'.
- 8 Dios nuxre' tu zriga', da nazrate na xrise uva wal-
 la,
 da zeaje na xel-la' dxezrá'a chee'.
- Dxulálaje' na chee xelę'aj benne' ca' dxelunę' da
 caleła.
 Xelé'aje' na xebizrtę na.
- 9 Neda' guzénquezda' bēnneache,
 ne gul-la' da güe lá'ana' Dios chee Jacob.
- 10 Le' guchínnajqueze' xel-la' waca chee benne'
 wen da caleła ca'.
 Gusezrendę' xel-la' waca chee benne' xrlátaje ca'.

76

- ¹ Zaj núnbea benne' Judá ca' Dios,
 na' ládujla benne' Israel zrentę nácaqueze La Le'.
² Lu xęzre Salem zua lataj lá'azxa cheę'.
 Lu xęzre Sión zua naga zúaqueze'.
³ Lataj na' gudíchaję' xaga nalá xéche'ze ca',
 ne xia da dxucu'uj na benne' lu wedil-la,
 ne ca naca da dxuluchínene' lu wedil-la.
- ⁴ Benne' xabáa nacu' Lue',
 ne Benne' wál-ladxa ca xi'a zri'a ca'.
⁵ Xeaјlechaze benne' wal-la ca', ne guláse dinnaje'.
 Netú benne' wal-la ca' quebe belexechisa ne'e
 cheę
 xelunę' wedil-la.
- ⁶ Dios cheę benne' Israel ca', gate gudil-lu' benne'
 ca',
 guláse dinnaj bzrina' ca', ne benne' gulebíę'-ba'.
⁷ Nacu' Lue' Benne' zrébedxu.
 ¿Nu benne' gaca se' lau Lue' gate dzezra'u?
⁸ Xabáate gunná'u, na' guchi'u cheę bėnneache.
 Dxelezrebe bėnneache lu xęzr la xu, na' dxelebeze'
⁹ zra seu' Lue', Dios, cheę guchi'u cheę bėnneache,
 ne cheę guseláu' xúgutę benne' dxexruј lazre' zaj
 zre'e lu xęzr la xu.
- ¹⁰ Da líqueze xel-la' dxelezá'a cheę bėnneache
 gaca na tu da gucá'ana szren na Lue'.
 Guzúa zriu' xel-la' dxelezá'a cheę bėnneache zaj
 nagá'ane'.
- ¹¹ Le chebe lázrele da gunle cheę Dios,
 na' le gun da na' cheę Xránadxu, Dios cheęle.
 Xúgutę benne' zaj zre'e du gabi'ila xelelé'e,
 na' xulunézruјe' da zaj nu'e cheę Dios,

Bénnea' dxezrébedxu.

¹² Guzague' da xu'u lu xichaj lázxdau benne' blau ca'.

Le' dxuchebe' benne' wenná bea ca' zaj zře'e lu xezr la xu.

77

¹ Nen chi'a bláwizra' Dios.

Bláwizra' Dios, na' Le' buzé nague' chi'a.

² Guxu'a lau Xránadxu lu zra guzúa' lu da ba xa'.

Chizrela guchisa na'a lau Le', ne quebe guzúa zria'.

Quebe be'a lataj nu benne' xue zrene' neda'.

³ Bsa lazra' chee Dios, ne guzúa' stébe.

Gudawa' zria lawe', ne bedú lazra'.

⁴ Begúe' bchigala chia'.

Guzúa' stébele'e, ne quebe guca guchálaja'.

⁵ Blaba lazra' ca naca zra nédxute.

Ca naca iza zan ca' da ba guledé chee na.

⁶ Bsa lazra' ca naca da bil-la' chizrelala, ne blaba lázrequeza' ca zaj naca na, na' gunaba be' xu'a:

⁷ ¿Guzúa Xránadxu dxi'u chalá'ala tu chi'ize ne québedxa gácalene' dxi'u?

⁸ ¿Cabátadxu xexache lazre' dxi'u?

¿Cabátadxu gune' ca da guchebe lazre'?

⁹ ¿Gul-la lázrequeze Dios xexache lazre' dxi'u?

¿Dxezré'e dxi'u, na' québedxa xexache lazre' dxi'u?

¹⁰ Nadxa gunnía': Caní dxuna' lawe' da quebe chawe' zua'.

Chee le' na' cheajsá lazra' chee xúgute da zrente da ben Dios zrente lu iza ba guledé chee na.

¹¹ Cheajsá lazra' chee da zrente ca' da ben Jah.

Awe', cheajsá lazra' chee da benu' nédxudaute da
ca'
dxexebánentu'.

¹² Gulaba lazra' ca naca xúgute da ba benu',
ne guchálaja' ca zaj naca da nunu'.

¹³ Dios, lá'azxa naca da dxusédenu' netu' ca guntu'.
¿Zua xetú Dios naque' benne' zren ca naca Dios
cheentu'?

¹⁴ Lue' nacu' Dios, dxunu' da ca' dxexebánentu'.
Blé'enu' xúgute bénneache lu xezr la xu ca zrente
naca xel-la' waca chiu'.

¹⁵ Nen xel-la' waca chiu' bexa'u bénneache chiu',
zri'ine zre sua Jacob, ne zri'ine zre sua José.

¹⁶ Xegu nisa ca' belelé'en Lue', Dios.
Belelé'e xegu nisa ca' Lue', na' belezrébele'e na.
Cá'anqueze gulezúa stebe nísadau' situj ca'.

¹⁷ Nisa xiuj zila bdxuaj na lu beuj bza ca',
ne gulennéle'e guziu', ne gulépele'e xesa.

¹⁸ Lu be' bdunu' ben guziu' chiu' da gunnéle'e na.
Bulusaní' xesa guziu' ca naca xezr la xu.
Guzúa stebe, ne guzrize xezr la xu.

¹⁹ Lawe' nísadau' guza'u,
ne lawe' nisa zila ca' gudéquezu',
ne quebe naca bea naga bléaju'.

²⁰ Guche'u bénneache chiu' ca zrila' ca'
lu na' Moisés, ne lu na' Aarón.

78

¹ Le xen, le'e, bénneache chia', ca da dxusédeda'.
Le xen xanne' ca da dxuchálaja'.

² Guchíneda' dizra' ca da dxuluchalaj benne' sina
ca',
na' guzéajni'ida' le'e da ca' gulezúa na bagácheze
gate nate,

- 3 da ca' bendxu, ne bēnbeadxu na,
 da ca' belixru be'e xra xrtáudxu ca' dxi'u.
 4 Quebe gucáchedxu na lau zrí'inedxu ca'.
 Guzénquezdxu zrí'inedxu ca' ca naca xel-la' szren
 chee Xránadxu,
 ne ca naca xel-la' waca chee', ne ca zaj naca da
 zren ca'
 da bēne'.
 5 Bzue' tu da nadxiruj bea na da xelún benne'
 Israel ca',
 ne da bdxiruj be'ene' ca' da xelún zri'ine zre sua
 Jacob.
 Gunná bé'ene' xra xrtáudxu ca' xuluzenne' bi chee'
 ca'
 ca naca da gunná bé'ene',
 6 chee xelúnbea zrí'ine' bidu ca' za xelálajbe' ca naca
 na,
 na' bi caní xuluzenbe' zrí'inebe' da na',
 7 chee xuluxrén lázrebe' Dios,
 ne quebe xelal-la lázrebe' da ca' ben Dios,
 ne chee xuluzúabe' dizra' da ca' gunná be'e.
 8 Quebe xelácabe' ca gulaca xra xrtáube' ca'.
 Benne' ca' quebe buluzúe' dizra' chee', ne
 guledábague' Le',
 ne quebe buluzúa chúchue' ca buluxrén lazre' Dios,
 ne quebe gulaque' li lazre' lu da naca chee Dios lu
 be' zaj nácaqueze'.
 9 Benne' zrí'ine zre sua Efraín, benne' zaj nu'e
 da dxuluchínene' lu wedil-la
 buluzrúnnuje' naga dxaca wedil-la.
 10 Quebe belune' ca naca xel-la' wezría da ben Dios,
 ne quebe buluzúe' dizra' da gunná bé'ene'.
 11 Gulal-la lazre' da ca' ben Dios,
 ne xel-la' waca ca' blé'ene' Le'.

12 Lau xra xrtawe' ca' bene' xel-la' waca ca'
lu xezr la xu Egipto, ne lu xezr la xu Zoán.

13 Gusalje' neza lu nísadau' naga guledé benne' ca'.
Bene' nísadau' na' ca xi'a ca' chalá'a weaj.

14 Te zra blé'ene' benne' ca' neza nen tu beuj bza da
xjácalene',

ne chizrela nen beuj bza da naca na ca tu xi'.

15 Gulé'e xiaj ca' naga naca xu bizre,
na' bxí'aje' benne' ca' nisa da gulaj na le'e xiaj ca'
ca tu xegu nisa.

16 Bene' gulaj tu xegu nisa le'e xiaj na',
na' bzriluj na ca tu xegu zren.

17 Lácala bene' caní belúndxaqueze' dul-la lau Dios
le'e xixre' lawe' lataj,
ne guledábage' Dios nape' dute xel-la' szren.

18 Gulegú'u lazre' xulu'zúa zrie' Dios.
Gulenabe' xelawe' ca da dxelezá lazre' le'.

19 Gulenné' chee Dios, gulenné':
¿Wazeque Dios na' gunne' da gágudxu le'e xixre'
nigá?

20 Da líqueze gulé'e xiaj na', na' gulaj nisa na',
na' bzriluj na ca tu xegu zren.

¿Wazéquequezne' gunne' dxi'u xeta, ne gunne' bela'
da gágudxu?

21 Chee le' na' bzra'a Xránadxu gate benne' da na',
ne gusel-le' xi' da bzezxe na bal-la bénneache chee',
na' bsedxí'ule'e xel-la' dxezrá'a chee' nen benne'
Israel ca',

22 lawe' da quebe guléajle'e chee Dios,
ne quebe buluxrén lazre' Le' guselé' le'.

23 Gunná bé'ene' beuj zran xabáa,
ne gusalaje' dxa xu'u chee xabáa,

24 na' bene' bxinnaj xeta maná ca dxinnaj xiuj chee

- gulagu benne' chee' na.
 Bnézruje' le' da naca ca zrua' chee xabáa.
 25 Gulawe' da dxelagu gubáz chee xabáa ca'.
 Gusél-lale'e da gulawe', na' gulélajtequezene'.
- 26 Bene' guca be' da za' chalá'ala naga dxalaj gu-
 bizra,
 ne xel-la' waca chee' bene' guca be' za' chalá'ala
 naga dxedé gubizra beu' zaga,
 27 na' gusel-le' chee benne' ca' bela' ca ze bxrte xu,
 béadu zaj zua xrila naxanba' ca xuzre' da dxe'
 dxu'a
 tu xegu zren.
- 28 Bene' guléxrujba' chale'aj chee benne' ca'.
 Guléxrujba' dútequeze naga zaj zua xu'u xide chee'.
- 29 Gulawe'-ba', ne gulélajquezene'.
- Dios bnézruje' chie' ca naca da gulaca lazre'.
- 30 Gate quebe ne xelélajene', ne ne dxelawe'-ba',
 31 bzra'a Dios benne' ca',
 na' betie' benne' zaj nácadxe' benne' wal-la,
 ne benne' Israel ca' zaj nácadxe' benne' waca.
- 32 Láqueze bene' caní, na' belúndxaqueze' dul-la,
 ne láqueze belelé'ene' xel-la' waca ca' da bene',
 quebe buluxrén lazre' Le'.
- 33 Chee le' na' guchugue' zra chee benne' ca' ca
 tu be' dxecá'adxu,
 ne ca zaj naca iza da gulezúe', bdee' le' lu da zi' da
 xa'.
- 34 Gate betie' bal-la benne' ca', na' xezícadxe'
 belexaque' chee Dios.
 Belexebí'i lazre', ne du lazre' buluchálajlene' Le'.
- 35 Xeajlesá lazre' naca Dios Benne' dxuxúe' le',
 ne Dios na' napé' duté xel-la' szren naque' Bénnea'
 bxá'awene' le',

36 san quebe guca li lazre' da gulenné'
lawe' da belún lazre' lau Dios.

37 Quebe gulaque' li lazre' nen Le',
ne quebe beluné' du lazre' ca naca xel-la' wezría
chee'.

38 Dios bexache lazre' chee' benne' ca',
ne bnite lawe' dul-la beluné', ne quebe bzria xi'e
le'.

Zane' lásate bzue' chalá'ala xel-la' dxezrá'a chee',
ne quebe bzre'e le' dute ca da dxéquene'.

39 Xeajsá lazre' Dios zaj naque' belá' dxen.
Zaj naque' ca tu be' da dxedé na, ne quebe xezrín
na.

40 Zane' lasa guledábague' Le' le'e xixre' lawe' lataj
na',
ne zane' lasa buluzúe' Le' baxache'.

41 Zane' lasa buluzúe' Dios chalá'ala,
ne buluché'e Dios lá'azxa chee' benne' Israel ca'.

42 Gulal-la lazre' ca naca xel-la' waca zren chee',
ne ca bene' lu zra na' bxá'awene' le' lu da zi' da xa',

43 gate bene' xel-la' waca ca' lu xezr la xu Egipto,
ne blé'ene' da ca' da dxebánedxu lu xezr la xu Zoán.

44 Bexune' xegu chee' ca' dxen,
na' québedxa guca da xe'le'aj benne' Egipto ca'.

45 Gusel-le' be'a ládujla benne' ca', be' buludeba' le'
xel-la' zi'.

Gusel-le' bluzru ca' buluzría xiba' xezr la xu chee'.

46 Gusel-le' biche zu ca' guláguba' lina chee',
ne buluzría xiba' da zaj zua lu xezr la xu chee'.

47 Gusel-le' xiaj bezxe' zri'a da bzria xi na lba uva
chee' ca',
ne gusel-le' da zaga da bsebizre na xaga higo chee'
ca'.

- 48 Gusel-le' xiaj bezxe' zri'a da beṭe na be xixre'
chee' ca',
ne gusel-le' xesa da beṭe na zrila' chee' ca'.
- 49 Bdee' benne' Egipto ca' lu xel-la' zi' zren,
lawe' da bzrá'ale'e benne' ca',
na' guca da ca' ca záneteṭe gubáz ca' chee xel-la' gute.
- 50 Quebe bzague' xel-la' dxezrá'a chee',
ne quebe bnite lawe' chee' chee' quebe xelátie',
san beṭie' le' nen tu xízrawe' wal-la.
- 51 Beṭie' bi biu nedxu chee' benne' ca',
bi biu nedxu ca' chee' benne' Egipto ca'.
- 52 Nadxa beche'e benne' chee' ca' ca tu benne'
dxeche'e zrila' ca',
ne bsi'e le' le'e xixre' lawe' lataj.
- 53 Bsi'e le' zri'a chawe', ne quebe bi belezrebe',
san gulate benne' guledábague' Le' lu nísadau'.
- 54 Beche'e le' lu xezr la xu lá'azxa chee',
naga zua xi'a nigá da guca cheéqueze'.
- 55 Bebéaje' benne' zaj zre'e lu xezr la xu na' lau
benne' chie' ca',
na' gulé'e xezr la xu chee' cha chee' benne' Israel
ca',
ne bzre'e le' lizre benne' ca' bebéaje'.
- 56 Da xula buluzúe' Dios chalá'ala, ne buluché'e
Dios, nape' dute xel-la' szren.
Quebe buluzúe' dizra' da ca' gunná be'ene' le'.
- 57 Da xula guledábague' Dios ca belún xra xrtawe'
ca'.
Gulaque' ca tu bdxeque' xala chee' xaga nalá
xéche'ze.
- 58 Buluché'e Le' ne chee' lataj ca' naga bulucá'ana
szrene' bedáu' xiaj xaga ca',
ne ne chee' bedáu' xiaj xaga chee' ca' bzrá'ale'e
Dios.

- 59 Bzra'a Dios gate blé'ene' na,
na' gucuídele'ene' benne' chee' ca', benne' Israel.
- 60 Guleaj xíchaje' xu'u xide lá'azxa chee' zua na
xezre Silo,
xu'u xide na' guzuáqueze' ládujla benne' ca'.
- 61 Be'e lataj belecá'a benne' ca' dxeledábague' dxi'u
xi'ina lá'azxa chee',
da na' dxulé'e na xel-la' waca, ne xel-la' szren
chee'.
- 62 Bzre'e benne' chee' ca',
na' bde'e le' lu na' benne' ca' belúti'e le'.
- 63 Benne' wal-la ca' guláti'e lu wedil-la.
Quebe nu zra' benne' wegu', benne' xelezúalene'
nu'ula wegu' ca'.
- 64 Cá'anqueze gulate bxruze ca' lu wedil-la,
na' nu'ula chee' bxruze ca' quebe gulebezre xache'
chee' bxruze ca'.
- 65 Nadxa guca Xránadxu ca tu benne' dxexebane' lu
bchigala.
Guque' ca tu benne' wal-la dxebezre xe'e gate ba
né'aje'
xrise uva wal-la.
- 66 Na' blague' benne' guledábague' Le',
ne bca'ane' le' cá'aze chadía chacanna.
- 67 Bzue' chalá'ala zri'ine zre sua José,
ne quebe bequ'é'e zri'ine zre sua Efraín,
- 68 san bequ'é'e zri'ine zre sua Judá,
ne xi'a Sión, da na' nazrí'ile'ene'.
- 69 Lu xi'a na' bene' xudau' lá'azxa chee',
da guca na ca naca da zua na xabáa.
Bzua chúchue' na chadía chacanna,
ca nácaqueze xezr la xu nigá.
- 70 Bequ'é'e David, benne' wen zrin chee'.

Bebéaje' le' naga zaj zra' zrila' ca'.

⁷¹ Beche'e le' naga zue' dxuxúe' zrila' ca' zaj
 nachē'ēba' bēdau',
 chee gaque' wenná bea, benne' guxúe' bēneache
 chee',
 zri'ine zre sua Jacob, benne' zaj naque' benne'
 Israel ca'.

⁷² Dute xel-la' du lazre' chee' bxue' benne' ca'.
 Bxue' le' dute xel-la' waca zren chee'.

79

¹ Dios, ba gulú'u benne' xezr la xu zitu' ca' lu xezr
 la xu
 chee bēneache chiu'.

Bulucá'ana dítaje' xudau' lá'azxa chiu'.

Buluzría xi'e xezre Jerusalén.

² Bulucá'ane' bēla' dxen chee wen zrin chiu' ca'
 naga
 gulagu bē zua xrila le'.

Bē xixre' ca' guláguba' bēla' dxen chee benne' ca'
 zaj naque' chiu'.

³ Ca nisa bululálaje' dxen chee benne' ca' xúgute lu
 neza
 chee xezre Jerusalén,

ne quebe nu chilá' benne' gucache' benne' ca'.

⁴ Benne' xezr la xu walizre' cheentu' ca'
 dxulucháchalene' netu'.

Benne' zaj zre'e xezre walíZR ca' dxulucá'ana dítaje'
 netu',
 ne dxelún le' cheentu'.

⁵ ¿Bata cuézaqueze gaca caní cheentu', Xran?

¿Tu chí'izqueze dxezra'u netu'?

¿Tu chí'izqueze gaca xel-la' dxezra'a chiu' ca tu xi'?

- 6 Bzra'a benne' xęzr la xu ca' quebe zaj núnbe'e
Lue',
na' benne' xęzr la xu ca' quebe dxululáwizre' Lue',
7 lawe' da ba buluzría xi'e zri'ine zre sua Jacob,
ne bulucá'ana dítaje' xu'u lizre benne' ca'.
8 Quebe gusebagu' netu' ca naca da zrinnaj da
belún
xra xrtauntu' ca'.
Gudázega xexache lazru' netu', lawe' da dxezraga
láule'entu'.
9 Gúcale netu', Dios, nacu' Bénnea' dxuselé' netu',
cheę gaca ba Lau'.
Bselá netu', ne bnite lau dul-la nuntu' cheę
xegá'ana szren Lau',
10 lawe' da xelenná bénneache: “¿Ga na Dios cheę
benne' ca'?”
Bebéaj lazre' benne' ca' belútię' węn zrin chiu' ca'.
11 Caní ben cheę xeledé'e xúgutę benne' chiu' ca' zaj
xu'e
lu na' benne' ca' dxeledábague' netu'.
Dutę xel-la' waca zren chiu' bselá benne' ca' ba zaj
nachugue'
cheę' xelatię'.
12 Bunezruj cheę benne' xęzr la xu walizre'
cheęntu'
ca' xegazre cue'
ca da calela da belune', bulucá'ana dítaje' Lue',
Xran.
13 Netu', bénneache chiu', nácantu' ca zrila' chiu' ca',
güe lá'anaquezentu' Lue' chadía chacanna.
Tu cuen tu cuen zri'ine zre suantu' gúl-laquezentu'
da
güe lá'anantu' Lue'.

80

- 1 Bene cheentu', Lue' dxuxú' benne' Israel ca',
Lue' na', dxuxú' zri'ine zre sua José ca zríla'du ca',
ne dxe'u lataj blau chiu' da zua na lávela querubín
ca'.
- 2 Ble'e xel-la' szren chiu' lau zri'ine zre sua Efraín,
ne Benjamín, ne Manasés.
Ble'e xel-la' waca chiu', ne gudá guseláu' netu'.
- 3 Beché' netu', Dios.
Bexache lazre' netu', na' lantu'.
- 4 Xránantu' Dios, napu' dute xel-la' waca,
¿bata chajsequeze zra'u netu',
ne quebe xennu' ca da nábantu' Lue'?
- 5 Bzúalē'u netu' lu xel-la' dxewí'ine lazre',
ne bzílalē'u nisa dxebézrentu'.
- 6 Bē'u lataj xēzr la xu walizre ca' bulucá'ana dítaje'
netu',
na' benne' ca' dxeledábague' netu' belún lē'
cheentu'.
- 7 Beché' netu', Dios, napu' dute xel-la' waca.
Bexache lazre' netu', na' lantu'.
- 8 Bebéaju' tu zrigu' lba uva lu xēzr la xu Egipto da
naca na
bénneache chiu'.
- Blagu' benne' xēzr la xu gulezré'e nigá, na' guzu'
nigá
zrigu' lba uva na'.
- 9 Gú'unu' lba uva na' cheē gula na.
Bdéle'e lue zrigu' lba uva na', na' gucu na xēzr la
xu na'.
- 10 Gulú'u na zrul-la xúgute xi'a ca',
na' zruze na ca' gulegú'u na zrul-la xaga cedro zren
ca'.

11 Gulechiluj zruze na, belezrinte na dxu'a
nísadau',
ne belezrinte na dxu'a xegu Eufrates.

12 ¿Bizr chee na' gucá'u le'aj da naxechaj na le na?
Na'a xúgute benne' dxeledé na' dxelebane' da zixre
chee na.

13 Dxuluchuchu dxululéaj cuche xixre' ca' lba uva
na',
na' be xixre' ca' dxeláguba' na.

14 Bedá cheentu', Dios, napu' dute xel-la' waca.
Gunná' netu' ga na' zu' xabáa, ne gudá xedajnná'u
lba uva chiu'.

15 Gudá, guseláu' lba uva nigá, da gúzaquezu'.
Behuj chee lba uva na', ba bzua chuchu' gaca na
chiu'.

16 Benne' ca' dxeledábague' netu' ba gulechúgue'
lba na',
ne ba guládué' na xi'.
Gunná' benne' ca' lu xel-la' dxezrá'a chiu',
ne bzria xi' benne' ca'.

17 Bzua chuchu, ne bxue benne' ca' ba guca'u,
benne' xezr la xu na' ba nuzúa chuchu'.

18 Cabátadxa cueaj xíchajntu' Lue' xecha lasa.
Bcache chawe' netu', naca bantu', na' güe lá'anantu'
Lau'.

19 Xránantu' Dios, napu' dute xel-la' waca, beché'
netu'.
Bexache lazre' netu', na' lantu'.

81

1 Lu dute xel-la' dxebé le gul-la chee Dios, Bénnea'
dxutipe'

lázredxu.

Lu da ba neza cheele le cuezre xa'a lau Dios chee
zri'ine zre sua Jacob.

- 2 Le gul-la, ne le capa xídedau'.
Le quinne xrtan da con zríadi'i na du, ne da dxúl-
lalenle.
- 3 Le gucuezre luzu da dxulucuezre' gate naca beu'
dxe'ene,
da naca na zra nuzúadxu gundxu laní lá'azxa.
- 4 Naca na tu da dxun na ba xen xelún benne' Israel
ca',
da bdxixruj bea Dios xelún zri'ine zre sua Jacob.
- 5 Bzue' na ca tu da gulé'e lau na zri'ine zre sua José
gate beledxúaje' lu xezr la xu Egipto,
naga benda' tu xrtizra' bèneache da quebe
guxéajni'ida'.
- 6 Gunná Dios: “Begúa' xua' da buludé'e' benne'
chia' ca'.
Bsezá'a benne' chia' ca' da zi'i.”
- 7 Lu da ba xa' da guzúale, bláwizrle neda', na' bselá'
le'e.
Becheba' chee le naga nagacha' lu beuj bza gate na'
gunnéle'e guziu',
na' bxua' ájala gunle naga zaj de beaj nisa zaj nazí
le Meriba.
- 8 Le xene, bèneache chia', na' gusízreda' le'e.
Le'e, benne' Israel, che dxaca lázrele sile da
dxennía',
- 9 quebe gápale tu dios chee benne' xula,
ne quebe guzú zríbele lau tu dios chee benne' zitu'.
- 10 Neda', Xránale, naca' Dios chee le.
Bebéaja' le'e lu xezr la xu Egipto.
Le salaj dxú'ale, na' gunna' da gágule.
- 11 Bèneache chia' quebe belúe lazre' da gunnía'.
Benne' Israel ca' quebe gulaca lazre' xezezí' lu ne'e
neda'.
- 12 Chee le na' bsana' benne' ca' lawe' da gulaque'

lázxdau zide'.
 Belune' ca da guléquene' xrlátaje.
 13 Che la gulebé' gunne xue bèneache chia' chee da
 gunnía',
 ne che la belún benne' Israel ca da ble'eda' le',
 14 na' chadite bzria xi'a benne' guledábague' le',
 ne gudíl-lalena' benne' guledíl-lalene' le'.
 15 Che la belún benne' Israel caní,
 na' benne' ca' dxelecuídenē' Xránadxu buluzúe' xr-
 tizre',
 (san chadía chacanna zaj nabague' zria),
 16 na' Dios gunē' xelawe' zrua' xtila cháwedau',
 ne gunē' xelélajquezne' nen bzrína'dau'.

82

1 Zua Dios naga zaj nazraga benne' dxuluchi'e
 chee bèneache chee'.
 Dios dxuchi'e chee benne' ca' dxuluchi'e chee
 bèneache.
 2 Dxenná Dios: “¿Bátadxa guchí'ale chee bèneache
 chia' da quebe naca xrlátaje,
 ne gápale ba lá'ana benne' ca' zaj nabéaj xíchaje'
 Dios?”
 3 Le gácale benne' xache' ca', ne bidau' wezebe ca'.
 Le gun da xrlátaje chee benne' baxache' ca'
 ne chee benne' ca' dxelexázejne'.
 4 Le guselá benne' ca' dxeledé' lu da ba xa',
 ne benne' ca' quebe bi zaj nape'.
 Le guselá benne' ca' lu na' benne' ca' zaj nabéaj
 xíchaje' Dios.
 5 Quebe bi zaj nézene', ne quebe dxeléajni'ine',
 na' dxeledé' lu da chul-la.
 Dxuluzrizre' ca naca da zaj de lu xezr la xu.

6 Neda' gunnía': Le'e nácaquezle ca dios ca',
 ne nácale xúgutele ca zrí'inequeze Dios szrente,
 7 Wátele ca dxelate xezícadxa bēneache,
 na' cheajcházele ca cheajchaze núteteze benne'
 dxenná be'ę.
 8 ¡Guxasa, Dios!
 ¡Bchi'a cheę bēneache zaj zra' lu xęzr la xu,
 lawe' da naca dutę xęzr la xu chiu' Lue'!

83

1 ¡Dios, quebe sua zriu'!
 Quebe su' zrize, Dios, ne quebe gusezxuj dxu'u,
 2 lawe' da dxelebezre xa'a benne' ca' dxeledábague'
 Lue',
 ne dxulucá'ana szren cuina benne' ca' dxele-
 cuídenę' Lue'.
 3 Bagácheze ba zaj nune' tuze dizra' bi xelune' cheę
 bēneache chiu',
 ne ba zaj nune' bi xelune' cheę benne' ca' dx-
 uxúquezu' Lue'.
 4 Gulenné': "Le chu'u, guzría xidxu benne' ca'
 cheę québedxa xelaque' tu cue' xęzr la xu,
 ne québedxa nu sua benne' cheajsá lazrę' la Israel."
 5 Ba belune' tuze dizra'.
 Zaj nune' tuze dizra' xeledábague' Lue'
 6 benne' Edom ca', ne benne' Ismael ca',
 ne benne' Moab ca', ne benne' zri'ine zre sua ca'
 Agar,
 7 ne benne' Gebal ca', ne benne' Amón ca', ne
 benne' Amalec ca',
 ne benne' Filistea ca', ne benne' zaj zrę'ę xęzre
 Tiro.
 8 Cá'anqueze benne' Asiria ca' zaj nune' le' tuze.

Xúgute benne' caní dxelune' zrin chee zri'ine zre sua Lot.

9 Ben chee benne' caní ca benu' chee benne' Madián ca',

ne ca benu' chee Síara, ne ca benu' chee Jabín dxu'a xegu Cisón,

10 benne' ca' gulátie' lu xezr la xu Endor, na' belexaque' ca xrche'e bezre da gun na bebe lu xezr la xu.

11 Ben gaca chee benne' blau ca' chee benne' caní ca guca chee Oreb, ne chee Zeeb, ne ben gaca chee benne' dxelenná bé'ene' benne' caní

ca guca chee Zeba, ne chee Zalmuna,

12 lawe' da gulenná benne' caní: "Gaca cheedxu xezr la xu

naga zaj zra' benneache chee Dios."

13 Dios chia', ben xelaque' ca xizre bebe da dxua be' gate dxedube na.

Ben xelaque' ca xrlácue xia xéladu ca' da dxua be' bdunu'.

14 Ca dxun tu xi' da dxuzezxe na tu xi'a zren,

ne ca dxun xi' da dxuzezxe na tu din zren,

15 ca'an gudáu zi' xuzre benne' caní tu lu be' bdunu',

ne bchebe le' nen tu be' bdunu' chiu'.

16 Ben xelexedué'ele'ene',

ne ben xelape' Lue' ba lá'ana, Xran.

17 Ben xelexeque zréajene' ne xelezúa stébele'e tu chí'izqueze.

Ben xelexegá'ana dítajé', ne xelexenítie'.

18 Ben xelexúnbe'e nacu' Lue' Xránantu' Dios.

Tuzu' Lue' nacu' Dios zrente' lawe' dute' xezr la xu.

84

- 1 Nazrí'ile'eda' xudau' chiu' Lue', Dios, napu' dute
xel-la' waca.
- 2 Dxaca lázrele'eda' sua' ga na',
ne dxezá lazra' sua' lu xudau' chiu', Xran.
Dute da naca', ne dute lázrdawa' dxul-la' chiu' Lue',
Dios ban.
- 3 Ba belún chjegu ca' xrú'uneba',
na' buchuj ca' zaj de lataj naga dxuluzríaba' biadu
cheeba' ca'
naga zua lu cugu chiu' Lue', Dios, napu' dute xel-la'
waca.
- Nacu' Lue' Wenná Bea chia', ne Dios chia'.
- 4 Ba neza zrente naca na chee benne' ca' zaj zre'e
xudau' chiu'.
Chadía chacanna xelúe lá'anaqueze' Lue'.
- 5 Ba neza zrente naca na chee benne' ca',
Lue' dxuzúa chuchu' le',
benne' ca' dxelezá lazre' chjaque' xi'a lá'azxa chiu',
xi'a Sión.
- 6 Gate dxeledé' lache' bizre nazí le na
Lache' Nisa Dxebézredxu,
dxexaca na lataj naga dxalaj nisa,
na' gusezrá nisa xiuj ca' zaj naca beaj ca'.
- 7 Dxelácadxe' benne' wal-la dxácaté ne zaj xu'e neza
lawe' da xeelé'engé' Dios lu xi'a lá'azxa chee', xi'a
Sión.
- 8 Bene, Xran, ca naca da dxenaba' Lue', Dios, napu'
dute xel-la' waca.
Bene, Dios, nacu' Dios chee Jacob.
- 9 Ben da xrlátaje chee benne' wenná bea cheentu',
Dios,
benne' wenná bea na' guca'u Lue'.
- 10 Cháwedxa naca sua' tu zraze lu xudau' chiu'
quézcala sua' chi gaxúa iza naga xula.

Dxaca lazredxa' sua' dxa xu'a xudau' cheē Dios
 chia'
 ca tu benne' nada'u,
 quézcala súaqueza' tu lizra' zaca naga quebe zua
 Dios.

¹¹ Xránadxu Dios naquē' Benne' dxuxúē' dxi'u,
 ne Benne' Wenná Bea xabáa cheedxu.
 Dxunē' dxi'u da chawe' dutē xel-la' zri'i lazre'
 cheē',
 ne dxunē' dxelapa bēneache dxi'u ba lá'ana.
 Quebe xezúenē' zi' gunē' da chawe' cheē benne' ca'
 zaj naquē' du lazre'.

¹² ¡Dios, napu' dutē xel-la' waca!
 ¡Ba neza zrentē naca na cheē benne' ca' dxuluxrén
 lazre' Lue'!

85

¹ Benu' da xrlátaje cheē bēneache chiu', Xrana'
 Dios.

Benu' belexelá zri'ine zre sua Jacob,
 benne' ca' gulu'ē lu na' benne' zitu' ca'.

² Bnite lau' da zrinnaj da belún bēneache chiu'.
 Bdeu' chalá'ala ca zaj naca dul-la cheē benne' ca'.

³ Bzua zriu' xel-la dxezrá'a chiu',
 ne bsanu' xel-la' xichaj zra'a chiu'.

⁴ Bēn xezúantu' lu da ba neza cheē xel-la' weselá
 chiu', Dios,
 ne québedxa zra'u netu'.

⁵ ¿Tu chí'izqueze zra'u netu'?

¿Wazrá'aquezu' tu cuen tu cuen zri'ine zre suantu'?

⁶ ¿Québedxa gunu' xexaca bantu',
 cheē súantu' lu da ba neza lau Lue'?

⁷ ¡Xran, bexache lazre' netu', ne bselá netu'!

⁸ Guzé naga' da nnē Xrana' Dios.

Nne' da guzúa na bèneache chee'
 lu xel-la' dxebeza zri lazre',
 chee' québedxa xelún benne' lá'azxa chee' da xálaze.
 9 Da líqueze Le' zúatequeze' guselé' benne' ca' dx-
 elezrebe' Le',
 chee' sua da xabáa chee' lu xezr la xu cheedxu.
 10 Zaj nazraga xel-la dxexache lazre', ne da li chee'
 Dios.
 Zaj naca tuze da xrlátaje, ne xel-la' dxebeza zri
 lazre'.
 11 Da li chee' gusezrá na xezr la xu nigá,
 na' sel-le' da xrlátaje chee' da za xabáa.
 12 Xránadxu gúnnaqueze' dxi'u da cháwedau',
 na' gúnnale'e xezr la xu cheedxu.
 13 Nu benne' naque' xrlátaje waca xezrine' lau
 Dios,
 na' guné' gundxu ca da ba blé'ene' gundxu.

86

1 Bze naga, Xran, ne bene chia',
 lawe' da zua' lu da ba xa', ne dxexázrjeda'.
 2 Bxue neda' lawe' da naca' chiu'.
 Bselá neda', Dios chia', naca' wen zrin chiu',
 ne dxuxrén lazra' Lue'.
 3 Bexache lazre' neda', Xrana' Dios,
 lawe' da dxuláwizra' Lue' te zra chizrela.
 4 Ben béle'eda' neda', wen zrin chiu',
 lawe' da dxuzúa cuina' lau Lue', Xran,
 5 na' Lue', Xran, nacu' xrlátaje, ne dxunite lau'
 cheentu'.
 Zúatequezu' xexache lazru' benne' ca'
 dxululáwizre' Lue'.
 6 Xrana' Dios, bene da dxuchálajlęna' Lue',
 ne bze naga ca da dxenaba' lau'.

- 7 Lu zra sua' lu da stébele'e wannéqueza' Lue',
lawe' da dxexechébequezu' Lue' chia'.
- 8 Xran, quebe nu chilá' Dios ca Lue',
ne quebe nu dxun ca da dxunu' Lue'.
- 9 Xelélé' bénneache dutē xezr la xu da benu' Lue',
na' xelúe lá'anaqueze' Lue', Xran,
ne xulucá'ana szrenē' Lau' Lue',
- 10 lawe' da nacu' Lue' szren, ne dxunu' da dx-
exebámentu'.
- Tuzu' Lue' nacu' Dios.
- 11 Bseḏe neda' da dxaca lazru' guna', Xrana' Dios,
na' guna' ca naca da li chiu'.
- Gunná be'e lázrdawa' cheę zreba' La cuinu'.
- 12 Dutē lázrdawa' güe lá'anaqueza' Lue', Xrana' Dios,
ne gucá'ana szrénqueza' Lau' chadía chacanna,
- 13 lawe' da zúatequezu' xexache lazru' neda',
ne bseláu' bénne'du xu'a lu lataj ba xa'.
- 14 Dios, belasa benne' dxulucá'ana szren cuine',
ne dxeledábague' neda',
na' benne' xichaj zra'a ca' belunē' tuze dizra'
xelútię' neda',
ne quebe dxelezrebe benne' ca' Lue'.
- 15 Lue', Xrana', nacu' Dios dxexache lazru' netu',
ne nacu' zren lazre',
ne quebe dxezrá'azeu', san zúatequezu' xexache
lazru' netu',
ne nacu' li lazre'.
- 16 Gunná' ca naca chia', ne bexache lazre' neda'.
Benna chia' neda', wēn zrin chiu', xel-la' waca
chiu',
na' bxue neda', zri'ine nu'ula wēn zrin chiu'.
- 17 Ble'e neda' tu da gaca bea na gaca chawe' chia',
ne bēn xelélé'e benne' ca' dxelecuídenē' neda' da
na',

ne ben xelexedué'ene',
lawe' da nacu' Lue', Xrana' Dios, Bénnea' gúcalene'
neda',
ne bexúe zrene' neda'.

87

¹ Lane xezre Sión zria na lu xi'a lá'azxa.

² Nazrí'idxa Xránadxu Dios lataj naga dxuluchi'a
benne' zaj zre'e xezre Sión,
ca nazrí'ine' xúgute xu'u lizre zri'ine zre sua Jacob.

³ Da xrtante ca' dxelenná bénneache ca naca xezre
chee' Dios.

⁴ Cheajsá lazra' lu xezr la xu Egipto, ne lu xezr la
xu Babilonia
ga na' zaj zra' bénneache zaj núnbe'e neda'.
Le nna' xque, lu xezr la xu Filistea, ne lu xezre
Tiro, ne lu
xezr la xu Etiopía gulalaj benne' caní zaj
naque' chia'.

⁵ Ca naca chee' xezre Sión nnia':
Benne' nigá, ne bénnea' gulálaje' ga na', na' neda',
Dios zrente, guzúa chúchua' xezre na'.

⁶ Gate gulaba Xránadxu Dios benne' ca' zaj naque'
chee',
nne': "Benne' nigá gúlaje' lu xezre na'."

⁷ Benne' ca' dxelul-le', ne benne' ca' dxeline' xide
xelenné':

Ca naca da ba neza zúantu' lu xezre na'.

88

¹ Xran, nacu' Dios dxuseláu' neda'.

Te zra, ne chizrela dxuláwizra' Lue'.

² Bene da dxuchálajlęna' Lue',
ne bze naga da dxuláwizra' Lue'.

³ Dxedú lazra' lu da caleła ca' da dxaca na chia',
ne ba zua' gatia'.

⁴ Dxeleque bėnneache neda' ca tu benne' gate,
lawe' da dxátele'ę ni'a na'a.

⁵ Nagá'ana' cá'aze ládujla benne' gate.

Naca' ca benne' gulátie' lu wedil-la, ne zaj de'
xędxu ba ca',

benne' ca' québedxa dxajsá lazru', Dios,
ne québedxa zaj xu'ę lu na'u Lue'.

⁶ Dxaca chia' cáteze ba nuzú' neda' tu xędxu zren
naga naca chul-la, ne nácale'ę situj.

⁷ Dxéqueda' dxezrá'le'u neda'.

Da dxaca chia' naca na ca dxazia' zran xeajxruza
zri'a
cheę nísadau'.

⁸ Benu' belexebiga bi ljwezra' ca' naga zua'.

Benu' neda' ca tu da dxusegute na benne' ca'.

Naca' ca tu benne' xu'ę lizre xia ne quebe gaca
xędxúaje'.

⁹ Dxelechul-la xiaj lawa' ne cheę da dxezí dzezaca'.

Xúgute zra dxuláwizra' Lue', Xrana' Dios.

Dxechisa na'a lau Lue'.

¹⁰ ¿Dxúnquezu' xel-la' waca cheę xabáa dxácalęnu'
benne' gate ca'?

¿Dxelexasa benne' gate ca' dxelúe lá'ane' Lue'?

¹¹ ¿Dxuluchalaj benne' zaj nagache' lu xędxu ba
cheę

xel-la zri'i lazre' chiu',

na' dxuluchalaj cheę da li lazre' chiu' benne' zaj
xu'e

lataj chul-la cheę benne' gate ca'?

12 ¿Welexúnbea benne' zaj xu'ę lataj chul-la na' ca
naca da zrentę da dxunu',
na' welexúnbea benne' zaj xu'ę naga quebe nu
dxajsá lazre' le'
ca nacu' xrlátaje?

13 Neda' dxuláwizra' Lue', Xrana' Dios.

Xúgute zila dxezrín lau' da dxenaba' Lue'.

14 ¿Bizr cheę na' dxebéaj xíchaju' neda', Xran?

¿Bizr cheę na' quebe dxenná'u neda' cheę gácalęnu'
neda'?

15 Dxezí dxezaca', ne ba zua' gatia'.

Nácatea' bi cuíde'tę dxedéa' xel-la' zi' da dxudeu'
neda',

na' dxedú lazra'.

16 Dxéqueda' dxezrá'le'u neda'.

Da dxuchebu' neda' ba bsedú na lazra'.

17 Zaj naxechaj da caní neda' du zra.

Dxulusaca zi na neda' gáteteze na'.

18 Bęnu' belexebiga bi ljwezra' ca' naga zua',

na' tuze da naca chul-la dxedále na neda'.

89

1 Tu gúl-lazqueza' cheę xel-la' zri'i lazre' chiu', Xran.
Guzenda' tu cuen tu cuen zri'ine zre súantu' nacu'
li lazre'.

2 Nezda' tu súazqueze xel-la zri'i lazre' chiu',
ne chadía chacanna zua xel-la li lazre' chiu',
cáteze zúaqueze xabáa.

3 Lue' gunnáu': “Bęna' xel-la wezría nen bęnnea' ba
gucá'a.

Guchebe lazra' cheę David, węn zrin chia',

4 gunnia': Guna' tu cházqueze zri'ine zre su'.

Guna' xelenná be'ę tu chí'izqueze lu waláz chiu'.”

5 Benne' zaj zra' xabáa dxelúe lá'ane' Lue',

ne chee da zrente ca' da dxunu', Xran,
 ne ne chee xel-la' li lazre' chiu', naga zaj nazrague'.
 6 Quebe nu zua xabáa, benne' naque' ca Lue', Xran.
 Quebe nu zua benne' szrente, benne' naque' ca
 Lue'.

7 Benne' zaj zra' xabáa dxelape' Dios ba lá'ana,
 na' xúgute benne' ca' zaj nazraga chee' dxelezrebe'
 Le'.

8 Xran, nacu' Dios chee benne' zante, benne' zaj
 zra' xabáa.

Quebe nu zua, benne' naque' ca Lue', Xran.
 Nacu' Benne' wál-late, ne tu nácazquezu' li lazre'.

9 Xu'u lu na'u xeajxruza zren chee nísadau'.
 Gate dxelasa xeajxruza ca' Lue' dxebeque zriu' na.

10 Bchúchuju' benne' Egipto ca', na' belexegá'ane'
 ca tu da gate.

Beše dínajju' benne' ca' dxeledábague' lue' nen na'u
 wál-late.

11 Chiu' Lue' naca xabáa, ne chiu' Lué'queze naca
 xezr la xu.

Benu' xezr la xu nigá, ne da ca' zaj nnita lawe na.

12 Benu' da de chalá'a naga za' be' zaga,
 ne da de chalá'a naga dxedé gubizra beu' zaga ca'.
 Xel-la dxelebé dxelul-la chiu' xi'a Tabor, ne xi'a
 Hermón.

13 Benne' wál-late nacu' Lue'.

Da zrente naca xel-la waca chiu', ne nagá'ana
 szren na.

14 Lu da xrlátaje, ne lu da li lazre' dxenná be'u.

Lu xel-la zri'i lazre', ne lu da li lazre' zaj zua ca da
 dxunu'.

15 Ba neza zrente naca na chee benne' ca' dxelul-le'

da dxue lá'ana na Lue',
ne zaj zue' lu xel-la naxani' chiu', Xran.

16 Ne chiu' Lue' dxelebéle'ene' du zra,
ne dxulucá'ana szrene' Lue' ca naca da xrlátaje
chiu'.

17 Lué'queze nacu' xel-la wal-la chee benne' ca',
ne xel-la xrtan chee'.
Dxúnnadxu' netu' xel-la' waca lawe' da ca'
dxéquenu' xrlátaje.

18 Xránadxu Dios dxucu'uje' dxi'u,
na' Dios lá'azxa chee benne' Israel ca' naque'
Wenná Bea cheedxu.

19 Nédxudaute bchálaju' lu da blé'enu' benne'
wēn zrin chiu' ca', benne' zaj naque' li lazre',
gunnáu':

Ba gucá'a tu benne' wal-la ládujla bēnneache chia',
ne ba bzua' le' gaque' wenná bea, ne dxácalēna' le'.

20 Ba gucá'a David, wēn zrin chia'.

Bzúaqueza' le' gaque' wenná bea.

21 Neda' tu gácalezqueza' le'.

Xel-la waca chia' gutípaqueza' lazre'.

22 Benne' ca' guledábague' Le' quebe xelezéquene'
bi xelune' chee',
na' benne' ca' dxelune' da calēla quebe
xelezéquene'
xuluchúchuje' le'.

23 Guchúchujqueza' benne' dxeledábague' Le', ne
gucuaasa'
benne' ca' lau le'.

Guna' wē' benne' ca' dxelecuídene' le'.

24 Tu zrí'izqueza' le', ne gaca' li lazre' nen le',
na' ne chia' neda' gápadxe' xel-la' wal-la.

25 Guna' nna be'e dute dxu'a nísadau' zren,
ne dute dxu'a xegu Eufrates.

26 Le' xe'e neda': "Lue' nacu' Xra'.
Nacu' Dïos chia', dxucu'uju' neda', ne dxuseláu'
neda'."

27 Neda' guzúa' le' ca zri'ina' blau,
na' nna bé'ene' xúgute benne' wenná bea zaj zre'e
lu xezr la xu.

28 Tu chí'izqueze nuzúa' chee' xel-la' zri'i lazre'
chia',
na' ca naca xel-la' wezríá chia' gaca líqueze na nen
le'.

29 Guna' tu cházqueze zri'ine zre sue',
na' xelenná be'e lu waláz chee' dxácatę ne zua
xabáa.

30 Che xulusán zri'ine zre sua David da nadxixruj
be'a,

ne che quebe xelunę' ca da nuchi'a chee',

31 ne che xelecuase' lu da dxenná be'a,
ne che quebe xelunę' ca da dxapa' le',

32 na' gu'a le' zrise lawe' da dxeledábague' neda',
ne quina' le' xide lawe' da dxelunę' da caleła.

33 Quebe gusana' ca nazrí'ida' David,
ne quebe gusana' gaca' li lazre' nen le',

34 ne quebe gal-la lazra' xel-la' wezríá da nuna',
ne quebe guchá'a ca da ba gunnía'.

35 Tu lásaze bzetaj cuina' guchebe lazra',
na' cabata' gun lazra' chee' David,

36 gunnia': Tu cházqueze zri'ine zre sue',
na' xelenná be'e lu waláz chee' lawa' neda'
dxácatę ne zua gubizra.

37 Xel-la' dxenná bea chee' tu sua chúchuzqueze na
ca zua beu' zran xabáa.

Tu sua chúchuzqueze na dxácatę ne zua xabáa.

- 38 Lue', Dios, guleaj xíchaju', ne bzu' chalá'ala
bénnea' guca'u,
ne dxezrá'le'u le'.
- 39 Nuzú' chalá'ala xel-la' wezría bénlenu' David,
wɛn zrin chiu',
ne nucá'ana dítajú' xel-la' dxenná bea chee'.
- 40 Nuxrínajú' ze'e da naxečaj na xezre zréntau'
chee',
ne nuzría xi'u ca naca lataj wal-la chee' chee' wedil-
la.
- 41 Xúguté bénneache, benne' dxeledaze ga na' dxele-
bane'
chee' dá zaj de chee',
na' benne' xezre walíZR chee' dxelún le' chee'.
- 42 Ba benu' bedxúaj chawe' benne' guledábague'
Le',
na' dxelebéle'ene'.
- 43 Ben dítajú' da ca' dxuchínene' lu wedil-la,
ne quebe gúcalenu' le' lu wedil-la na'.
- 44 Ba gudú' ca naca da xrtanté chee',
ne nucá'ana dítajú' xel-la' dxenná bea chee'.
- 45 Benu' naque' ca tu benne' gula gate ne zué' iza
cuide' chee',
ne bsi'u le' xel-la' stu'.
- 46 Xrana' Dios, ¿bátaqueze quebe xennu' cheentu'?
¿Tu chí'izqueze dxezrá'aquezu' netu'?
- 47 Bsa lazre' látega sua' lu xezr la xu.
Látega nunu' xel-la' nabán chee' xúguté bénneache.
- 48 Quebe zua nu benne' gaca bane' tu chí'izqueze.
Xúguté' xelatíe'.
- Quebe zua nu benne' le' lu na' xel-la' gute.
- 49 Xran, ¿ba bsanu' David, ne québedxa nazrí'inu'
le',

ca bzetaj cuinu' guchebe lazru' zrí'iquezenu' le'?
⁵⁰ Gunná' xque, Xran, ca dxelún le' chia' neda',
 wen zrin chiu',
 ne ca dxuchaga lawa' da dxelún lala benne' xúgute
 xezr la xu
 chia' neda'.
⁵¹ Benne' ca' dxeledábague' lue' dxulucá'ana dítajē'
 bēnnea' guca'u Lue', Xran.
 Dxulucá'ana dítajē' le' gáteteze zéajē'.
⁵² Ba neza zrente gaca Xránadxu Dios chadía cha-
 canna.
 Ca' naca na, ne ca' gaca na.

90

¹ Xránantu' Dios, ba cua ba cua,
 Lue' nacu' ca tu xu'u naga zra cháwentu'.
² Nédxudaute ca za gunu' xi'a zri'a ca',
 ne ca za sua xezr la xu, ne bēneache,
 na' nédxudaute, ne lu da za za' nácaquezu' Lue' Dios.
³ Dxu'u bēneache xelexaque' da gulaque',
 dxelexaque' xu xrte.
⁴ Chiu' Lue' chi gaxúa iza zaj naca na ca neaje, da
 ba gudé na,
 ne ca tu chí'idau'ze chizrela.
⁵ Dxegú' bēneache ca dxun guba'u,
 da dxua na xúgute xizre laga ca'.
 Zaj naque' ca tu bchigala da dxexenite na gate
 dxexebandxu.
⁶ Zaj naque' ca tu xixre' da dxegula na che zílala.
 Dxegula na, ne dxelá'te na xiaj,
 na' xelate' zua gubizra dxelechugue' na, na' dxe-
 bizre na.
⁷ Dxebía xi'ntu' lawe' da dxezra'u netu'.
 Stébele'e zúantu' lawe' da dxezrá'le'u netu'.

8 Dxenna'u ca da caleḷa da nuntu'.

Dxulé'enu' lówela zria da nabágantu'.

9 Dxuzáchiu' iza cheḡntu' lawe' da dxezra'u netu'.

Dxelexedú iza cheḡntu' ca tu be' da dxecá'antu'.

10 Ca zaj naca zra naca bantu', zaj naca na ga xun
chi iza,

na' che nácantu' benne' wal-la, waca bantu' du
tápalalaj iza,

san ca zaj naca iza ca', dxedentu' xel-la' zi',
ne dxéquentu' zede.

Chadí dxeledé iza ca', na' xenítentu'.

11 ¿Nuzra núnbea xanne' ca naca xel-la' dxezrá'a
chiu'?

¿Nuzra núnbea ca naca xel-la' xichaj zra'a chiu'?

12 Ble'e netu' ca láteze zaj naca zra cheḡntu'

cheḡ gácantu' benne' dxeléajni'ine'.

13 Xran, bexaca netu' tuze.

¿Bátadxa chenu'?

Bexache lazre' netu', wḡn zrin chiu'.

14 Tu tu zila bzua xichaj lázrdauntu' xel-la' zri'i
lazre' chiu',

na' dutḡ xel-la' dxebé tu gul-lazquezentu' chiu'
xúgutḡ zra naca bantu'.

15 Bḡnna netu' zane' iza cheḡ bentu' ca zaj naca iza
bsaca zi'u netu',

ne ca zaj naca iza guzúantu' lu da stebe.

16 Bḡ lataj netu', wḡn zrin chiu', le'entu' da zrente
da dxunu',

ne xeledé'e zri'ine zre suantu' da xabáa chiu'.

17 Xránantu' Dios, bḡn gaca cheḡntu' da chawe'
chiu'.

Bḡn chepe ban ca naca zrin dxuntu'.

Awe', Xran, bḡn chepe ban ca naca zrin dxuntu'.

91

- 1 Bénnea' dxuxrén lazre' Xránadxu Dios chee guxúe'
le',
ne dxuzúe' Dios, Bénnea' nape' dutę xel-la' waca,
chee gácalene' le',
- 2 waca xe'e Dios: Nacu' Bénnea' dxebeza lazra',
ne Bénnea' dxucache chawe' neda'.
Nacu' Dios chia', na' dxuxrén lazra' Lue'.
- 3 Dios gucache chawe' lue' lu xúgute da stebe da
quebe zaj nalá',
ne lu xúgute xízrawe' da dxelute na bénneache.
- 4 Gucache chawe' lue' ca dxun tu bedxuj dxézreba'
biadu cheeba' zran xrílaba', na' chu'u
chawu' lu na' Le'.
- Xel-la' li lazre' chee gácale na lue', ne gucache
chawe na lue'.
- 5 Quebe bi guchebe lue' chizrela, ne quebe bi da
stebe te zra,
- 6 ne quebe bi xízrawe' chee da chul-la,
ne quebe bi da calela ca' da dxelute na bénneache
te zra.
- 7 Welate chi gaxúa bénneache cuitu' lue',
ne gaxúa gaxúa bénneache gáguze naga zu',
san quebe bi sacu' lue'.
- 8 Wanna'u, na' walé'enu'
ca ba xa' xeledé benne' ca' dxelune' da calela.
- 9 Nuzú' Xránadxu Dios ca Benne' dxebeza lazru', ne
Dios,
Bénnea' nape' dutę xel-la' waca, chee gucache
chawe' lue'.
- 10 Chee le na' quebe bi da calela gaca na chiu',
ne quebe bi xízrawe' chu'u na lizru'.
- 11 Dios gusebague' gubáz chee xabáa chee' ca' chee
xelácalene' lue',

na' xuluxúe' lue' gáteteze chéaju'.

¹² Xeluxre' lue' lu ne'e chee quebe ga'a xiaj ni'u.

¹³ Guléajquezu' bezre xixre' ca', ne bēla' ca',
bezre xixre' schanní' ca', ne bē snia ca'.

¹⁴ Dxenná Dios: “Guselá' xúgute benne' ca' zaj
nazrí'ine' neda',

ne gucache chawa' benne' ca' dxelexechebe' naca'
Xrane'.

¹⁵ Gate xelenné' neda', na' xecheba' chee'.

Gate zaj xu'e lu da stebe, súalequeza' le'.

Guselá' le', ne guna' le' ba lá'ana.

¹⁶ Guna' xelaca bane' zánete iza, ne guselá' le'.”

92

¹ Chawe' naca dxue lá'anantu' Lue', Xrana' Dios,
ne gúl-lantu' da dxucá'ana szren na Lue', Dios
szrente.

² Chawe' naca dxuzéentu' bēnneache tu zra tu zra
ca dxexache lazru' netu',
na' dxela dxulé'entu' nacu' li lazre'.

³ Dxúl-lantu' da caní, dxínentu' da dxúl-lalentu'
da ze chi du chee na,

ne dxínentu' da con zríadi'i na du da dxennéle'e
xrtandau'.

⁴ Xrana' Dios, ne chee da dxunu' Lue', dxunu'
dxebéle'eda'.

Ca zaj naca da nun na'u zua' lu da ba neza.

⁵ Da zrente zaj naca da nunu', Xrana' Dios.

Da zréne'e zaj naca da dxugú'u lazru' gunu'.

⁶ Québequeze neze benne' lázxdau zide',

ne quebe dxéajni'i benne' xala ca naca da nigá.

⁷ Gate dxelegula benne' dxelebéaj xíchaje' Dios
ca dxegula xixre',

ne dxepe ban da dxelún benne' wēn da zrinnaj,

naca na cheē xelebía xi'e tu chí'izqueze.

⁸ Lue', Xrana' Dios, tu nácazquezu' Dios szrente.

⁹ Dxunna bea na ca gaca cheē benne' dxedábague'
Lue',

Xrana' Dios.

Dxunna bea na xelebía xi' benne' ca' dxeledábague'
Lue'.

Xelase dinnaj xúgutē benne' ca' dxelunē' da zrin-
naj.

¹⁰ Lue' dxunu' dxezrendxa xel-la' wal-la chia' ca
naca
xel-la' wal-la cheē bezre.

Dxugú'u da za xíchaja' da dxutipa na lazra'.

¹¹ Dxal-la' le'eda' xelezrá' zran ni'a benne'
dxeledábague' neda',

na' xenda' xebebezre xache' benne' ca' guledíl-
lalenē' neda',

benne' ca' dxelunē' da calēla.

¹² Welexán benne' xrlátaje ca' ca dxun xaga zina'.
Xelegulē' ca dxun xaga cedro lu xi'a Líbano.

¹³ Zaj naquē' ca tu xaga zē na lu xudau' cheē
Xránadxu Dios,
da dxegúlalē'e na lu chale'aj cheē xu'u lizre Dios
cheēdxu.

¹⁴ Zaj naquē' ca xaga ca' dxelebía da zixre cheē na
gate

ba zaj nagula na, ne zaj naca na xaga xa'a wal-la.

¹⁵ Benne' caní xuluzenne' bénneache naca li lazre'
Xrana' Dios, Bénnea' dxuzé chúchuē' neda',
ne quebe bi zúalē Lē' da quebe naca xrlátaje.

93

¹ Xránadxu Dios naquē' Wenná Bea,
ne nacē' zra lanē' da zácalē'e.

Nácuē' zra lanē', ne da nagú'u lē'e naca na xel-la'
waca zrēn.

Nuzúa chúchuē' xēzr la xu nigá, na' quebe nu
seque' gutá na.

² Lataj naga dxe'u dxenná be'u, Xran,
zua chuchu na nédxudaute,
na' Lue' zúaquezu' chadía chacanna.

³ Dxelebezre xa'a xegu ca', Xran.
Dxelebezre xa'a na, ne dxelenné na zizraj.

⁴ Xránadxu, Bénnea' zuē' xabáa nápadxē' xel-la' waca
ca da zaj napa xegu ca' dxelebezre xa'a na,
ne ca da zaj napa xeajxruza cheē nísadau'.

⁵ Chúchulē'e zaj naca da nadxixru be'u, Xran.
Lá'azxa nácaqueze xudau' chiu' chadía
chacánnaqueze.

94

¹ Xrana' Dios, dxebéaj lazru' bēnneache.
Lue', Bénnea' dxebéaj lazrē' bēnneache, ble'e cuinu'.

² Dxuchi'u Lue' cheē da dxelún xúgutē bēnneache.
Guxasa, bexizruj da dxal-la' xelezí' benne'
dxulucá'ana szren cuinē'.

³ Xrana' Dios, ¿Bátadxaqueze xelún benne' wēn da
calela caní?
¿Bátadxaqueze xelebé benne' ca' dxelebéaj xíchajē'
Dios?

⁴ ¿Bátadxaqueze xulucá'ana szren cuinē', ne xe-
lenné' dizra' zī?
¿Bátadxaqueze xulucá'ana szren cuina benne' ca'
dxelebéaj xíchajē' Dios?

⁵ Benne' caní dxuluxrínna' bēnneache chiu' Lue',
Xran,

ne dxulusaca zi'e bēnneache guca'u Lue'.

⁶ Dxelútíe' nu'ula tuze ca', ne benne' zitu' ca',
ne dxelunē' xelátebe' bidau' wezebe ca'.

⁷ Dxelenné': "Quebe bi dxelé'e Díos, Xrana benne'
ca'.

Dios chee benne' Israel ca' quebe dxue lazre' chee
da na'."

⁸ Le chéajni'i, le'e, benne' lázxdau zide'.

Le'e, benne' xala, ¿bátadxaqueze quebe chéajni'ile?

⁹ Dios bene' nágadxu.

¿Québequeze dxénne' da dxennale?

Dios bene' xiaj laudxu.

¿Québequeze dxelé'ene' da dxunle?

¹⁰ Díosqueze dxuzé' lu da ba xa' benne' xezr la xu
ca'.

¿Québequeze til-le' le'e?

Díosqueze dxunē' dxeléajni'i bēnneache.

¿Québequeze gueque be'ene' da xu'u xichaj
lázrdaule?

¹¹ Xránadxu Díos nézquezne' da xu'u xichaj lázxdau
xúgutē bēnneache.

Nézene' zaj naca na da dácheze.

¹² Ba neza zrente naca na chee bēnnea' dx-
uzéajni'inu', Xran,

ne dxusédenu' le' ca naca da nadxixruj be'u,

¹³ chee cueza zri lazre' gate za zra dxaca da calela,
ca zrin zra xelexú'u xedxu ba benne' dxelunē' da
zrinnaj.

¹⁴ Québequeze cueaj xichaj Xránadxu Díos
bēnneache chee',

ne quebe gusán lazre' benne' ca' ba gucá'a Le'.

¹⁵ Naca xrlátaje ca xuluchí'e chee bēnneache,
na' xelúnqueze da xrlátaje xúgutē benne' zaj naque'
li lazre'.

- 16 ¿Núzraqueze gácale neda' tíl-lalēdxu benne'
wēn da calela ca'?
- ¿Núzraqueze súale neda' tíl-lalēdxu benne'
dxelunē' da zrinnaj?
- 17 Chela ca gúcale Xránadxu neda', bachelja xu'a
xēdxu ba.
- 18 Gate gunnía': Xran, ba zua cheajcházia',
na' Lue', dute xel-la' zri'i lazre' chiu' gúcalēnu'
neda'.
- 19 Gate dxe'a gunne xue, ne zua' lu da stēbe,
Lué'queze dxexúe zrenu' neda', na' dxebéle'ēda'.
- 20 Québequeze nacu' tuze benne' ca' dxuluchi'e
cheē
bénneache da quebe naca xrlátaje,
benne' ca' dxulucá'anē' ca xrlátaje da quebe naca
na xrlátaje.
- 21 Benne' caní dxelunē' tuze dizra' da xelunē' cheē
benne' xrlátaje,
na' dxelechugue' cheē gate bénnea' quebe bi zria
nabague'.
- 22 Xránadxu Dios naque' ca tu xu'u naga zua
chawa'.
Dios chia' naque' ca tu xiaj xre da dxuzé chacha na
neda'.
- 23 Le' xexízruje' benne' ca' dxelunē' da calela cáteze
naca
da zrinnaj da belunē'.
- Guzría xi'e benne' ca' lu da calela da dxelunē'.
- Xránadxu Dios guzría xi'e benne' ca' dxelunē' da
calela.

95

- 1 Le da, güe lá'anadxu Xránadxu Dios dute xel-la'
dxebé.

Dute₂ xel-la' dxebé gúl-ladxu chee₂ Bénnea' nuzúa
chúchue'
dxi'u naga ladxu.

² Cheajdxu lau Le', ne xedxu Le': Xcalenu'.

Dute₂ xel-la' dxebé gúl-ladxu da güe lá'anadxu Le'.

³ Naca Xránadxu tu Dios szrente,
ne naque' Wenná Bea szrente lawe' dios ca' chee₂
bénneache.

⁴ Dxenná bé'ene' du gabí'i xezr la xu,
naga naca situj, ne naga naca sibe chee₂ xi'a ca'.

⁵ Dxenná bé'ene' nísadau' da núnqueze Le',
ne cá'anqueze xezr la xu da bene'.

⁶ Le da, gucá'ana szrendxu Le', gátadxu sudxú'ala.
Guzú zríbedxu lau Xránadxu, Bénnea' nune' dxi'u.

⁷ Le' naque' Dios cheedxu.

Nácadxu benne' ca' dxuxúequeze', ne nácadxu ca
zríla'du ca'
cheéqueze'.

⁸ Che dxenle chi'e na'a zra, quebe gun zide'
láZRdaule

ca belún xra xrtáule ca' naga nazí le na Meriba,
ne ca belune' lu zra na' le'e xixre' lawe' lataj naga
nazí le na Masah,

⁹ naga buluchá'a xra xrtáule neda', ne belune'
neda' da stebe

lácala belelé'ene' xúgute da bene'.

¹⁰ Lawe' chua iza beditaj lazra' chee₂ benne' ca',
na' gunnía': Zaj naque' benne' dxelebéaj xíchaje'
neda',

ne quebe dxelune' ca da dxulé'eda' le'.

¹¹ Chee₂ le na', dute₂ xel-la' dxezrá'a chia' bzetaj
cuina' gunnía':

Quebe xelexú'unqueze' naga xelexezi' lazre' nen neda'.

96

- ¹ Le gul-la chee Xránadxu tu da cube.
Le gul-la chee Xránadxu, le'e zrale du gabí'i xezr la xu.
- ² Le gul-la chee Xránadxu, ne le güe lá'ana La lá'azxa chie'.
Tu zra tu zra le guzén ca naca xel-la' weselá da dxunne'.
- ³ Le guzén benne' xezr la xu ca' ca naca xel-la' szren chee',
Ne benne' xúgute xezre ca zaj naca xel-la' waca zren nune'.
- ⁴ Szrente naca Xránadxu, ne naca chee' güe lá'anale'edxu Le'.
Naca chee' gápadxe' xel-la' ba lá'ana ca dios ca' chee' bèneache,
- ⁵ lawe' da zaj naca xúgute dios ca' bedáu' xiaj xaga ca'.
Xránadxu Dios bene' xabáa na'.
- ⁶ Zúale Le' da xabáa, ne xel-la' szren.
Nazrate xudau' chee' xel-la' waca, ne da xrtante'.
- ⁷ Le güe lá'ana Xránadxu, le'e zrale du gabí'i xezr la xu.
Le güe lá'ana xel-la' szren chee', ne xel-la' waca chee'.
- ⁸ Le gapa ba lá'ana Xránadxu ca da naca chee' si'e.
Le gua da gunézrujle, ne le da chale'aj chee' xudau' chee'.
- ⁹ Le gucá'ana szren Xránadxu lu xel-la' xrtante' chee' da naca lá'azxa chee'.
Le zrebe lau Le', le'e zrale du gabí'i xezr la xu.

10 Le x̄e b̄enneache x̄ezr la xu: Naca Xránadxu Wenná Bea.

Nuzúa ch̄úchue' x̄ezr la xu nigá, na' quebe nu seque' gutá na.

Guchi'e chee b̄enneache ca naca da xrlátaje.

11 Le be, le'e, xabáa, ne x̄ezr la xu.

Le cuezre xa'a, le'e, nísadau', ne bea ca' zrale na'.

12 Le be, le'e, le'e xixre', ne bea ca' zrale na'.

Xaga ca' zaj dx̄e' xi'a ca' welunna schaga lu xel-la' dxebé

13 lau Xránadxu gate xide'.

Xide' guchi'e chee b̄enneache zaj zre'e x̄ezr la xu.

Nna bé'ene' b̄enneache du gabí'i x̄ezr la xu.

Nna be'e Le' ca naca da xrlátaje, ne ca naca da li.

97

1 Naca Xránadxu Benne' Wenná Bea.

Le be, le'e zrale x̄ezr la xu.

Le be, le'e zrale dxu'a nísadu ca'.

2 Zaj naxechaj beuj, ne da chul-la Le'.

Ca naca da li, ne da xrlátaje dxenná be'e.

3 Cuía lau xi' lau Le',

ne guzezxe na benne' guledábague' Le'.

4 Ca naca xesa ca' chee' bulusení na x̄ezr la xu.

Dxelé'e x̄ezr la xu na, ne dxezrize na.

5 Dxelexuna xi'a ca' ca da zixre chee b̄ezudau' lau Xránadxu,

lau Xrana b̄enneache zaj zre'e du gabí'i x̄ezr la xu.

6 Dxulé'e xabáa ca naca da xrlátaje chee',

na' dxelelé'e b̄enneache dut̄e x̄ezr la xu ca naca xel-la' szren chee'.

7 Dخال-la' xelexedué'e xúgute benne' ca'

dxulucá'ana szrene'
bedáu' xiaj xaga ca',

benne' ca' dxulucá'ana szren cuine' ca zaj naca
bedáu' xiaj xaga ca'.

Xúgute dios chee bèneache ca' dxal-la' xuluzú
zribe na

lau Xránadxu Dios.

⁸ Belén benne' zaj zře'e Sión, na' gulebene'.

Gulebé benne' zaj zře'e Judá, ne chee da guchi'u
Lue', Xran.

⁹ Szrente nacu' Lue', Xran, lawe' dute xezr la xu.

Szrendxa nacu' Lue' ca xúgute dios chee bèneache.

¹⁰ Le'e, núlale nazrí'ile Xránadxu, le cuide da calela.

Le' dxuxúe' bène'du zaj xu'e bèneache chee'.

Dxuselé' le' lu na' benne' dxelebéaj xíchaje' Dios.

¹¹ Zuale da dxusení na benne' xrlátaje ca',

na' xel-la' dxebé zúale na benne' li lazre' ca'.

¹² Le be, le'e, benne' xrlátaje, lau Xránadxu.

Le gusá lázrele ca da nun Dios lá'azxa, ne le güe
lá'ana Le'.

98

¹ Le gul-la chee Xránadxu tu da cube lawe' da nune'
da ca'

da dxebánedxu.

Ne chee xel-la' wal-la chee', ne xel-la' waca lá'azxa
chee'

ba bdinne'.

² Ba nuzén Xránadxu ca dxune' dxuselé' bèneache.

Ba bzenne' bèneache xezr la xu ca' ca naca da
xrlátaje chee'.

³ Ba nune' ca da guchebe lazre' chee benne' Israel
ca'

ca naca xel-la' li lazre' chee', ne xel-la' nazrí'i zren
chee'.

Bénneache du gabí'i xezr la xu ba belelé'ene' ca naca
da ben
Dios cheedxu.

⁴ Le gul-la lu xel-la' dxebé lau Xránadxu, le'e zrале
du gabí'i
xezr la xu.

Le güe lá'ana Le' nen da gúl-lale, ne lu xel-la' dxebé
chee
le cuezre xa'a.

⁵ Le gul-la da güe lá'anale Xránadxu.

Le gul-la nen da con zríadi'i na du ca' da quínnele.

⁶ Le gucuezre luzu da ca' dxulucuezre', ne da
dxutíl-lale ca',

ne le cuezre xa'a lu xel-la' dxebé lau Xránadxu,
Wenná Bea cheedxu.

⁷ Le gun schaga nísadau', ne bea ca' zrале na'.

Le gul-la, le'e, xezr la xu, ne le'e zrале na'.

⁸ Le capa na'le, le'e xegu ca'.

Le gul-la lu xel-la' dxebé, le'e, xi'a ca', lau Xránadxu

⁹ lawe' da xide' xedajnná bé'ene' xezr la xu nigá.

Nna bé'ene' benne' zaj zre'e du gabí'i xezr la xu lu
da xrlátaje,

ne bénneache dutę xezr la xu lu da naca li lazre'.

99

¹ Naca Xránadxu Dios Benne' Wenná Bea,
na' dxelezrize xúgute bénneache lau Le'.

Dxe'e lataj blau chee' da zua na lówela querubín ca',
na' dxezrú' lu xezr la xu.

² Szrente naca Xránadxu lu xi'a Sión.

Naque' szren lawe' xúgute cue' xezr la xu ca'.

³ Le güe lá'ana La Xránadxu da naca na szren,
ne da dxal-la' zrébedxu.

¡Lá'azxa naca Le'!

4 Lue', Wenná Bea szrente, nazrí'inu' da naca xrlátaje.

Nuzúa chachu' da naca li lazre'.

Ba nunu' da naca xrlátaje, ne da naca li lazre'

ládujla zri'ine zre sua Jacob.

5 Le gucá'ana szren Xránadxu Dios.

Le guzú zríbele lau Le' naga dxe'e.

¡Lá'azxa naca Le'!

6 Moisés, ne Aarón gulaque' bxruze chee' ca'.

Samuel guque' tu benne' bchálajlene' Le'.

Gulenné' Xránadxu Dios, na' Le' bechebe'.

7 Tu lu beuj bza bchálajlene' benne' ca'.

Buluzúe' dizra' da gunná bé'ene',

ne da ca' bdxixruj be'ene' le'.

8 Xránantu' Dios, bechebu' lau benne' ca'.

Blé'enu' le' nacu' Dios, dxunité lau' chee' bèneache,

lácala dxudéu' le' xel-la' zi' ne chee' dul-la da zaj

nabague'.

9 Le gucá'ana szren Xránadxu Dios.

Le guzú zríbele lau Le' lu xi'a lá'azxa chee',

lawe' da lá'azxa naca Xránadxu Dios.

100

1 ¡Le gul-la lau Xránadxu Dios, le'e zrале du gabí'i xezr la xu!

2 ¡Le gucá'ana szren Le' duté xel-la' dxebé!

¡Le da lau Le', dxúl-lale duté xel-la' dxebé!

3 Cabata' gal-la lázrele naca Xránadxu Diósqueze.

Le' bene' dxi'u, na' nácadxu chee' Le'.

Nácadxu xezre chee', ne zríla'du chee'.

4 Le chu'u lataj naga zua xudau' chee', xele Le':

Xcalenu',

ne chale'aj chee' na, güe lá'anale Le'.

Le xe Le': Xcalenu', ne le güe lá'ana Le'.

⁵ Chawe' naca Xránadxu, na' chadía chacanna zua
xel-la' zri'i lazre' chee'.

Xel-la' li lazre' chee' tu súazqueze na chadía cha-
canna.

101

¹ Tu gúl-lazqueza' ca naca xel-la' zri'i lazre',
ne xel-la' li lazre' chiu'.

Tu gúl-lazqueza' chiu' Lue', Xrana' Dios.

² Dxaca lazra' guna' da naca li lazre'.

¿Bátala xidu' gácalenu' neda'?

Guna' da naca du lazre', ne cá'unqueze guna' caní
lu xu'u lizra'.

³ Québequeze cu'u lazra' guna' tu da zrinnaj.

Dxecuídeda' da dxelún benne' ca' dxelebéaj xíchaje'
Dios.

Québequeze gu'a lataj xelegue' naga zua' neda'.

⁴ Gucuasa' lu xichaj lázrdawa' da calela,

ne quebe cu'u lazra' chee' da calela.

⁵ Guzúa' chalá'ala benne' dxelenné' bagácheze
chee' benne' xula.

Quebe gu'a lataj súale' neda' tu benne' dxucá'ana
szren cuine',

u naque' benne' wenná be'e.

⁶ Le'eda' chawe' benne' ca' zaj naque' li lazre' lau
Dios,

chee' xelezré'e' lawa' neda'.

Tuze benne' ca' zaj naque' du lazre' xelune' zrin
chia'.

⁷ Quebe gu'a lataj benne' wecache lan chu'e lizra'.

Quebe gu'a lataj tu benne' wen lazre' xegá'ane'
naga zua'.

8 Tu zra tu zra guzría xi'a benne' ca' dxelunę' da
calela,
benne' ca' zaj zřę'e lu xęzr la xu chia'.
Gucuasa' xúgute benne' ca' dxelunę' da zrinnaj lu
xęzre chee
Xránadxu Dios.

102

- 1 Xrana' Dios, bene da dxenaba' lau',
ne bžę naga da dxuláwizra' Lue'.
2 Quebe gucache lau' lawa' neda', lawe' da lu da
stębe zua'.
Bžę naga neda', ne bechébeche chia' gate dx-
uláwizra' Lue'.
3 Naca xel-la' nabán chia' ca zren cheę xi' da dxex-
enítetę.
Xu'u da la lu zrita chia' ca tu xi' da dxálalę'e na.
4 Dxedú lazra', ne naca lázrdawa' ca tu xixre' da
dxecuade,
na' québedxa dxenná na gudagu xeta.
5 Lawe' da dxebezre wé'le'a ba nazrítalę'a.
6 Naca' ca tu situgún dxedaba' tu lu xęzr la xu bizre,
ne ca tu bzriu zríaba' lawe' tu xu'u ze la'a.
7 Dxíchaja' bchigala, ne naca' ca tu bxinne zríaba'
túzeba'
xrgu'u sibe.
8 Tu zra tu zra tu dxulucháchalęzqueze benne'
dxeledábague' neda'.
Benne' ca' dxelecuídenę' neda' dxuluchínenę' la'
neda'
gate nu benne' dxelegú'ę de'.
9 Lu waláz cheę xeta dxawa' de,
na' nisa dxebezra' dxechixre na da dxé'aja'.
10 Caní dxaca chia' lawe' da dxezra'u neda',
ne dxecuídenu' neda'.

Guca'u neda', na' gudxú'unu' neda'.

11 Naca xel-la' nabán chia' ca tu zrul-la da dxedeze, na' naca' ca tu xixre' da ba nabizre.

12 Lue', Xrana' Dios, tu chí'izqueze zu', na' cheajlesá lazre' xúgutẹ cuen bēnneache Lau'.

13 Chasu', ne xexache lazru' benne' zaj zre'ē xezre Sión,

lawe' da ba bzrin zra xexache lazru' benne' ca'.

14 Netu', wen zrin chiu', nazrí'intu' xiaj ca' chee xezre na'.

Dxéquentu' zi' lawe' da ba nabía xi na.

15 Nadxa benne' xezr la xu ca' xelezrebe' lau Lue', Xran.

Xelezrebe xúgutẹ benne' wenná bea chee xezr la xu nigá

da xabáa chiu',

16 gate ba bechisu' xezre Sión, Xran,

ne xeelé'equezne' ca naca da xabáa chee na,

17 gate na' guzé nagu' da dxelenaba benne' ca' guleaj xíchaju',

ne québedxa guzú' chalá'ala da dxelata' xuene' Lue'.

18 Xuaj da nigá chee xululaba benne' ca' za zá'aca, na' benne' ca' za xelalaj xelúe lá'anē' Xránadxu Dios.

19 Naga zua Xránadxu xabáa gunné'e.

Naga zuē' xabáa blé'ene' lu xezr la xu nigá.

20 Dxelé'ene' benne' dxelebezre xache', benne' zaj xu'e

lizre xia,

na' gusanē' benne' ca' ba zaj nachugue' chee' xelatie'.

21 Xuluzenne' benne' zaj zre'ē xezre Sión ca szren naca

La Xránadxu Dios,

chee xelúe lá'ane' Le' lu xezre Jerusalén,
 22 gate xelezraga bènneache chee xúgute xezre, ne
 xúgute cue'
 xezr la xu
 chee xulucá'ana szrene' Xránadxu Dios.
 23 Xránadxu Dios bene' gute ni'a na'a gate ne naca'
 cuide'.
 Xeláteze ca betie' neda'.
 24 Nadxa gunnía': Dios chia', quebe gutiu' neda',
 gate quebe ne guéxrúa'.
 Lue' tu chí'izqueze zu'.
 25 Nédxudaute Lue' bzu' xezr la xu nigá, na' nen na'u
 benu' xabáa.
 26 Xelebía xi' da ca', san tu zúazquezu' Lue'.
 Welexru xúgute da ca' ca tu ladxe'.
 Ca dxuchadxu zra lánadxu tuzruj, ca' gucha'u da
 ca',
 na' xucúbeu' na.
 27 Túzqueze ca nacu' Lue',
 ne québequeze te chiu' Lue'.
 28 Zrí'inentu' netu', wen zrin chiu', xelezrabe'
 chawe',
 na' guzé chúchuquezu' zri'ine zre súantu' lau Lue'.

103

1 Be lá'ana Xránadxu Dios, lue', bènne'du xu'a.
 Be lá'ana Le' lá'azxa, dute da naca'.
 2 Be lá'ana Xránadxu, lue', bènne'du xu'a,
 ne quebe gal-la lazru' ca da chawe' da nune' chiu'.
 3 Dxunite lawe' chee xúgute dul-la nabaga'a.
 Dxexune' neda' ca naca xúgute xízrawe' da xu'a.
 4 Dxuxúe' neda' chee quebe gatia'.
 Lu xel-la' zri'i lazre' chee', ne xel-la' dxexache
 lazre' chee'

dxune' chawe' chia'.

⁵ Dxuzánle'e da chawe' da dxaca chia' chee
xegá'ana'

benne' cuide',

ne benne' wal-la ca dxaca chee tu bsia.

⁶ Xránadxu Dios dxuchi'e chee da dxaca chee
benne'

dxeledé'e da ba xa',

ne dxucá'ana chawe' da dxaca chee'.

⁷ Blé'ene' Moisés da ca' gulú'u lazre' guné',

ne be'e lataj benne' Israel ca' belelé'ene' da ca'
bené'.

⁸ Naca Xránadxu Benne' dxexache lazre', ne Benne'
zri'i lazre'.

Quebe dxezrá'azie', san zrente naca xel-la' zri'i
lazre' chee'.

⁹ Quebe nníaqueze', ne quebe zrá'aqueze'.

¹⁰ Quebe dxudé'e dxi'u lu da ba xa' ca naca zria
da nabágadxu,

ne quebe ne guzría xi'e dxi'u ne chee dul-la da
nabágadxu.

¹¹ Ca sibe naca xabáa lawe' xezr la xu,

caníqueze naca xel-la' zri'i lazre' zren chee' nen
benne' ca'

dxelape' Le' ba lá'ana.

¹² Ca zitu' naca naga dxalaj gubizra, ne naga
dxebía na,

caníqueze dxucuase' zitu' dul-la da nabágadxu.

¹³ Ca zri'i lazre' naca xra bidu ca' nen zrí'inequeze',
caníqueze naca zri'i lazre' Xránadxu nen benne' ca'

dxelape' Le' ba lá'ana.

¹⁴ Le' nézene' ca nácadxu lu bela' dxen cheedxu.

Dxajsá lazre' nácadxu xu xrte.

15 Ca naca xel-la' nabán cheedxu, nácadxu ca tu xixre'.

Dxegúladxu ca tu xiaj xixre',

16 na' dxedé be' dxua na le na, na' dxexenite na, na' québedxa nu dxelé'equeze le na.

17 Ca naca chee benne' ca' dxelape' ba lá'ana Xránadxu,

zúale xel-la' zri'i lazre' chee' benne' ca' chadía chacanna,

na' xel-la' xrlátaje chee' zúalequeze na xúgute zri'ine zre sua

benne' ca',

18 benne' ca' dxelúnqueze' ca naca xel-la' wezría nune',

ne benne' ca' dxelune' ca zaj naca da nadxixruj be'e.

19 Nuzúa Xránadxu lataj chee' xabáa naga dxee dxenná be'e.

Nácaqueze' Wenná Bea lawe' xúgute da zaj zua.

20 Le güe lá'ana Xránadxu, le'e, gubáz chee xabáa ca',

Nácale benne' wal-la, ne benne' chúchule'e,

na' dxunle ca dxenná Le', ne dxuzé nágale ca dxee le'e.

21 Le güe lá'ana Xránadxu, le'e, dxenná beale xabáa.

Nácale wen zrin chee', ne dxunle ca dxaca lazre'

Le'.

22 Le güe lá'ana Xránadxu, xúgutele le'e ba nun Dios le'e,

zrale xúgute lataj naga dxenná bea Le'.

¡Be lá'ana Xránadxu, lue', bénne'du xu'a!

104

1 Be lá'ana Xránadxu Dios, lue', bénne'du xu'a.

¡Xrana' Dios, szrentę nacu' Lue'!

Nacu' zra lanu' da xabáa, ne da xrtante.

² Dxugacu cuinu' xel-la' naxaní' ca zra lanu'.

Dxechilju' xabáa ca tu xu'u ladxe' chiu'.

³ Nunu' lizru' lawe' nisa da ze ná'ala.

Dxuchínenu' beuj ca' ca tu da dxudé xua naga dxe'u

Lue',

da dxedá na lu be'.

⁴ Dxuchínenu' be' ca' ca gubáz chiu' ca',

ne xesa ca' ca wen zrin chiu' ca'.

⁵ Bzua chuchu' xezr la xu nigá lu lane na,

na' quebe nu gaca gutá le na.

⁶ Bgacu' xezr la xu nigá nen nísadau' ca dxun tu

benne'

dxacue' zra lane',

na' nisa na' bgacu na xi'a ca'.

⁷ Gate gudil-lu' nisa na', na' bzrunnuj na.

Bebiga na gate ben na chi'u zizraj.

⁸ Nisa na' bgacu na xi'a ca' xajxedxé na dxu'a xegu

ca',

lataj ca' ba nunu' chee nisa na'.

⁹ Bzu' naga ze lau cheajsé na, naga québedxa gaca

te na,

chee québedxa gacu na xezr la xu bizre na'.

¹⁰ Dxunu' beaj ca' dxelalaj na dxu'a xégudu ca',

ne xegu ca' dxeledé na ládujla xi'a ca'.

¹¹ Lu xegu ca' dxelé'aj be xixre' ca' nisa,

na' dxegúa na xel-la' dxelebile chee burro xixre'

ca'.

¹² Lu xaga zaj nnita dxu'a xegu ca' zaj zra' béadu ca'

zaj zua xrila.

Dxelúl-laba' ládujla zruze na ca'.

¹³ Zran xabáa dxesel-lu' xiuj da dxaca na lu xi'a ca',

na' dxezrate xezr la xu na' ca naca da xrlátaje da

dxunu'.

- 14 Dxusegulu' xixre' da dxelagu bezre ca',
 ne xixre'du ca' da dxelagu bēneache,
 ne da ca' dxuluchine bēneache dxelunē' xel-la'
 wagu,
- 15 ne uva ca' da dxelunē' xrise uva wal-la da dx-
 uzúa na
 bēneache ca' xel-la' dxelebé,
 ne olivo ca' da dxelunē' da za da dxelegú'ē xíchajē',
 ne zrua' da dxelunē' xeta cheē xelaca banē'.
- 16 Xaga cedro ca' da zaj zua na xi'a Líbano dx-
 elezilé'ē na nisa xiuj.
 Zaj naca na xaga cheē Xránadxu Dios, da ca' guza
 Le'.
- 17 Lu xaga ca' dxuluzría bxínnedu ca' xrú'uneba',
 na' lu zruze na ca' zaj zua lizre bxuze' ca'.
- 18 Zaj zua chivo xi'a ca' lu xi'a zri'a ca',
 na' lu bluaj ca' cheē xi'a ca' zaj zua bzrizru' ca'.
- 19 Bēnu' beu' da dxulé'e na tu beu' tu beu' cheē iza,
 na' gubizra núnbea na gate dxal-la' cuía na.
- 20 Bēnu' dxēla, na' gate bache nachul-la,
 na' dxeledxúaj bē dxēla ca'.
- 21 Dxelebezre xa'a bezre xixre' ca', zaj nauba' bē
 xeláguba'.
- Dxelílajba' da nun Dios xeláguba'.
- 22 Gate dxalaj gubizra, na' dxelexezrinba' lu bluaj
 cheeba',
 naga dxeláseba' te zra.
- 23 Nadxa dxeledxúaj bēneache dxelunē' zrin,
 na' dxelúnqueze' zrin ca' dxebía gubizra.
- 24 Xran, da zante zaj naca da bēnu'.
 Dute xel-la' sina chiu' bēnu' da ca'.
 Nazrate xezr la xu nigá da ca' bēnu'.
- 25 Na' zua nísadau', da zri'a, ne da laga,

naga zaj xu'u zánete bea ca', béadu ca', ne be zri'a ca'.

26 Lu nísadau' na' zaj zra' da dxeledá lawe' nísadau' ca'.

Zua be zri'a na' benu' Lue', nazí' laba' leviatán.

27 Xúgute bea ca' dxuluxrén lázreba' Lue', chee gunézruju' da xeláguba' ca zrin chee na.

28 Dxunézruju' leba', na' dxelecá'aba' na.

Dxunézruju' da dxeláguba', na' dxeléljeba'.

29 Gate quebe dxenná'u-ba', na' dxelezzébeba'.

Gate dxucuasú' be' dxelecá'aba', na' dxeláteba', ne dxelexácaba' xu xrte.

30 Gate dxezel-lu' be' chiu', na' xelexaca banba'.

Dxunézruju' xel-la' nabán cube chee da ca' zaj zua xezr la xu nigá.

31 ¡Chadía chacanna gaca ba Xránadxu Dios!

Dxezaca ba lazre' Xránadxu chee da ca' ba núnqueze'.

32 Dxenné'e xezr la xu nigá, na' dxezrú' na.

Dxuté' xi'a ca', na' dxeledxúaj na zren.

33 Gúl-laqueza' chee Xránadxu dxácate na' naca bana'.

Xúgute zra zúaqueza' neda' gul-la' da güe lá'ana' Dios chia'.

34 Chawe' naca chia' da ca' dxulaba lazra' ca naca chee',

na' dxebéle'eda' ne chee Xrana' Dios.

35 Welebía xi' benne' dul-la ca' zaj zre'e lu xezr la xu nigá,

Na' québedxa cha benne' ca' dxelebéaj xíchaje' Dios.

¡Be lá'ana Xránadxu Dios, lue', bénne'du xu'a!

¡Le güe lá'ana Xránadxu!

105

1 ¡Le güe lá'ana Xránadxu Dios!

¡Le gucá'ana szren La Le'!

¡Le guzén bēnneache dute xēzr la xu ca naca da nune'!

2 ¡Le gul-la chee'!

¡Le gul-la da güe lá'anale Le'!

¡Le guchalaj chee da zrente ca' da nune'!

3 ¡Le be lu da naca chee'!

Xúgute benne' ca' dxelapa ba lá'ana Xránadxu dxal-la'
xelebéle'ene'.

4 Le naba Xránadxu gácalene' le'e.

Tu zra tu zra le guxrén lazre' Xránadxu Dios.

5-6 Le'e, zri'ine zre sua Abraham, wēn zrin chee Xránadxu.

Le'e, zri'ine zre sua Jacob, bēnnea' guqué'e,

Le gusá lazre' xel-la' waca ca', ne da zrente ca' da bēne',

ne ca naca da bchi'e chee.

7 Le' naque' Xránadxu, ne Dios cheedxu.

Le' dxenná bé'ene' bēnneache zaj zre'e dute xēzr la xu.

8 Lácala te chee chi gaxúa cuen bēnneache,

québequeze gal-la lazre' da guchebe lazre'

lu xel-la' wezría chee',

9 xel-la' wezría na' bēnne' Abraham,

da na' bzetaj cuine' guchebe lazre' chee Isaac,

10 na' bzua chúchue' na ca tu da nadxixruj bea na,

da gun Jacob,

da gaca na tu xel-la' wezría da zeajlí canna nen

benne' Israel ca',

- 11 da bene' gate na' gunné': "Chiu' lue' gunna' xezr
 la xu chee
 benne' Canaán ca',
 da gaca na tu da xudele lu na' zri'ine zre súale."
- 12 Gate na' bábaze zaj naque'
 gulezré'e lu xezr la xu nigá ca benne' zitu' ca',
- 13 ne guledé'e tu xezr la xu xetú xezr la xu, ne tu
 xezre
 xetú xezre.
- 14 Quebe be' Dios lataj nu benne' bi guné' chee
 bénneache chee',
 na' ne chee benne' ca' gudil-le' benne' wenná bea
 ca'.
- 15 Guzre' le': "Quebe bi gunle chee benne' ca'
 gucá'a,
 ne quebe gunle da calela chee benne' ca' dxu-
 luchalaje'
 waláz chia'."
- 16 Bene' guta' tu gubina' lu xezr la xu na',
 na' gudúe' ca naca xeta xelawe'.
- 17 Gusel-le' tu benne' cuía lawe' lau benne' chie' ca',
 bénnea' naque' José, bi na' belutie'-be' chee gácabe'
 wen zrin chee benne' zitu'.
- 18 Buluzré'e ní'abe' lu xedxu chee cuaga da bexru
 na ní'abe',
 gate na' gulu'e-be' lizre xia lu xezr la xu Egipto,
- 19 ca bzrin zra guca li ca da gunná José dxal-la'
 gaca.
 Caní guca, ble'e xrtizra' Xránadxu cúnnabe' da li.
- 20 Nadxa benne' wenná bea chee Egipto gusel-le'
 nu gusán José na'.
 Bénnea' dxenná bé'ene' zánete cue' xezr la xu
 bsane'-be'.
- 21 Bzue'-be' gácabe' xrana benne' zaj zre'e lizre',

- ne chee nna be'ebe' ca naca da xu'u lu ne'e,
 22 chee tíl-labe' benne' szren ca' chee wenná bea
 cáteze
 dxaca lázrebe',
 ne chee guzéajni'ibe' benne' gula chee xezr la xu
 Egipto
 chee xelaque' benne' sina.
- 23 Gudé na' gulu'e benne' Israel ca' lu xezr la xu
 Egipto,
 na' guzúa Jacob lu xezr la xu chee zri'ine zre sua
 Cam.
- 24 Gulánle'e bénneache chee Xránadxu lu xezr la xu
 na',
 na' bene' gulaque' wál-ladxa ca benne' guledábague'
 Le'.
- 25 Bcha Dios lázxdau benne' Egipto ca' chee xe-
 cuídene'
 bénneache chee',
 chee xelegú'u lazre' xelune' da calela chee wen
 zrin chee' ca'.
- 26 Nadxa gusel-le' Moisés, wen zrin chee', lau
 bénneache
 chee' ca', ne Aarón, bénnea' guqué'e.
- 27 Benne' caní be'e Dios lataj belune' xel-la' waca
 ca'
 chee xabáa,
 ne xel-la' waca zrente' ca' lu xezr la xu chee zri'ine
 zre sua Cam.
- 28 Gusel-la Dios tu da chul-la da bgacu na dute xezr
 la xu na',
 san benne' Egipto ca' quebe buluzúe' dizra' da
 gunná be'ene' le'.
- 29 Nadxa bene' bexaca nisa xegu chee benne' ca'
 dxen,

ne betie' xúgute bela zaj zra'ba' xegu ca'.

³⁰ Busezrate' xezr la xu chee' bluzru ca' ga bzrinte gulezra'ba'

xu'u lizre benne' wenná bea chee benne' Egipto ca'.

³¹ Gunnaze Dios, na' belelá' zánete be'a chee bezre, ne be'a lase ca' dute lu xezr la xu chee benne' ca'.

³² Waláz chee nisa xiuj gusel-le' xiaj bezxe' lu xezr la xu

chee benne' ca',

ne xi' da bzezxe na ca naca xezr la xu chee'.

³³ Bzria xi'e ca zaj naca lba uva chee', ne ca zaj naca xaga higo chee',

na' bzúxujé' ca zaj naca xaga zaj ze lu xezr la xu chee'.

³⁴ Gunnaze', na' belelá' biche zu ca', da quebe nu seque' gulaba le'ba',

³⁵ na' guláguba' dute xixre' xa'a lu xezr la xu chee', ne guláguba' dute lina da dxunna xezr la xu na'.

³⁶ Nadxa betie' xúgute bi biu nedxu chee benne' Egipto ca',

bi zaj nácabe' bi blau chee'.

³⁷ Bebéaje' bénneache chee' na' zaj nu'e dumí plata, ne dumí oro,

na' quebe nu chilá' benne' ládujla le', benne' quebe chawe' zué'.

³⁸ Gulebé benne' Egipto ca' gate beledxúaj benne' ca' ga na',

lawe' da belezrébele'e le'.

³⁹ Bzalaj Dios tu beuj da gulú'u na benne' ca' zrulla,

ne tu xi' da bsaní na chee' chizrela.

⁴⁰ Gulenabe' Dios, na' gusel-le' chee' btau ca', ne bene' gulélajene' xeta da bdxuaj na xabáa.

- 41 Gule'e tu xiaj xre, na' gulaj nisa
da gudé na lu xezr la xu bizre na' ca tu xegu nisa.
- 42 Caní ben Dios lawe' da bsa lazre' xrtizre' lá'azxa
da guchebe lazre' guné' chee Abraham, wen zrin
chee'.
- 43 Bebéaje' bèneache chee' lu xezr la xu Egipto,
dxelebene'.
- Lu da ba neza gulezrá' benne' ca' guqu'é'e.
- 44 Bnézruje' benne' ca' xezr la xu chee benne' xez-
ica ca',
na' da belún benne' xezr la xu ca' bexaca na chee
benne'
chee' ca',
- 45 chee xulupá'ane' ca naca xrba chee' ca',
ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

106

- 1 ¡Gaca ba lá'azxa Xránadxu Dios!
¡Le xe Xránadxu Dios: "Xcalenu!"
Caní dxal-la' gunle lawe' da naque' xrlátaje,
ne lawe' da tu chí'izqueze dxexache lazre' dxi'u.
- 2 ¿Núzraqueze seque' gulé'ene' ca naca xel-la' waca
zrente ca'
da nune' Xránadxu?
¿Núzraqueze seque' güe lá'ane' Le' ca dxal-la'
gundxu?
- 3 Ba neza zrente naca na chee benne' ca' dxelune'
da xrlátaje,
benne' ca' tu dxelúnzqueze' da naca xrlátaje.
- 4 Bsa lazre' chia', Xrana' Dios, gate dxunu' da
chawe'
chee bèneache chiu'.

5 Gudá bselá neda' chee gaca le'eda' da chawe'
 gunu'
 chee benne' ca' ba guca'u Lue',
 ne chee beda' gate xelezrá' bèneache chiu' lu da ba
 neza,
 ne chee bélena' bèneache chiu'.

6 Ba bentu' dul-la cáqueze belún xra xrtáuntu' ca'.
 Bentu' da calela, ne bentu' da zrinnaj.

7 Gate gulezrá' xra xrtáuntu' lu xezr la xu Egipto,
 quebe bululaba lazre' ca' naca xel-la' waca ca' chee
 xabáa
 da benu'.

Quebe xeajlesá lazre' ca' bexache lázrele'u le'.
 Guledábage' Lue' dxu'a nísadau' da nazí le' na
 Xrna.

8 Le' bselé' benne' ca' chee gaca ba lá'ana La Le',
 ne chee gulé'e lau ca' naca xel-la' waca chee'.

9 Gudil-le' nísadau' Xrna na', na' bebizre na,
 na' guledé bèneache chee' laduj nísadau' na' lu xu
 bizre.

10 Bselé' benne' ca' lu na' benne' guledábage' Le',
 ne bebéaje' le' lu na' benne' ca' bulusaca zi'e le'.

11 Nadxa nísadau' na' bgacu na' benne' ca'
 guledábage' le'.

Netú benne' ca' quebe nu' begá'ana.

12 Nadxa benne' chee' ca' guléajle'e dizra' chee',
 ne belul-le' da belúe lá'ane' Le'.

13 Chadí gulal-la lazre' ca' da bene'.

Quebe gulebeze' ca' la' dizra' chee' Dios.

14 Gulezá lazre' tu da calela le'e xixre' lawe' lataj
 na',

na' buluché'e Dios le'e xixre' na'.

15 Gudé na' bnezruj Dios ca' da gulenabe',

san gusel-le' ládujla le' tu da gute na bal-la benne'
ca'.

16 Gulaque' xa lazre' chee Moisés naga zaj zre'e,
ne chee Aarón, Bénnea' gucá'a Xránadxu Dios.

17 Nadxa bzra xezr la xu na', ne gudebe na Datán,
ne bgacu na benne' ca' zaj de'e Abiram.

18 Nadxa guxalaj xi' naga zaj nazraga benne' ca',
na' bzezxe na benne' ca' dxelune' da calela.

19 Belune' tu bedáu' bezre da naca na oro lu xi'a
Horeb,
na' buluzú zribe' lau bedáu' oro na'.

20 Caní bulucá'ane' Dios, Benne' xabáa,
chee xulucá'ana szrene' tu bedáu' bezre,
da naca na ca tu bezre dxáguba' xixre'.

21 Gulal-la lazre' Dios, Bénnea' bselé' le',
Bénnea' bene' xel-la' waca zrente' ca' lu xezr la xu
Egipto,

22 ne bene' xel-la' waca ca' chee xabáa lu xezr la xu
chee zri'ine zre sua Cam,
ne da ca' buluchebe na dxi'u dxu'a Nísadau' Xrna.

23 Nadxa guca lazre' Dios guzría xi'e bénneache
chee',

san Moisés, bénnea' gucá'a Dios, bzua cuine' lau
Dios

chee guzúa zrie' xel-la' dxezrá'a chee Dios,
na' bene' quebe guzría xi' Dios benne' ca'.

24 Buluzúe' chalá'ala xezr la xu xrtante' da gunezruj
Dios le',

ne quebe guléajle'e dizra' chee'.

25 Tu gulennézqueze' chee Dios lu xu'u xide chee'
ca',

ne quebe buluzé nague' da gunná Xránadxu Dios.

26 Chee le' na' bzetaj cuine' gunné' ca da gune' chee
benne' ca'.

Gunné' guné' xelate benne' ca' le'e xixre' lawe'
lataj na',

27 ne gusi'e bēneache chee' lu xel-la' stu' lau benne'
xezr la xu ca',

ne guse dínnajé' le' ládujla benne' xezr la xu ca'.

28 Nadxa beluné' tuze benne' ca' dxulucá'ana
szrene'

bedáu' xia nazí le na Baal-peor,
ne gulawé' béadu ca' belútié' lau dios gate ca'.

29 Buluché'e Dios ne chee da beluné',
na' guxalaj tu xízrawé' zren da bēte na benne' zan
benne' ca'.

30 Nadxa guxasa Finees, ne bētié' bēnea' bēne'
dul-la,

na' guleza xízrawé' zren na'.

31 Da na' bēn Finees guzí' Dios ca tu da dxucá'ana
xrlátaje na

bēnea',
da gulé'e lawe na lau xúguté cuen bēneache ca'.

32 Cá'anqueze buluché'e Dios dxu'a beaj nisa nazí le
na

Meriba,
na' guca da calēla chee Moisés ne chee benne' ca',

33 lawe' da ne chee da beluné' guca Moisés xichaj
zra'a,

na' bexúbetē Moisés da gunné'.

34 Gate gulu'e lu xezr la xu nigá quebe buluzría xi'e
bēneache zaj nite' ga na'.

Caní guca, quebe beluné' ca da guzre Dios le'
xeluné'.

35 Gulaque' tuze benne' xezr la xu ca',
ne bulusédié' benne' Israel ca' xeluné' ca dxelún
benne' ca',

36 na' bulucá'ana szrene' bedáu' xia xaga ca' chee
benne' ca',

da na' ben na bxrinnaj Dios bèneache chee'.

37 Belútie' zrí'ine' bi biu, ne bi nu'ula chee'
lau bedáu' chee' da xriwe' ca',

38 ne bululálaje' dxen chee' bi dxé'enedu ca',
bi quebe zaj nunbe' dul-la,

da naca na dxen chee' zrí'ine' bi biu, ne bi nu'ula,
bi ca' belútie' lau bedáu' xia xaga ca' chee'
bèneache Canaán,

na' guca sban xezr la xu na' ne chee' dxen chee' bidu
ca'.

39 Da ca' belune' ben na le' sban,
na' gulebéaj xíchaje' Dios lu da belune'.

40 Chee' le' na' bzrá'ale'e Dios bèneache chee',
na' gucuídenē' benne' ca' zaj naca chee'.

41 Nadxa bdee' benne' ca' lu na' benne' xezr la xu
ca',

na' benne' ca' dxelecuide bèneache chee' Dios
gulenná bé'ene' le'.

42 Benne' ca' guledábague' le' bulusaca zi'e
bèneache
chee' Dios,

ne buluxrínnaje' le' lu xel-la' dxenná bea chee'.

43 Zánete' lasa Dios bselé' bèneache chee' ca',
san guledábague' ca' da bsízrene' le',
na' gulape' xel-la' stu' lawe' da belune' da calēla.

44 Lácala caní belune', gate gulezré'e lu da stebe,
Dios gunné'e ca' da dxelezaque',
ne benne' ca' da bululáwizre' Le',

45 na' xeajsá lazre' xel-la' wezría da bēnlene'
benne' ca',

na' bexíaje lazre' chee' xel-la' dxezrá'a chee'
lawe' da nácale'e benne' dxexache lazre'.

46 Cá'anqueze beñe' belexache lazre' benne' ca' benne' ca' guleché'e le' ca benne' zaj nada'u.

47 ¡Bselá netu', Xránantu', nacu' Dios cheentu'!
 ¡Becá'a netu' ládujla benne' xezr la xu ca',
 chee güe lá'anantu' Lau' lá'azxa,
 ne chee béle'entu' lu da dxúl-lantu' chiu'!

48 Cháwedau' naca Xránadxu, Bénnea' naque' Dios
 chee
 benne' Israel ca' nédxudaute, ne chadía chacanna.

Xúgute bénneache dxal-la' xelenné': ¡Ca'an gaca na!
 ¡Gaca ba lá'azxa Xránadxu Dios!

107

1 ¡Le güe lá'ana Xránadxu, Benne' xrlátaje!

¡Chadía chacanna naque' Benne' zri'i lazre'!

2 Da nigá dxal-la' xelenná benne' ca' ba naxá'awe
 Xránadxu le',
 benne' ca' bselé' lu na' benne' guledábague' Le'.

3 Beché'e le' naga gulezrá' benne' xezr la xu zitu'
 ca',
 da zaj zua naga dxalaj gubizra, ne naga dxebía na,
 ne naga za' be' zaga, ne naga dxedé gubizra beu'
 zaga ca'.

4 Bal-la benne' ca' guledé' le'e xixre' naga quebe bi
 neza zua,
 ne quebe belezrelne' xezre naga xelezúe'.

5 Guledune', ne gulebílene',
 ne québedxa bi gulebeza lazre'.

6 Nadxa lu da dxelezaque' gulenné' Xránadxu,
 na' bselé' benne' ca' lu da dxelezaque'.

7 Na' buzre'e le' tu neza li,
 chee chjaque' tu xezre naga xelezúe'.

8 D_xal-la' xelúe lá'ane' Xránadxu lawe' da bexache
lazre'
Xránadxu le',

ne lawe' da bene' chee' da ca' da dxelebedxu.

9 Dxuxí'aje' benne' ca' dxelebile lazre',
ne dxugawe' benne' ca' dxeledún nen da chawe'
chee'.

10 Bal-la benne' caní gulezúe' lu da chul-la, ne lu da
stebe
chee' xel-la' gute.

Gulaque' ca benne' zaj xu'e lizre xia,

ne zaj nadxéaj du xia, ne dxeledéé' ba xa',

11 lawe' da guledábague' xrtizra' Xránadxu,
ne buluzúe' chalá'ala da bzéajni'i Dios zrente le'.

12 Belexedú lazre' lu zrin zí'ite' da dxelune'.

Xeleajcházie' zran xua da zaj nu'e,

ne quebe nu chilá' gácalene' le'.

13 Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.

14 Nadxa bebéaje' benne' ca' lu da chul-la

ne lu da stebe chee' xel-la' gute,

ne bzúzruje' du xia ca' da zaj nadxéaje'.

15 D_xal-la' xelúe lá'ane' Xránadxu lawe' da bexache
lazre' le',

ne lawe' da bene' chee' da ca' da dxelebedxu.

16 Bchínnaje' dxa xu'u ca' zaj naca na xia gache,
ne bzúzruje' xia ca' da zaj naxechaj na benne' ca'.

17 Bal-la benne' ca' gulaque' benne' xala,

ne guledéé' xel-la' zi' ne chee' dul-la da zaj
nabague',

ne ne chee' da zrinnaj ca' da belune'.

18 Belexegútene' da dxelé'aj dxelawe',
na' xáteze ca gulátie'.

19 Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.

20 Gusel-le' dizra' chee' chee' benne' ca',
na' bexune' le', ne bselé' le' lu xel-la' gute.

21 Dخال-la' xelúe lá'ane' Xránadxu lawe' da bexache
lazre' le',

ne lawe' da bene' chee' da ca' da dxebánedxu.

22 Dخال-la' xelé'e Le': Xcalenu'.

Dخال-la' xelú'e da xulunézruje' Le',

na' lu xel-la' dxelebé chee' dxال-la' xelúl-le',
ne xuluzenne' bénneache ca zaj naca da nune'.

23 Bal-la benne' ca' guledé' lu nísadau'

lu da zren ca' da dxedá lawe' nísadau'.

Belezi'e dumí zren lu zrin dxelune' lu nísadau'.

24 Belelé'ene' ca naca da ca' dxun Xránadxu,
da ca' dxune' lu nísadau' da zaj naca na da
dxebánedxu.

25 Gunnéze', na' guzú lau dxaca be' bdunu',

na' gulasa xeajxruza zren lu nísadau'.

26 Belegüén da dxedá lawe' nísadau' ca' ca lu xi'a
zri'a

da naca na nísadau',

na' belexetaj na lu da situj lawe' nísadau' na'.

27 Gulechégüe', ne xeajleté' ni xeajleté' na' ca
benne' dxelezuzre,

na' guca dácheze ca da zaj nusédie'.

28 Nadxa lu da dxelezaque' gulenné' Xránadxu,

na' bselé' benne' ca' lu da dxelezaque'.

29 Bzua zrie' be' bdunu' na' da dxaca na,
ne gulezúa zri xeajxruza chee' nísadau' na'.

30 Gulebéle'ene' lawe' da zaj zua zri xeajxruza ca',

na' guché'e Dios le' cháwedau' naga zjaque'.

³¹ D_{xal}-la' xelúe lá'ané' Xránadxu lawe' da bexache
lazre' le',

ne lawe' da bene' chee' da ca' da dxebánedxu.

³² D_{xal}-la' xuluzenne' ca naca xel-la' szren chee'
naga

zaj nazraga bénneache chee',

ne xelúe lá'ané' Le' naga zaj nazraga benne' gula
ca', benne'

dxelenná be'e.

³³ B_{en} Xránadxu gulebizre xegu nisa ca',

ne busú'aje' beaj nisa ca'.

³⁴ Xu xa'a bexune' na xu bizre,

ne chee' da calela da belún benne' ca' zaj zre'e na'.

³⁵ Naga naca xu bizre bexune' na xu nisa,

na' xu xiaj bexune' na naga dxalaj nisa.

³⁶ Bzre'e ga na' benne' ca' benne' dxeledún,

na' belune' tu xezre naga xelezúe'.

³⁷ Gulaze' xezr la xu na', na' belexaze' lba uva ca',

na' belexezi'le'e lina chee' na.

³⁸ B_{ene}' da chawe' chee' benne' ca', na' gulánle'e

bidu chee' ca',

ne quebe be'e lataj xeledase ca zaj naca be xixre'
chee' ca'.

³⁹ Gate buludé benne' dxelenná bea benne' ca' lu
xel-la' zi',

ne bulusaca zi'e le',

ne gulenná bé'edxene' le', ne belune' le' da calela,

ne buludée' le' lu da ba xa',

⁴⁰ bca'ana ditaj Dios benne' xíchaje ca',

ne bene' guledée' le'e xixre' lawe' lataj naga quebe
bi neza de.

⁴¹ Bselé' benne' xache' ca' lu da zi' da xa' da dx-
eledée',

ne bzánlę'e zri'ine benne' ca' ca dxelán zrila' ca'.

⁴² Gate dxelelé'e benne' xrlátaje ca' da caní, na' dxelebéle'ęęe',
na' benne' ca' dxelunę' da caleła quebe bi gaca xelennę'.

⁴³ Benne' ca' zaj naque' sina dxal-la' xulaba lazre' ca zaj naca da caní,
ne dxal-la' xelexúnbe'ę ca naca xel-la' zri'i lazre' cheę Xránadxu.

108

¹ Ba zúatequeze lázrdawa', Dios,
cheę gúl-laqueza' da güe lá'ana' Lue'.
Da nigá dxugú'u na neda' lu da ba neza.

² Bebán lazre', bėnne'du xu'a, na' le xebán lázrele,
le'e dxínnele da dxúl-lalęnle, ne da con zríadi'i na du.
Che zílala cheajsá'queza'.

³ Güe lá'anaqueza' Lue' ládujla bėnneache chiu', Xran.
Gúl-laqueza' chiu' lau benne' dutę xęzr la xu,

⁴ lawe' da naca xel-la' dxexache lazre' chiu' zrendxa ca xabáa,
na' da li chiu' naca na zrendxa ca beuj bza ca'.

⁵ Xegá'ana szrėnquezu' xabáa, Dios.
Xel-la' szren chiu' sua na lawe' dutę xęzr la xu.

⁶ Cheę xelelá benne' ca' nazrí'iqueznu' Lue',
bselá le' dutę xel-la' waca chiu', ne bene chia'.

⁷ Lu lataj lá'azxa cheę' gunná Dios: "Wabéquezda' neda'.
Gunna' late weaj cheęle xęzr la xu cheę benne' Siquem ca',

ne gudixra' cheeḷe xezr la xu de cuite xegu Sucot.
 8 Chia' naca xezr la xu Galaad,
 ne chia' naca xezr la xu chee zri'ine zre sua Man-
 asés.
 Xezr la xu chee zri'ine zre sua Efraín naca na ca tu
 da napa chí'i na xíchaja'.
 Xezr la xu chee zri'ine zre sua Judá naca na naga
 dxenná be'a.
 9 Xezr la xu chee benne' Moab naca na ca tu zriga'
 da xuzru nisa guná'a,
 na' lu xezr la xu chee benne' Edom chu'una' zrela'
 gula.
 Si'a ba neza xezr la xu chee benne' Filistea.”

10 ¿Nuzra che' neda' chee chu'a xezre da naxechaj
 ze'e sibe?
 ¿Nuzra che' neda' chee guzétaja' benne' Edom ca'?
 11 ¿Quegá Lue' na' che'u neda', Dios.
 Nacu' Bénnea' bzua netu' chalá'ala,
 ne quebe guxéajlenu' benne' cheentu' ca', benne'
 dxjaque'
 wedil-la, Dios?
 12 Gúcale netu' chee séquentu' tíl-lalentu' benne' ca'
 dxeledíl-lalene' netu',
 lawe' da naca dácheze xelácale bénneache netu'.
 13 Tu zren nen Dios gundxu tu da zrente,
 na' Le' gulague' benne' ca' dxeledil-lalene' dxi'u.

109

1 ;Dios, dxue lá'ana' Lue'!
 Quebe xegá'anu' zrize
 2 lawe' da dxelenná benne' ca' dxelune' da caleḷa,
 ne benne' wen lazre' ca' chia' neda'.
 Dxelenné' chia' da naca da wen lazre'.

- ³ Lu xel-la' dxelecuide chee' zaj naxéchajē' neda',
 ne dxelenné' chia'.
 Dxeledíl-lalēne' neda', ne quebe bi nuna' chee
 benne' ca'.
- ⁴ Lácala bzri'ida' benne' ca', na'a dxeledábague'
 neda',
 san neda' dxenaba' gaca da chawe' chee benne' ca'.
- ⁵ Lácala bēna' neda' da chawe' chee benne' ca',
 dxelunē' chia'
 da calēla,
 ne lácala bzri'ida' le', dxelecuídenē' neda'.
- ⁶ Bzua tu benne' wēn da zrinnaj chee guchi'e chee
 benne' wēn da calēla ca',
 ne bēn sua tu benne' nnie' chee benne' ca',
 benne' guzúe' ca naca da calēla belún benne' ca'.
- ⁷ Gate na' zri'a chee', bēn gaca bea na zaj nabague'
 zria.
 Ble'e da xelenabe' lau' ca tu dul-la da dxelunē'.
- ⁸ Bzache zra xelaca ban benne' ca',
 ne bēn xelú'u xezica' benne' waláz chee'.
- ⁹ Bca'ana zrí'ine' ca' bidau' wezebe,
 ne xelaca zru'ule' nu'ula tuze ca'.
- ¹⁰ Bēn xelaca zrí'ine' bi dxeledaze chee xelenábabe'
 guna',
 ne bēn xelezrébe' xeta xelágube' zitu' naga zaj
 zua lízrebe'
 da zaj naxinnaj.
- ¹¹ Bēn xelú'u da ca' zaj nape' lu na' bēnne' ca'
 bulusanē' le' dumí.
 Bēn xelexúa benne' zitu' ca' da ca' zaj nunē'.
- ¹² Bēn quebe nu zrel-la benne' xexache lazre' le',
 ne quebe nu benne' zrel-la xexache lazre' bidau'
 wezebe
 chee' ca'.

13 Bēn xelebía xi' zri'ine zre sua benne' ca',
 ne québedxa nu cha' zri'ine zre sue',
 si' lē' ca zaj nazi'i la benne' ca'.

14 Bsa lazre' ca da calela da belún xra xrtawe',
 Xran,
 ne quebe xusulu' dul-la da gulún xrne'e ca'.

15 Tu chí'izqueze bsa lazre' ca da calela da zaj nune'.
 Québedxa cheajsá lazru' benne' ca'

16 lawe' da quebe xeleajsá lazre' xelexache lazre'
 le sa' ljwezre' ca',
 san bulusaca zi'e benne' baxache' ca', benne' dx-
 elexájrjē',
 ne benne' dxexruj lazre' ca', na' belútiē' bēnne'du
 ca'.

17 Beledánene' da dxugú'u na de', na' da caníze guca
 na chee'.
 Quebe gulacá lazre' xelenabe' gaca chawe' chee
 bēnneache,
 na' da chawe' bebiga na naga zaj zue'.

18 De' da gulegú'e bēnneache guca na ca tu da gu-
 lacu cuine',
 na' guxú'u na lē'e ca nisa gulé'aje',
 ne guxú'u na zrita chee' ca da za.

19 Tu chí'izqueze bēn gaca na chee' ca xicha da
 dxelácue',
 ne gaca na ca tu xpádxue' dxuluchela lē'e.

20 Gaca da nigá da quizruj Xránadxu Dios benne' ca'
 dxelenné' calela chia',
 ne da quizruje' benne' ca' dxelune' da calela,
 ne dxelenné' calela chee bēnne'du xu'a.

21 Xrana' Dios, bēn culuén chia' chee xegá'ana'
 xrlátaje lau'.

Bselá neda' lawe' da dxexache lázrele'u bēnneache,

22 ne lawe' da dxezaca zi'a, ne dxexájrjeda',

ne dxeque zi' lászrdawa'.

23 Dxedé chia' ca dxedé chee tu zrul-la gate dxebía gubizra.

Dxaca chia' ca dxaca chee biche xuaj gate dxua be' leba'.

24 Dxelate zriba' lawe' da dxuna' gubasa, ne nazrítale'a lawe' da quebe bi dxawa'.

25 Naca' ca tu da dxulucá'ana dítaje'.

Dxelenné'ē neda', ne dxelún le' chia', dxulutá xíchaje'.

26 Gúcale neda', Xrana' Dios.

Bselá neda' lawe' da dxexache lazru' bēneache.

27 Bēn xeleque be'ene' Lué'queze dxácalenu' neda'. Lué'queze, Xrana' Dios, ba nunu' da nigá.

28 Dxelegu'ē neda' de', san bēn Lue' gaca chawe' chia'.

Guxasa, bēn xelexedué'e benne' ca' dxeledábague' neda', san bēn beda' neda'.

29 Bēn xelezrá' lu xel-la' stu' benne' ca' dxelenné' da calela chia'.

Bēn xeleque zréajene' tu chí'izqueze.

30 Du lazra' gúl-laqueza' da güe lá'analē'a Xránadxu Dios.

Ládujla benne' zan ca' güe lá'ana' Le'.

31 Le' zue' cuita xabēla chee benne' xache' ca' chee guselé' bēnne'du zaj xu'ē lu na' benne' ca' dxuluchi'ē chee'.

110

1 Xránadxu Dios guzre' Xrana': “Gudxé'e chalá'a xabēla chia'”

cadxa zrin zra guna' ga benne' ca' dxeledábague'
 lue'
 xuluzúa zribe' lau'."

² Naga zu' Sión, gun Xránadxu zriluj xel-la' dxenná
 bea chiu'.

Dxenné': "Gunná be'e benne' ca' dxeledábague'
 lue'.

³ Lu zra gate tíl-lalenu' benne' ca' dxeledábague'
 lue',

du lázrequeze benne' chiu' ca' chjaque' wedil-la.
 Ca dxun xrlə'əla chee bálala, dxacu na xi'a lá'azxa,
 caníqueze xelaca benne' cuide' chiu' ca',
 xeledé'ə naga zu' xelácaləne' lue'."

⁴ Guchebe lazre' Xránadxu, ne quebe gunítie' xr-
 tizre',

gunné': "Chadía chacanna nacu' bxruze ca guca
 bxruze
 Melquisedec."

⁵ Zua Xránadxu chalá'a xabela chiu'.

Gate zre'ə, na' guzría xi'ə benne' wenná bea ca'.

⁶ Guchi'ə chee benne' dutə xəzr la xu, na' gutie'
 zánete

benne' xəzr la xu ca'.

Guzría xi'ə benne' dxelenná be'ə dutə xəzr la xu.

⁷ Xi'aj benne' wenná bea nigá nisa xégudu zua na
 dxu'a neza,
 na' xexape' xel-la' wal-la chee'.

111

¹ Dutə lázrdawa' güe lá'ana' Xránadxu Dios tu zren
 nen
 benne' xrlátaje ca', benne' zaj nazrague' lau
 Le'.

² Da zrentə zaj naca da ca' nun Xránadxu Dios,

na' xúgute benne' ca' dxelezaca ba lázreleṅe' da
nune',

ne dxelaca lazre' xeledé'ene' na.

³ Da xabáa, ne da xrtante zaj naca da dxune' Le',
ne tu chí'izqueze zua da xrlátaje chee'.

⁴ Dxune' dxeajsá lázredxu ca naca xel-la' waca
zrente
da dxune'.

Xránadxu Dios naque' zren lazre', ne dxexache
lazre'
bénneache.

⁵ Dxugawe' benne' ca' dxelezrebe' Le'.

Tu chí'izqueze dxeajsá lazre' xel-la' wezría da
nune'.

⁶ Blé'ene' bénneache chee' ca' ca naca xel-la' waca
chee'
da ca' bene'.

Dxunézruje' benne' chee' ca' da zaj napa benne'
xezica
xezr la xu ca'.

⁷ Li lazre', ne xrlátaje zaj naca da ca' dxune'.

Li lazre' zaj naca xúgute da bdxixruj be'e.

⁸ Tu chí'izqueze, ne chadía chacanna zaj zua da ca'
bdxíxruje'.

Lu da li, ne lu da li lazre' nune' ca zaj naca na.

⁹ Gusel-le' tu benne' weselá chee' guselé' bénneache
chee'.

Tu chí'izqueze nadxixruj be'e xel-la' wezría chee'.

Lá'azxa, ne tu da zrébedxu naca La Le'.

¹⁰ Chee' su laudxu gácadxu sina, dxun na ba xen
zrébedxu
Xránadxu Dios.

Dxeléajni'i xanne' xúgute benne' ca' dxelune' ca zaj
naca
da nadxíxruje'.

Tu chí'izqueze dxal-la' güe lá'anadxu Le'.

112

- ¹ Ba neza zrente naca na chee bënnea' dxezrebe'
 Xránadxu Dios,
 ne ca zaj naca da bdxixruj be'e dxezaca ba
 lázrele'ene'.
- ² Zri'ine zre sua bënnea' xelape' xel-la' dxenná bea
 lu xezr la xu,
 na' gaca chawe' chee benne' xrlátaje ca'.
- ³ Da zan da de, ne xel-la' gunní'a zaj zra na xu'u
 lizre',
 ne tu chí'izqueze zua da xrlátaje da dxun bënnea'.
- ⁴ Dxusaní' tu xi' lu da chul-la naga zaj zra' benne'
 li lazre' ca',
 benne' ca' zaj naque' zren lazre', ne xrlátaje,
 ne dxelexache lazre' bënneache.
- ⁵ Tu benne' xrlátaje dxexache lazre' bënneache,
 ne dxusané' le' dumí.
 Lu da xrlátaje dxenná bé'ene' da zaj xu'u lu ne'e.
- ⁶ Chee le' na' quebe bi gutá na le' lu lataj naga zue',
 na' tu chí'izqueze xeajlesá lazre' bënneache ca'.
- ⁷ Quebe zrebe' gate xenne' dxaca da calēla chee
 da xu'u lu ne'e.
 Ze chacha lázrdawe' lawe' da dxuxrén lazre'
 Xránadxu Dios.
- ⁸ Zua chawe' lázrdawe', ne quebe bi dxezrebe',
 ca zrindxa zra lé'ene' gaca chee benne' ca'
 guledábage' le'
 ca da dxezá lazre'.
- ⁹ Dxisie' da de chee', ne dxunézruje' da gácale
 benne' xache' ca',
 ne tu chí'izqueze zua da xrlátaje da dxune'.

Lu da xabáa xegá'ana szren xel-la' dxenná bea chee'.

¹⁰ Walé'e benne' wen da calela da nigá, na' gueque zréajene'.

Gágu xa'ate lazxe', ne cue'e gunne xue.

Xelenite da ca' dxelezá lazre' benne' ca' dxelune' da calela.

113

¹ ¡Le'e, wen zrin chee Xránadxu Dios, le güe lá'ana Le'!

¡Le güe lá'ana La Xránadxu Dios!

² ¡Gaca ba lá'azxa La Xránadxu Dios, na'a zra, ne chadía chacanna!

³ ¡Naga dxalaj gubizra ca zrinte naga dxebía na gaca ba lá'azxa La Xránadxu Dios!

⁴ ¡Szrente nagá'ana Xránadxu Dios lawe' dute xezr la xu,

na' lávela xabáa dxe' da xabáa chee'!

⁵ ¿Núzraqueze naca ca naca Xránadxu Dios, Bénnea' dxe'e xabáa na'la?

⁶ Dios dxun cuine' dxexruj lazre' chee lé'ene' da de zran xabáa, ne lu xezr la xu.

⁷ Dios dxechise' benne' xache' lu xu xrte, ne dxebéaje' benne' baxache' lu da dxezaca zi'e,

⁸ na' dxune' dxelebé' benne' caní ládujla benne' dxelenná be'e,

ládujla benne' ca' dxelenná bé'ene' bénneache chee'.

⁹ Dxune' zua nu'ula zue' tuze ládujla zrí'inequeze' ca',

na' dxebé nu'ula nigá lawe' da naque' xrna bi cheéqueze'.

¡Gaca ba lá'azxa Xránadxu Dios!

114

- 1 Gate beledxúaj benne' Israel ca' lu xęzr la xu Egipto,
beledxúaj zri'ine zre sua Jacob lu xęzr la xu chee benne' zitu' ca',
- 2 na' gulaca zri'ine zre sua Judá ca tu xu'u lizre Dios,
gulaca benne' Israel ca' naga dxenná be'e.
- 3 Ble'e Nísadau' Xrna da nigá, na' bzrunnuj na,
na' gugá xęgu Jordán.
- 4 Gulexrite xi'a zri'a ca' ca dxelexrite chivo ca',
na' gulexrite xí'adu ca' ca dxelexrite chíbudu ca'.
- 5 ¿Bizra guca chiu', nísadau', lawe' da ben na
bZRúnnuju'?
- ¿Bizra guca chiu', xęgu Jordán, lawe' da ben na
gugú'?
- 6 Le'e, xi'a zri'a ca', ¿Bizr chee na' guxrítele ca
dxelexrite
chivo ca'?
- Le'e, xi'adu ca', ¿Bizr chee na' guxrítele ca dx-
elexrite
chíbudu ca'?
- 7 Dxezrize xęzr la xu lau Xránadxu Dios, lau Dios
chee Jacob.
- 8 Dios nigá bene' bexaca xiaj xre' tu beaj nisa,
na' bexaca xiaj tu ga dxalaj nisa.

115

- 1 Quegá netu', Xran.
Quegá cuintu', san Lué'queze dxal-la' xucá'ana
szrentu'
ne chee xel-la' zri'i lazre' chiu', ne xel-la' li lazre'
chiu'.

2 ¿Bizr chee na' dxun na ba xen xuluchebe
 béneache netu':
 “Gazra zua Dios cheele?”

3 Dios cheedxu zue' xabáa.
 Dxune' ca da dxaca lázrequeze'.

4 Dios ca' chee benne' ca' zaj naca na bedáu' plata,
 ne bedáu' oro, da nun ni'a na' béneache.

5 Zaj zua dxu'a na, san quebe dxelenné na.
 Zaj zua xiaj lau na, san quebe dxelélé'e na.

6 Zaj zua naga na, san quebe dxelén na.
 Zaj zua zrina na, san quebe dxelélé'e na.

7 Zaj zua na' na, san quebe bi dxelecá'a na.
 Zaj zua ni'a na, san quebe dxeledá na.

Quebe dxedxuaj chi'i na lba na.

8 Ca zaj naca na, zaj naca benne' ca' zaj nune' na,
 ne benne' ca' dxuluxrén lazre' na.

9 Le guxrén lazre' Xránadxu, le'e, benne' Israel ca'.
 Le' dxácalene' le'e, ne dxuxúe' le'e.

10 Le guxrén lazre' Xránadxu, le'e, bxruze chee
 Dios,
 nácale zri'ine zre sua Aarón.

Le' dxácalene' le'e, ne dxuxúe' le'e.

11 Le guxrén lazre' Xránadxu, le'e dxucá'ana szrenle
 Le'.

Le' dxácalene' le'e, ne dxuxúe' le'e.

12 Xránadxu dxajsá lazre' dxi'u, na' guné' dxi'u da
 chawe'.

Guné' da chawe' chee benne' Israel ca'.

Guné' da chawe' chee bxruze chee', zri'ine zre sua
 Aarón.

13 Guné' da chawe' chee xúgute benne' dxelape' Le'
 ba lá'ana,
 benne' blau ca', ne benne' quebe zaj naque' blau.

- 14 Gun Xránadxu chan zri'inu' ca',
ne chan zri'ine bi biu chiu' ca'.
15 Gun Xránadxu da chawe' chiu'.
Naque' Bénnea' ben xabáa, ne xezr la xu.
16 Chee tuze Xránadxu naca xabáa,
san bnézruje' bènneache xezr la xu.
17 Benne' zaj nate quebe gaca xelúe lá'ane'
Xránadxu,
ne quebe gaca benne' ca' zaj zuę' lu xędxu ba.
18 Dxi'u, benne' ban, güe lá'anadxu Xránadxu,
na'a zra, ne chadía chacanna.

¡Le güe lá'ana Xránadxu!

116

- 1 ¡Nazrí'ida' Xránadxu Dios
lawe' da benne' chi'a, ne da gunaba' lawe',
2 ne lawe' da bze nague' chia!
Chee le na' guláwizra' Le' dxácatę naca bana'.
3 Guzúa' lu da stebe chee xel-la' gute,
ne bzreba' ba zua' chu'a lataj ba xa'.
Guzúa' lu da stebe, ne guzaca zi'a.
4 Nadxa bláwizra' Xránadxu Dios, gunnía':
Xrana' Dios, bselá bènne'du xu'a.
5 Cháwe'le'e naca Xránadxu Dios, ne xrlátaje naque'.
Awe', dxexache lazre' Dios cheedxu dxi'u.
6 Dxuxúe Xránadxu benne' dxexruj lazre' ca'.
Gate na' guzúa' lu da stebe bselé' neda'.
7 Ben dipa lazre', bènne'du xu'a,
lawe' da nun Xránadxu da chawe' chiu'.
8 Lue', Xran, bseláu' bènne'du xu'a lu na' xel-la'
gute,

chee québedxa cuezre we'a, ne chee quebe chea-
jcházia'.

⁹ Ta' lau Xránadxu Dios
naga zaj zra' benne' ca' zaj naca bane'.

¹⁰ Guxéajle'a chee', na' chee le na' bchálaja', lácala
guzaca zí'le'a.

¹¹ Lu xel-la' dxezrebe chia', gunnía':
Zaj naca xúgute bénneache benne' wen lazre' ca'.

¹² ¿Bizra quízrujqueza' Xránadxu Dios
chee xúgute da chawe' da bene' chia'?

¹³ Si'a lu ne'e xel-la' weselá,
ne guláwizra' Xránadxu Dios.

¹⁴ Na'a guna' da ca' guchebe lazra' lau Xránadxu.
Guna' na lau xúgute bénneache chee'.

¹⁵ Xránadxu Dios dxe'e gunne xue
chee bénneache chee' gate dxelátie'.

¹⁶ Xrana' Dios, da li naca' wen zrin chiu'.
Naca' wen zrin chiu', ne zri'ine nu'ula wen zrin
chiu'.

Lue' bzúzruju' da zaj nadxéaj na neda'.

¹⁷ Da güe lá'ana' Lue' gaca na ca tu béadau' gutia'
lau',

ne gucá'ana szrena' Lau', Xrana' Dios.

¹⁸ Lau Xránadxu Dios guna' da ca' guchebe lazra'
chee',

da guna' lau xúgute bénneache chee'.

¹⁹ Guna' na chale'aj xu'u lizre Xránadxu Dios,
da dxe' na lu'ule xezre Jerusalén.

¡Gaca ba lá'azxa Xránadxu Dios!

117

¹ ¡Le güe lá'ana Xránadxu Dios, le'e, benne' dute xezr
la xu!

¡Le güe lá'ana Le', le'e, xúgute bēneache,

² lawe' da zrente naca xel-la' zri'i lazre' chee' ca
nazrí'ine' dxi'u,

ne chadía chacanna naca xel-la' li lazre' chee'!

¡Le güe lá'ana Xránadxu!

118

¹ ¡Le güe lá'ana Xránadxu Dios lawe' da naque'
xrlátaje,

ne lawe' da chadía chacanna dxexache lazre'
dxi'u!

² Dxal-la' xelenná benne' Israel ca':

¡Chadía chacanna dxexache lazre' dxi'u!

³ Dxal-la' xelenná zri'ine zre sua Aarón:

¡Chadía chacanna dxexache lazre' dxi'u!

⁴ Dxal-la' xelenná benne' ca' dxelezrebe' Xránadxu
Dios:

¡Chadía chacanna dxexache lazre' dxi'u!

⁵ Gate na' guzúa' lu da stebe bláwizra' Xránadxu
Dios,

na' bechebe Xránadxu, ne bselé' neda' lu da na'
bexru na neda'.

⁶ Zualē Xránadxu neda', na' québequeze zreba'
bi xelún bēneache chia' neda'.

⁷ Zúalē Xránadxu neda' ládujla benne' ca' dx-
elácalenē' neda'.

Chee' le na' Iē'eda' cheajlechaze benne' ca' dxele-
cuídenē' neda'.

⁸ Cháwe'dxa naca guxrén lázredxu Xránadxu Dios
quézcala guxrén lázredxu bēneache.

⁹ Cháwe'dxa naca guxrén lázredxu Xránadxu Dios

- quézcala guxrén lázredxu benne' dxelenná be'e.
 10 Gulechaj benne' xúgutę cue' xęzr la xu neda',
 na' lu La Xránadxu Dios guzría xi'a benne' ca'.
 11 Guléchaję' neda', ne buluchídię' neda',
 na' lu La Xránadxu Dios guzría xi'a benne' ca'.
 12 Guléchaję' neda' ca dxelún bęscutuचे',
 na' guca xel-la' dxelezrá'a cheę' ca tu xi' da dx-
 uzezxe na
 xixre' xeche' bizre,
 na' lu La Xránadxu Dios guzría xi'a benne' ca'.
 13 Buluzrigue' neda' cheę cheajcházia'
 na' gúcale Xránadxu Dios neda'.
 14 Naca Xránadxu Dios ca tu xu'u naga zua chawa',
 na' tu gúl-lazqueza' cheę' lawe' da Léquezeę' dxuselę'
 neda'.
 15 Xel-la' dxelebé dxelul-la benne' xrlátaje ca'
 lawe' da dxuselá Xránadxu le'.
 Dute xel-la' waca cheę' dxun Xránadxu Dios da
 zrente ca'.
 16 Szrente nagá'ana xel-la' waca zren cheę
 Xránadxu Dios.
 Da zrente ca' dxun xel-la' waca zren cheę
 Xránadxu.
 17 Québequeze gatia', san gaca bana',
 na' guzenda' bėnneache ca zaj naca da nun
 Xránadxu.
 18 Bde Xránadxu neda' lu da ba xa',
 san quebe bdeę' neda' lu na' xel-la' gute.
 19 Gusalaj dxa xu'u cheę chu'a naga guchi'u chia',
 Xran,
 na' chu'a na', ne güe lá'ana' Lue', Xrana' Dios.
 20 Dxa xu'u nigá naca na cheę Xránadxu Dios.

Dxa xu'u nigá dxelú'u benne' xrlátaje ca'.

21 Güe lá'ana' Lue', Xran, lawe' da bennu' chia',
ne bseláu' neda' lu da guca chia'.

22 Xiaj na' da buluzúa benne' wēn xu'u ca' chalá'ala,
lē na' naca na xiaj blau.

23 Da nigá bēn Xránadxu,
na' naca na tu da dxexebánedxu.

24 Zra nigá naca na zra da bēn Xránadxu.
Bélē'ēdxu, ne súadxu lu da ba neza lu zra nigá.

25 Xrana' Dios, dxata' xueda' Lue' guseláu' netu'
na'a.
Dxata' xueda' Lue', Xrana', gunu' chepe ban na'a
da dxuntu'.

26 Ba neza zrentē naca na cheē bēnnea' ze'ē waláz
cheē
Xránadxu Dios.
Lu xu'u lizre Xránadxu Dios nigá dxenábantu'
gaca chawe' chiu'.

27 Xránadxu naque' Dios, ne ba bēnne' dxi'u tu da
dxusaní na.
Le guchéaj béadu ca' gútele lawē' lu luzu cugu cheē'.

28 Nacu' Lue' Dios chia', na' güe lá'ana' Lue'.
Dios chia', gucá'ana szrena' Lue'.

29 ¡Le güe lá'ana Xránadxu Dios lawe' da naque'
xrlátaje,
ne lawe' da chadía chacanna dxexache lazre'
dxi'u!

119

Da dxun da bdxixruj be'e Dios dxi'u

¹ Ba neza zrentę naca na cheę benne' ca' tu dx-
elúnzqueze'

da naca du lazre',

benne' ca' tu dxelúnzqueze' ca dxenná da bdxixruj
bea

Xránadxu Dios.

² Ba neza zrentę naca na cheę benne' ca' tu dx-
elúnzqueze'

ca dxusede dizra' cheę' dxi'u,

na' dutę xichaj lázrdawe' dxuluzúę' dizra' cheę'.

³ Benne' caní québequeze dxelune' da zrinnaj,
benne' ca' tu dxelúnzqueze' ca dxenná Dios dxal-la'
xelune'.

⁴ Lue', Xran, bsízrenu' netu' cheę gun xánmentu'
ca zaj naca da bdxixruj be'u Lue'.

⁵ Dxaca lázreļ'a tu gúnzqueza'
ca zaj naca xrba chiu'.

⁶ Nadxa québequeze xedué'eda',
na' cue'a gunne xue guna' xúgute da bdxixruj be'u.

⁷ Dutę xel-la' li lazre' chia' güe lá'ana' Lue' gate ba
nusédia'

da ca' nuchi'u cheęntu', da zaj naca na xrlátaje.

⁸ Tu gúnzqueza' ca da dxenná be'u.

Québequeze cueaj xíchaju' neda'.

Dxal-la' gundxu da gunnáqueze Dios

⁹ ¿Ájala gun benne' cuide' gunbe' da naca na
xrlátaje?

Dxal-la' tu gúnzquezebe' ca dxenná xrtizru'.

¹⁰ Dutę xichaj lázrdawa' dxuna' ba xuzre guna'
da dxennáu' Lue'.

Quebe gu'u lataj guzúa' chalá'ala ca da bdxixruj
be'u.

11 Lu xichaj lázrdawa' tu dxúnzqueza' ca da
dxennáu' Lue'

chee quebe guna' dul-la tábaga' Lue'.

12 Ba lá'azxa nacu' Lue', Xrana' Dios.

Bséde neda' da ca' dxenná be'u.

13 Nen dxú'aqueza' ba bzenda' bēneache

ca zaj naca da ca' nuchi'u cheentu'.

14 Dxebéle'edxeda' tu dxúnzqueza' ca dxusede
dizra' chiu' netu',

quez ca dxelebé benne' ca' déle'e xel-la' gunní'a
chee'.

15 Gulaba lazra' ca zaj naca da bdxixruj be'u Lue',
ne nna' xánnia' ca dxennáu' dxal-la' guntu'.

16 Béle'eda' guna' ca da dxenná be'u,

ne quebe gal-la lazra' ca zaj naca xrtizru'.

Dxebéle'edxu dxundxu da dxennáqueze Dios

17 Ben gaca chawe' chia' neda', wen zrin chiu',
na' gaca bana', ne tu gúnzqueza' ca naca xrtizru'.

18 Gusalaj xiaj lawa' chee nna'a

da zrentę ca' da zaj zua na lu da bdxixruj be'u.

19 Naca' ca tu benne' dxedaze' lu xęzr la xu nigá.

Ben chéajni'ida' da dxenná da bdxixruj be'u.

20 Dxedú lazra' lawe' da tu chí'izqueze

dxezá lazra' guna' da ca' nuchi'u cheentu'.

21 Gudil-lu' benne' ca' dxulucá'ana szren cuine',
benne' wen da calela ca',

benne' ca' dxuluzúe' chalá'ala da bdxixruj be'u.

22 Quebe gu'u lataj nu benne' nne' schanni' chia',
na' quegá gucá'ana dítaje' neda'

lawe' da tu dxúnzqueza' ca dxusedenu' netu'.

23 Cá'anqueze benne' dxelenná bea ca' gulenné' chia'.

Neda', wən zrin chiu', blaba lazra' ca zaj naca xrba chiu'.

24 Dxezaca ba lázreḷena' da dxuseḷe dizra' chiu' netu'.

Dxuluzéajni'i na neda'.

Dute lázrdaudxu gundxu da dxennáqueze Dios

25 Zua bénne'du xu'a lu da stebe cheḷ xel-la' gute.

Ben dipa xichaj lázrdawa' nen xrtizru'.

26 Ble'eda' Lue' ca zaj naca da dxuna', na' bezi'u neda'.

Bseḷe neda' ca zaj naca xrba chiu'.

27 Ben chéajni'ida' ca gaca guna' ca bdxixruj be'u cheḷ gulaba lazra' ca zaj naca da zrentḷ ca' da benu'.

28 Dxedú lazra' lawe' da dxewí'ine lázreḷa.

Bexru chacha neda' ne cheḷ xrtizru'.

29 Quebe gu'u lataj guna' da naca na wən lazre'.

Lu xel-la' dxexache lazre' chiu' bseḷe neda' da bdxixruj be'u.

30 Bechugu lazra' guna' da naca li lazre', na' dxe'a gunne xue guna' da ca' nuchi'u cheḷntu'.

31 Tu dxúnzqueza' ca dxuseḷe dizra' chiu' netu'.

Xran, quebe guzú' neda' lu xel-la' stu'.

32 Tu gúnzqueza' ca bdxixruj be'u,

gate guzéajni'idxenu' neda'.

Dxaca lázredxu chéajni'idxu xrtizra' Dios

33 Xran, bseḷe neda' cheḷ guna' ca naca xrba chiu', na' tu gúnzqueza' ca naca na ca zrindxa zra cheajsé chia'.

34 Bzéajni'i neda', na' tu gúnzqueza' da bdxixruj be'u,

na' dute lászrdawa' guna' ca naca na.

³⁵ Ble'e neda' chee guna' da bdxixruj be'u,

lawe' da dxaca lászrequeza' guna' ca dxenná na.

³⁶ Ben sa lazra' guna' ca dxusede dizra' chiu' netu',
chee quebe gaca' benne' wecude.

³⁷ Quebe gu'u lataj gucá'ana szrena' bedáu' xia
xaga ca'.

Ben dipa xichaj lászrdawa' chee guna' ca dxenná
xrtizru'.

³⁸ Ben ca dxenná xrtizru' da guchebe lazru' chia'
neda',

wen zrin chiu', chee zreba' Lue'.

³⁹ Bde chalá'ala dizra' schanni' da dxelenné' chia',
da na' dxezreba', lawe' da xrlátaje zaj naca xrba
chiu'.

⁴⁰ Dxezá lazra' guna' da bdxixruj be'u.

Ben dipa xichaj lászrdawa' nen da xrlátaje chiu'.

Dxuxrén lászredxu xrtizra' Dios

⁴¹ Gudá xexache lazru' neda', Xrana' Dios.

Gudá guseláu' neda', ca ba guchebe lazru' gunu'.

⁴² Becheba' lau bénnea' dxusi'e neda' xel-la' stu',
gunnía':

Dxuxrén lazra' xrtizra' Xrana' Dios.

⁴³ Ben tu séquezda' guchálaja' dizra' li lazre' chiu',
lawe' da dxebeza lazra' da ca' dxuchi'u cheentu'.

⁴⁴ Tu gúnzqueza' ca dxenná da bdxixruj be'u.

Guna' na tu chí'izqueze, ne chadía chacanna.

⁴⁵ Láqueza' neda'

lawe' da dxe'a gunne xue guna' ca bdxixruj be'u.

⁴⁶ Guchálajqueza' ca dxusede dizra' chiu' netu'

lau benne' wenná bea ca', na' québequeze xe-
dué'eda'.

⁴⁷ Wabéle'equezda' guna' ca bdxixruj be'u,

da ca' nazrí'ile'eda'.

⁴⁸ Dxechebe lazra' guna' ca bdxixruj be'u,
da nazrí'ida', na' gulaba lazra' ca naca xrba chiu'.

Tu zúazqueze xrtizra' Dios

⁴⁹ Bsa lazre' da guchebe lazru' chia' neda',
wen zrin chiu', da na' benu' dxebeza lazra'.

⁵⁰ Gate na' guzaca zi'a, guzúa tu da bexúe zren na
neda'
lawe' da ben dipa xrtizru' xichaj lázrdawa'.

⁵¹ Benne' dxulucá'ana szren cuine' belún lale' chia'
neda',
san québequeze gusana' da dxenná da bdxixruj
be'u.

⁵² Xeajsá lazra' da bchi'u cheentu' nédxudaute,
Xran,
na' bexaca zrena'.

⁵³ Nen dute xel-la' dxezrá'a guzúa' lu da stebe
ne chee benne' ca' dxelune' da zrinnaj,
benne' ca' dxuluzúe' chalá'ala da bdxixruj be'u.

⁵⁴ Xrba chiu' ca' gulaca na chia' ca tu da dxul-la'
gate na' zua' tu xezr la xu zitu'.

⁵⁵ Chizrela xeajsá lazra' lau' Lue', Xrana' Dios,
na' tu bénzqueza' ca dxenná da bdxixruj be'u.

⁵⁶ Lu da ba neza caní guzúa'
lawe' da tu bénzqueza' ca zaj naca da bdxixruj
be'u.

Dxebedxu dxulábadxu xrtizra' Dios

⁵⁷ Da dxezá lazra' nácaquezu' Lue', Xrana' Dios.
Ba gunnía' tu gúnzqueza' ca naca xrtizru'.

⁵⁸ Dute lázrdawa' dxenaba' Lue' xidu' gácalenu'
neda'.

Bexache lazre' neda' ca ba gunnúu' gunu'.

⁵⁹ Gunná' xannia' ca zaj naca da dxuna',

na' xecha lasa dxuna' ca dxusede dizra' chiu' netu'.

⁶⁰ Bena' ba xuzre, ne quebe guzreda'
chee tu gúnzqueza' ca bdxixruj be'u.

⁶¹ Xralaj chee benne' ca' dxelune' da calela zaj
nuchele na
neda',

san quebe ne gal-la lazra' ca dxenná da bdxixruj
be'u.

⁶² Dxela dxasa' chee güe lá'ana' Lue'
lawe' da xrlátaje zaj naca da ca' dxuchi'u cheentu'.

⁶³ Naca' tuze nen xúgute benne' ca' dxelezrebe'
Lue',

benne' ca' tu dxelúnzqueze' da bdxixruj be'u.

⁶⁴ Xrana' Dios, dxezrín dutę xęzr la xu
xel-la' dxexache lazre' chi'u'.

Bsede neda' chee guna' ca dxenná xrba chiu'.

Zácale'e da wnnáqueze Dios

⁶⁵ Ba benu' guca chawe' chia' neda', wen zrin chiu'.
Xran, benu' na cáteze dxenná xrtizru'.

⁶⁶ Bsede neda' chee gueque be'eda' da naca
xrlátaje,
ne chee chéajni'ida' lawe' da dxéajle'a da bdxixruj
be'u.

⁶⁷ Nédxula ca bzéxruju' neda' gudéa' chalá'ala,
na' na'a tu dxúnzqueza' ca dxenná xrtizru'.

⁶⁸ Nacu' xrlátaje, ne dxunu' gaca chawe' cheentu'.
Bsede neda' guna' ca naca xrba chiu'.

⁶⁹ Benne' dxulucá'ana szren cuine' gulenné' chia'
da wen lazre'

san dutę lázrdawa' tu gúnzqueza' ca bdxixruj be'u.

⁷⁰ Quebe xu'u xel-la' dxéajni'i lázrdau benne' ca'.
Neda' dzezaca ba lázrelena' da dxenná da bdxixruj
be'u.

71 Chawe' naca bzéxruju' neda'
chee gusédia' guna' ca naca xrba chiu'.

72 Cháwedxa naca da bdxixruj be'u chia' neda'
quez ca gaxúa gaxúane dumí oro, ne plata.

Cháwele'e naca da wnnáqueze Dios

73 Nen ná'quezu' benu' neda' cáteze naca'.
Bzéajni'i neda' chee gusédia' guna' ca bdxixruj
be'u.

74 Benne' dxelezrebe' Lue' xeelé'eng' neda'.
Xelebené' lawe' da dxebeza lazra' gaca ca dxenná
xrtizru'.

75 Xran, ba nézquezda' xrlátaje naca da dxuchi'u
cheentu',
na' lu duté xel-la' li lazre' chiu' bsaca zi'u neda'.

76 Lu duté xel-la' dxexache lazre' chiu' bexúe zren
neda'
cáteze dxenná da guchebe lazru' chia' neda', wen
zrin chiu'.

77 Bexache lazre' neda' chee gaca bana'
lawe' da dxezaca ba lázrelena' da bdxixruj be'u.

78 Ben xelexedué'e benne' ca' dxulucá'ana szren
cuina
lawe' da gulenné' schanni' chia', ne quebe bi bena'
chee'.

Neda' gulaba lazra' ca da bdxixruj be'u.

79 Ben xelexelá' benne' ca' dxelezrebe' Lue',
chee xellené' chia',
na' xulusédie' da dxuséde dizra' chiu' netu'.

80 Ben gaca' du lazre' ca naca xrba chiu'
chee québequeze xedué'eda'.

Gun Dios ca dxenná xrtizre'

81 Zua bénne' du xu'a lu da stebe
lawe' da dxebeza' xidu' guseláu' neda',

na' dxebeza lazra' gaca ca dxenná xrtizru'.

82 Dxezé bxinne xiaj lawa' lawe' da dxezá lazra' xrtizru',

dxennia': ¿Bátaqueze xexúe zrenu' neda'?

83 Dxebizra' ca tu buzude xide zę na lu zren, san quebe dxal-la lazra' guna' ca dxenná xrba chiu'.

84 ¿Bal-la zra gaca bana' neda', węn zrin chiu'?

¿Bátaqueze gudéu' lu da ba xa' benne' ca' dxeláu zi' xuzre' neda'?

85 Benne' dxulucá'ana szren cuine' gulene' tu xędxu

naga cheajcházia'.

Québequeze dxelune' ca dxenná da bdxixruj be'u.

86 Da líqueze zaj naca xúgute da bdxixruj be'u.

Gúcale neda' lawe' da dxeláu zi' xuzre' neda', ne quebe bi nuna' chee'.

87 Xeláteze la belutię neda',

san quebe ne gusana' guna' ca bdxixruj be'u.

88 Lu xel-la' dxexache lazre' chiu' ben dipa xichaj lázrdawa',

cheę tu gúnzqueza' ca dxusede dizra' chiu' netu'.

Dxéajle'dxu xrtizra' Dios

89 Xrana' Dios, tu chí'izqueze

zua xrtizru' xabáa na'la.

90 Xel-la' li lazre' chiu' sua na cheę xúgute bęneache.

Lue' bzua chúchuquezu' xęzr la xu, na' zúaqueze na.

91 Ne cheę da gunnáquezu' zaj nnita xúgute da de, na' xúgute da ca' dxelún na zrin chiu'.

92 La quebe bezaca ba lázrelęna' da bdxixruj be'u bache benítia' lu da guzaca zi'a.

93 Cabátaqueze gal-la lazra' da bdxixruj be'u

lawe' da ne chee da ca' ba btipu' lazra'.

⁹⁴ Chiu' Lue' naca' neda'.

Bselá neda', lawe' da dxuna' ba xuzre guna' ca
bdxixruj be'u.

⁹⁵ Benne' dxelebéaj xichaj Dios gulenné'e neda'
chee

xuluzría xi'e neda',

san neda' dxulaba lazra' ca dxusede dizra' chiu'.

⁹⁶ Dxelé'equesda' dxeajsé chee xúgutę da de lu xęzr
la xu,

san da bdxixruj be'u Lue' québequeze cheajsé chee
na.

Dxaca lázredxu gúnbeadxu xrtizra' Dios

⁹⁷ Dios, nazrí'ile'eda' da bdxixruj be'u.

Du zra dxulaba lazra' ca naca na.

⁹⁸ Ne chee da bdxixruj be'u nunu' nácadxa' sina ca
benne' ca'

dxeledábage' neda'

lawe' da tu zúálezqueze da bdxixruj be'u neda'.

⁹⁹ Dxéajni'idxeda' ca benne' ca' dxulusédene' neda'

lawe' da dxulaba lazra' ca dxusede dizra' chiu'
neda'.

¹⁰⁰ Ba guxéajni'idxeda' ca benne' gula ca'

lawe' da tu dxúnzqueza' ca dxenná da bdxixruj
be'u.

¹⁰¹ Bena' ba xuzre quebe bi da caleła guna'

chee tu gúnzqueza' ca dxenná xrtizru'.

¹⁰² Quebe bsana' dxuna' da ca' nuchi'u cheentu'

lawe' da Lué'queze bsédenu' neda'.

¹⁰³ Xrtizru' naca na ca tu da zízrele'e lu dxu'a.

Nácadxa na zixre ca bzrina'dau' lu dxu'a.

¹⁰⁴ Ne chee da bdxixruj be'u naca' benne' sina.

Chee le na' dxecuída' xúgutę da wen lazre'.

Xrtizra' Dios dxuzéajni'i na dxi'u

105 Ca tu xi' naca xrtizru' naga dxedá',
da dxusení na neza xu'a.

106 Bzétaja' Dios, ne guchebe lazra'
tu gúnzqueza' ca nuchi'u cheentu' da naca na
xrlátaje.

107 Dhezaca zí'le'a.

Xrana' Dios, btipa lazra' cáteze guchebe lazru'
gunu'.

108 Xrana' Dios, dxata' xueda' Lue' si'u da dxue
lá'ana' Lue',
ne gusédenu' neda' guna' ca nuchi'u cheentu'.

109 Tu zúazqueza' lu da stebe chee xel-la' gute,
san québequeze ne gal-la lazra' guna' ca bdxixruj
be'u.

110 Benne' dxelebéaj xichaj Dios buluzale' xralaj
da queła na neda'
san neda' quebe bsana' dxuna' ca bdxixruj be'u.

111 Ba gucá'a da dxusede xrtizru' neda' chee gaca
na
da gápaqueza' chadía chacanna
lawe' da zaj naca xrtizru' da dhezaca ba lázrele'a.

112 Zúatequeze lázrdawa' guna' ca zaj naca xrba
chiu'
tu chí'izqueze, ca zrindxa zra cheajsé chia'.

Bexácadxu chawe' ne chee xrtizra' Xránadxu

113 Dxecuídeda' benne' ca' dxelune' láweze da
xrlátaje,
san nazrí'ida' da dxenná da bdxixruj be'u.

114 Nacu' Lue' ca tu xu'u naga zua chawa', ne ca tu
da dxucu'uj na neda',
lawe' da dxebeza lazra' gaca na ca dxenná xrtizru'.

115 Le gucuasa naga zua', le'e, benne' wen da
calela,

lawe' da tu gúnzqueza' ca bdxixruj bea Dios chia'.

116 Bze chacha neda' cáteze dxenná xrtizru', na'
gaca bana',

ne quebe xedué'eda' chee da na' dxebeza lazra'.

117 Bze chacha neda', na' la',

ne tu xezaca ba lázrezqueza' ca naca xrba chiu'.

118 Bchuchu bléaju' xúgute benne' ca' bulusane' ca
naca

xrba chiu'

lawe' da wen lazre' naca xel-la' sina chee benne'
ca'.

119 Ca bebe bzria xi'u xúgute benne' ca' dxelebéaj
xíchaje'

Lue' lu xezr la xu nigá.

Chee le na' nazrí'ida' da dxusede dizra' chiu' netu'.

120 Dxezrize bela' dxen chia' lawe' da dxezreba'
Lue',

ne dxezreba' da dxuchi'u cheentu' da naca na
xrlátaje.

Dxal-la' gundxu ca dxenná xrtizra' Xránadxu

121 Ba bena' ca da nuchi'u cheentu', ne ca naca da
xrlátaje.

Quebe gudeu' neda' lu na' benne' ca' dxuluchínene'
neda'.

122 Guchebe lazre' chia' gunu' gaca chawe' chia'.

Quebe gu'u lataj benne' ca' dxulucá'ana szren
cuine'

xuluchínene' neda' xadía.

123 Guze bxrinne xiaj lawa' lawe' da dxebeza' xidu'
guseláu' neda',

ne guchi'u cheentu' ca dxenná xrtizru'.

124 Dute xel-la' dxexache lazre' chiu' ben gaca
 chawe'
 chia' neda', wen zrin chiu',
 ne bsede neda' guna' ca naca xrba chiu'.

125 Naca' wen zrin chiu'.

Bzéajni'i neda' chee gúnbe'a da dxusede dizra' chiu'
 netu'.

126 Xrana' Dios, ba bzrin zra bi gunu',
 lawe' da ba buluzúe' chalá'ala da bdxixruj be'u.

127 Chee le na' neda' nazrí'idxeda' da bdxixruj be'u
 Lue'

quézcala oro, ne quézcala galega oro.

128 Chee le na' dxéqueda' zaj nácadxa li lazre'
 da bdxixruj be'u ca xúgutę da de,
 na' dxecuídeda' xúgutę da zaj naca na da wen lazre'.

Dxaca lázredxu gundxu ca dxenná xrtizra' Dios

129 Dxebánentu' ca dxusede dizra' chiu' netu'.
 Chee le na' du lazra' tu dxúnzqueza' ca dxenná na.

130 Gate nu dxuzájla'a ca naca xrtizru', dxusaní na.
 Dxun na dxeléajni'i benne' dxexruj lazre' ca'.

131 Guxá dxu'a, ne gucá'a lazra'
 lawe' da dxezá lazra' gúnbe'a da bdxixruj be'u.

132 Gunná' neda', ne bexache lazre' neda',
 ca tu dxúnzquezu' chee benne' ca' zaj nazrí'ine'
 Lue'.

133 Ben tu gúnzqueza' ca dxenná xrtizru',
 ne quebe gu'u lataj da zrinnaj nna be'e na neda'.

134 Bselá neda' lu na' benne' xichaj zra'a ca',
 na' tu gúnzqueza' ca dxenná da bdxixruj be'u.

135 Ben gaca chawe' chia' neda', wen zrin chiu',
 ne bsede neda' guna' ca zaj naca xrba chiu' ca'.

136 Nisa gudxezra' guca na ca tu xegu nisa
 lawe' da quebe dxelún bénneache ca bdxixruj be'u.

Da li naca da dxenná Xránadxu

137 Xrana' Dios, xrlátaje nacu' Lue',
ne li lazre' naca ca dxuchi'u cheentu'.

138 Da dxusede dizra' chiu' netu', da na' bzu' lu
na'ntu',
naca na da li, ne da li lazre'.

139 Dxedú lazra' lawe' da dxé'le'a gunne xue
lawe' da gulal-la lazre' benne' ca' dxeledábague'
neda'
ca zaj naca xrtizru'.

140 Du lázrele'e naca xrtizru',
na' nazrí'ida' neda' na, naca' wen zrin chiu'.

141 Dxexruj lazre' naca', na' dxuluzúe' neda'
chalá'ala,

na' quebe ne gal-la lazra' da bdxixruj be'u.

142 Tu chí'izqueze zua da dxuchi'u cheentu',
na' da li naca da bdxixruj be'u.

143 Da dxezaca zi'a, ne da stebe zua' zaj nuchuchuj
na neda',

san dxezaca ba lázrelena' da bdxixruj be'u.

144 Tu chí'izqueze naca li lazre' da dxusede dizra'
chiu'.

Bzéajni'i neda', na' gaca bana'.

Dxal-la' gulaba lázredxu da gunná Dios

145 Dute lázrdawa' dxuláwizra' Lue', Xrana' Dios.
Ben gaca chawe' chia', na' tu gúnzqueza' ca dxenná
xrba chiu'.

146 Dxuláwizra' Lue'.
Bselá neda', na' tu gúnzqueza' ca dxusede dizra'
chiu' netu'.

147 Bálala dxasa', na' dxuláwizra' Lue'.
Dxebeza lazra' gaca ca dxenná xrtizru'.

148 Dxenná'aza' bedú xela,
chee gulaba lazra' da bdxixruj be'u.

- 149 Dute_̄ xel-la' dxexache lazre' chiu' bene chi'a.
 Xrana' Dios, da bchi'u che_̄ntu' btipa lazra'.
- 150 Benne' dxeláu zi' xuzre' neda' ba zaj zre'_̄e
 xelune'_̄ chia'
 da calēla.
- Zaj nusane'_̄ da dxenná da bdxixruj be'u.
- 151 Xrana' Dios, zu' Lue' gagu naga zua',
 ne da li zaj naca xúgute_̄ da bdxixruj be'u.
- 152 Gate nate ba núnbe'a da dxuse_̄de dizra' chiu'
 netu',
 da na' nuzú' che_̄ntu' tu chí'izqueze.

Da gunná Dios dxuzéajni'i dxi'u

- 153 Gunná' xque ca dxezaca zi'a, ne bselá neda'
 lawe' da quebe ne gal-la lazra' da dxenná da bdx-
 ixruj be'u.
- 154 Bechebe waláz chia', ne bexa'u neda'.
 Btipa lazra' nen xrtizru'.
- 155 Stébele'_̄e naca xeledá benne' ca' dxelebéaj
 xíchaje'
 Lue', Díos,
 lawe' da quebe dxelebé'_̄e gunne xue xelune'_̄ ca
 naca xrba chiu'.
- 156 Xrana' Dios, dxexache lázrele'u bēneache chiu'.
 Btipa lazra' cáteze dxenná xrtizru' gunu'.
- 157 Zánete_̄ zaj naca benne' ca' zaj nau zi' xuzre'
 neda',
 ne benne' ca' dxeledábague' neda',
 san quebe ne gusana' dxuna' ca dxuse_̄de dizra'
 chiu' netu'.
- 158 Ble'eda' benne' ca' dxelún lazre', na' dxegúteda'
 benne' ca'
 lawe' da quebe dxelune'_̄ ca dxenná xrtizru'.

159 Gunná'xque, Xran, ca nazrí'ida' da bdxixruj be'u.

Dute xel-la' dxexache lazre' chiu', btipa lazra'.

160 Da líqueze zaj naca xúgute xrtizru',
ne tu chí'izqueze zaj naca da dxuchi'u cheentu' lu
da xrlátaje chiu'.

Da gunná Dios dxutipa lázredxu

161 Benne' ca' dxelenná be'e dxeláu zi' xuzre' neda'
na' quebe bi nuna' chee'.

Dute lázrdawa' dxezreba' ca zaj naca xrtizru'.

162 Dxebéle'eda' lu da dxenná xrtizru'
ca dxebé bënnea' dxezrel-lenē' tu xel-la' gunní'a
zrente.

163 Dxecuúdeda', ne dxegúteda' da wen lazre'.

Nazrí'ida' da dxenná da bdxixruj be'u.

164 Gazre lasa tu zra dxue lá'ana' Lue'
lawe' da xrlátaje naca ca dxuchi'u cheentu'.

165 Dxelebeza zri lázrele'e benne' ca' zaj nazrí'ine'
da bdxixruj be'u,

na' quebe bi de da gun na cheajlecházie'.

166 Xrana' Dios, dxebeza' Lue' xidu' guseláu' neda',
ne tu dxúnzqueza' ca naca da bdxixruj be'u.

167 Dute lázrdawa' tu dxúnzqueza' da dxusede dizra'
chiu' netu',

ne nazrí'ile'eda' ca naca na.

168 Tu dxúnzqueza' ca naca da bdxixruj be'u,
ne ca dxusede dizra' chiu' netu'

lawe' da dxelé'equeznu' xúgute da dxuna'.

Dxebéle'eledxu xrtizra' Dios

169 Xrana' Dios, bene da dxuláwizra' Lue'.

Bzéajni'i neda' ca dxenná xrtizru' gunu'.

170 Bene da dxenaba' lau Lue'.

Bselá neda' ca dxenná xrtizru' gunu'.

171 Tu güe lá'anazqueza' Lue', Xran,
gate ba nusédenu' neda' guna' ca naca xrba chiu'.

172 Tu guchálajzqueza' ca naca xrtizru'
lawe' da xrlátaje naca ca dxenná be'enu' netu'.

173 Guzúatequeze gácalenu' neda'
lawe' da dxuna' ba xuzre guna' ca bdxixruj be'u.

174 Dxezá lazra' guseláu' neda', Xrana' Dios.
Dxezaca ba lázreḡna' da bdxixruj be'u.

175 Ben gaca bana', na' güe lá'ana' Lue',
na' da dxuchi'u chia' xelácale na neda'.

176 Gudéa' chalá'ala ca dxedá tu zrila' naníteba'.
Bexilaj neda', wən zrin chiu', lawe' da quebe ne
gal-la lazra'
da bdxixruj be'u.

120

1 Gate guzúa' lu da stebe bláwizra' Xránadxu Dios,
na' Le' gúcalene' neda'.

2 Bselá neda', Xrana' Dios, lu na' benne' wən lazre'
ca',
ne lu na' benne' dxelezí xē'e ca'.

3 ¿Bizra gunna Dios le'e, benne' dxelezí xē'e?
¿Bizra da ba neza gaca na cheeḡ gate gudé'e' le'e
lu da zi' da xa'?

4 Gudé'e' le'e lu na' benne' ca' xuludé'e' le'e xaga
nalá xéche'ze,
ne xuluzríe' le'e xi' galaj.

5 Edxugúa neda'.

Dxaca chia' ca zúaqueza' ládujla benne' Mesec,
ne ca zua' tu lu xu'u xide chee benne' Cedar.

6 Da zrente ba guzúa' ládujla benne' caní
dxuluzúe' chalá'ala xel-la' dxebeza zri lazre'.

⁷ Neda' dxezá lazra' gata' xel-la' dxebeza zri lazre'.
Gate dxuchálaja' cheeṅ, dxeledíl-laleṅ benne' ca'
neda'.

121

¹ Chisa xíchaja' nna'a da dxelún bēneache lu xi'a
ca'.

¿Gazra za' da gácaleṅ na neda'?

² Da gácaleṅ na neda' za' lu na' Xránadxu Dios,
Bēneea' bēne' xabáa, ne xezr la xu.

³ Quebe gu'e lataj cheajcháziu'.

Quebe gase Bēneea' dxuxúequezeṅ lue'.

⁴ Gunná' xque, quebe te bchigala cheeṅ Bēneea'.

Québequeze gase Bēneea' dxuxúequezeṅ benne' Is-
rael ca'.

⁵ Xránadxu Dios dxucú'uje' lue'.

Xránadxu Dios zueṅ cuitu' xabela dxegu'e lue' zrul-
la.

⁶ Quebe guzezxe gubizra lue' te zra,
ne quebe bi gune beu' lue' chizrela.

⁷ Xranu' Dios guxúequezeṅ lue' cheeṅ quebe bi da
calela
gaca na chiu'.

Guxúequezeṅ bēne' du xu'u.

⁸ Xránadxu Dios guxúequezeṅ lue' gate dxedxúaju',
ne gate dxexú'u, na'a zra, ne chadía chacanna.

122

¹ Gubélēna' benne' ca' gulé'e neda':

“Chéajdxu xu'u lizre Xránadxu Dios.”

² Na'a zúadxu nigá, zentu' dxa xu'u ze'e
da naxechaj lue', xezre Jerusalén.

³ Jerusalén naca na tu xezre da belexuné',
na' naca na xrtante, ne dxé'le'e na cháwedau'.

- 4 Lu xezre na' zjaca xúgute cuen bénneache zaj de'e
 Xránadxu Dios.
 Dxelune' ca dxenná dizra' da guzre Dios benne'
 Israel ca',
 chee xelúe lá'ane' La Xránadxu Dios.
- 5 Lu xezre na' zaj dxe' benne' ca' dxuluchi'e chee
 benne' Israel ca',
 naga zaj dxe' benne' xrtia David, benne' ca' dxe-
 lenná be'e.
- 6 Le naba lau Dios gata' xel-la' dxebeza zri lazre'
 lu xezre Jerusalén,
 chee xelepe ban da dxelún benne' ca' zaj nazrí'ine'
 xezre na'.
- 7 Dxenábantu' Dios sua xel-la' dxebeza zri lazre'
 lu'ule ze'e da naxechaj na lue', Jerusalén,
 ne chee xelezrá' chawe' benne' zaj xu'e xu'u zren
 chiu'.
- 8 Nazrí'ida' le sa' ljwezra', ne bi ljwezra' ca', na'
 dxennía':
 Gata' xel-la' dxebeza zri lazre' chiu', xezre
 Jerusalén.
- 9 Lawe' da nazrí'ida' xu'u lizre Xránadxu Dios
 dxuna' ba xuzre gaca chawe' chiu'.

123

- 1 Chisa xíchaja' nna'a naga zu', Xran,
 naga zu' Lue', zu' xabáa na'la.
- 2 Ca dxun tu bi wen zrin dxenná'abe' bi nna
 xránabe',
 ne ca dxun nu'ula wen zrin dxenná'abe' bi nna
 nu'ula xránabe',
 caní dxenná'adxu bi nna Xránadxu Dios
 ca zrindxa zra xexache lazre' cheedxu.
- 3 Bexache lazre' cheentu', Xránantu' Dios.
 Bexache lazre' cheentu', lawe' da dxedú lázrentu'

lawe' da dxulucá'ana ditaj bèneache netu'.

⁴ Dxedú lázrentu' lawe' da dxelún lala benne'
gunní'a ca'
cheentu',
ne dxulucá'ana ditaj netu', benne' ca' dxulucá'ana
szren
cuine'.

124

¹ Chela ca gúcale Xránadxu Dios dxi'u.

Caní dxal-la' xelenná benne' Israel ca' na'a.

² Chela ca gúcale Xránadxu Dios dxi'u
gate guledíl-lalę benne' ca' dxi'u,

³ na' buluzría xi'te' dxi'u

lu dute xel-la' dxelezá'a zrente chee',

⁴ ne guca cheedxu ca dxaca chee benne'
dxugacu nísadau' le', da na' gute na le'.

⁵ Chela guca caní cheedxu, na' bétete da na' dxi'u.

⁶ Dخال-la' xedxu Xránadxu Dios; Xcalenu',
lawe' da quebe be'e lataj benne' ca' xuluzría xi'e
dxi'u.

⁷ Beladxu ca dxelá tu bxinne lu xixruj chee benne'
wezén bxinne.

Bzria xi' Xránadxu xel-la' dxenná bea chee benne'
ca', na' beladxu.

⁸ Naca Xránadxu Dios Bénnea' dxácalene' dxi'u,
Bénnea' bénqueze' xabáa, ne xezr la xu.

125

¹ Benne' ca' dxuluxrén lazre' Xránadxu Dios zaj
naque' ca xi'a Sión,
da quebe nu seque' gutá, san tu chí'izqueze zua
chacha na.

² Ca zaj zua xi'a ca' da zaj naxechaj na Jerusalén,

zua Xránadxu Dios, dxuxúequeze' bēneache chee'
na'a zra,
ne chadíá chacanna.

³ Quegá tu chí'izqueze xelenná bea benne' ca' dx-
elune'
da calela lu xēzr la xu chee benne' xrlátaje ca',
chee quebe xelaca benne' xrlátaje ca' tuze nen
benne'
wēn da zrinnaj ca'.

⁴ Xrana' Dios, bēn gaca chawe' chee benne' xrlátaje
ca',
ne chee benne' ca' zaj naque' li lazre'.

⁵ Benne' ca' dxelebéaj xichaj Dios chee xelune' da
calela,
xucuasa Xránadxu Dios benne' ca' tu zren nen
benne' ca'
dxelune' da zrinnaj.

Dxenaba' gata' xel-la' dxebeza zri lazre' chee
benne' Israel ca'.

126

¹ Gate Xránadxu Dios bselé' dxi'u lu na' benne' zitu'
ca',
ne begu'e dxi'u lu xēzre Sión, gúquedxu dxennedxu
xela.

² Nadxa b̄zrízredxu, ne bē lá'anadxu Xránadxu Dios.
Nadxa gulenná benne' xēzr la xu ca':

“Da zrentē ca' bēn Dios, Xrana benne' ca', chee'.”

³ Da zrentē ca' bēn Xránadxu Dios cheedxu dxi'u,
na' zúadxu lu da b̄a neza zrentē.

⁴ Bselá Xránadxu dxi'u lu na' benne' zitu' ca',
na' bezrindxu lu xēzr la xu cheedxu
ca dxezrín nisa guba'u lu xēgu bizre ca'.

⁵ Benne' ca' dxelebezre' tie' dxelaze',
nen xel-la' dxelebé xelexezi'e lina.

⁶ Dxebezre tie' zéaje' nu'e binne cháwe'du ca',
na' dutę xel-la' dxebé dxezrine' zeajnu'e lina chee'.

127

¹ Chela ca zúale Xránadxu Dios benne' ca' dxelune'
tu xu'u

dácheze naca xelune' zrin na'.

Chela ca dxuxúe Xránadxu Dios tu xezre,

dácheze naca dxuluxúe benne' ca' le' na.

² Dácheze naca dxásazele che zílala,

ne dxunle zrin cáteze dxalaj gubizra ca dxebíadxa
na,

ne dutę xel-la' dxudía dxezile da gágule,

lawe' da dxunna Dios da xelagu benne' ca'

nazrí'ine'

dxácatę na' dxelásie'.

³ Le nna' xque, zaj naca zrí'inedxu bi ca' bęna
Xránadxu dxi'u.

Zaj naca be' tu da gunní'a zrente.

⁴ Zrí'inedxu dxelálajbe' cheędxu gate ne nácadxu
cuide'

zaj nácabe' ca xaga nalá xéche'ze ca' da nuxru
benne'

zeje' wedil-la.

⁵ Ba neza zrente naca na cheę bęne' nuxrue'
zánete

xaga nalá xéche'ze caní.

Québequeze xedué'ene' gate zri'a chee'

tu zren nen benne' ca' dxeledíl-lalene' le'.

128

¹ Ba neza zrente naca na cheę benne' ca' dx-
elezrebe' Xránadxu Dios,

benne' ca' tu dxelúnzqueę' ca nadxixruj be'e Dios.

² Gate dxagu' da dxezi'u cheę zrin da nunu'

gaca chiu' tu da ba neza, ne gaca chawe' chiu'.

³ Gaca zru'ulu' ca tu lba uva da dxebía da zixre
cuíta xu'u lizru',
na' zri'inu' ca' xelácabe' ca xaga olivo ca' zaj ze
dxu'a ga dxagu'.

⁴ Caní gun Xránadxu gaca chawe' chee bënnea' dx-
ezrebe' Le'.

⁵ Dxenaba' gun Xránadxu, zu'e' xi'a Sión, gaca
chawe' chiu',
chee le'enu' gaca chawe' chee xezre Jerusalén
xúgute zra naca banu',

⁶ ne chee le'enu' zri'ine zre su'.

Dxenaba' gata' xel-la' dxebeza zri lazre' chee
benne' Israel ca'.

129

¹ Zúadxu lu da stébele'e gate nácatēdxu cuide',
waca xelenná benne' Israel ca'.

² Zúadxu lu da stébele'e gate nácatēdxu cuide'
san quebe buluzria xi'e dxi'u.

³ Belune' we' cúzrudxu gate beline' dxi'u xide,
na' gulaca cúzrudxu ca xezr la xu naga dxedé xia
chee bezre.

⁴ Xlátaje naca Xránadxu Dios.

Bselé' dxi'u lu na' benne' ca' buluchínene' dxi'u
xadázaze.

⁵ Ben cheajlechaze, ne xelebíaqueze
xúgute benne' ca' dxelecuídenē' benne' Sión ca'.

⁶ Ben xelaque' ca xixre'du ca' dxelebía na xrgu'u
da dxelebizre na gate ne zaj nadxé'ene na,

⁷ da na' quebe nu benne' dxexequé'e na,
ne quebe seque' nu benne' gunē' na tu cheaj weaj.

⁸ Quebe xelenná benne' dxeledé'e naga zaj zria na:

Dxenábantu' gun Xránantu' Dios gaca chawe'
cheēle.

Lu La Xránantu' Dios dxenábantu' gaca chawe'
cheēle.

130

¹ Ga ni zua' lu da stébele'e dxuláwizra' Lue', Xrana'
Dios.

² ¡Xran, bene chi'a!

¡Bze naga da dxenaba' lau'!

³ Xrana' Dios, chela nna' xánniu' ca naca dul-la
nabágantu'

¿núzraqueze xegá'ana xrlátaje lau Lue'?

⁴ Lué'quezu' dxunité lau' cheentu'

cheē gápantu' Lue' ba lá'ana.

⁵ Dutē lárzdawa' dxebeza lazra' Xránadxu Dios,
ne dxuxrén lazra' xrtizre'.

⁶ Dxebeza lazredxa' Xránadxu Dios

cáqueze dxelún benne' ca' dxuluxúe' xezre ca',
dxelebeze' chaní',

ne cáqueze dxelún benne' ca' dxelicha bchigala,
dxelebeze' chaní'.

⁷ Benne' Israel ca' dxal-la' xelebeza lazre' Xránadxu
Dios

lawe' da dxexache lazre' Xránadxu bénneache chee',
ne dxexá'awe' benne' ca' lu na' benne' guledábague'

Le'.

⁸ Dios xexá'awe' benne' Israel ca'

lu na' xúgutē dul-la da zaj nabague'.

131

¹ Xrana' Dios, ba bsana' xel-la' dxucá'ana szren
cuina',

ne ba bcuasa' xel-la' dxeque xrlátaje cuina'.

Quebe dxulapa napa' lu da zaj naca szren,

da ca' quebe naca chia' gulapa' na'a.

² Quebe bi gunnía', ne guzúa' zrize ca tu bi dxe'ene
za bexuzrte gúzrebe'.

Naca bénne' du xu'a ca tu bi dxe'ene za bexuzrte
gúzrebe'.

³ Le cueza lazre' Xránadxu Dios, le'e, benne' Israel
na'a zra, ne chadíá chacanna.

132

¹ Bsa lazre', Xrana' Dios, ca guca chee David,
ne ca guzaca zi'e,

² ne ca da guchebe lazre' gune' chiu',
da guchebe lazre' lau', Dios wal-la chee Jacob.

³ Guné': "Québequeze chu'a xu'u lizra',
ne québequeze gáta'a ga dxasia'

⁴ ne québequeze guchúdia' xiaj lawa'
ne québequeze gasia'

⁵ ca zrindxa zra ba bēna' tu xu'u lizre Xrana' Dios
naga súaqueze Dios wal-la chee Jacob."

⁶ Bénedxu zua xí'ina lá'azxa naga xu'u xel-la' wezría
lu xezr la xu Efrata,

na' bezréledxu na lu xezr la xu chee bēne' le' Jaar.

⁷ Gunnantu': Chéajntu' naga zua Dios cheentu'.
Guzú zríbentu' zran ni'a Le'.

⁸ Guxasa, Xránantu' Dios, nen xí'ina naga xu'u
xel-la' wezría chiu',
ne gudá lu xi'a naga súaquezu' Lue'.

⁹ Ben xelún bxruze chiu' ca' da naca xrlátaje,
ne xelebezre xa'a xúgutē bēneache chiu', lu dute
xel-la' dxelebé chee'.

¹⁰ Lawe' da nazrí'inu' David, wēn zrin chiu',

quebe guzú' chalá'ala wenná bea na' ba guca'u
Lue'.

11 Da líqueze bzetaj cuina Xránadxu Dios,
guchebe lazre' chee David quebe gucuase' ca da
gunné'.

Gunné': "Guna' xelenná bea zri'ine zre su' naga
dxenná béaquezu' Lue'.

12 Che zri'inu' ca' tu xelúnzqueze' ca naca xel-la'
wezría chia',
ne ca naca xrtizra' da gusededa' le',
zri'inu' ca' tu xelenná béazqueze' naga dxenná be'u
lue'."

13 Lawe' da gucá'a Xránadxu Dios xezre Sión,
guca lazre' sua xu'u lízrequeze' ga na'.

14 Gunné': "Tu gácazqueze lataj nigá naga súaqueza'
neda'.

Tu súaqueza' nigá lawe' da caní dzezaca ba lazra'
guna'.

15 Guna' gáta'le'e lina chee benne' ca',
ne guna' xelejaj benne' xache' ca' xeta.

16 Guna' xelún bxruze chia' ca' da naca chawe',
na' xelebezre xa'a xúgutē bēneache chia' lu dute
xel-la' dxelebé chee'.

17 Lataj na' guna' xexaca xel-la' dxenná bea chee
David.

Guna' xelezúa na' zri'ine zre sua wenná bea na'
ba gucá'a neda'.

18 Guna' xeleque zrējaje benne' guledábague' Le',
na' guna' chepe ban xel-la' dxenná bea chee David
na'."

133

¹ Le nna' xque, xrtantē naca, ne cháwe'le'e naca

gate zaj nazraga bēnneache cheē Dios, zaj naquē
tuze.

² Naca na ca tu da za da dxuluzúa xíchaje',
da dxedínnetē na dxu'a lawe',
ca na' dxedínnetē na lu luzru Aarón,
ne dxedínnetē na ga zria zre'.

³ Dxedínnetē na ca xrlē'ēla da dxexruj lu xi'a
Hermón,
ne dxexruj na lu xi'a Sión lawe' da gun Xránadxu
Dios
gaca chawe' cheē bēnneache zaj zre'ē na',
ne gunne' benne' ca' xel-la' nabán da zeajlí canna.

134

¹ Le na' xque, le güe lá'ana Xránadxu Dios,
le'e, nácale wēn zrin cheē Xránadxu,
zrale xu'u lizre Xránadxu chizrela.

² Le chisa na'le lau lataj lá'azxa,
ne le güe lá'ana Xránadxu Dios.

³ Dxenaba' lau Xránadxu zuē' Sión gunē' gaca
chawe' chiu',
naquē Bēnnea' bēne' xabáa, ne xezr la xu.

135

¹ ¡Le güe lá'ana La Xránadxu Dios!
¡Le güe lá'ana Le', le'e, wēn zrin cheē Xránadxu,

² le'e zrale xu'u lizre Xránadxu Dios,
lu chale'aj cheē xu'u naga zúaqueze Dios!

³ ¡Le güe lá'ana Xránadxu lawe' da naquē' xrlátaje!
¡Le gul-la da güe lá'anale La Le', lawe' da naquē' zri'i
lazre'!

⁴ Xránadxu Dios ba guqué'ē zri'ine zre sua Jacob.
Guqué'ē zri'ine zre sua Israel cheē xelaquē'
bēnneache chee'.

⁵ Nézquezdxu szrentę naca Xránadxu Dios.
Xránadxu naque' szrendxa ca xúgute dios cheę
benne' zitu' ca'.

⁶ Xúgute da dxaca lazre' Xránadxu gunę',
dxune' na zran xabáa, ne lu xęzr la xu,
ne lu nísadau', ne lu da situj cheę nísadau' ca'.

⁷ Dxune' zá'aca beuj dapa saca cheę xęzr la xu.
Dxune' dxelepe xesa guziu' gate dxaca xiuj.
Dxune' dxaca be' gáteteze.

⁸ Bene' gulate bi biu nedxu cheę benne' Egipto ca'.
Gulate bi biu nedxu cheę bėnneache,
ne béadu ca' cheę bę xixre' cheę' ca'.

⁹ Bene' xel-la' waca ca' da za xabáa, ne da zrentę ca'
da bene' lu xęzr la xu cheę benne' Egipto ca',
da ca' ben Dios da guca cheę Faraón,
ne cheę xúgute wen zrin cheę Faraón na'.

¹⁰ Bzria xi'e bėnneache zánete cue' xęzr la xu ca',
ne betie' benne' wenná bea ca',
benne' zaj nápale'e xel-la' dxelenná bea.

¹¹ Betie' Sehón, wenná bea cheę benne' amorreo
ca',
ne Og, wenná bea cheę benne' Basán ca',
ne xúgute benne' wenná bea cheę benne' Canaán
ca'.

¹² Beque'e xęzr la xu nigá lu na' benne' wenná bea
ca',
na' bnézruje' na lu na' bėnneache cheę', benne'
Israel ca'.

¹³ Xrana' Dios, chadía chacanna zua lau' Lue'.
Tu cheajlesá lázrezqueze bėnneache Lue'.

¹⁴ Xránadxu Dios guchi'e cheę bėnneache cheę',
ne xexache lazre' cheędxu dxi'u, wen zrin cheę'.

- 15 Bedau' xia xaga ca' chee benne' xezr la xu ca'
 zaj naca na oro, ne plata.
 Zaj naca na da belún bēneache.
- 16 Zaj zua dxu'a na san quebe dxeleñé na.
 Zaj zua lau na san quebe dxelelé'e na.
- 17 Zaj zua naga na san quebe dxelén na, ne quebe
 dxelecá'a na be'.
- 18 Benne' ca' dxelunē' na zaj nácaqueze' ca léqueze
 na,
 ne caní zaj naca xúgutē benne' dxuluxrén lazre' na.
- 19 Le'e, benne' xrtía Israel, le güe lá'ana Xránadxu
 Dios.
 Le'e, benne' xrtia Aarón, le güe lá'ana Xránadxu
 Dios.
- 20 Le'e, benne' xrtia Leví, le güe lá'ana Xránadxu
 Dios.
 Le'e, núlale dxezrébele Xránadxu Dios, le güe lá'ana
 Xránadxu Dios.
- 21 Le'e, zrale xezre Sión, le güe lá'ana Xránadxu Dios,
 Bēnea' zúaqueze' xezre Jerusalén.

¡Gaca ba lá'azxa Xránadxu Dios!

136

- 1 ¡Le güe lá'ana Xránadxu Dios, Benne' xrlátaje!
 ¡Chadía chacanna dxexache lazre' dxi'u!
- 2 ¡Le güe lá'ana Dios, naque' sزرéntدخا ca zaj naca
 dios
 chee xezr la xu ca'!
 ¡Chadía chacanna dxexache lazre' dxi'u!
- 3 ¡Le güe lá'ana Xránadxu, naque' sزرéntدخا ca zaj
 naca
 xrana xezr la xu ca'!
 ¡Chadía chacanna dxexache lazre' dxi'u!

- 4 ¡Le güe lá'ana Dios na', dxune' xel-la' waca zri'a ca!
 ¡Chadía chacanna dxexache lazre' dxi'u!
- 5 ¡Le güe lá'ana Dios na', bene' xabáa dute xel-la'
 sina chee'!
 ¡Chadía chacanna dxexache lazre' dxi'u!
- 6 ¡Le güe lá'ana Dios na', bzue' xezr la xu lawe'
 nísadau'!
 ¡Chadía chacanna dxexache lazre' dxi'u!
- 7 ¡Le güe lá'ana Dios na', bene' gubizra ne beu!
 ¡Chadía chacanna dxexache lazre' dxi'u!
- 8 ¡Bene' gubizra chee gusení na te zra!
 ¡Chadía chacanna dxexache lazre' dxi'u!
- 9 ¡Bene' beu' ne belaj ca' chee xulusení na chizrela!
 ¡Chadía chacanna dxexache lazre' dxi'u!
- 10 ¡Le güe lá'ana Dios na', betie' bi biu nedxu chee
 benne' Egipto ca!
 ¡Chadía chacanna dxexache lazre' dxi'u!
- 11 ¡Le güe lá'ana Dios na', bebéaje' benne' Israel ca'
 lu xezr la xu Egipto na'!
 ¡Chadía chacanna dxexache lazre' dxi'u!
- 12 ¡Beche'e le' dute xel-la' waca zren chee'!
 ¡Chadía chacanna dxexache lazre' dxi'u!
- 13 ¡Le güe lá'ana Dios na', bene' chupa la'a nísadau'
 da nazí le na Xrna!
 ¡Chadía chacanna dxexache lazre' dxi'u!
- 14 ¡Bdee' benne' Israel ca' laduj nísadau' na'!
 ¡Chadía chacanna dxexache lazre' dxi'u!
- 15 ¡Bgacue' nísadau' na' Faraón, benne' wenná bea
 chee Egipto,
 ne benne' zeje' wedil-la chee' ca'!
 ¡Chadía chacanna dxexache lazre' dxi'u!
- 16 ¡Le güe lá'ana Dios na', beche'e benne' chee' ca'
 le'e xixre' lawe' lataj!

¡Chadía chacanna dxexache lazre' dxi'u!
 17 ¡Le güe lá'ana Dios na', betie' wenná bea blau ca!
 ¡Chadía chacanna dxexache lazre' dxi'u!
 18 ¡Betie' wenná bea wal-la ca!
 ¡Chadía chacanna dxexache lazre' dxi'u!
 19 ¡Betie' Sehón, wenná bea chee benne' amorreo
 ca!
 ¡Chadía chacanna dxexache lazre' dxi'u!
 20 ¡Betie' Og, wenná bea chee xezr la xu Basán!
 ¡Chadía chacanna dxexache lazre' dxi'u!
 21 ¡Bnézruje' xezr la xu chee benne' ca' chee gaca na
 chee benne' chee' ca!
 ¡Chadía chacanna dxexache lazre' dxi'u!
 22 ¡Benne' na chee benne' Israel ca', benne' wen
 zrin chee' ca!
 ¡Chadía chacanna dxexache lazre' dxi'u!
 23 ¡Naque' Dios na', quebe gul-la lazre' dxi'u
 gate buluzetja benne' ca' dxi'u!
 ¡Chadía chacanna dxexache lazre' dxi'u!
 24 ¡Le' bselé' dxi'u lu na' benne' ca' guledíl-lalene'
 dxi'u!
 ¡Chadía chacanna dxexache lazre' dxi'u!
 25 ¡Naque' Dios na', dxugawe' xúgute da zaj naca
 ban!
 ¡Chadía chacanna dxexache lazre' dxi'u!
 26 ¡Le güe lá'ana Dios chee xabáa!
 ¡Chadía chacanna dxexache lazre' dxi'u!

137

1 Dxu'a xegu chee xezr la xu Babilonia gudxé'edxu,
 ne gudxézredxu gate xeajsá lázredxu chee xezre
 Sión.
 2 Lu zruze xaga labada' dxu'a xegu na'
 buquéladxu da cun zríadi'i na du cheedxu ca'.

³ Benne' ca' guleché'e dxi'u ca benne' zaj nada'u
gulenábene' dxi'u gúl-ladxu.

Benne' ca' buluzría xi' xezre cheedxu gulé'e dxi'u
súadxu lu xel-la' dxebé, gulenné':

Le gul-la cheentu' da ca' bíl-lale lu xezre Sión.

⁴ ¿Ájazra gúl-ladxu da güe lá'anadxu Xránadxu Dios
naga zúantu' lu xezr la xu chee benne' zitu' ca'?

⁵ Chela gal-la lazra' lue', xezre Jerusalén,
gun Dios gunite na'a xabela xel-la' waca chee na.

⁶ Ben xedá' luzra' chíchajla' che quebe cheajsá
lazra' chiu',
ne che quebe gucá'ana szrena' lue', Jerusalén,
nacu' da dxezaca ba lázreleda'.

⁷ Xrana' Dios, bsa lazre' da calela da belún benne'
Edom
lu zra na' guzría xi' xezre Jerusalén,
gate na' gulenné': "Le guchinnaj na. Le guchinnaj
na,
ca zrinte lu lane chee na."

⁸ Le'e, benne' Babilonia, cuía xile.
Ba neza zrente gaca na chee bènea' gune' cheele
ca da benle le'e cheentu' netu'.

⁹ Ba neza zrente gaca na chee bènea' que'e bidu
cheele ca',
ne quine'-be' lu xiaj xre na'.

138

¹ Xrana' Dios, duté lázrdawa' güe lá'ana' Lue'.
Tu dxúl-lazqueza' da dxue lá'ana' Lue' lau dios ca'
chee
benne' zitu' ca'.

² Dxuzú zriba' lau xudau' lá'azxa chiu',
ne dxue lá'ana' Lau' lawe' da nacu' li lazre',
ne dxexache lazru' bèneache chiu',

ne lawe' da blé'enu' nacu' Benne' szrente,
na' szrente naca xrtizru'.

³ Gate bláwizra' Lue', na' gúcalenu' neda'.
Nen dutę xel-la' waca chiu' btipu' lazra'.

⁴ Xúgute benne' wenná bea du gabí'i xęzr la xu
xelúe lá'ane' Lue', Xrana' Dios.

Caní xelune' lawe' da ba belenne' ca naca xrtizru'.

⁵ Xelúl-le' cheę da ba nune' Xránadxu Dios,
lawe' da zrente naca xel-lá' ba cheę Xránadxu.

⁶ Szrente naca Xránadxu Dios, ne dxácalęne'
benne' baxache' ca',
na' quebe dxu'e lataj benne' dxucá'ana szren
cuine'
zrine' lau Le'.

⁷ Lácala zua' lu da ba xa', Lue' dxutipu' lazra'.
Dxedábagu' benne' ca' dxeledábaguę' neda',
ne dutę xel-la' waca chiu' dxuseláu' neda'.

⁸ Gun Xránadxu Dios da guchebe lazre' chia'.
Xrana' Dios, tu dxexache lázrezquezu' bėnneache
chiu'.

Quebe gusanu' dxunu' zrin da guzú lau' dxunu'.

139

¹ Xrana' Dios, ba gunná' xánniu' neda'
ne núnbea xánniu' neda'.

² Nézqueznu' gate dxe'a, ne gate dxasa'.
Zítu'la nézqueznu' da zaj xu'u xichaj lázrdawa'.

³ Ba gunná' xánniu' ca dxuna', ne ca dxexezi' lazra'.
Nézqueznu' xúgute da dxuna'.

⁴ Gate quebe ne guchálaja' ba nézqueznu' Lue',
Xran,

xúgute da nnia'.

⁵ Gátetezla cuita' neda' zúaquezu' Lue', Xran,
ne nuzé na'u neda'.

⁶ Ca szrentę naca da nézenu' Lue' naca na da
dxebáneda'.

Nácale'e na sina da quebe gaca chėjai'ida'.

⁷ ¿Gala cha'a zitu' naga quebe zúaqueze Be' chiu'?

¿Gala guzrúnnuja' naga quebe zúaquezu' Lue'?

⁸ Che cuena' sibe zran xabáa, na' zúaquezu' Lue',
ne che xétaja' lu da situj cheę xęzr la xu, na' zu'
Lue'.

⁹ La séqueda' tea' lu be', ne cha'a zitu' naga dxalaj
gubizra,

u tea' xechalá'a nísadau' naga dxebía gubizra,

¹⁰ cá'anqueze na' súalęnu' neda',

ne guxru na'u xabelá neda'.

¹¹ Chela gaca guna' gacu da chul-la neda',
u guna' xexaca lení' da naxechaj neda', cheę
xaca na da chul-la,

¹² da chul-la na' quebe gaca gucache na neda' lau
Lue',

na' chizrela xaca na ca te zra lau'.

Túzqueze ca zaj naca da chul-la, ne xel-la' naxaní'
lau Lue'.

¹³ Lue' bęnu' da zaj xu'u lu belá' dxen chia'.

Lue' bzajju' neda' lu le'e xrna'a.

¹⁴ Güe lá'anaqueza' Lue' lawe' da szrentę zaj naca da
dxunu',

ne dxebáneda' ca zaj naca na.

Dute lázrdawa' nézquezda' caní naca na.

¹⁵ Blé'equeznu' neda' gate gulá' gubinna zrita xu'a,
gate na' belezraga na lu le'e xrna'a,

gate na' bgula' lu da bagácheze na'.

¹⁶ Ble'enu' belá' dxen chia' gate gulá' gubinna na.

Xúgute da caní ba naxúaj na lu xiche chiu',
 na' ca gude na' gulá' gubinna na,
 na' xúgute na gulaca na cáteze zaj naxúaj na.

17 Dios, szrentę zaj naca da dxuwía lazru' gunu'.

Da zante ca zaj naca na.

18 Chela gaca lazra' gulaba' ca zaj naca na,
 zaj naca na ca xuzre' dxe' dxu'a tu xęgu zren.
 Gate dxexebana', ne zúalequeza' Lue'.

19 Dios, da líqueze gutiu' benne' ca' dxelune' da
 caleła.

Cheę le na', le gucuasa naga zua', le'e, węte benne'.

20 Chiu' Lue', Dios, dxelenné' dizra' schanni'.

Benne' ca' dxeledábage' lue' dxuluzétaje' Lau' lu
 da xálaze.

21 Xrana' Dios, dxecuída' benne' ca' dxuluzúe'
 Lue'

chalá'ala,

ne dxezrá'li'a benne' ca' dxeledábage' Lue'.

22 Dute lázrdawa' dxecuída' benne' ca'.

Dxéqueda' benne' ca' ca benne' ca' dxeledábage'
 nédaqueza'.

23 Gunná' xanne' neda', Dios, ne gunná' da xu'u na
 lázrdawa'.

Bxue neda' cheę nézenu' da xu'u lu xichaj lázrdawa'.

24 Gunná' che zúale tu da caleła neda',

na' bsi neda' lu neza chawe' chiu' da zeajlí canna.

140

1 Xrana' Dios, bselá neda' lu na' benne' ca' dxelune'
 da caleła.

Bxue neda' cheę quebe bi xelún benne' xichaj zra'a
 ca'
 chia' neda'.

2 Benne' caní dxuluwía lazre' da calela ca' da xelune'.

Tu zra tu zra dxulutíl-lalene' bènneache.

3 Da dxelenné' naca na ca lazxa beła' da zaj nalále'e.

Xrtizra' benne' ca' zaj naca na ca nisa snia chee beła'.

4 Xrana' Dios, bxue neda' chee quebe bi xelún benne' ca' dxelune' da calela chia' neda'.

Bselá neda' lu na' benne' xichaj zra'a ca', benne' ca' dxelune' ba xuzre cheajcházia'.

5 Benne' ca' dxulucá'ana szren cuine' zaj nabeque' tu da queł-la na neda'.

Ba zaj nuzale' xralaj dxu'a neza.

Ba zaj nabeque' da ca' xełeł-la na neda'.

6 Gucha' Xrana' Dios: Lue' nacu' Dios chia'.

Xrana' Dios, bene chi'a dxuláwizra' Lue'.

7 Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

8 Xran, quebe gu'u lataj gaca ca da dxelezá lazre' benne' ca' dxelune' da calela.

Quebe gu'u lataj chepe ban da dxuluwía lazre' xelune',

chee quebe xulucá'ana szren cuine'.

9 Zaj naxečaj benne' ca' dxelune' da calela neda'.

Ben gaca chee benne' ca' ca de' da dxelaca lazre' gaca

chee benne' xula.

10 Ben xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítujle'e naga cabátadxa xelixedxúaje'.

11 Quebe gu'u lataj xegá'ana lu xezr la xu bénnea'
dxenné'
da caleļa.

Ben gaca da caleļa chee benne' xichaj zra'a, da
guzría xi na le'.

12 Nezda' xechebe Xránadxu Dios waláz chee
benne' baxache',

ne guzé chache' da zaj xu'u lu na' benne' xache' ca'.

13 Da líqueze benne' xrlátaje ca' xelúe lá'ane' Lau'
Lue',

na' benne' li lazre' ca' xelezúe' naga zu' Lue'.

141

1 Xrana' Dios, dxuláwizra' Lue'.

Gudázega gácalenu' neda'.

Bene chí'a gate nnia' Lue'.

2 Ben la' da dxenaba' lau Lue' ca zren xala.

Ble'e na'a da dxechisa' lau' ca tu béadau' dxútia'-ba'
lau'.

3 Xrana' Dios, bxue dxu'a nigá,

ne bxue xide dxu'a chee quebe nnia' tu da caleļa.

4 Quebe gu'u lataj gaca lazra' guna' tu da caleļa,

ne chee quebe guna' tu da caleļa tu zren nen
benne' ca'

dxelune' da zrinnaj,

ne chee quebe gágulena' benne' ca' dxelune' da
caleļa

lu laní chee'.

5 Che gudé benne' xrlátaje neda' lu da ba xa', gaca
na chia'

tu da chawe',

na' che til-le' neda', gaca na chia' ca tu da dxelále'e
zixre

da dxegu'e xíchaja'.

Tu nábazqueza' Dios guzague' da calela da dxelún
 benne' ca'
 dxelunē' da calela.

⁶ Gate xeledxú'une' benne' xíchajē ca' cheē benne'
 wēn da calela ca' zran xi'a xiaj ca',
 na' xeleque be'e bēneache naca li ca da gunnía'.

⁷ Xelase dinnaj zrita cheē benne' ca' dxu'a xēdxu
 ba cheē' ca'.

Xelaca na ca bchecu xu, da dxelase dinnaj na naga
 dxa'ana bēzre.

⁸ Cheē lē na' dxenná'a naga zu' Lue', Xrana' Dios.
 Dxuxrén lazra' Lue', quebe gusán lazru' neda'.

⁹ Bxue neda' cheē quebe xelēl-la xralaj ca' cheē
 benne' ca'
 dxelunē' da calela neda',
 ne cheē quebe cheajcházia' lu da zaj nabeque'
 benne'
 wēn da calela ca'.

¹⁰ Bēn cheajlechaze benne' ca' dxelunē' da calela
 lu xralaj
 da zaj nabéchequeze'
 dxácatē na' tea' neda' ga na' zri'a chawe'.

142

¹ Zizraj dxuláwizra' Xránadxu Dios.

Du lazra' dxenaba' Xránadxu xexache lazrē' neda'.

² Lau Lē' dxawa' zría ca da dxaca chia'.

Lau Lē' dxulé'eda' ca da stēbe zua' neda'.

³ Gate zua lázrdawa' lu da stēbe, Lue', Xran, nézenu'
 da dxaca chia'.

La neza naga dxedá' gulebeque' xralaj da quēl-la
 na neda'.

⁴Dxenná'a cuita' xabela, san quebe nu chilá' gácale neda'.

Quebe nu chilá', benne' guxúequeze' neda'.

Quebe nu chilá', benne' dxe' gunna xue' chia' neda'.

⁵Dxuláwizra' Lue', Xrana' Dios, dxennia':

Dxebeza lazra' tuzu' Lue'.

Tuzu' Lue' dxezá lazra' lu xezr la xu nigá.

⁶Bene da dxuláwizra' Lue', lawe' da dxezaca zí'le'a.

Bselá neda' lu na' benne' ca' dxeláu zi' xuzre' neda', lawe' da zaj naque' wál-ladxa ca neda'.

⁷Bebéaj neda' lu da dxaca chia', chee gaca güe lá'ana' Lue'.

Benne' xrlátaje ca' xeléchaje' neda' lawe' da gunu' gaca chawe' chia'.

143

¹Xrana' Dios, bene da dxuchálaja' lau Lue'.

Bze naga da dxenaba' lau'.

Gudá gácalenu' neda' lawe' da nacu' li lazre', ne xrlátaje.

²Quebe guchi'u chia' neda', wen zrin chiu', ca naca da nabaga',

lawe' da lau' Lue' quebe nu chilá' benne' naque' du lazre'.

³Gúcale neda' lawe' da dxeláu zi' xuzre' neda'.

Xeláteze bache xelútié' neda'.

Ba beluné' naca' ca tu benne' dxedé' lu da chul-la ca naca chee benne' gate ca'.

⁴Zua lázrdawa' lu da stébele'e, ne dxewí'ine lázrele'a.

⁵Dxeajsá lazra' ca guca nédxudaute.

Dxulaba lazra' ca naca xúgute da benu'.

Dxeajsá lazra' ca naca da zrenté ca' da benu'.

- 6 Dxechisa na'a lau Lue'.
Naca' ca tu xezr la xu bizre, dxebíleda' Lué'queze.
- 7 Gudázega gácalenu' neda', Xran, lawe' da dxedú
lazra'.
Quebe chenu' gácalenu' neda', chee quebe gaca' ca
tu benne'
ba xu'e xedxu ba.
- 8 Che zílala ben cheajsá lazra' dxexache lazru'
bénneache
chiu' ca'
lawe' da dxuxrén lázrequeza' Lue'.
Bzéajni'i neda' ca dxal-la' guna'
lawe' da dxezá lazra' guna' da dxaca lazru' Lue'.
- 9 Xrana' Dios, bselá neda' lu na' benne' ca' dx-
eledábague'
neda'
lawe' da dxuzúa cuina' lu na'u chee guxúequezu'
neda'.
- 10 Bsedé neda' chee guna' da dxaca lazru' Lue',
lawe' da nacu' Lue' Dios chia'.
Gusel-la Be' xrlátaje chiu' chee che'e neda' la neza
chawe' chiu'.
- 11 Chee gaca bea na nacu' xrlátaje, Xran, gutipu'
lazra'.
Lawe' da nacu' xrlátaje, guseláu' neda' lu da dxaca
chia'.
- 12 Lawe' da nacu' li lazre', guzría xi'u benne' ca'
dxeledábague' neda',
ne guzría xi'u xúgute benne' ca' dxelaca lazre'
xuluzría xi'e neda',
lawe' da naca' neda' wen zrin chiu'.

144

- 1 ¡Gaca ba lá'azxa Xránadxu Dios,
Bénnea' dxuzé chache' neda'!

Naque' Bénnea' dxuzázraje' na'a chee cha'a lu
wedil-la,
ne dxuzázraje' zrube na'a chee séqueda' tíl-lalena'
benne' ca'
dxelune' da calela.

² Naque' Benne' dxexache lazre' neda',
ne naque' ca tu xu'u naga ze chawa'.

Dxuzúa chache' neda', ne dxuselé' neda'.

Dxucu'uje' neda', na' dxuxrén lazra' Le'.

Dxune' dxuluzúa bénneache chia' dizra' chia'.

³ Xrana' Dios, ¿ájazra naca nu benne', dxeajsá
lazru' le'?

¿Ájazra naca nu benne' dxe'u gunne xue chee'?

⁴ Naca benne' ca tu da níteze.

Zaj naca zra chee' ca tu zrul-la da dxedeze.

⁵ Xrana' Dios, gusalaj zran xabáa, ne betaj
gácalenu' neda'.

Bta xi'a ca', na' dxuaj zren chee xi'.

⁶ Bzalaj xesa guziu', ne blaga benne' ca' dxelune'
da calela.

Bzalaj xaga nalá xéche'ze chiu', ne bzria xi' le'.

⁷ Naga zu' na'la, bze na'u, ne bselá neda' lu da
stébele'e zua'.

Bselá neda' lu na' benne' zitu' ca',

⁸ benne' ca' tu dxelennézqueze' da wen lazre',
ne dxuluzétaje' Dios gate dxelezí xe'e.

⁹ Dios, gúl-laqueza' chiu' da cube, quínnia' da dxúl-
lalena'.

Nen tu da dxínnia' da nua chi du chee na gúl-
laqueza' chiu'.

¹⁰ Nacu' Lue' Bénnea' dxune' dxeledxúaj chawe'
benne' wenna' bea ca'.

Dxuseláu' David, wen zrin chiu', lu xia nalá chee

benne' wen da calela ca'.

11 Bexa'u neda', ne bselá neda' lu na' benne' zitu' ca',

benne' ca' tu dxelennézqueze' da wen lazre',
na' dxuluzétaje' Dios gate dxelezí xe'e.

12 Ben xelegula bi biu cheentu' ca tu xaga da dxeg-
ula chawe',
ne zaj nácabe' bi cuide'.

Ben xelaca bi nu'ula cheentu' ca bdu'a xiaj xrtante
ca'
da zaj nnita tu lu xu'u zren.

13 Ben chate lízrentu' xúgute cuen lina cheentu'.

Ben xelánle'e be xixre' cheentu', chee xelácaba'
gaxúa gaxúane be xixre' du ca' lu xezr la xu cheentu'.

14 Ben xelaca bezre cheentu' be wal-la chee
xelunba' zrin.

Ben quebe xelezanba' gate quebe ne zrin cha beu'
cheeba' ca'.

Ben quebe nu cha' cuezre xache' la neza cheentu'.

15 Ba neza zrente naca na chee bénneache ca' dxaca
caní chee'.

Ba neza zrente naca na chee bénneache ca'
naca Xránadxu Dios chee'.

145

1 ¡Gucá'ana szrena' Lue', Dios chia', ne Wenná Bea
chia'!

¡Tu güe lá'anazqueza' Lau' Lue' chadía chacanna!

2 ¡Tu zra tu zra güe lá'ana' Lue'!

¡Tu güe lá'anazqueza' Lau' Lue' chadía chacanna!

3 ¡Szrente naca Xránadxu Dios, ne naca chee'
tu güe lá'anazquezdxu Le'!

¡Québequeze séquedxu gúnbeadxu ca szrente naque'!

4 Xúgute cuen bēneache chiu' xelúe lá'ane' da bēnu'
 Lue',
 ne xuluzenne' benne' xezr la xu ca' ca naca da
 zrente da bēnu'.

5 Gulaba lazra' ca naca da xrtante chee da xabáa
 chee
 xel-la' szren chiu', ne ca naca da zrente da
 nunu'.

6 Xúgute bēneache xuluchálaje' ca naca xel-la'
 waca chee
 da zrente da nunu',
 na' neda' guzenda' le' ca naca xel-la' szren chiu'.

7 Xuluzenne' le sa' ljwezre' ca naca xel-la' zri'i
 lazre' zren
 chiu',
 ne tu xelúl-lazqueze' chee da xrlátaje da nacu' Lue'.

8 Xránadxu Dios naque' zri'i lazre', ne dxexache
 lazre'
 bēneache chee'.
 Dxezrene', ne quebe dxezrá'aze', na' dxexache
 lázrele'e dxi'u.

9 Dxun Xránadxu Dios da chawe' chee xúgute
 bēneache,
 ne dxexache lazre' xúgute da zaj naca ban da
 nune'.

10 Xúgute da ca' nunu' xelúe lá'ana na Lue', Xran,
 na' bēneache chiu' xulucá'ana szrene' Lue'.

11 Dxelenné' ca szrente naca xel-la' dxenná bea
 chiu'.

Dxuluchálaje' ca naca xel-la' waca zrente chiu',

12 chee xuluzenne' xúgute bēneache ca naca da
 zrente ca'
 da nunu',

ne ca naca da xabáa chee xel-la' szren chee xel-la'
 dxenná bea
 chiu'.

13 Xel-la' dxenná bea chiu' tu súazqueze na,
 ne nna be'enu' xúgute cuen bénneache.

14 Nuxru Xránadxu Dios xúgute benne' ca' dxeajlecházie',
 ne dxechise' xúgute benne' ca' zaj nada'u lu zrin
 wal-la.

15 Xúgute bénneache dxelenné'e Lue' chee gácalenu'
 le',

na' Lue' gunézruju' da xelawe' ca zrin zra chee na.

16 Dxuzé na'u, ne dxunézruju' ca naca da chawe'
 da dxelexázrje xúgute da zaj naca ban.

17 Xlátaje naca Xránadxu Dios lu xúgute da dxune',
 ne dxexache lazre' xúgute da zaj naca ban da nun
 Le'.

18 Xránadxu Dios zúatequeze' gácalene' xúgute
 benne' ca'
 dxululáwizre' Le',

xúgute benne' ca' du lazre' dxululáwizre' Le'.

19 Gune' ca dxelezá lazre' benne' ca' dxelezrebe'
 Le'.

Cá'anqueze xenne' chee' gate xululáwizre' Le', ne
 guselé'
 benne' ca'.

20 Xránadxu Dios dxuxúequeze' xúgute benne' ca'
 zaj nazrí'ine' Le',

san guzríá xi'e xúgute benne' ca' dxelebéaj xíchaje'
 Le'.

21 Du lazra' güe lá'ana' Xránadxu Dios.

Xúgute benne' dxal-la' tu xelúe lá'anazqueze' Le'
 lá'azxa
 chadía chacanna.

146

- ¹ ¡Gaca ba lá'azxa Xránadxu Dios!
 ¡Du lazra' güe lá'ana' Xránadxu Dios!
- ² ¡Dxácate naca bana' güe lá'ana' Xránadxu Dios!
 ¡Tu gúl-lazqueza' da güe lá'ana' Xránadxu Dios
 dxácate
 naca bana'!
- ³ Quebe guxrén lázrele benne' dxelenná bea,
 ne quegá bēnneache lawe' da quebe xelezéquene'
 xuluselé' le'e.
- ⁴ Dxeledxúaj be' zaj xu'e, na' xelexexaque' xu xrte.
 Lu zra ná'queze xelenite da dxuluwía lazre'
 xelune'.
- ⁵ Ba neza zrente naca na chee bēnnea', dxácale Dios
 chee
 Jacob le',
 bēnnea' dxebeza lazre' Xránadxu Dios.
- ⁶ Dios na' bene' xabáa, ne xezr la xu, ne nísadau',
 ne xúgute da zaj zra' lataj ca'.
 Naque' Bēnnea' tu dxúnzqueze' da li lazre'.
- ⁷ Dxuchi'e chee benne' baxache' ca',
 ne dxugawe' benne' ca' dxeledune'.
 Xránadxu Dios dxuselé' benne' ca' zaj nada'u lu na'
 benne' ca'.
- ⁸ Xránadxu Dios dxexune' xiaj lau benne' la chul-la
 ca'.
 Xránadxu Dios dxechise' benne' ca' dxeajlecházie'.
 Xránadxu Dios nazrí'ine' benne' xrlátaje ca'.
- ⁹ Xránadxu Dios dxuxúe' benne' zitu' ca'.
 Nuxre' bidau' wezebe ca', ne nu'ula tuze ca',

na' dxuchínnajē' da dxelún benne' ca' dxelunē' da calela.

¹⁰ Tu nna béazqueze Xránadxu Dios.

Le'e, benne' xēzre Sión, nna be'e Dios cheeḷe
ne xúgute cuen zri'ine zre súale.

¡Gaca ba lá'azxa Xránadxu Dios!

147

¹ ¡Le güe lá'ana Xránadxu Dios lawe' da naca chawe' gúl-ladxu da güe lá'anadxu Dios cheeḷdxu, lawe' da xrtantē naca güe lá'anadxu Le'!

² Xránadxu Dios xexunē' xēzre Jerusalén.

Xequé'e benne' Israel ca' zaj zuē' xēzr la xu zitu' ca'.

³ Dxexunē' benne' ca' dxelexewí'ine lázreḷe'e, ne dxudé'e ladxe' naga zaj naca wē' chee benne' ca'.

⁴ ¡Nézquezne' ca zaj naxán belaj ca'!

¡Tu tu belaj ca' dxu'e la na!

⁵ ¡Szrentē naca Xránadxu Dios, ne nape' dute xel-la' waca!

¡Quebe bi dē da quebe dxéajni'ine'!

⁶ Xránadxu Dios dxácalenē' benne' dxexruj lazre' ca',

na' dxuzéxruje' benne' ca' dxelunē' da calela.

⁷ ¡Le gul-la da güe lá'anale Xránadxu Dios!

¡Le gul-la, ne le quinne da cun zríadi'i na du lau Dios cheeḷdxu!

⁸ ¡Le' dxudé'e beuj ca' zran xabáa!

¡Le' dxeḷ-le' nisa xiuj lu xēzr la xu!

¡Le' dxunē' dxelezríá xíxre'du ca' lu xi'a ca'!

⁹ ¡Le' dxunézruje' da dxelagu be xixre' ca'!

¡Dxunéꝛruje' da dxelagu béchajdu ca', be dxelebezre
xa'aba'!

10 Da dxezaca ba lázreleṅe' quebe naca na xel-la'
wal-la
chee bzrina' ca',
ne quegá xel-la' wal-la chee bēneache.

11 Dxezaca ba lázreleṅe' benne' ca' dxelezrebe' Le',
ne benne' ca' dxelebeza lazre' Le' chee xexache
lazre' le'.

12 ¡Le güe lá'ana Xránadxu Dios, le'e zrale xezre
Jerusalén!

¡Le güe lá'ana Dios cheeḷe, le'e zrale xezre Sión!

13 ¡Le' dxuzúa chúchue' dxa xu'u chee xezre cheeḷe!
¡Dxune' dxaca chawe' chee benne' ca' zaj zre'e
xezre cheeḷe!

14 ¡Dxebeque' xel-la' dxebeza zri lazre' lu xezr la xu
cheeḷe!

¡Gúnnale'e cheeḷe zrua' chawe'!

15 ¡Dxusel-le' xrtizre' chee benne' ca' zaj zre'e dute
xezr la xu,

na' chadí dxaca ca da dxenné'!

16 ¡Dxugacue' xezr la xu bezxe' da naca na ca zrila'!

¡Dxuzéꝛruje' xrlé'ela dxela ca de!

17 ¡Dxune' dxelexruj xiaj bezxe' ca weaj xíajdu ca'!

¿Nu benne' gaca guchaga lawe' da zaga chee na?

18 ¡Dxenná be'e, na' dxexuna na!

¡Dxune' dxaca be', na' dxexaca bezxe' na' nisa
guba'u!

19 ¡Bzéajni'ine' Jacob ca naca xrtizre', ne bdee' xrba
chee',

ne da ca' gunná be'e lu na' benne' Israel ca'!

20 Quebe ne gune' caní chee xezr la xu xezícadxa
ca',
na' benne' xezr la xu ca' quebe dxelexúnbe'e xrba
chee'.

¡Gaca ba lá'azxa Xránadxu Dios!

148

- 1 ¡Le güe lá'ana Xránadxu Dios!
¡Le güe lá'ana Xránadxu, le'e, zrale xabáa!
¡Le güe lá'ana Le', le'e, zrale dxala!
- 2 ¡Le güe lá'ana Le', le'e, gubáz chee xabáa chee' ca'!
¡Le güe lá'ana Le', le'e, benne' zante chee'!
- 3 ¡Le güe lá'ana Le', le'e, gubizra, ne beu'!
¡Le güe lá'ana Le', le'e, belaj dxusenile!
- 4 ¡Le güe lá'ana Le', le'e, xabáa ca',
ne le'e, nisa zrale lówela xabáa!
- 5 ¡Le güe lá'ana La Xránadxu,
lawe' da gunná bé'ene', na' guzúale!
- 6 ¡Bene' súaletu chi'ize, ne chadía chacanna!
¡Bzue' cheeletu da bdxixruj be'e da quebe te chee
na!
- 7 ¡Le güe lá'ana Xránadxu lu xezr la xu,
le'e, bea zri'a zrale lu nísadau', ne xúgute nisa situj,
- 8 ne le'e, xesa guziu', ne xiaj xiuj, ne bezxe', ne beuj
ca',
ne le'e, be' bdunu' ca', dxunle ca gunná be'e!
- 9 ¡Le güe lá'ana Le', le'e, xí'adu ca', ne xi'a zri'a ca',
ne le'e, xaga zixre ca', ne xaga cedro ca',
- 10 ne le'e, be' xixre' ca', ne bea ca' dxuluxúe
bénneache,
ne le'e, be' snia ca', ne be' zaj zua xrila!
- 11 ¡Le güe lá'ana Le', le'e, benne' wenná bea ca', ne
xúgute

bénneache,
ne le'e, benne' dxelenná be'e, ne benne' dxu-
luchi'e,

¹² ne le'e, benne' wegu' ca', ne nú'uladu ca',
ne le'e, benne' gula ca', ne bidu ca'!

¹³ ¡Le güe lá'ana La Xránadxu!
¡Szréntedxa naca La Le' ca xúgute la bénneache!
¡Da xabáa chee' dxulé'e lau na lu xezr la xu, ne
xabáa!

¹⁴ ¡Le' nune' xezr chee' xezre wal-la!
¡Le güe lá'ana Le', le'e, bénneache chee',
nácale zri'ine zre sua Israel!
¡Nácale benne' nazrí'i Le'!

¡Le güe lá'ana Xránadxu!

149

¹ ¡Le güe lá'ana Xránadxu Dios!
¡Le gul-la chee Xránadxu tu da cube!
¡Le güe lá'ana Le' naga zaj nazraga bénneache chee'!
² ¡Le be, le'e, benne' Israel, lau Bénnea' bene' le'e!
¡Le sua xel-la' dxebe, le'e, zrale Sion, lau Bénnea'
naque'

Wenná Bea chee!

³ ¡Le güe lá'ana La Xránadxu, ne guxa'ale!
¡Le guchunchu xide ca', ne le quinne
da cun zríadi'i na du ca', dxue lá'anale Le'!
⁴ ¡Xránadxu Dios dxezaca ba lázrele' bénneache
chee'!
¡Dxape' ba lá'ana benne' dxexruj lazre' ca', ne
dxuselé' le'!
⁵ Dخال-la' xelebéqueze bénneache chee' lu da xabáa
chee',
ne xelúl-le' duté xel-la' dxelebé du xela.

6 D⁶xal-la' xelebezre xē'e, xelúe lá'ane' Dios,
 zaj nu'e xia da zaj nalá dxupa la'ate,
 7 chee xelexebéaj lazre' benne' xezr la xu ca',
 ne xuludée' xel-la' zi' benne' xezre ca',
 8 ne xuluchéaje' benne' wenná bea chee' ca' du xia,
 ne benne' dxeleenná be'e nen du xia,
 9 ne xuluzría xi'e benne' ca' ca ba nun Dios gaca
 chee'.
 Da nigá gaca na da xabáa chee bénneache chee
 Dios.

¡Le güe lá'ana Xránadxu!

150

1 ¡Le güe lá'ana Xránadxu Dios!
 ¡Le güe lá'ana Xránadxu lu xudau' chee'!
 ¡Le güe lá'ana xel-la' waca chee' lu xabáa chee'!
 2 ¡Le güe lá'ana Le' ca zaj naca da zren da nune'!
 ¡Le güe lá'ana Le' ca naca xel-la' szren chee'!
 3 ¡Le güe lá'ana Le', gucuézrele luzu ca' da dxulu-
 cuezre'!
 ¡Le güe lá'ana Le', quínnele da cun zríadi'i na du,
 ne da ca' dxínnele!
 4 ¡Le güe lá'ana Le', guchúnehule xide, ne guxa'ale!
 ¡Le güe lá'ana Le', quínnele da cun zríadi'i na du,
 ne gucuézrele bchiuj!
 5 ¡Le güe lá'ana Le', gutíl-lale xíadu ca'!
 ¡Le güe lá'ana Le', gutíl-lale xia zren ca'!
 6 ¡Le güe lá'ana Xránadxu, xúgutele naca banle!
 ¡Le güe lá'ana Xránadxu Dios!

cli

Xela wezria cube nen salmo ca'
New Testament and Psalms in Zapotec, Tabaa
(MX:zat:Zapotec, Tabaa)

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

ccli

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

80626b72-93df-58ae-9f5e-9d86733fab46